

國學基
本叢書
明

書

八

套

國學基本叢書

書

明

(八)

傅維麟纂



商務印書館發行

國家圖書館典藏

由國家圖書館數位化



626
756
V.8
明書卷九十八

列傳一

勳臣傳五

方瑛、楊洪、郭登、毛勝傳

方瑛、全椒人。大父銘，開國功爲百戶。父政，以從燕爭戰爲都指揮。正統三年，進右都督，總騎兵征木麓川，戰沒。贈威遠伯。諡忠毅。四年，瑛以父功爲金吾衛指揮使，憤發報父仇，乞領父兵，從定西伯，效死。先登破賊寨，進都指揮使。七年，從靖遠伯戰賊功，陞都督僉事。充參將，守雲南。已而從侯侍郎征貴州功，陞右都督，充總兵，移守貴州。景泰元年，征香鑪山賊功，轉召總五軍營，論先後平賊功多，封南和伯，食祿千石。與世券。明年，征銅鼓賊，平之，留鎮湖廣、貴州。天順元年，進流侯，加祿三百石。四年，卒。諡忠襄。子毅嗣。伯卒，子壽祥嗣。卒。嘉靖中，以嘗論大禮，得贈太子太保。子東嗣。卒。子炳嗣。無子。弟□嗣。

楊洪，六合人。祖政，立功。世漢中百戶。洪嗣。官調開平，機變敏捷，善用計，出奇兵，揭虛，或夜劫營，累功。陞都指揮。正統元年，內臣韓政、阮鸞疏洪短。上詰二內官曰：「此必小人左右汝。」卽械至京。姑貸汝二人者，時洪頗爲衆忌。上又每舉洪功，勵諸將。洪益自奮。洪守邊屯營，善用鐵蒺藜，尋以都督守獨石，敗虜宣府。大石

門、寶昌州、捕虜阿台、打刺花，斬首功二百餘。正統十三年，論前後功，封昌平伯，食祿千石，充總兵，鎮宣府。虜畏之，呼楊王。十四年，虜入土朮，上皇北狩，洪閉城門，逮繫詔獄。是年十月，虜犯京師，出洪獄中，自效。洪與孫鏜、范廣等率兵二萬，擊虜涿州、紫荆等處，遂至固安，大捷，捕虜阿歸等四十八人，斬首功四百八十餘。遂還俘掠人萬計，馬牛羊弓刀數萬，虜去。進侯。景泰二年，賜世券，還鎮宣府。卒，贈穎國公，諡武襄。洪紀律嚴明，將士用命，敬慎自將，不敢專殺。宣德、正統、景泰稱名將，諸大臣皆重之。每左右洪，初指揮杜衡、誣洪，尚書魏源即訊雪洪，貶衡廣西。部卒李友全誣奏洪，上付洪自治。洪以故感激戮力也。先之難，奮不顧身，轉戰千里。一時諸將，洪功爲最。時石亨爲大將京營，忌洪，洪又與孫鏜不相能，時忿爭。洪子傑嗣侯。言臣家一侯三都督，諸蒼頭得官旗者十六人，乞停蒼頭職役，許之。未幾，卒，傑庶兄俊嗣侯。俊先以擒叛者喜寧功陞都督，上言也。先往時，酋長尙在，東西諸番未附。今旣弑脫脫不花，并其衆，東自女直，兀良哈，野人，西至蒙古，赤斤，哈密，皆受約束，包藏禍心，待時而動。又聞其妻孥輻重在哈刺莽，來去宣府，纒數百里，健人壯馬屯沙窩，去邊尤近。今大同、宣府、懷來、遼東、山海、永平、寧夏、延綏、甘涼、莊浪等處，宿兵不下數十萬，臣愚以爲險阻之處，量留守禦，其餘壯勇，各選老成謀略將官統率，迤西悉赴代州，迤東悉赴永平，結營操練，更選京營騎兵，申令股肱大臣統率，至大同、宣府會合。所在兵列營堅守，爲正兵。其永平營赴獨石，代州營兵赴偏頭關一帶，按伏爲奇兵。部署旣定，或拘絕虜使，以激其怒，或檄數叛逆，以正其罪。彼必來侵，我正兵堅壁清野，坐觀其變。密遣奇兵，日夜倍道，搗其巢穴，使彼前不敢進，後不敢顧，必擒其妻孥。

獲其輜重。彼或察知我謀。急還相救。我乘其奔潰。奇兵夾擊。立致摧敗。此實戰攻取勝之機。抑臣又聞三軍之害。猶豫最甚。昔在有宋澶淵之役。若從寇準之議。必無靖康之悔。今若間以羣疑。失今不治。臣恐他日之患。又有甚於今日者。願陛下重念天下者祖宗之天下也。人民者祖宗之人民也。縱欲息兵保民。暫安一時。寧不思祖宗創業守成之艱乎。文武諸臣。何面目忍恥偷生。縱此虜驕悍。臣一家父子兄弟。受恩實深。馬革裹屍。固其分也。事下總督總兵及營中諸將校議。于謙上言。賊虜也。先違天背德。彼之罪惡已盈。我之讎恥宜雪。楊俊此疏。發憤殉國。但與兵舉事。係社稷安危。卽如俊所言。萬一我軍出境。賊與牽制。分別犬羊。由間道乘虛。四散剽掠。是自撤守備。計非萬全。國家之患。非止北虜。東南寇盜未除。河南流民又聚。豈可輕內重外。更不思預防。夷狄之性。利於疾速。不能持久。去來如風雨。聚散如蜂蟻。得利則鴟張。失勢則鼠遁。乃其常態。若欲糾兵涉遠。出徵倖之謀。掠凶險之虜。將卒不相知。號令不相統。臣愚未見其可。疏上。從謙議。先是遣俊及劉深充遊擊將軍。出宣府。經略獨石諸城堡。參贊參政葉盛言。俊往守獨石。所謂敗軍之將。乞遣深罷俊。遂令俊護瓦剌使人出塞。俊又挾私怨。杖永寧守備都指揮姚貴。且縛貴斬曰。我常殺陶指揮。上不問。諸裨校力解。得釋之。還廷。臣劾俊論死。會傑卒。母請釋俊葬。傑得降都督僉事。遂得嗣侯。後坐法罪死。宥革爵。子珍嗣。天順元年。石亨坐俊及驍勇都指揮范信等附于謙。斬西市。調珍戍廣西。秦議。天順八年。赦珍。授龍虎衛指揮使。係越。乞調開平。洪從子四人。能。武強伯。信。彰武伯。仁。錦衣指揮僉事。智。開平指揮使。

郭登字元登武定侯英諸係也年七歲讀書過目輒成誦十歲能文詞永樂二十二年充勳衛正統七年從王驥征木麓川有功九年從沐斌征騰衝有功歷陞署都指揮僉事十四年七月虜入塞急進都督僉事副劉安守大同會上親征成國公朱勇西寧侯宋瑛武進伯朱冕全軍覆沒倉卒議班師登告學士曹鼐張益駕入宜從紫荊關乃忽東折向居庸纒四十里虜至上北狩當是時大同堡塢蕭條城門盡閉人心危疑登慷慨自奮修城繕兵拊循士卒弔死問傷裹創傅藥衆皆感戢是年八月虜奉上皇至城下索金幣納賂至歸駕登閉門不納上皇曰朕與登有姻何外朕若此登遣人奏曰臣奉朝命守城不敢擅啓閉竟不出劉安孫祥霍瑄出見獻上皇金帛瑄尤效力及內賄往虜笑不應竟擁駕去十月虜以和爲名犯京師登欲率所部兵并糾集忠義從鴈門入援先以蠟書馳奏大略謂胡馬南驅三關失險賊留連內地爲患非輕欲悉起各處官軍民壯入護闕庭使賊腹背受敵首尾不揀奏至賊已退優詔褒答再上疏言虜人雖回離邊不遠傳報有云黃河已凍且向延綏青草復生再侵京闕事雖未信情亦可疑又奏上以開誠待下側席求賢擴天理充人欲以成聖學之功親君子遠小人以收天下之望十二月虜復欲犯京師登以京兵新選不可輕戰又疏以爲今日之計可以養銳不可浪戰可以用智不可鬪勇此謂知己知彼可守則守其涑水易州真定保定一帶皆堅壁清野京兵分據犄角安營以逸待勞以主待客勿求僥倖務在萬全此謂不戰而屈人兵善之者善也歷陞右都督景泰元年正月賊入境率兵躡之行七十里至水頭日暮休兵夜二鼓東西沙窩賊營自朔州掠回登召將士問計或言我寡莫若全軍而返登曰

我軍去城百里。一退避。人馬疲倦。賊以鐵騎來追。難自全矣。卽按劍起曰。敢言退者斬。徑薄賊營。天漸明。賊以數百騎迎戰。登奮勇先登。諸軍繼進。呼聲震山谷。登射中二人。手刃一人。虜氣奪。退去。遂大破其衆。追奔四十餘里。至栲栳山。斬首虜二百餘。奪還人馬器械萬計。是年論功。封定襄伯。食祿千一百石。與世券。登以八百騎破虜數千人。以爲一時戰功無與比者。明年閏正月。登獲謀二人。械至京。皆也先所親信。鞠之云。喜寧與也先謀。遣人至京。覘兵衆寡。大明皇帝立未定期。今年五月名送上皇奪京城。誘也先入寇。皆喜寧及小田兒也。先戰大同。把入平章死。戰北京。卯那孩平章及其弟孛羅死。人馬約九萬。戰死。疫死不下萬餘。老營住九龍口。其精銳在斷頭山。又言虜甚畏大砲。神銳短鎗。時鎮守陳太監忌登。會姚都指揮使發陳太監姦賊二十事。陳疑登。巡撫沈固又言鎮守不和。乞更調。景帝召陳太監還。諭登留鎮。登憤邊事未戢。弊政猶存。思得公廉有爲者。相與共事。上疏曰。往者承平日久。人心驕逸。在官旣無廉恥之心。洩政惟肆貪婪之志。釀成汚濁之風。致有夷狄之禍。又曰。虜勢雖云請和。變態豈能預度。倘或淪盟。則大同一鎮。首先受敵。及今無事之時。若不早爲措置。一旦賊至。又似前日。手無所措。中國受侮已深。邊事豈容再壞。虜旣退。欲大興屯田。苦民力困乏。牛種俱無。疏乞官爲措置。四年秋。病。召還京。登初至大同。士可戰者不及數百。馬百餘匹。不數年。馬至萬五千匹。精兵數萬人。登智勇兼備。紀律嚴明。料敵制勝。動合機宜。一年百戰。未嘗挫衄。以己意設爲攪地龍。飛天網。鑿深塹。覆土木。人馬通行。如履實地。賊入圍中。令人發其機。自相擊撞。頃刻十餘里皆陷。當是時。巡撫年富知登與孫鏜不睦。乞分登軍。登亦會病。稱疾不

出富爲聞於朝。上詰責鐘。天順元年。奪爵爲都督僉事南京。是秋。謫戍甘肅。憲宗卽位。復爵。出鎮甘肅。未幾。召還。充團營總兵。八年卒。贈侯。諡忠武。登事母至孝。居喪秉禮。武而能文。謀而善斷。無子。以兄尙寶丞斌之子嵩請於朝爲後。得嗣伯。減祿五百石。十四年卒。子參乞嗣。不許。授世指揮使。

毛勝。初名福壽。元大都人。伯父那海爲元官。歸附爲燕山中護衛。閑牧官。燕兵起。從戰有功。歷陞都指揮同知。建文四年卒。無子。福壽父安太。那海母弟也。嗣羽林衛指揮使。永樂七年卒。福壽兄濟嗣官。卒。無子。福壽嗣。以兄濟九龍口殺胡鎮功。進都指揮使。正統六年。征木麓川功。陞都指揮僉事。充右參將。復征木麓川有功。進同知。十四年。以禦宣府功。陞左都督。是年冬。守宣武門。又哨虜紫荊關。景泰元年。充左副總兵。率河間。東昌。達兵。征湖廣洞苗。章同烈。戶部主事陳汝言。福壽本虜人。奸黠不可信。敕王驥候。福壽至善御之。無使驚疑。已而有功。三年。封南寧伯。食祿千石。五年。進屯金川。斬賊功。與世券。改名勝。移金齒。彈壓諸蠻。天順二年卒。贈侯。諡忠壯。子榮嗣。伯。八年。坐法調廣西立功。卒。子文嗣。卒。子良嗣。卒。子重器嗣。卒。無子。弟邦器嗣。無子。弟國器嗣。

史官曰。人之稱說。豈足信哉。是四人者。往往故老。皆能道楊。郭而忽方。毛。其以方。毛之立功在炎方。而楊。郭之立功在近畿。耶。方。毛。發奮摧陷。不可懸知。楊。郭特守禦。能耳。掩襲零級。遽膺爵券。不亦忝哉。草野猶惑傳聞。則在廷左右之毀譽。又何當焉。

孫鏗。施聚。曹義。陳友。焦禮。楊信。衛穎。趙輔傳。

孫鏜、東勝州人。永樂二十年嗣父指揮同知。從出塞征胡功。再進都指揮僉事。正統十四年充左參將。捕處州賊功。陞都督僉事。戰也先都城。先登有功。景泰元年。薦都指揮李奇。楊洪劾其徇私。下御史獄。武清侯石亨。刑部右侍郎江淵薦鏜勇敢得釋。已而爲大同副總兵。與郭登不協。時忿爭。乞罷兵柄。不許。四年。請盡統兵出塞襲虜。敕止之。後天順初。以奪門功封懷寧伯。與世券五年。充陝西總兵。與兵部尙書馬昂出禦虜。期七月二日出師。先一日夜初。指揮馬亮走告鏜。曹欽反。謀先殺鏜及昂。奪其軍。攻皇城。鏜披衣起。急草奏。呼長安左門閤人曰。與爾奏疾。造上前告急變。稽遲軍法。且斬。又走右門。亦如之。內廷始得集兵縛吉祥。鏜徵服至太平侯張瑾家議討賊。賊已呼噪四出。劫殺文武大臣。上出密帖隙中。令百戶楊能至瑾家伺鏜云。何能報鏜督殺此賊。上喜。手敕鏜父子爲朕用心滅賊。賊攻長安右門。不得入。走攻左門。又不得入。欽兄弟率胡兵直趨東安門。發火力攻。上又敕鏜。賊犯闕急。鏜等努力殺賊。俄又敕鏜。昂盡統各營兵殺賊。鏜子輔與軌追賊至東市。大戰。軌奮力入陣。砍欽兩臂傷。賊并力圍軌。攢鎗殺軌。鏜急調神砲與諸營兵夾攻。欽傷遁歸家。投井中。并其黨盡擒。伏誅。進封侯。食祿千三百石。與世券成化初。盡革奪門封者。鏜亦在革中。上曰。鏜有勞於國。老且無恙。可食祿。奉朝請。七年卒。贈涑國公。諡武敏。子輔乞嗣。上曰。鏜伯以奪門功封。然滅曹賊功大。輔可嗣侯。卒。子瑛嗣侯。卒。無子。弟瑄嗣。卒。子秉元嗣。卒。子世忠嗣。卒。子維藩嗣。

施聚、北通州人。父忠。開國功。授千戶。從燕兵戰功。累進金吾右衛指揮使。從出塞征胡。戰沒。聚嗣官。積職。

功正統九年以都指揮征兀良哈功最進都督僉事充參將守遼東進總兵右都督英宗北狩聚慟哭即日引兵西裨將爭進牛酒聚曰主上安在忍受此耶數日抵京師天順元年以禦胡功封懷柔伯食祿千一百石明年以守邊久與世券聚智勇樸直與士卒同甘苦在遼東訓練有方增繕障塞興修儒教虜人畏服卒贈侯諡威靖子榮嗣伯卒子鑑嗣坐法謫貴州立功赦復伯不得任軍政卒子瓚嗣卒無子弟瓚嗣卒子齋嗣卒子嵩嗣卒子光祖嗣

曹義儀真人父先以開國功臣燕山衛指揮義嗣官永樂中出塞至牛壁山有功宣德中征梅花洞賊平之累陞都督僉事充遼東總兵破虜開原進左都督天順元年封豐潤伯食祿千二百石與世券卒贈侯諡莊武子麟先卒麟庶子振嗣伯坐法革衣冠習禮國子監逾年復爵又坐法奪祿一年卒子愷嗣伯卒嘉靖中子棟乞嗣吏科取棟義非開國靖難功不得嗣上特准棟嗣伯卒庶子松乞嗣吏部言義以邊將立功封伯傳三世子奪請上裁松得嗣伯卒子文炳嗣伯

陳友全椒人永樂初起騎卒從征胡有功歷陞千戶正統初通使順寧王脫歡降附進都指揮僉事十九年充遊擊將軍捕虜寧夏功陞都督僉事十四年龍門口捕虜功進同知充左參將南征香鑪山功陞右都督守湖廣天順元年捕苗賊五開銅鼓功召還封武平伯食祿千石與世券二年出鎮番斬虜功多充總兵捕虜延綏塞功加流侯增祿百石四年卒贈沔國公諡武僖子能嗣伯卒子綱嗣卒子勳嗣卒無子弟熹嗣卒子大策嗣

焦禮、山後人。父焦八思台。洪武中來降。授薊州衛指揮僉事。禮以舍人從軍。有開國功。太祖喜禮。與禮官禮辭。宣德初。嗣父官。累立功。遼東陞左都督。充總兵官。守遼東。景泰元年。破虜小團山。斬獲數千。天順初。封東寧伯。食祿千二百石。與世券。禮守遼東二十餘年。年八十二。卒。贈侯。諡襄毅。適孫壽嗣伯。卒。無子。壽弟俊嗣。卒。子洪嗣。卒。子一鳳。優給。卒。無子。洪弟洵嗣。卒。無子。再從姪棟嗣。棟者。洵從兄澄之子。禮長孫也。卒。子文耀嗣。

楊信。幼武悍。正統初。從伯父洪征興州。虜轉戰西涼亭。白塔兒。斬獲有功。累陞指揮僉事。十四年。進都指揮僉事。守紫溝堡。從洪戰虜紫荊。倒馬。五郎河。有功。景泰二年。出宣府。歷陞都督僉事。充參將。再守懷來。會洪病。移信協守宣府。五年。充副總兵。天順元年。召還京。陞同知。移鎮延綏。總兵佩將軍印。自信始。明年。虜孛來。毛里孩入塞。奮兵擊走之。又明年。虜入寧夏塞。信合武平伯陳友兵於安營夾擊。虜遁去。四年。封張武伯。食祿千石。與世券。五年。移鎮大同。成二化年。毛里孩入河套。出沒塞上。召信至京。問方略。信言。兵難遙度。乞精騎疾走。至榆林圖上。上從信言。命爲平虜將軍。總諸鎮兵。至延綏。厲兵秣馬。待虜。烽火嚴。虜奸不入。覘我。輒突入塞。信縱兵邀擊。上龍州。鐵青原。虜錯愕。盡棄所掠人畜。遁。渡河去。明年。還鎮大同。六年。虜又入延綏。塞信西援。信曰。虜覘我大同。兵渡河。必乘虛東掠。設備封胡柴溝。虜果至。伏發。奮擊。斬獲功多。八年。又敗虜伯顏哈蒼於塞下。自是虜不敢輒入塞。與世伯券。十三年。卒。贈侯。諡武毅。子瑾嗣。伯。卒。子賈。優給。尋嗣。卒。子儒嗣。卒。子炳嗣。

衛穎華亭人。世官濟南衛指揮。正統九年。陞署都指揮僉事。京營練兵。十四年。禦虜功實。進指揮同知。是年冬。出守黃花鎮。戰西直門紫荊關。功。陞都督同知。景泰三年。總兵守宣府。天順元年。陞左都督。以奪門功。封宣城伯。食祿千一百石。與世券。移鎮甘肅。五年。破虜於鎮番。斬獲有功。八年。捕番賊。斬獲功多。召還。成化元年。盡革奪門功。穎亦在革中。兵部言。穎有軍功。得不革。增祿四百石。四年。被劾奪祿。七年。乞宥。與祿。秦朝請。弘治十一年。卒。贈侯。諡壯勇。子璋嗣。伯。卒。子鏞嗣。嘉靖中。爲京營總兵。卒。子守正嗣。卒。子國本嗣。卒。子時春嗣。

趙輔。鳳陽人。曾祖瑞。開國功。累官都指揮使。世指揮使。父本。從征漢庶人。陞都指揮。卒。輔嗣。官。正統十四年。大臣薦陞都指揮使。練兵禦虜有功。充統兵參將。出居庸。守懷來。禦虜有功。天順八年。陞都督同知。成化元年。充總兵。征兩廣蠻。俘斬二萬餘。二年。封武靖伯。食祿千二百石。三年。征建州。斬俘千人。四年。進流侯。十六年。輔辭流侯。乞世伯。與世伯券。減祿二百石。二十二年。卒。贈容國公。諡恭肅。子承慶嗣。伯。卒。子弘澤嗣。卒。子世爵嗣。卒。子光遠嗣。

史官曰。英宗復辟。德左右臣下。施予大過。而迎駕奪門。垂貂綴蟬者。累累。及後。上有貪賄之輔弼。旁多蠱蝕之侍嬖。此皆巧費其欲。以陰中人主之喜怒。而邊將希寵榮。輦金錢溢都市。接刃無幾。輒飾奇捷。爛羊充斥。牧豎縱恣。皆得分茅土。紆朱紱。又何必楛矢東輪。葦瑣南舶。氈裘稱萬歲。玉環表絕微也。興言及此。不能恕辭於孫鏜以下諸人矣。而是數家者。子孫長世。與寶錄同沈朽。目視之。實深感慨焉。

朱永傳

朱永字景昌河南夏邑人。其先日明以戍卒隸北平。生真。燕兵起。積功至中都留守。司指揮僉事。永父謙調邊戍。與虜接角。鬪戰者三十餘年。自守備至參將副總兵。遂爲鎮朔將軍。總兵於宣府。其官自都指揮至左都督。再以戰功封奉天翊衛推誠宣力武臣。特進榮祿大夫。柱國撫寧伯。歲祿千石。子世券。是時定襄伯郭登帥大同。而謙帥宣府。功名略相埒。然謙勇略文采皆不及登。而獲老牖下。以功名終。贈撫寧侯。諡武襄。永偉軀貌。舉止顧盼有威容。虜之挾上皇而過宣府也。謙出謁陣院下。有所獻金帛器物酒炙之類。使永進之。上皇數目屬焉。景泰中。永得嗣謙爵。奉朝請。英宗復辟。觀永而識之。曰。是子侯也。乃見朕於宣府水門者耶。永頓首謝不敢。卽日召待左右。有所詢問。輒率意以對。不爲浮飾。往往稱旨。上雖貴重閣吉祥。大將亨。而內疑厭之。往往以心腹寄永。永亦慎重不洩。分領大營禁兵。凡車駕游幸。必挾永從。所賜蟒繡玉帶。廐馬寶刀。玉筓上尊。金帛鎧甲弓矢。不可勝計。英宗崩。以屬皇太子。曰。諸侯伯中。獨永習兵。可任大事。俾率兵治裕陵。天順六年。總神機營。兼領三千營兵馬。掌右軍都督府事。詔修景泰時制。改神機營曰十二團營。益以諸道操卒。永復總之。而領三千營如故。時定襄伯登久鎮甘肅。永上疏請召之歸。與共事。或曰。定襄宿將也。然子亦久在事。能爲之下乎。永曰。吾知治天子軍需材耳。吾安知下。於是物情漸歸永。以爲有古范燮父子風。成化二年丙戌。荆湘大盜劉千斤。石和尚等作亂。永以靖虜將軍總兩京。湖廣。江西。四川諸路兵討之。尙書白圭監其軍。至則永病寒不任戰。而石和尚已降。尙書圭破其衆。永病已。

始縱兵搜巢穴，斬獲九百有餘，俘千斤等。又敗之於古路山，捕執千斤子聰等百餘曹，籍其符印資仗萬計。餘寇以不時發，分兵勦之，獲級至萬餘，遂進封撫寧侯，增祿歲百二十石。三年，北虜亂，加思蘭寇掠大同，永復以平虜將軍大出兵拒之，虜退走，進號如父讜，而加佐理字，并階勳，追封及三代。五年，虜阿羅寇延綏，永以平虜將軍與左都御史王越擊之，擒斬首虜數十，擄馬牛羊甲械以萬計，降敕卽軍中予世侯，留鎮三邊。它虜復屯柳榆莊諸處，出沒爲患，永復與戰，敗之，克獲多，賜金幣良厚。永疏欲盡論諸將士功，於是兵部言：永等二年之間，所獲賊十一人，斬首二百五十七，而我軍之戰沒者六百六十四，其勝負雅不相當，願以功遷者一千六百三十人，賞者一萬六千七百人矣。而今又欲益遷三千一百二十人，於格太濫，詔乃弗予。十二年，入侍經筵，再錄塞上功，加太子太保，官一子錦衣衛百戶。歲益祿六十石。時永與王越厚相結，而出入權閹汪直門。十六年，遼東巡撫陳鉞報建州結三衛入寇爲邊患，請討之。王越知虜弱易勝也，計必永出討，而直監其軍，已得參帥焉，而直新入巡撫，鉞賂重謀之，永改越命以授鉞，遂大發兵，敵大驚，壯者遁走，乃破其營，焚廬舍二千餘區，斬獲以千計。然皆老弱，馬牛羊十三，是時直等得便宜生殺陞賞，遂左藏爲竭。明年，永進封保國公，直鉞皆大有遷賞，鉞以是大恨，永與汪直，然不敢與直異，而更媚之。會虜犯延綏，永遂爲平虜大將軍，與越直合兵出塞，越偵知虜營在威寧海子，乃復與直謀，使永大兵從中道發，而身從汪直將輕騎，皆選人各二馬，從它徑掩威寧虜，破之，盡俘其衆，而永道迂遠，所費軍食巨萬，馬死者以千計，及抵延綏，虜已悉遁去，一亡所獲。於是越以文臣得封伯，直磨錫踰等，而永

無功自此始大愧悔。事直愈謹。而與越合。不敢持異矣。尋積前功。賜階。特進光祿大夫。右柱國。加太子太傅。歲益祿三百石。予鐵券。復以大將軍出征虜。亦思馬於大同海東山等處。破之。擒虜數斬首百二十。獲駝馬牛羊二千餘。甲仗幾七千。賜世公爵。再與誥券。復爲鎮朔大將軍。總大同。宣府兵。北禦虜。還加太子太師。永前後八佩大將軍印。入統六軍。盡獲徹侯將。最名。用法嚴。持重有威望。而制敵設奇。要不能如王越。時汪直以少年懷銳。喜功名。恃上寵。開邊釁。然所至多不負敗。大要直恃永。永恃王越耳。而兵部尙書陳鉞。旣以建州之役。中直心。直亦怙之。永時有所役。兵治私第。有閹優阿丑。在上前裝爲楚歌者。曰。吾張子房。能一歌而散楚兵六千人。曰。吾聞之。楚兵八千人。何以六千。曰。其二千在保國公府作役耳。上爲之發笑。永懼罷役。出其兵。會直與司禮諸大閹交惡。而其所援。東廠太監尙銘。背之。發其姦私。并發與王越交通狀。俱貶竄。而是時。適各與永小閹見顏色。永亦自有內主。弗與敗。及憲宗崩。弘治初。復被命典治茂陵。工完。進太師。改領後軍都督府。其督諸營兵如故。自是邊徼稀警。師不復出矣。永與其婦弟英國公張懋。俱爲太師。懋領經筵。監修國史。所典司多文事。而永總六師。於勳臣肺腑無二。朝有大禮。歲時迭爲班首。時人榮之。弘治丙辰。以久疾卒。年六十八。追封宣平王。初諡武襄。以同父謙諡。辭。改武毅。子暉。當嗣公。而當事者難之。曰。永功固不當公也。而暉頗有奧援。詔特子襲。一輩暉長身美髯。器宇凝重。寡言笑。以其類父永也。而才之。又多從出塞。外受方略。其拜爵則已垂五十矣。凡三歲。而領神機營兵。又二載。兼領三千營。掌右軍都督府事。虜犯延綏。平江伯陳銳出禦之。坐撓微抵罪。暉遂爲征虜大將軍。與太監苗達。右

都御史琳討之。大將軍最重不易當。而暉繼永而佩。盡護諸將。人以爲榮。兵出塞搆虜。會大雪。虜前已驚走不相格。而是時苗達以倖故。要暉上疏以捷聞。優詔獎勵班師。遣中官齎羊酒迎勞於路。上特御奉天門見之。且下兵部第封賞。給事御史言所得虜首級故敕三道。馬四百二十。牛六十。羊八十。器械二千五百而已。而報功乃一萬有餘。暉等相率爲誣罔。請罪之。上難苗達弗聽。然自是賞亦薄。又二歲。進領十二圍營兵馬。其三千營務如故。監治孝肅太皇太后山陵。別建齋廟。明年復出拒虜於宣府。大同復有斬獲。班師。中官迎勞如初。加太保。侍經筵。武宗卽位。充皇后納徵正使。後先賜蟒衣玉帶繡春刀。及他器物甚厚。以疾請解營府。久之。卒。年六十四。贈太傅。子麟不得嗣。公仍爲撫寧侯。數領軍府。以征蠻將軍出鎮兩廣。與總督右都御史姚鏌破平田州。僂叛酋岑猛。加太子太保。增歲祿。猛之黨衆叛。以不時宣敕歸。奉朝請。久之。復起掌軍府。卒。子岳嗣。亦掌軍府。以平蠻將軍鎮河廣。召還。卒。無子。從弟岡嗣。

史官曰。朱永爲將能持重。其馭軍又嚴整有法。然未嘗有揭社橫草之績。而遭世承平。爲國虎臣者。垂四十年。位元台。爵上公。所共事者。敗而謫。誅不及。歿而贈。王子孫徹侯。世世勿絕。是遵何德哉。嗟乎。開國之視從燕也。其巨細尙不可同年而語。以視朱永。何霄壤也。士大夫往往駭守仁。成梁。而忽永。弗見久遠。良可唾矣。

毛忠、劉聚、仇鉞傳

毛忠、涼州人。曾祖哈喇歹。洪武初歸附。從軍戰沒。祖拜都。征哈密。又戰沒。父寶。永樂中。從出塞功。授百戶。

老忠嗣官立功甘涼。歷陞都督。成化三年。征番。忠先登。手斬番賊。轉戰俘獲功多。論功封伏羌伯。食祿千石。總兵鎮甘肅。固原土達滿四反。猖獗。敕忠討之。力戰先登。後援不能繼。中流矢沒。子海孫鎧皆沒於陣。贈忠侯。諡武勇。與世伯券。子銓先卒。孫銳嗣伯。有祖風。弘治十三年。鎮兩廣。累加至太子太傅。正德三年。逆瑾索銳金錢。不能應。落太子太傅。奪祿。十五年。勒罷。瑾誅。銳自陳。得還祿。復宮傅。嘉靖三年。卒。贈太傅。諡威襄。子江嗣。無子。弟漢嗣。無子。從子桓嗣。卒。子登嗣。

劉聚。清豐人。聚叔永誠。以司禮監太監出鎮甘肅。聚驍勇有智略。隨永誠塞上冒功。歷陞都督同和。天順五年。捕曹賊功。陞右都督。成化六年。充總兵。出延綏塞。遇虜。身被七創。濺血力戰。大破虜。七烈忽。斬首百級。獲俘二千餘人。七年。封寧晉伯。食祿千石。八年。爲征虜將軍。總陝西諸兵。捕虜榆林塞。斬首四百五十。獲馬畜千輿。世券。是年。捕虜鎮靖堡。未幾。虜大入塞。聚設伏破虜。斬首百五十。奪獲人畜數萬。十年。卒。贈侯。諡威武。子祿嗣伯。卒。無子。弟福嗣。福爲京營總兵。加太子太保。弘治十三年。上召輔臣平臺議。諸將去留。福與成山伯王鏞皆勒罷。卒。子岳嗣。卒。無子。從子文嗣。卒。子良瓊優給。尋嗣。無子。叔斌嗣。卒。子應元嗣。仇鉞。鎮原人。以開國功。世指揮同知。後立功。陞指揮使。充遊擊將軍。鎮寧夏。驍勇敢戰。正德五年。寘鐸反。陷賊中。京師訛言鉞從賊。興武營守備保勳者。又與賊聯姻爲外應。大學士李東陽曰。鉞必不從賊。動以賊故。姻遂疑勳不用。諸與賊通者。皆懼不復歸。正用上用勳爲參將。鉞爲副總兵。討賊。命下。纔數日。勳疏上。言臣母及妻子俱在賊中。臣義不顧家。恨不飛渡黃河。食賊肉。謝朝廷。鉞亦稱病臥。陰約遊兵壯士侯。

保勳、楊英諸兵至河上。從中發爲內應。俄蒼頭書童沒河潛入見鉞。言諸兵營河干。鉞噉人謂賊何。錦宜急出守渡口。防決河灌城。過東岸兵勿使渡河。錦果出。留賊周昂守城。鉞又稱病亟。昂來問。鉞猶堅臥呻吟。言旦夕且死。蒼頭卒起。椎殺昂。斬首。鉞乃起。披甲仗劍跨馬出門。一呼。諸遊兵壯士皆至。遂奪城門。擒寘縉。尋以總兵鎮寧夏。論功封咸寧伯。食祿千石。與世券。仍總兵。七年。充平賊將軍。征流賊功。進侯。與世券。加祿百石。十六年。子恩病。恩子鸞嗣侯。鸞怙恩通虜。磔死。另有傳在。佞幸。爵除。

史官曰。憲宗朝。運際清輝。琛玉五服。風教遠播。帝室恬熙。中原無種。霽之蹄。潢池乏赤子之弄。誠明運之正中者矣。而毛忠等以罽劣之材。駕汗血之號。策勳天府。曳玉螭頭。撫摩癬疥。謬稱和緩之神。拜翦苗枝。飾作斧斤之利。視乎竭心膂之力。以啓疆效股肱之任。以翼衛。不啻徑庭也。非孽鸞自速厥禍。亦將與毛劉同世矣。嗟哉。

明書卷九十九

列傳一

勳臣傳六

金忠、吳允誠、吳成、和勇、金順、蔣信傳

金忠，本名也。先土干元太保。不花孫。虜中呼爲王子。永樂二十一年冬，上出塞駐王莊堡。也先土干率妻子種落千人來歸。上喜，立封忠勇王，賜姓名金忠，詔諭天下，與鐵券金印玉帶，綺衣金幣，鞍馬牢廩，居第器用，歲祿千石，并官其部酋。時侍從仁宗卽位，加太子太保，支二俸。諭蹇義曰：「朕嗣位，文武大臣進官，忠得無冀恩澤，亦以慰其心爾。」義對曰：「胡人降附者衆，皆視朝廷待忠何如。聖慮及此，柔遠之道也。宣德三年，扈巡邊，出喜峯口，至會州，請深入捕虜，自效。或言忠非我族類，去必不反。」上曰：「朕推心待人，何疑於忠。同此覆載，任渠去留，竟與兵數千遣去。數日，俘斬首虜及畜產以歸。」上大喜曰：「忠，朕之金日磾也。」拊其背，飲之酒。明年，進太保。忠勇悍好謀，恭慎不伐。感三朝恩遇，矢心竭力，至死不懈，無子，除。

吳允誠，粗獷人。在彼爲酋長，號平章。把都帖木兒永樂三年，都督宋晟招諭，父子率衆來降。因賜姓名，爲都督府僉事。出塞爲鄉導，至卜哈思，擒哈刺乞台等，進同知。八年，扈從敗阿魯台，進都督。九年，又出塞逐

虜至闕脫赤斬首虜中律封恭順伯食祿一千二百石先是允誠父子從太宗出塞留家涼州其部將虎保脅允誠餘衆劫其妻及其少子管者叛去妻召部將都指揮保住卜顏不花等出兵盡擒殺諸叛者上遣行人敕勞允誠妻賜縑米羊紗陞管者指揮僉事允誠卒贈邠國公諡忠壯子伯客十六年嗣伯賜名克忠二十二年扈駕出塞有功洪熙元年以戚里恩又有功進侯與世券加祿二百石宣德中爲副總兵巡邊正統九年統兵出喜峯寨征兀良哈有功加太子太保十四年沒於土木贈邠國公諡壯勇弟克勤累官都督亦戰沒贈遵化伯諡儉敏管者亦累功封廣義伯克忠子瑾嗣伯曹欽反劫瑾瑾不從死贈涼國公諡忠壯與世侯子鑑優給與半祿天順六年嗣侯卒子世興嗣卒子繼爵嗣卒子惟英嗣

吳成本名買驢遼陽人胡種也父通伯天遼陽行省右丞洪武中隨觀童來降買驢充總旗出塞征胡功陞永平衛百戶燕兵起從攻眞定大寧鄭村塢功陞指揮僉事廣昌白溝館陶功再陞指揮使夾河葦城西水寨功陞都指揮僉事戰灑河小河齊眉山靈壁先登渡淮克揚州入金川門再陞都指揮使永樂八年從上出塞征胡功陞都督僉事已而三出塞斬獲多洪熙元年陞左都督是年大松嶺破虜封清平伯食祿千一百石與世券宣德初從擒漢庶人三年出喜峯寨敗虜寬河斬獲進封侯祿如故八年卒贈渠國公諡壯勇子忠先卒又明年孫英嗣伯卒子璽嗣卒無子弟琮嗣卒子傑優給尋嗣卒子家彥優給尋嗣卒子國乾嗣

和勇祖阿魯台降太祖封和寧王父阿卜只奄授左都督勇以父故爲錦衣衛指揮使正統十四年紫荊

關斬首虜功。歷陞都督僉事。天順元年。進同知。五年。充遊擊將軍。征廣蠻有功。成化元年。又征廣蠻。累功。歷陞左都督。加祿歲百石。已而潯州獲叛酋。斬首功多。封靖安伯。食祿千一百石。十年。卒。諡武敏。子忠。自歷戰功爲錦衣指揮僉事。乞嗣伯。不許。得爲錦衣指揮使。

金順。瓦剌人。原名阿魯哥。失里。永樂七年。來降。授大寧都指揮僉事。八年。從北征。至威胡鎮。追敗本雅失里。靜虜鎮。又敗阿魯台。進同知。洪熙元年。進都督僉事。宣德三年。又從巡北邊。有擒虜功。明年。上以順遠歸效勞。勳事皇祖。封順義伯。食祿歲八百石。卒。子忠。纔五歲。優給長與指揮僉事。

蔣信。故降胡也。初名把台。從舅氏忠勇王來降。歷戰塞北。勇敢。所至摧陷有功。陞都督。與全俸。正統中。又立功邊塞。封忠勇伯。食祿千石。土木敗。爲也先所擒。也先令信隸其弟賽罕王部下。景泰初。信舊部曲達官伯顏答里。從皮兒馬黑麻來請和。告于謙曰。把台欲南歸久矣。不得間。每南望揮涕。感國恩。漸死無地。謙因奏言。信從虜肆惡。皇上曲全其家。信或未知。況因諜用間。取勝之術。宜令伯顏答里等。密令信家人。無恙。令其設策。破虜入寇之計。或擒殺也。先來歸。即授王爵事。露以疑虜心。即成。亦足彌亂。上從謙言。後信從上。皇至大同。大同諸將吏不肯出。喜寧嗾虜殺袁彬。得信告上。皇獲免。信竟從上。皇歸。時已停信祿。至是。補給。卒。贈侯。諡億順。

史官曰。粵昔委莎來附。育鞠羣歸。霧帳雲連。溢充郊甸。誠與王之上烈。羈縻之要術。然桀驚虔劉。埃霾趨扇。固其常也。而留其懷情質樸。蹈信不移。無嚙門之奸雄。有日磬之忠篤。則也先土干諸人。俱有可取者。

鉤之數以往。既至而也。先所使館伴者來。與飲帳中。而詫善曰。土木之役爲何。六師抑何弱也。善曰。當是時。六師之勁悉南征。而中貴人振欲邀太上皇帝幸故里。一不爲戰備。故輕以卒予敵。而今者南征之士悉歸。可二十萬。而又募中外材官技擊。得三十萬。悉教以神鎗砲火。弩射命中。百步之外。洞人馬腹。透七札。又用言者計。沿邊要害。皆隱金椎三尺。所值蹄立穿。刺客林立。夜度營幕。若猿猴。而皆已矣。置之無用矣。問何以言無用。曰。和議方成。且懼喜若兄弟。而又何用也。因以所攜賂之。其人悉以語也。先次日。善入謁。乃大略也。先及其酋婦左右也。先喜。坐定。善乃前責之曰。太上皇帝朝。太師所使使必三千人。歲必再。卽裨子亡弗賚者。金帛器服絡繹載道。而太師乃背盟好。而見攻。何也。也先曰。然則柰何。削我馬價。又予我帛。時有翦裂幅不足者。我是以攻汝。善曰。非敢削馬價也。太師之馬。歲益增。價亦不繼。而不忍拒。是以微損之。太師自度價所得比前孰多也。先曰。者。其稱者。胡語是也。善復曰。帛有一二翦裂幅不足者。諸通事爲之也。事露而誅矣。卽太師所使進馬有劣弱而貂皮敝。豈太師意耶。也先又曰。者。善因復進曰。太師之攻我兩矣。所磔殺列剝以數十萬計。而太師之部曲。寧無有血吾刃者。上天好生。太師獨好殺。夫是以數有雷警。今者能奉太上皇帝歸我。和好不絕。器幣溢於穹廬。而黎庶彼此俱逸。不亦快乎。也先益喜曰。者。者。因謂善曰。歸而太上皇帝有重寶來購乎。善曰。太師得重寶。而歸我太上皇帝。天下後世謂太師貪重寶也。歸我太上皇帝而不索重寶。天下後世以太師貴信義而賤貪黷。令名奕奕。何況我之德。太師無已。而重寶以漸繼也。也先大悅曰。者。者。遂以善見上皇。善再拜進醪。問萬壽。侍立不敢坐。也先數目上。

皇上皇謂善曰。太師與汝坐則坐。善頓首辭曰。君臣之禮。雖草野寧敢廢哉。也先嚙指顧其下曰。咄。咄。汝曹中國禮乃若此。遂以輕騎奉上皇與善歸。而景帝以非初遣旨。薄其賞。僅遷左都御史。仍領寺事。而大司馬謙心許之。其從行子弟有得官者。易東宮。加太子太保。時上皇在南宮。元旦朝正出。復且修投謁。善復泫然曰。太上皇帝不受賀。何我曹乃相賀也。識者益稱之。善始事闡振。後更事闡吉祥等。與石亨比。會景帝病。善伺知亨吉祥有迎上皇謀。遂與之合。而發南宮錮。太上皇帝復即位。論善功。封奉天翊衛推誠宣力武臣。特進光祿大夫柱國興濟伯。尋加號守正。改文臣。歲祿千二百石。予誥券。世世承襲。改領左軍都督府。尋加禮部尙書。兼領部事。有四子。一爲勳。一爲指。一爲揮。一爲僉。一爲千戶。一爲鎮。一爲撫。而從子及養子官錦衣者復四人。旬日之間。恩賜赫奕。所陳請無不允。幾與石亨張軏埒。又嘗陰薦李賢入內閣。而定襄伯郭登故有幾微於上。亟疏善使虜功。請傳之三。公獲以身免。於是亨吉祥忌之。稍稍間於上。漸疏。繼明年善卒。年七十五。贈興濟侯。諡忠敏。子宗自勳。衛襲四歲。例奪爵爲金吾衛指揮使。孫增。尙公主。授駙馬都尉。善雖負才。辯以巧取功名。而儉。伎多岸谷。其爲序班。坐事下獄。庶吉士章朴亦坐事下獄。與相狎。言家有方孝孺集。時方窮治孝孺黨。善從借觀。而密奏之。遂誅朴。而復善官。最後于謙。王文之死。陳循等之竄。善皆與有力焉。善死。或云見謙。文爲祟。而李實者。時以右都御史撫湖廣。中旨奪職爲民。其時英宗北狩。著功勞者。有袁彬。沙狐狸。吳官童。袁彬。江西新昌人。少以材力射生。選從刺奸緹騎。從英宗於土木。沒虜。麾下牧馬。久之。乃使侍上皇。上皇方坐裘駝帳中。咄咄無所出。得彬甚喜。彬溫美多計數。善言笑。時時

爲隱語悅上皇。獲一羊脾烹而共啖之。晝斧薪伐冰。則以背承上皇足。夜而寢。虜挾上皇。攻雲中。轉戰上谷。遂躡關而下趨京師。小不遂。輒欲僇殺彬。上皇至爲泣請之不得。而哈銘者。故夷種官。爲賜姓楊。以譯鞮從陷虜。頗幸也。先間以談諧解之。僅免也。先欲使妹配上皇。上皇謀之。彬曰。不可。請辭以返國。而聘彬嘗病中寒。上皇親爲治糜啖之。身壓彬背。汗治良已。及上皇還居南宮。彬隨還。緇彬勞。僅拜錦衣百戶。英宗復辟。卽日召見彬。語絮且泣。超爲都指揮僉事。理錦衣事。賜城東甲第一區。引太液池。穿中御溝。達之。黃金十鎰。白金二十鎰。綵綺鹽醪。醢醬乾饈充實。又加費妻異。繪精鏐各有差。擢楊銘爲千戶。賜半之間。夕宴對。略用家人禮。然彬畏滿好避。而同列門達顯。達初以錦衣校用。又無害。理鎮撫司事。積功次稍遷。至指揮。而其所任校尉逸。杲繼起與同列。上故綠大閣吉祥及石亨復大位。德之。而二人驕。千請不已。上心厭之。欲稍稍削其重。以屬彬。彬固辭不敢。乃屬杲。杲數伺亨罪狀聞上。併其從子彪誅之。上益貴重杲。理衛篆。都指揮王某取充位而已。杲遂持吉祥陰擬之急。乃與其從子欽謀以五鼓從騎就謁。杲出見之。欽拔刀手斷杲頭。攻長安門不下。尋就誅。族吉祥。贈杲右都督。彬請急不任。而門達獨重。達佐理衛。得兼治鎮撫司。鎮撫於錦衣屬也。專治獄。或上有所怒。特下與緹騎。賊曹鈞發者。俱以委鎮撫。獄竟。自上請可否。毋由錦衣大僚。達爲人沈敏善計算。所識恆規上旨而決。時上業已誅曹石。內憚不自安。恆借達爲疆。而達多所陰獻。累遷都指揮僉事。治鎮撫如故。時上最所禮信者李賢。達次之。每朝而左顧則命賢。右顧則命達。賞賚無算。而達內害賢寵。讚於上曰。是常受陸瑜金。酬尙書者。上疑之。不召可半歲。而達惡袁彬。

猶以義故位已上。伺知上稍薄之。搆以死罪。劾奏。上不欲以彬撓法。爲慘然不樂。曰：是負我者。然須還朕一活袁彬。此外一任若。蓋恐其陰中之也。達退。則執彬下獄。脅以大五毒。更下。彬不勝苦。且誣服矣。而燕中少年楊暄者。性鯁直。常爲漆工尙方。俗呼爲矯漆匠。奮曰：袁公上魚服侶也。門達何人。而輒害之。因上疏救。以爲昔者駕留□□。獨彬以一校尉保護聖躬。備嘗艱苦。今卒然付獄。乞御前審錄。則死無憾。遂條達不法二十餘事。擊登聞鼓以進。上復下達逮問。達悲甚。捶暄至百餘。暄恐遂死不得白。乃謬曰：吾有陰事欲告公。達令復與前。前乃蔓達耳。曰：吾小人。何辨爲此。蓋受李閣老教耳。又云：且今日言之。無據。不若請會多官廷鞫我。對衆言之。彼將無詞。達大喜。趣罷筭。出湯沐沐暄。醢肉食之。持牘於上前。訴曰：李賢令楊暄中臣爲袁彬地。獨不畏陛下法乎。上復命中官會法司訊於午門。比羣臣皆至。乃出餘肉大言曰：死則我死耳。何敢枉他人。鬼神昭鑒。此實門指揮醢肉食我。教我反指李也。然李閣老貴人。吾何從見之。達失色計沮。遂減論。上悟。趣赦彬。令分司南都。餘置不問。然自是達寵漸衰。不復寄心復矣。居一載。驛召彬還職。寄如故。上崩。李賢益重。達內不自安。出怨望語。以御史奏劾。詔執赴法司。論成嶺表。濱行。袁彬帥僚出餞郊墅。握手語繾綣。已揮囊金爲解裝。良厚。衆咸多彬不念舊惡。有古長者風。彬再遷掌衛事。至都督僉事。乃卒。達竟死嶺表。沙狐狸衛士也。在虜中侍上皇。常以乏御膳告也。先也。先不曉何等語。問譯者。譯者曰：中國惟皇帝飲食稱御膳也。先嚙指稱羨。以我中華君臣。雖在蒙塵。其禮猶如此。乃與之六羊。令自致行在。蓋又以測沙之強弱智愚。沙卽裂其衣。聯革爲長條。條各繫三羊。擔著兩肩而行也。先已異之。復

令人覘沙行數里。始至上前叩頭復命。置羊復出數里外取水返。又出數里取薪藎。每往返皆復命如初也。先益奇之。召問其姓名。及有無事任。沙告之。又問汝邂逅至此耶。亦故隨駕者耶。沙曰。偶隨來耳。又問中國如汝比者幾。沙曰。十萬勝我者若干。更勝而至精者復若干也。先曰。然則向何不以汝等輩來迎駕耶。沙曰。先是往征東南某國未旋耳。回卽來此矣。也先聞頗動心。及上皇旋。沙不及從。留虜中。虜授以士卒爲頭目。浸用事。權力已雄。納婦生子。爲富貴大族。亦事奉虜命。帥部曲至朵顏三衛市馬。如是殆四十年。弘治初。又來訪得其子。因密詔之。令輸情於朝。期以明年復至。當遂歸。明年朝廷多益兵衛之歸。其子以聞。上允且深憫之。如期果至。見我兵及其子。已喻。揮其屬幡然南趨。暨其胡婦胡兒一家悉至。所攜輻重且甚富。至京師見上。上疑其詐。命所司詳驗。時諸上下莫有識之者。不敢決。沙曰。是同有證。先帝頃嘗賜我一繡囊。且曰。此周娘娘手製也。今囊固在。乞進娘娘驗之。所司取以進。太皇太后覽之曰。此真老爺物也。上乃授以金吾千戶。及宅一區。吳官童。宣府人。譯使也。正統十三年。使虜。拘爲奴。十四年。英宗蒙塵。官童聞之泣。方爲人牧放。適也先至。叩馬以故諭之。久之也先下馬曰。爾識若君也。官童曰。我君豈有不識者。於是令從者引見上。上皇曰。吳某至。吾無憂矣。相對泣。官童因告也先。吾中國爲君者甚衆。失一君。復立一君。執之何爲。時英宗與也先不曾相見。未有定禮。官童復以理諭也先。爾某年來朝受某賜。某年又受某賜。爾亦臣也。豈可爲賓主禮也。先見再拜稽顙進膳。英宗飲而賜其餘也。先飲之。如是者三也。先以車載其妹爲英宗配。問於官童。官童曰。焉有萬乘君而爲胡塔耶。後史何以載。卻之則拂其情。乃

給之曰爾妹朕固納之。但不當爲野合。待朕還中國。以禮聘之。也先乃止。又選胡女數人薦寢。復卻曰。留候他日爲爾妹從嫁。當併以爲嬪御也。先益加敬。上皇歸。官童從。至復辟。加千戶。後二年。有哈哈者來朝。上在胡時舊隸也。上令官童問曰。也先何失信耶。曩時許以妹併從人嫁我。今皆安在。對曰。某年被石彪殺其從而納其妹矣。上叱曰。豈有此事。復戒曰。敢泄是言者磔之。彪之反狀既明。而英宗疑之。亦有在矣。官童居京師。年八十餘乃卒。

史官曰。楊善巧人也。景帝本無迎英宗意。是以善足用其巧。說者謂景帝君臣以緩得之。若使果能寓急於緩。則東宮南宮之事不疊出。而迎駕奪門之封不足奇。故曰。善足用其巧也。夫以片言而取飛龍於洪濤。濟濟中。非膽力足濟。其孰能之。前惟厮養卒。後惟善耳。然而陰慝儉伎。卒弗長世。宜哉。至沙狐狸諸人。皆奇士也。誰謂沈淪輩中無奇士耶。

王驥王越傳

王驥字尙德。其先太原。家大同之宣寧。尋徙東獲。爲東鹿人。世務農。至驥而始讀書。三十餘。成進士。驥爲人。長身偉幹。多力便騎射。剛毅有膽略。既入仕。通法律。尤曉暢戎略。以選授兵科給事中。永樂間。上神聖羣臣奉職不瞻。而給事中不專封駁論建。驥嘗奉命鎮山西。兼飭邊備。奏獨鹽池逋課二十餘萬緡。督人德之。尋遷其省按察副使。持憲有聲。超入爲順天府尹。事治。宣德二年。遷兵部右侍郎。坐事縛下獄。尋復任。前後滿九載。進尙書。當是時。南北多邊警。羽檄旁午。兵部最爲要重。張本材而廉。稍以刻稱。許廓僅僅。

循職而驥代之始振刷有風望。正統二年西虜阿台、朵兒只伯數侵盜甘涼諸邊，戍殺掠吏人，左右副總兵都督任禮、蔣貴等勢敵不相下，狐疑莫發。於是驥輟部務行邊，詔一切便宜行事。時都指揮使安敬爲偏將，黷而怯，都督蔣貴、都御史曹翼追虜至魚海子，將及之，而敬謂前途無水草，不可進，引還。曹翼言狀，上密敕驥責貴死狀，而僂敬軍中以殉。驥故祕之，至乃大會諸將，方就坐，忽揖敬下曰：「汝奈何逗撓誤大計，命斬敬而會貴曰：公亦當死，且責狀以報。」於是諸將士股栗莫敢仰視。驥乃請分兵畫地，自莊浪西南抵黃河，東北抵寧夏，屬都督李安自涼州北抵鎮番，南抵古浪，東北抵板井，屬都督趙安自甘州東過山丹抵永昌，北抵臙脂堡，西抵深溝壘，屬任禮自肅州東接深溝，稍東北抵鎮夷，西抵嘉峪，北抵天倉，屬蔣貴約以賊小至則各自戰守，大至則併力拒敵。軍勢遂大振。尋下詔任禮爲平羌將軍，蔣貴、趙安副之，而驥特爲監督討阿台、朵兒只伯。諸進止悉取驥驢謀，虜營狼山等處，乃選精騎授蔣貴，使爲前鋒，而自與任禮等以大軍繼之。且與貴約曰：「勉旃，不能成功，毋相見也。」貴感奮，直前搏虜，敗之。渡河遁去，貴等追敗及於石城，虜食盡，竄兀魯乃地，北依阿台。貴復以精騎出鎮夷，間道兼行，三日夜，及而大敗之，得其左丞脫羅及裨校百人，斬首三百餘，獲金銀璽印各一，駝馬兵甲以千計。朵兒只伯與阿台以數騎遁，尋喝死，而任禮兵亦至梧桐林，得樞密同知僉院十五人，明日，至亦集乃地，得僞萬戶二人，以爲鄉導，窮追五百餘里，至魚泉而還。招其平章阿的平，并部落數十帳降。右軍趙安等出昌寧，至刀力溝，得右丞達以花赤三十人，駝馬兵甲稱是，捷聞。貴、禮皆進封伯爵，而驥兼大理寺卿，兼食其俸。尋詔還理部事。六年，麓川宣

慰思任發叛。雲南總兵沐晟與弟昂討之。數不利。晟至以憂死。而刑部右侍郎何文淵援舜舞干羽。格有苗事。請使使撫諭之。驩與英國公輔等議。以天下全盛。而示弱於舊屬小夷。非策。時太監王振方柄國。喜功名。遂緝文淵說。而命定西伯蔣貴爲平蠻將軍。驩總督軍務。率副將軍李安、劉聚等。大發兩都諸鎮土漢兵。合十五萬討之。瀕行。賜驩貴金兜牟細鎧蟒繡衣朱弓矢。驩馳傳至雲南。而貴等兵集。時大暑。衆請且按兵。驩曰。賊方熾毒吾民。行不可緩。敢阻軍者斬。遂進兵。會賊酋刁令道等以衆三萬象八十抵大垵川。欲略景東諸處。參軍兵部郎中侯璉等徼破之。驩乃奏上方略。請遣參將冉保等由東路直取孟定。會木邦。車里夷兵。而大軍由中路至騰衝。與保會。俾賊腹背受敵。從之。冬十月。驩等抵金齒。其別酋陶孟。刁門。捧以鎮康降。遣冉保等率輕兵五千受之。因其衆破昔刺寨。進攻孟通。而驩等以兵二萬水陸攻上江。敗其伏兵。遂進圍上江。上江者賊巢也。副總兵劉聚。參將宮聚兵亦至。攻三日不下。會大風。縱火焚其排柵。遂大破之。殺其將刁放。憂。刁招漢父子。虜刁門頂。斬馘五萬餘級。上江遂平。由夾象石渡上江。通高黎貢山道。移駐騰衝。留水守之。取道南甸。至羅下思莊。遣指揮江洪等八千人爲哨。抵木籠山。而思任發令陶孟。靠者軍心等。以二萬餘衆乘高據險。爲七營相救。驩遣劉聚。宮聚分左右翼緣嶺攻之。不下。自率中軍進夾擊之。遂破殺靠者軍心等。乘勝進。憂賴隴把。至馬鞍山。麓川大震。尋敗其象陣於泥溝箐。復敗其象陣於永毛摩泥寨。遂拔之。而別將冉保合木邦兵降其夷衆十二寨。車里兵亦降其孟連長官司。破烏木弄。憂邦等寨。斬首虜二千餘級。驩等遂進圍麓川。縱火焚其門。并庫藏廬舍皆盡。俘斬及溺死者數

萬人思任發夜攜其二子走孟養。以大捷聞，仍請留所部兵。界都指揮胡誌九人分守金齒、蒙化等處。而是時維摩州賊韋郎羅稱廣新王以叛，詔驥旋師討之。驥曰：「此不足血吾刃也。」乃遣偏師壓其境。曰：「王尙書大兵至矣。」賊皆潰。韋郎羅走南安，傳檄捕之。南安王懼，斬其首并妻子來獻。廣南富州土守交惡，十餘年不解。驥諭之，立釋。搆請命師旋。上遣戶部右侍郎王質齋羊酒迎勞數百里外。既入見，慰勞有加。特封驥推誠宣力武臣，特進榮祿大夫柱國靖遠伯，歲食祿千二百石，追封及三代。予誥世券，賜貂蟬冠朝服，玉帶白金綵幣鈔萬貫，而貴進封定西侯，賞如之。劉聚等陞賞皆過望。士卒賜予加等，府庫爲竭。而驥以侯伯奉朝請，不預兵部政矣。蔣貴果勇善戰，雖至大將，猶摧鋒陷堅。驥前後皆賴之成大功。而是時思任發尙在竄，其子思機發復率其餘衆往來窺伺。乃復命驥總督雲南軍務，率都督同知冉保、都督僉事毛福壽以兵往圖之。賜金牌信符，便宜行事。驥至，思任發復走緬甸，索之不獲。而思機發衆漸盛，不能制。乃奏請益兵，詔復遣定西侯貴以兵五萬會討之。然緬甸卒不肯送思任發，以思機發致讎爲解。驥等無如之何。乃縱兵擣思機發寨，獲其妻子及從賊百餘。戰象十一，革麓川宣慰司，設隴川宣撫司於隴把，凱還京師。加祿定西侯歲五百石，驥三百石。其白金鈔幣如初。而冉保、毛福壽等陞賞亦次之。人頗以驥老師亡見績，而閩振內主弗恤也。亡何，西巡陝西、寧夏、甘涼等處，所至申飭邊隘，練士卒，虜不敢犯。久之召還。十三年，先是思機發竄之孟養，孟養與相比，匿不肯捕送。後復反，於是驥復總督軍務。時貴已病卒，偕平蠻將軍宮聚討之。師抵金沙江，賊立柵西岸，驥作浮梁以渡。一鼓破之，復連拔其三柵，斬獲萬級。然竟不

能獲孟養會與思機發。驩威名故甚盛。至是凡三率師南矣。而稍稍損於前。一衛調導。簷英者官其地。上言驩等輩重至。役夫六百人。多散綵幣於其屬。使責重報。鹵蠻暨輓閣之。以爲已役。大軍十五萬。一日起行。因而相蹂踐。有至死者。又每軍使負米六斗。跋涉山谷。有自縊死者。師抵金沙江。彷徨不敢渡。旣渡。縮朒不敢攻。攻而失都指揮等。俟賊解散。多捕漁戶。以爲賊俘。此何異李宓之敗。而楊國忠以捷聞也。上爲之下。兵部會法司議。請御史一員直抵其境。會巡按御史勘報。上不許。然業已獎勞驩。聚召還京矣。至是停獎勞。敕勒聚還。而改驩爲平蠻將軍。討貴州苗。獲其稱剗平王。蟲富者。檻送京師。僇之。加歲祿百石。土木之難。羣臣廷議。闔振不道。株及驩。景帝初。召爲總督南京機務。位寧遠伯。任禮上。南京素習。媮戎陣廢弛。驩至。一切以所御軍法教之。爲一新。而大司馬謙弗重也。因事解其任。奉朝請。上雖以罷驩。而內猶嚴之。時禁私役閹人。俱令籍入宮。惟黔國公寧陽侯得留四人。驩獨留六人。驩老且八十。食肉躍馬。多從女妓。供張奉御如王公。而會武清侯石亨等奉太上皇帝於南宮。驩亦與焉。復得領兵部事。加號奉天翊衛。推誠宣力守正文臣。階光祿大夫。餘如故。數月。復請老。又三歲。乃卒。年八十三。贈靖遠侯。諡忠毅。子璫嗣。孫添。尙嘉善長公主。拜駙馬都尉。後嗣伯。卒。子憲嗣。卒。子璫嗣。卒。子學詩嗣。卒。無子。弟學禮嗣。王越。字世昌。大名之瀋人。長軀七尺餘。風骨奇邁。自少博涉書史。爲詩歌文章。援筆立就。而藻思溢發。且多力善騎。好談說經濟大略。睥睨顧盼。有天下志。景泰二年。年二十六。舉進士。方對策大廷。忽有旋風起。攝其卷雲表。已而不見。皆怪異之。監試御史請再給卷。及秋。而朝鮮貢使附越卷來。曰。其主方視朝。有大

風蔽天捲一物下者。則進士卷也。敢以聞。景帝閱而得姓名。謂吏部曰。識之。當任風憲。於是。由進士選入。得監察御史。英宗復辟。日視朝。覩越進士。與奏對。數目屬之。時寇深。長都察院。東溼僚吏無當可者。而越於臺事精。所建畫必出深意表。以故愛異之。留館諸道章奏。天順四年。擢山東按察使。名聲蓋藉藉。七年。大同有虜警。當置巡撫。以某薦。上嫌其貌寢。罷不用。喟然曰。安得如韓雍者而任之。時雍已撫宣府。吏部乃請徵越。召見便殿。越故偉服而短其袂。上熟視良久。曰。非故快御史耶。可使弁而將也。遂擢右副都御史。以行。會虜稍徙去。越乃整兵政。繕器甲。簡士伍。修堡寨。爲經久計。尋以病告。召還京。病良已。明年。召署院事。久之。以總督視師。延綏。輕騎襲破虜於崖窰川。俘四十餘人。鹵首百二十。進右都御史。前是文臣視師者。多從大軍。後出號令。行賞罰而已。至越。而始多選驍勇。跳盪武騎。爲腹心。將而與虜搏。始有戰矣。然尙不敢與虜軍鋒角。惟以間諜探虜累重所聚而劫之。或翦其零騎。用是得數成功名。越再設伏。徼虜。破之。俘斬百餘。獲馬牛羊器仗稱是。詔武靖侯趙輔爲平虜將軍。統大軍與越相繼逐虜。輔行則已病。而越復諜知虜滿都魯。李羅亂。加思蘭三酋自河套渡。而分寇西路。其妻子營於紅鹽池。乃率總兵許寧等。以精騎五千襲之。兩晝夜行三百三十里。至其地。分兵千餘。爲十伏。以相救。而身與寧等分兩哨薄其營。遂破之。擒斬三百五十五級。獲其女穉駝馬牛羊器械不可勝計。焚其廬帳。而還。時滿都魯等行刺至韋州。頗有所獲。欲歸。而遇諸鎮兵。邀而敗之。斬首虜一百四十九。奪所擄男婦二千有奇。馬騾牛羊十三萬甲仗千六百餘。賊旣以失利歸。則廬帳妻子畜產皆蕩盡。相顧慟哭。遠徙不敢居河套故地。捷聞。再賜璽書。

襄諭俄召還京。論功加太子少保。食從一品俸。掌都察院事。兼提督十二營兵。又一歲。兵部缺尙書。越意必見屬。而余子俊自外鎮躋之。越忽忽不樂。乞歸不允。乃上疏陳紅鹽池之戰。謀皆自己出。爲故尙書白圭所抑沮。錄功在諸將後。而部曲亦未有陞賞者。下兵部。而余子俊爲請。進兼兵部尙書以餌之。乃已。三年。加太子太保。時上所寵信。閩人汪直方領西廠。得調察中外事。威福傾一時。而年少好言兵。越乃乘間與之納好。甚密。而直方欲伐蓋州夷以爲功。遼東都御史陳越賄之重。且始謀也。以故直用撫寧侯朱永總兵東討。而身監其軍。俾陳越參焉。竟不及越。尋破蓋州夷。永至封保國公。陞賞優渥。越益醜之。乃謀於直。以虜西犯邊。詔保國公永爲平虜將軍。率師西討。越爲總督。直仍監其軍。初至邊。與永巡察堡堞。出塞周視。虜猝至。主客不當。永欲走。越止之。爲陣列自固。虜疑未敢前。薄暮。令騎皆下。銜枚魚貫行。毋反顧。自率驍勇殿。走五十里。抵城。虜不覺。得入城。永問曰。何也。越曰。我一動。虜臨擊無瞧類矣。結陣示暇形也。以惑之也。次第而行。且下馬。無軍聲。故虜弗覺也。永歎服。然雖與永同事。每念直之征蓋州。永與征行。而不先露。使陳越擅其功。恨之。乃爲直謀。令永將大兵由南路。身與直將輕騎由宣府。大同。俱會於榆林。旣至大同。諜虜帳在威寧海。則選二鎮之勁騎二萬餘。分道乘風雪。用老卒計薄之。虜狼狽出戰。遂破之。斬首虜四百餘級。鹵男婦將二百人。馬駝牛羊以數千計。旗纛甲仗萬餘。捷聞。詔班師。越遂封奉天翊衛推誠宣力守正文臣。特進光祿大夫。柱國威寧伯。歲祿千二百石。予誥及世券。越旣封。不當復領都察院。而御史許進等上章稱越功德。引王驥。楊善例。請仍領院事。而越亦不肯就。西班牙欲仍列大學士。萬安。吏部

尙書尹旻下。俱許之。自是益精心事。汪直而陳鉞時得爲兵部尙書。上嘗曲宴內伶爲戲者阿丑。以貴人裝兩手各操金鉞。恣睢前。問爲何人。曰汪太監所持何物。曰兩鉞耳。不仗此不能一步。上笑而弗罪也。當是時保國公永師至榆林。甫三日。召還毋論。有司供億百費。而戰馬七千匹。死者已五千。亡幼自如。於是亦懼而與越比事汪直矣。尋復命越等出師。至大同。適虜從東山等墩入境剽掠。越縱兵擊之。擒十人。斬首百餘。獲馬七百餘匹。詔進越太子太傅。增歲祿四百石。復錄一子官。是役也。斬級少。於法僅下賞。而拜封橫溢。則上以直在事。欲貴重之故。而越改掌前軍都督府。總督五軍十二營兵馬。蓋越以文臣爵不得侯。改右班或可得侯。不復有薦紳念。而萬安、劉吉等稍側目越矣。汪直亦爲其儕所忌惡。遂復命越爲平胡將軍。直仍監其軍。駐宣府。調度擊虜。虜已退。越等請班師。不許。遂巡延綏。而虜入寇河西清水營等處。越等使遊擊將軍劉寧敗之於塔兒山。參將支玉敗之於大窰梁。延綏總兵許寧敗之於三里塔。擒十二人。斬首虜三百餘。功較前事爲多。虜亦創懼不敢近邊。捷聞。僅加祿五十石。汪直賞亦薄。尋改越征西將軍。鎮大同。不獲稱大帥。而猶與直共一鎮。大學士萬安等乃請移越師延綏以離之。而命延綏帥許寧鎮大同。言者以寧直不相能。遂改直於南京御馬監。既行。則姦事大露。上乃命給事中御史論糾直八罪。因併糾越。詔削越官爵。追誥券。徒置安陸州。盡奪其諸子錦衣衛都指揮使等官。越之敗由汪直。然直尙得爲奉御。一時朝士大夫雖快越之去。而有謂其罰太重弗平者。越最名能知人。其在臺所旌拔御史屠浦、佶鍾等。皆爲大官。以至同列。而故吏將佐多鼎貴。時時稱越才。弘治初。赦還鄉。尋上書自列冤狀。會有爲

左右之者得復左都御史致仕。越居恆喜奢華。自奉若諸侯王。而其御軍能恤下。財往來若流水。不之間。龍罩顛倒。豪傑不知所從入。皆願爲之死。機事百端。閃倏變幻。出沒神鬼。故不復持名檢。軍行過陝西。秦王宴之。奏伎。越語王。下官之爲王吠犬久。寧有以相酬否。因盡乞其伎女歸。一日大雪。方坐地。鎗使四伎抱琵琶捧觴侍。而一千戶詞虜還。即召入與談虜事。甚哲。大喜曰。寒矣。手金卮飲之。復談。則益喜。命絃琵琶侑酒。即併金卮予之。已久談。則又喜。指其中最姝麗者曰。欲之乎。以予汝。自是千戶所至爲效死力。積功至指揮。而其夜襲威寧海也。將至。忽風暴起。塵翳目。衆惑欲歸。一老卒前曰。天贊我也。去而風使虜不覺。歸而卒遇虜人掠者還。而我據上游。皆是風也。越不覺下馬拜。功成。推卒功以爲千戶。越之在安陸與還。濬田池。射獵帳飲。聲樂如故。而其於功名志不小衰。會家近京。得通於權閹李廣。爲上言之。中旨召長都察院。爲臺諫所論阻。時西虜犯邊急。兵部言宜得一重臣控制之。庶於進止便。凡再薦。弗稱旨。時屠瀟爲吏部。德越而閹廣與之。以越名上。遂許之。陛見。上慰諭有加。進太子太保。仍兼左都御史。總制甘肅。寧夏。延綏軍務。諸鎮守巡撫而下。悉聽節制。仍許以便宜行事。越至。即擢賀蘭山之別部行剽者。覆之。斬首捕生過當。捷聞。加少保。太子太傅。請復哈密封。以兵援其王還國。疏上不報。而閹廣敗。自殺。言者皆首攻越。上雖雅重之。不爲報。而越坐憂悴病劇。遂卒。年七十四。贈太傅。諡襄敏。祭葬如禮。越之再起。欲還伯爵。竟不得。而諸子多官環列者。

史官曰。太祖既定天下。刊訓誓載之盟府。曰。文臣非汗馬勞。無得封公侯伯。明興二百餘年。封者僅數人。

驥以蘆川。越以威寧。守仁以宸濠。而有貞善。又其下焉者。驥材足。揮斥而多欲。武略則優。越則天下多貴。其才而穢其行。然皆稱良將。爲時傑。竭人才之難也如此。而皆阿私中人。以獲勳爵。人臣之建樹。亦豈無因哉。噫。



明書卷一百

列傳一

勳臣傳七

韓雍、項忠、馬吳傳

韓雍字永熙，吳人。弱冠舉正統七年進士，選授監察御史。尋奉命錄囚，碭山教諭邱純責膳夫邱磨兒，磨兒父令逃去，因訴他御史純，蓋死吾子。他御史榜掠純，強自誣服，然無所得屍。黃河撈一浮體，支解者，父迺哭曰：吾兒也。於是坐純極刑。雍疑之，蹤跡得磨兒，純始白。十三年，出巡按江西，衆猶謂雍年少，未經事。雍抵境，振刷精彩，經措宏久，後先皆弗如也。廬陵饑，盜大起，雍從巡撫侍郎楊寧謀，設伏捕首虜二百餘，餘孽以次伏誅。楊寧見雍輒自失，曰：御史卽少而老於吏，是聰明百寧，何可當。大學士陳循，廬陵人，熟知雍才，言於上，擢僉都御史，代寧巡撫。雍時未三十，黜屬吏姦貪，疏滯獄，均徭役，平市價，恩威大著。英宗狩土木，虜猖獗，西南夷繼叛，諸省無不被兵。獨江西恃雍少安。景泰七年，劾宸濠不法，并論府僚。上遣大臣卽訊，奪王護衛，罪諸府僚。英宗復辟，下陳循獄，誦戍。雍坐是調山西副使，尋罷歸。二年，召起大理右少卿，復右僉都御史，協理院事。長院者寇深，剛愎少許可，迺獨心敬雍。雍亦時時有所喻益。石亨誅，錦衣指揮

劉敬坐直所邀亭午具用朋黨律罪死。雍抗言朋黨者阿比共亂朝政。今以一飯當之恐過重。亨盛時大臣中固有朝夕趨其門。宴會且累時。今不坐。獨坐敬何也。敬卒不死。冬虜復掠內地。詔雍巡撫宣大。陞辭賜宴及鈔。上諭善爲朝廷守北門。雍至則虜已遁。修戰守。練卒固城堡。戎政大修。爲一時北方之重。七年還議事。上喜雍狀貌。進兵部右侍郎。諭大學士楊溥曰。九邊撫臣宜得如雍者。溥復薦山東按察使王越代雍。越至見上。上又喜曰。是真將官也。英宗崩。閣大學士陳文忌雍。因事間於大學士李賢。左遷浙江參政。雍爲參政。頗不理省務。日選勝。從賓客曲宴西湖。賦詩自娛。憲宗初。兩廣蠻寇復大起。拜都督趙輔征夷將軍。發湖湘閩廣土漢兵討之。兵部尙書王竑言於朝曰。韓雍才氣無雙。盜事非雍莫可。雍舊有過。請置勿計。於是使使就浙江拜雍爲左僉都御史。贊理軍務。雍卽日拜命。會衆議進取。或請分軍。盛賊入廣西可破。雍曰。不然。古仗鉞臨戎。制關外。謂利國家得專之也。夫兵有合爲正。分爲奇者。二廣地鮮完。大藤峽爲賊藪本也。諸軍不先薄其本。適分兵以趨末。分兵勢弱。趨末難盡。我全師至。彼南可以攻大藤。援高廉。雷東可以應南韶。西可以取柳慶。北可以斷陽峒諸路。勢若常山蛇。首尾互應。彼分而拒。我聚而攻。志曰。先人有奪人之心。茲行必勝。我奪之矣。遂行。會趙輔知雍才。軍事一聽雍。於是督大兵分道進。擊賊平陽峒。及修仁。荔浦諸峒。直抵大藤峽。道有儒生里老數百人。跪持香曰。我輩苦賊久矣。今日幸遇天兵。得生爲良民。願先三軍鋒。雍大怒。顧左右叱曰。此皆賊耳。縛斬之。左右初亦疑。旣縛而挾。中利刃出。乃知間也。悉斷頸。散手足。剝腸胃。分掛箐棘中。累累相屬。賊大驚沮。曰。韓公天威也。乃奪其險塞。焚其積聚。四面

交攻斬獲四萬有奇捷上上大嘉賞雍功詔卽軍中拜左副都御史賜綵幣六官一子錦衣鎮撫雍請以讓其弟詔可雍乃改大藤峽爲斷藤峽置藤縣千戶所控之復獻策二廣賊勢實相聯屬不兼委且勢輕互避不便於是命總督軍務鎮撫而下咸聽約束雍既得以便宜行益修飭陣伍擇別將分捕窮黨羽功最鉅六年進都察院右都御史雍威嚴凝王公三司長吏見長跪白事促縮如小吏軍門設銅鼓數十儀節詳密以故謗議遂起內官黃沁忌雍束縛不得肆噉人上書誣雍上爲遣使卽訊雍引疾乞歸卒年五十三諡襄毅雍洞達剴爽篤於孝友與人交有信義不爲岸谷臨戎蒞政豹變鵬搏雖發姦摘伏而事簡心平江西嶺南莫不畏如神明愛如父母摘詞酒翰風生泉湧天才逸發

項忠字蓋臣嘉興人正統七年進士爲刑部主事陞員外郎扈上北狩陷虜自拔歸步走間道七晝夜抵宣府足隱羨藜百數不覺也還復爲郎進廣東按察副使天順三年進陝西按察使內艱陝人數千里赴闕乞留乃奪服還任又徵入爲大理卿陝人復詣闕乞留改右副都御史陝西巡撫成化元年虜入延綏忠及寧遠伯擊虜遁去明年又與彰武伯破虜四年固原土達滿四叛據石城迎擊殺官軍旬日間衆且二萬矣遠近戒嚴敕忠總督軍務將兵往討忠至師自往逼賊賊從高下我師不支時伏羌伯毛忠戰死軍遽退忠卽陣斬一退縮官以殉陣始定移兵據賊水草困賊賊屈會星李台斗中外洵洵忠堅不爲動曰賊無援又食匱堅守可破也兵部議益師忠力止於是絕堅壁不復戰而持賊且百日賊稍急忠單騎巡賊壘曉禍福諸脅從賊日相率來降滿四以精兵來劫營大小二百戰皆卻之於是擒獲賊愛將楊虎

鯉忠叱令斫頭來。虎狸伏地乞宥自效。忠卽假以詞色。許立功。解金鉤束賜虎狸。遣去。故滿四竟爲虎狸所誘。擒急擊下石城。凡斬首七千六百。俘獲無算。忠因陳四事爲經久計。以石城險。盜據卒不可下。乃留兵戍之。是時兵事急。衆危懼。忠督軍。矢石雨下。無懼色。常歎曰。奉命討賊。久無功。甘心效死矣。召還。督右都御史。協理院事。故馬文升每語人曰。滿四鷙猛。關中根本。四發難。朝野洶洶。使其得志。天下事未可知也。項公畢竭心力。露宿原野者六十餘日。躬冒矢石者二十餘戰。始克獲醜。獻殄平巨寇。而止進一階。較諸趙輔。劉聚。王越。封拜如寄者。不無功懋。賞薄之疑。六年。大旱。荆襄流民。咸遁入山。李鬻子者。劉千斤黨也。倡流民爲亂。復敕忠出總督軍務。忠遣人持榜入山諭降。勦擊負險不服者。凡遣還鄉者四十餘萬。編戍萬餘。俘斬二千。因上便宜十事。詔暫留撫治。進左都御史。會有星孛天田。言官因論荆襄妄殺。忠再疏。自列乞歸。不許。八年。討平野王剛。小王洪。詔還院。荆襄以忠處置得宜。三十餘年。賊不起。而議者指忠妄殺。致干天和。交章論奏。故忠辯疏略曰。臣忠肅將天威。克平逋寇。不意娼嫉流言。仰瀆宸聽。今廷臣之所指。兵科之所糾。兵部之所參駁。大率謂臣以流寓良民作賊盜。俘獻京。以無罪編民作從賊。謫戍邊。以久居僑民作無籍。逐還鄉。至謂祛殺慘酷。甚於夷虜。禁出旱傷。皆臣所致。又謂奏報與功冊數不符。不宜陞賞。臣若不辯。何由自明。竊惟荆襄自劉千斤。石和尚。王彪。就擒而後。有李鬻子。王洪。燃燼煽惑。千百成羣。遠近荼毒。今臣奉命總師。與李震等督兵悉捕。僅俘百餘。詣京。皆首惡也。科臣乃謂盡良家子。而法司聽其翻異。不知前巡撫楊濬。參將王信等屢奏。猖獗難禦。誰耶。其餘黨賊。不忍濫誅。簡其丁壯。譟發邊戍。

而家屬從之。非其罪者。流民附籍。百無一二。如光化縣陳長干。籍雖有之。然占山四十餘里。招聚無賴一千餘衆。爭鬪劫殺。無日無之。可以久居之。故不遣乎。若非近山州縣。則固仍其附籍。而未嘗遣也。臣始因嘯聚。揭榜諭之。謂荆襄中山已殺數千。蓋張虛聲。怵之使解散耳。彼時原屬烏有。今既殺傷囚繫。死者實不過千。較昨討劉千斤擒殺至數十萬者何如哉。科臣乃謂慘於夷狄。而致彗出旱傷。亦誠厚誣矣。軍中報捷。初未及詳。斬獲的數。每多冒濫。其後勦功定籍。百不存一。雖擒李鬍子。王洪輩。以將士爭邀首功。臣皆革去不錄。如功少報多。敢曰無弊。今報止一百二十餘級。皆加參駁。奚以服人。且兵部尙書白圭亦常親洩此地。親任此事矣。今日之舉。乃圭往日之遺患也。若以今日之功。不宜陞賞。則往擒劉千斤。尙遺厚患。而得高擢厚賞者。盍亦少思乎。今臣已遣回流民一百五十餘萬。謫戍賊黨一萬二百有奇。隨居家屬五萬九千餘。四省境內。帖然安矣。先時中外皆慮荆襄禍患。何日得寧。今既平靖。而流言沸騰。反以臣爲口實。昔馬援征南。蒙薏苡之謗。鄧艾伐蜀。來檻車之徵。非惟功不見錄。反致身且不保。今幸遭聖明。不加罪譴。伏乞投閒。賜臣致仕。奏入。上嘉之。不允辭。十年。代王概爲刑部尙書。十一年。改兵部尙書。代白圭。忠以職方最屬要樞。卽調劉大夏。陸深爲郎。時有錦衣百戶韋瑛者。挾權閹汪直爲詞察。屢曲大獄。擅執京朝官。中外重足。莫敢正言。忠發憤草疏。約吏部尙書尹旻。諸公卿發直瑛姦罪。或先漏言於直。而尹旻又先以疏草與直。幸上聖明大怒。罷直廠職。瑛戍邊。而直見上獨泣言。此內臣黃賜。陳祖生中傷奴。御史戴縉。因而言直奉法無他。以迎上意。故復令直領廠。直遂首誣忠。下廷訊。事本起於千戶吳綬。綬在楚軍中。

撓法。忠急奏遣回衛。因而附直用事。搆忠落職去。久之直敗。乃起忠兵部尚書。致仕家居。二十六年。御史交薦不起。卒。贈太子太保。謚襄毅。忠明果。儻曉暢軍務。直言正色。不屑詭隨。子綬。孫錫。皆舉進士。綬爲江西參政。錫爲南京光祿卿。錫兄鏞。以世功世蘇州衛指揮。錫子治元。嘉靖丙辰進士。時憲宗頗好寶玩。諸璫言前朝常遣太監王三保使西洋。獲珍異無算。上乃命內官至兵部查西洋水程。時劉大夏爲郎。忠令吏檢故牘。大夏先檢得匿之。吏檢不得。復令他吏。忠曰。署中牘焉得失。大夏微笑曰。昔下西洋。費錢穀數十萬。軍民死者亦萬計。此弊政。牘在尙宜毀之。以拔其根。猶究無有邪。忠聳然再揖。指其位曰。公達國體。此位不久屬公矣。

馬昊。關中人。本姓鄒。昊長身驍捷。善騎射。弘治中。舉進士。爲監察御史。出爲按察僉事。尋以御史時罪謫。眞定推官。至則教吏士習武。多布直鉤。指民家有流卻奸盜亡命。悉擒之。再用前罪謫。判開州。吏士伏闕上言。昊於眞定稱保障甚宜。請勿謫。詔許之。亡何。蜀盜藍鄙叛。侵掠蜀。合四省兵討之。未效。吏部言。馬昊才可。蜀按察僉事佐治兵。昊至。閱所部。笑曰。將不知兵。若勝何。擇驍勇材力之士千人。分四隊。隊各立長。會賊來逼城。昊夜出百騎。舉砲擊賊營。亂。自蹈籍。而悉兵從後乘之。斬首四千餘級。軍中皆喜。以兵起未有者。昊曰。此尙未見大敵。胡足喜。宜及勝用之。遂前遇賊。賊方陣左。而伏兵於右爲應。昊以正兵當左。而身輿精兵百騎直擣伏。伏驚潰趨左。左陣亦潰。兵合擊。火其柵。大破之。斬騎將方四。捕首虜降萬人。遷副使。治兵川東道。賊延蔓。勢尙張。都御史高崇熙謀於副使張思齊。招諭賊。賊請降。而乞住居臨江市。空其

民。吳曰：臨江市蜀襟喉，上達重，敍下連湖、湘，其地饒富沃衍，可委賊自困耶？獨益飭治兵，募召豪傑，賊因不敢東。伏漢州平墳，未幾復反，集衆至二十萬，前後官兵俱敗績。賊遂圍中江，因謀嚮成都。吳以五千騎馳赴中江，賊走，窮追之，與總督彭澤合擊，大破。殺賊酋廖麻子，遂進右僉都御史巡撫。正德中，蜀廖麻子死，尙數萬竄於東鄉山，推喻老人爲帥。吳請於彭澤曰：山險不便騎射，深入賊爲主，或返失便，願發步兵三萬，據出入要道，賊當自餓死也。澤如吳言，賊窘，果縛喻老人請降，而他賊在遂寧、渠縣者相繼平。進副都御史，逾歲，虜亦不刺自西海犯松，潘蜀大震。吳招土番爲間，取道夜掩虜，虜驚潰，獲馬及衣械甚夥。事聞，加祿俸。高琪竊棘人，普法惡，倡諸夷部立寨，僭號攻劫。吳率兵擣破之，降者萬計。獨青山寨不下，吳行周視寨曰：此固高絕水道，可下也。乃遣兵絕泉口，而撤南方圍，待兩日，賊渴，覘南圍薄，夜走。兵從後追捕，首虜又萬人，執普法惡誅之。遷右都御史，子一子錦衣百戶，然吳好功名，又欲討夷，不勝，逮下獄，罷免。史官曰：韓雍稱少時多奇跡，至今鄉里人能誦道之，近怪故弗悉。二廣士大夫每屈指雍曰：大藤峽百世功也，而雍獨首破之，守仁力易爲矣。項忠逸氣豪挺，夙標神略，其坐困滿四，智侔充國矣。不然，套虜橫連，鴟張其何底也。馬昊出奇制勝，風情暇逸，而終致劔挫。昔胡世寧嘗於世宗時盛言於朝曰：吳名將，可寄麾鉞，而撫蜀時亦欲平松、潘夷。曰：昊長用兵，輕用其長，故敗。臣短用兵，重用其短，必勝。嗚呼！名言哉。是三臣者，功不在三王下，而究無尺寸之封，意其猶守正不阿者歟，何相懸之甚也。

王守仁傳

王守仁字伯安。餘姚人。父華。舉進士第一。侍日講。修國史。會典。累官南京吏部尚書。有長者稱。母鄭。當娠而祖母岑夢神人。袞冕乘五彩雲下。抱一兒授之。驚寤。聞啼聲。則守仁生。岑以語其祖天敘。名之曰雲。五歲尚不能言。一日出從羣兒戲。有僧見而撫之曰。此非凡兒。奈何名泄之耶。祖悟。因爲更名守仁。卽能言。讀書過目成誦。十一歲。當從父華北上。過金山。題詩警絕。華以是奇之。然爲兒戲。猶故。一日之市。所與鬻雀者爭。遊客熟視之。出篋錢市雀。而送守仁歸塾。曰。少年貴當極人爵。立非常功名。且徧閱他弟子。語其壽夭貧賤。後皆驗。守仁自是稍愛經術。工屬文。一日。謂其師曰。讀書欲何爲。師曰。取甲第耳。守仁曰。讀書乃僅取甲第耶。如聖賢何。華聞之歎異。乃欲令我愧見之耶。已負材氣。十五訪客於居庸。山海關。時闡出塞。與諸屬國夷角射。因縱觀山川形勝。慨然有勒碑燕然志。弘治五年。舉鄉試。十二年。中進士。使治威寧。伯王越葬。守仁少夢威寧伯貽之寶劍。旣葬。而其子出越所佩劍爲謝。則宛然若覲矣。益沾沾自喜。還而朝議方急西北邊。守仁爲策八事上之。其言皆警凱。報聞。尋授刑部主事。當直獄。歲行盡。諸尙書侍郎畜豬於署。飼以囚食。甚膻。守仁悉殺以享獄卒。及囚。莫能詰也。論囚江北。因游九華諸山。有所遇。遂好神仙術。明年引疾請告。前是守仁與諸所善太原喬宇。廣信汪峻。秦州諸曠。河南李夢陽。何景明。山東邊貢。相切劘。爲古文辭。名藉藉。已而厭之。曰。滑精耗神。因築室於陽明洞。頗習導引。久而有若先知者。衆譁以爲仙。而實無所得。乃北上。道山東。而巡按御史留聘主鄉試。所爲程式文出。人咸服。所獲多顯名士。入補兵部主事。時閹劉瑾等導上爲狎遊。南省臺臣戴銑等爭之力。瑾矯旨捕置詔獄。守仁上疏。謂君聖則臣直。

銑等以言爲責如其善自宜嘉納卽不善亦宜包容以開忠讜之路乃今赫然下令緹騎旁午拘繫載道卽陛下非有意怒絕之而下民無知妄生猜懼自今而後雖有上關宗社危疑不測之事孰從而聞之幸寢前旨令各供職如故適足以廣大公無我之仁明改過不吝之勇瑾銜其言切旨下詔獄廷杖四十死而復蘇謫費州龍場驛丞守仁至錢塘欲緩行而瑾使人尾之急守仁懼不免乃托投江而輕舟自海至閩入武夷山逾年始至驛諸苗夷相率伐木爲室以居守仁守仁乃益講學所治經往往取心得不必與前訓故比矣提學副使席書與守仁談乃創書院命諸生師事之又明年瑾伏誅擢廬陵縣至則選里正三老委之詞訟而總其凡囹圄空虛他若立保甲清驛供杜巫賽定水次兌絕鎮守橫斂至今守之爲甲令焉入爲南京刑部主事尋調吏部驗封在都乃肆講知行合一之學明年累進考功郎尋進南京太僕少卿分署滁州從游學者日衆始教人靜坐大閱天理人欲之分縉紳多怪爲迂僻不堪用是時王瓊爲兵部尙書用事獨奇守仁才會南贛江漳賊據險爲亂擢爲僉都御史巡撫其地守仁至則令行十家甲法務使姦無所容又以太祖訓教其父老子弟賊聞而易之而守仁左右至郡邑輿臺多爲之耳目守仁廉得老隸黠者致密室而脅之曰汝自知當死否肯爲極言賊情吾貰汝隸迫吐實守仁笑而遣之乃故爲不可測意在此則示以彼每擇吉日出師又復止或將發不果以多方誤賊而陰勒諸兵備道幕選力士以三之一赴軍門與舊兵參教擊射明賞罰忽出破賊於長富村追至象湖山會閩廣兵至且合賊迫潰圍出指揮賈桓縣丞紀鏞戰死諸將懼請俟狼兵守仁怒責之曰戰小挫何損且兵豈不足而需狼兵

耶。乃率所選士進屯上杭。佯諭諸道。姑以牛酒犒師。使小息。俟秋再舉。謀賊懈。即分兵爲三路。約以同夕。銜枚進。中軍奪象湖之隘。方大戰。而奇兵乘間發。遂大破之。閩、廣兵亦盡破。其巢四十三所。斬獲大酋。詹師富等七千有奇。牛馬輻重無算。捷上。因請立崇義縣治。盡得賊之要害地而耕之。報可。加俸一秩。賜銀幣。守仁爲巡撫。權輕。不足以控壓諸道。因上奏云。古者賞不踰時。罰不後事。過時而賞。與無賞同。後事而罰。與不罰同。況過時而不賞。後事而不罰。其何以整齊衆心。鼓舞士氣。誠得大軍討賊之法。責而行之。以於平時。假臣等令旗令牌。便宜行事。如是而兵精。賊不平。臣無所逃死。王瓊讀而歎曰。不與此人權。將誰與也。奏改提督軍務。悉聽便宜。於是守仁立兵符。申約束。且爲文撫諸賊。詞旨隄側。賊酋黃金巢、盧珂等相率來歸。已進兵破橫水賊。擒其大酋謝志珊等五十六。俘斬五千有奇。因襲破桶岡賊。擒其酋藍天鳳等三十四。俘斬二千有奇。泃頭賊酋池大鬚等尤黠桀。故與降賊盧珂等讎。守仁使使諭降。報曰。大鬚等欲歸。恐盧珂等乘隙掩我家室。今者用自保耳。守仁乃陽移文責珂等。而珂等急上變。謂大鬚等實挾詐。老我師。守仁復陽怒責珂等下之獄。而諭之情。復以新歷給大鬚等。且諭使來。大鬚乃語其腹心曰。欲得伸。必先屈。贛州伎倆。我亦欲行闕之。遂以勇賊百人。裹甲來見。守仁慰諭宴犒之。館於祥符宮。使更新衣習禮。供張儲饌甚設。大鬚等喜過望。至正元之次日。乃張樂大宴。伏士以待。引大鬚等魚貫入。卽俛之庭。無一脫者。遂出盧珂於獄。使發兵爲鄉導。夜半。守仁出師與之會。遂破泃頭、石門。覆其巢三十餘。擒大酋及斬獲二千有奇。餘奔九連山。守仁以九連深險不易攻。乃使精卒七百。衣賊衣。僞告奔潰者。賊從崖上。

招呼與相應。久而賊覺之。則師已度險。賊狼狽失據。大軍蹙之。皆就縛。守仁既已盡得賊地。相險要。增設和平縣治。捷上進右副都御史。予世官錦衣百戶。再進副千戶。守仁念非王瓊精心任之。毋與成功。每疏捷輒歸本瓊。時內閣惡瓊。因而訾及守仁矣。守仁在軍旅。不廢講學。後爲致良知之說。直指本心。自然最簡易痛切。乃至欲盡廢學問思辨之功。以行誼一切皆粗跡。其始頗推鵝湖。謂其能紹孟子所重周程。而所詆在朱氏。自致良知之說行。天下高明之士。樂於頓而惡檢束者。喜其便。直推以上接孔子。而實踐之士。多嗤其脫略浮薄焉。時寧王宸濠謀不軌。素浮慕守仁。而畏其擁強兵上游。使其黨劉養正探之。養正故善守仁。好講學。而守仁亦使其門人冀元亨應宸濠聘。欲以窺其爲人。語兩不合而罷。十四年六月。守仁適勘事福建。取道南昌。至豐城。而宸濠反。守仁聞變返。宸濠已遣兵逆之。守仁入漁舟得免。乃過臨江。抵吉安。吉安知府伍文定邀守仁起兵討宸濠。守仁然之。乃與文定計。上疏告變。而移檄列郡。暴宸濠罪。俾各率吏士勤王。時巡按御史謝源。伍希儒自嶺外復命。道吉安。守仁留之。紀功。時兵未集。而恐宸濠兵速出下南京。乃僞遣諜檄諸郡邑。使備餉。言京師及湖廣。廣東。西。南京。淮安。浙江各發兵數十萬。以給宸濠。使濠不敢出南昌。又僞蠟書貽李士實。劉養正云。得密示。具悉爲國至意。第從臾使早出。足一離省。大事濟矣。而故繁宸濠之謀。示將斬。而令點校監者。僞若與宸濠款。泄而縱之。宸濠得書。檄果疑。而與士實。養正謀。則皆勸之疾趨南京。卽大位。宸濠益疑。十餘日。探知中外兵不至。乃悟守仁給之。留少兵守城。而劫其衆六萬人。號十萬。襲九江。南康。皆下之。進圍安慶。不下。而兵已大集。諜知宸濠離南昌。乃大喜。整衆。

至樟樹鎮。襲破其伏兵之在新舊廠者。躡之。至暮。進破南昌。遂擒其居守宜春王拱樞等。守仁猶在後軍。質明而始知之。建旗鼓入城。申約東。拊循其脅從吏士。然已不能無所傷殺矣。守仁留二日。發兵躡宸濠。宸濠時爲安慶所抗。氣稍沮。而驟聞南昌失守。解圍回顧巢穴。守仁以伍文定等四郡兵三千分道逆擊之。都指揮余恩爲疑兵二千分爲十餘軍。張疑設伏。與文定等密相應。與其前鋒遇於黃家渡。文定等伴北以致之。賊爭利競進。陣亂。邢珣以所部衝擊。斷其中堅。文定、恩等乘之。伏羣起。賊遂大敗。退保八字腦。宸濠懼。盡發南康、九江之城守者以自益。守仁乃分兵襲取之。明日復大戰。兵小卻。守仁急斬先卻者。遂進擊。擒斬二千餘。溺水者以萬計。宸濠始大懼。乃聯舟爲方陣。乃大犒士。詰責敗者。將斬之。兵奄至。砲碎其副舟。遂奔潰。妃嬪皆與宸濠泣別。沈水死。遂擒宸濠。與其世子眷屬、李士實、劉養正等數十人。斬首三千有奇。溺水死者無算。浮屍衣甲器物亘十餘里。乃分道搜捕其餘黨。捷聞。寢不下。前是守仁上宸濠僞檄。末謂陛下在位一十四年。屢經變難。民情騷騷。尙爾巡幸不已。以致宗室黜者。謀動干戈。冀竊大寶。且今天下之覲覲。何特一寧王。天下之姦雄。豈直在宗室。興言及此。悚骨寒心。昔漢武帝有輪臺之悔。而晚節莫安。唐德宗下奉天之詔。而士民咸泣。皇上宜痛自克責。易轍改絃。罷細姦諛。以回天下豪傑之心。絕跡巡遊。以杜天下姦雄之望。則太平尙有可圖。臣民不勝幸甚。左右多弗悅。以守仁方起義師。不能難也。而上則自稱威武大將軍。鎮國公。總督軍務。率京邊驍卒數萬南下。使太監張忠、安邊伯許泰、都督劉暉爲提督。以數千人由江而上。抵南昌。守仁乃俘宸濠取內道以獻。忠、泰等使人要之於廣信。守仁弗聽。抵

錢塘遇太監張永。永時稱提督。贊畫機密軍務。在忠秦輩上。而故與楊一清善。除劉瑾。天下稱之。守仁夜見永。頌其賢。永悅。守仁乃極言江西遭亂。民困已極。不堪六師之擾。永深然之。乃曰。吾出爲羣小在君側。欲左右調護聖躬耳。非爲功來也。第事不可直致耳。先生功吾自知之。守仁乃悉以宸濠等付永。而身至京口。欲謁。不果。會有巡撫江西命。乃還南昌。而忠秦等前已駐師南昌。銜守仁不待。故縱其卒傲守仁。欲以爲爭端。守仁厚加恩禮撫慰。卒皆悅。乃不能有所加。及歸。復譖之上。謂守仁且反。獨張永保持之。於是守仁請賑卹其士民。且以大水自劾。語極懇切。皆報聞。世宗初。召守仁入受封。而中有沮者。謂國甫大喪。不宜舉宴賞。中道止之。拜南京兵部尙書。參贊機務。遂歸省。父華於越。尋論功。封奉天翊衛推誠宣力守正文臣。特進光祿大夫。柱國。新建伯。父華尋卒。守仁憂居。而從游者益衆。相與推隆之。又以功高。文臣預五等爵。忌者蜂起。有目爲僞學者。有以下南昌縱士擄掠。及得寧邱之金寶子。女者。至有謂初通宸濠謀。策其不勝而背之者。言絕醜不可聞。而所封獨守仁與吉安。守文定。至大官。當上賞。其他皆名。示遷而陰抑絀之。守仁不勝憤。乃上疏再辭爵。且極論白諸有功者。溫旨慰諭。不聽。會守仁之所善。席書與門人方獻夫。黃綰。皆以議禮得幸上。力稱守仁賢。而復爲言之。張璁。霍輅等。皆有所推轂。然江西輔臣。故銜守仁。不能特薦。猶持前論。以故廷推兵部。若三邊若團營。皆弗果用。而最後田州土守岑猛驕。不合縱兵圍其鄰郡。右都御史姚鏌討而誅之。其二子挑別將盧蘇。王受各擁衆以叛。兵驩進不利。時謀易帥。乃召守仁起家。以故官兼都察院左都御史。督兩廣及江西湖廣四鎮軍務。討之。守仁至。而徵兵已大集。盧蘇等

亦素習守仁威名。竊甚。守仁既抵南寧。卽上疏請一切撫綏。而以便宜悉散其衆。僅留楚兵數千自衛。招諭蘇、受等。皆大悅。率衆來歸。守仁薄懲之。遣歸農。改田州爲田寧。敕岑猛之後。與蘇、受皆弗誅。刻石云。爰告思田。無忘帝德。爰勒山石。昭此赫赫。文武聖神。率土之濱。凡有血氣。莫不尊親。刻石田州云。田石平。田州寧。田水濠。田山迎。府治新。千萬世。鞏皇明。嘉靖歲。戊子春。新建伯。王守仁。勒此石。告後人。因蘇、受兵以攻斷藤峽寇。斷藤峽者。卽大藤峽。其中諸獠。上連八寨。下通仙臺。花相諸峒。聯絡四十餘巢。盤亘三百里。數出流劫郡邑。自韓雍大征之後。無能至者。守仁使蘇、受等爲鄉導。挾永順。保靖。土兵。分道深入。大破之。斬敵三千餘。獲其男女牛馬資械以萬計。守仁方欲移府治。建衛所。增兵設官。次第上疏。而病始報平。盧蘇等。詔賜金幣。遣行人奉璽書將諭。及平斷藤捷上。上以手詔問閣臣。謂守仁自誇大。且及其生平學術。一清等有密對。桂萼以爲守仁擒宸濠。日攻城。紀律不減。奏捷張翊無藉。而學術邪僻。足壞士習。宜削官爵。上憐守仁功。不許。先是楊一清者。雅知守仁。會黃綰常上疏稱守仁賢。謂當入輔。而又有他疏陰指一清辭甚厲。一清不能無移憾。守仁病益甚。上疏乞骸骨。因北歸。度大庾。而革卒於南安舟中。年五十八。萼又覘上意不悅守仁。因奏參其擅離職。并處置田州事宜失當。下公卿議。停世襲。及他卹典。守仁有一子。曰正億。久之。上怒解。始得襲錦衣衛副千戶。隆慶初。贈守仁新建侯。諡文成。賜葬于祭。及贈誥詞。稱爲元勳。聖學正億得嗣。伯正億卒。子承勳嗣。卒。子先通嗣。守仁天資穎敏。絕世少好古文辭。爽朗多奇。晚取詞達。不能工也。旣以氣節名世。又建大勳。柰有志道學。一切盡掃去之。而識者不謂盡然。又其慕好之者。亦

挾以兩相重。守仁之語門人云：無善無惡者，其心之體；有善有惡者，心之用。知善知惡者，良知；爲善去惡者，格物。以此爲一切宗旨云。

史官曰：守仁學術凡三變，漸入玄虛，是以多訾之。古云：兵不厭詐，而守仁用兵則專用詐，然而非堂堂之陣，正正之旗矣。獨其起義旅，擒叛王，不使九重之尊，輕與匹夫角，使樂安之蠢動，有如守仁者。宣宗無羈勒之勞矣，厥功懋哉。昔人謂學士大夫與守仁辯，未嘗不心折。及退而讀其書，平平耳。而世宗語李時曰：守仁凡事虛浮，好名士耳。可謂人倫朗鑒，然其御烏合，籠豪儁，待宵人，蹈險出危，假僮權譎，則過人過矣。孔子曰：作易者，其有憂患乎？抑中古以後不能不爾耶。

伍文定傳

伍文定，松滋人，舉進士，爲常州推官。剛直能斷，而多忤，與提學御史抗，諸生箠之幾斃，猶曳衣行，行自若也。後知吉安府，寧庶人宸濠反，報至，都御史王守仁從間避入城。文定卽閉門繕甲兵，請曰：賊烏合，勢必敗，而一時猝起，無抗者，公威望素重，宜卽吉安起義，集諸路兵，擣其穴，必潰。身敢任麾下之役。守仁曰：善。乃起兵，治餉儲餼，遂同促南昌，以精兵自廣潤門入，殺守者，市肆安堵。二日，追及於樵舍，宸濠兵舟萬艘，蔽江面。文定薄冒矢石，火燎鬢不動，士爭殊死，闖大破之。獲宸濠，語在宸濠及守仁傳中。進江西按察使，大闡張忠率師討賊，賊平無與，內忌其功，因見脇，跪不屈，執而撻之，竟移病歸。世宗卽位，論功遷副都御史，官其後錦衣千戶。雲南土師鳳朝文叛，加兵部尙書，發四省兵討之。至則朝文死，難漸息，乞歸，卒於家。

時以爲宸濠之役。文定功第一。進賢令劉源清。蓋誅持寧藩檄者。尙氣好兵法。後以侍郎討大同。發兵不利。機官爵。

史官曰。文定烈士也。孤城孑然。角強藩。不爲動。衝強陷深。至介冑之夫披焉。夫江西固制帥。愆憑揮霍。提其領夾之。不少矣。而反不獲世爵。惜哉。



明書卷一百一

列傳二

忠節傳一

史官論曰。孔子稱伯夷、叔齊曰。求仁得仁。又何怨乎。怨不怨。聖人所難言也。夫人生也直。圓刈委曲。豈性所樂哉。利害炎於中。安危交於外。感慨未已。而悔吝隨之。故意變於初。而行枉其性也。若夫嚴氣正志。赴蹈爲期。指刃鑿以旌心。凌風霜而辨業。懷懷皜皜。豈利害安危之可動其中耶。而死者尤其大焉者。於是乃憮然曰。人臣死生之際。顧不重哉。丁國家傾仄之運。昏濁之朝。或沈惑僻毒。或鼎圖嚙震。而夷然若無預。此人世之大僂也。若夫見理明決。義不返顧。以片言溥仁人之利。亢章而進。力足回天。不惜血碧幽藏。卽類危而不死。而視湯沸刀鋸。如飴之甘。屹然如山。峙而不轉。使天下萬世仰之如恆。岱焉。不亦休乎。亦有委折以濟事。留身以有爲。卒之時過事遷。勢無如何。遂曉然白於天下。以見前之所以生。爲後之所以死。而人乃服於其驟。以釋其疑。設相時之所譽。以嚮直。以至主憂臣辱。主辱臣死之秋。而曰我致死而未獲。駕言明哲之保。爲藏身之巧。伊誰欺。欺天乎。縱頸血不濺。頭顱苟全。而其心則不勝誅矣。若君死之自死之。可死而幸勿死焉。而天下萬世頌之。懷然有生氣。一時之生終死。一時之死終生。人臣儉錫。不以權

誠予君而斤斤於生死之名焉。其品已卑。況彼夷然若無預者哉。如明之持初節。齊戰場。遭燕難。爭大禮。罹極禍。遇喪亡。而能碧血殷郊原。漆身溷豎牧。卽截支體。燔九族而不悔。而甲申之變。妻徇其夫。子隨其父。闔門雉經。視死若歸。真足以泣鬼神而動天地。而或抗顏直諫。至於流離沈滯。氣壯河山。如此者皆人傑也。爰錄於篇。以媿天下萬世之爲人臣而不忠節者。人臣死生之際。顧不重哉。若而人。其古之求仁者歟。嗚呼。此皆明興來祖宗教養之遺澤也。平時無犯顏敢諫之士。臨難必無仗節死義之臣。養士者鑒之哉。養士者鑒之哉。

王綱

附王名
善陳敬 王綽 附子紳
孫律

孫炎、葉琛、許瑗、王愷、熊鼎

附黃政

胡深傳

王綱一名性常。字德常。溫州人。弟秉常。敬常。並以文學知名。綱尤善識鑒。有文武才。少與族人元章、永嘉高則誠相友善。往來山水間。時人莫知測也。元末嘗奉母避兵五洩山中。有道士夜投宿。綱異其氣貌。禮敬之。曰。君必有道者。願聞姓字。道士曰。湖南隱士趙緣督也。與語達旦。因授以筮法。且爲筮曰。公後當名世。然不克終牖下。今能從吾出遊乎。綱以母老有難色。道士笑曰。俗緣未斷。吾固知之。劉基徵時。常造語不忍去。謂曰。子眞王佐才。然貌微不稱其心。宜厚施而薄受之。予性在邱壑。異日得志。幸勿以法見累。則善矣。基薦綱於太祖曰。王綱命世才也。洪武四年。以文學徵至京。時年已七十。齒髮精神如少壯。上見而異之。親策治道。大悅。拜兵部郎中。未幾。潮民弗靖。擢廣東參議。督兵糧。謂所親曰。吾命盡茲行乎。致書與

家人訣。攜其子彥達以行。至則單舸往諭。民咸叩首服罪。事竣。歸增城。遇海寇曹真鼓噪突至。截舟。願得爲帥。曲諭不從。叱罵之。遂共擁而去。賊爲壇坐綱。日羅拜請不已。綱痛罵不絕聲。遂遇害。時彥達年十六。亦隨入賊中。從旁哭罵求死。賊欲并殺之。其曾曰。父忠而子孝。殺之不祥。與之食。不顧。賊憫其誠。孝。令綴羊革裹屍。負之而出。歸葬禾山。洪武二十四年。御史郭純上其事。得立廟死所。錄用彥達。痛父以忠死。力耕養母。粗衣惡食。終其身不仕。時有王名善。義烏人。洪武七年。爲高州府通判。四年秋八月。黨寇羅子仁劫奪府印。逼名善附之。名善罵賊不屈。執至霞爛新營。遂遇害。未幾。寇平。旌名善。又有陳敬。世家增城之石灘。洪武十四年。以賢良舉授禮部主客司郎中。遇事剛果。敢爲人多忌之。以事左遷雲南曲靖府經歷。尋署劍川州事。劍川鄰寇竊發來攻。敬率壯士禦之。衆寡不敵。其下欲退。敬瞋目大罵。賈勇前進。遂力戰而死。軍民咸聚哭。收其屍。事聞。命有司恤其喪以歸。

王禕。字子充。烏人。幼秀爽奇敏。義及長。長身山立。屹有偉度。習古學。師事黃潛。戊子。元政亂。公爲書七八千言上時宰。以切直格不聞。危素。張起巖並薦不報。隱青巖山著書。戊戌。被徵。署中書省掾。商略幾務。上每稱子充而不名。間與論文章稱善。因命撫故實爲四言詩授太子。辛丑。江西平。禕上頌。頌喜。歎曰。吾固知浙東二儒。卿與宋濂。學問之博。卿不如濂。才思之雄。濂不如卿。癸卯。授江西儒學提舉司校理。外艱。乙巳。除禮侍郎。兼引進使。定議禮制。遷起居注。丙午。陞同知南康府。禕披榛莽。建府署。撫瘡殘。集流散。收廩賢士。搜除姦蠹。經理廢壞。郡得安輯。賜黃金帶。丁未。召議卽位禮。忤旨。洪武元年。降漳州府通判。尋

上疏言上天以生物爲心。雷霆霜雪。有時而搏擊。有時而肅殺。然皆暫而不常。向使雷霆霜雪。無日不有。則上天生物之心息矣。又曰。修德之要。忠厚以存體。寬大以致用。無外法天道以順人心二者。二年。召修元史。與宋濂爲總裁官。徵逸士汪克寬、胡翰、宋信、陶凱、陳基、趙增、曾魯、高啓、趙訪、張文海、徐壽生、黃篪、傅恕、王綺、傅著、謝徵十六人爲纂修官。開局天界寺。禋史事擅長。裁繁剔穢。力任筆削。書成。拜翰林待制。同知制誥。坐失朝降國史院編修。三年。預教大本堂。經明理達。善開道。召對殿廷。必賜坐。從容宴語。奉使吐蕃。尋召還。五年。往雲南論元梁王把而刺瓦爾。既至。抗言皇上聰明神聖。天人所歸。惟爾僻在西南。久阻聲教。故遣使者來諭意。亟宜奉版圖。歸職方。官封如故。身名俱全。不然。天討且旦。夕至。梁王不聽。館別室。數日。又諭曰。朝廷以雲南百萬生聚。不欲殲於鋒刃。今元綱解紐。天兵四征。不五六年。天下大定。爾恃險遠。屢拒明命。龍驤鷁艦。會戰昆明。悔無及矣。梁王駭服。有降意。卽爲改館。會元遺孽自立於沙漠。遣使脫脫至雲南。觀梁王有二心。迫殺我。使以固其意。梁王持兩可。不決。匿禕春登楊氏家。脫脫聞之。誚責梁王。不得已。出禕。脫脫欲降之。不屈。罵曰。天訖汝元命。實代之。燭火餘燼。尙欲與日月爭光耶。我將命遠來。豈爲汝屈。有死而已。顧梁王曰。大兵旦夕至。屠梁矣。傍有解者。脫脫曰。今雖孔聖。義不可生。竟被害。司徒達里麻等殮而火之。既葬。莫實其處。時六年十二月也。年五十二。雲南旣平。立祠祀之。著有華川前後集。玉堂雜著。續東萊大事記。子紳。字仲縉。父死時。甫十三。明悟能文章。鞠於伯氏。綬。事母何盡孝。及卒。哀毀踰禮。未幾。綬亦沒。獨傑然負奇志。益取經史百氏言。窮其浩博。會其旨歸。曲暢引之。縱橫磅礴。出入上下。務

探擷精英乃已。潛溪先生一見器之曰：吾友其有後乎？蜀王能下士聞之，聘以爲客。紳痛父死節，憤激遺骸未返，白其事。王憫之，給道里費以行。二十九年，至雲南，號哭訪求，不獲，幾絕者數。過者洒泣，述滇陽慟哭記志感。乃還，建文皇帝卽位，給事中涂誠、御史黃凱會薦爲國子博士，預修太祖實錄，獻大明鏡歌鼓吹曲十二章。曰：神龍躍，曰：殪奔鯨，曰：開洪基，曰：清江漢，曰：縛狡兔，曰：掃殘虜，曰：海波平，曰：拓閩境，曰：定關陝，曰：關川蜀，曰：散苞枋，與方孝孺友善，嘗尊孝孺爲百代儒宗，每勸著書淑來學。孝孺不應，紳悟，遂略文藝，潛心道德。尋上言父死節狀，贈翰林學士，諡文節。明之文臣有諡，自禕始。正統中，改諡忠文。紳以建文二年卒，年四十一。有繼志齋集二十卷行世。子：祿，字叔豐，受業方孝孺，妻以女。方死難，紳周旋其間，又與廖鏞、鄭珣等至聚寶門外，求遺骸歸葬，不得。卒，坐逮繫。太宗念其祖死國，特宥免，且欲用之。疾辭還金華，結屋讀書青巖之下。紳與童景庸書信，痛念遁志名蹟，日就湮沒，欲執事與令兄商榷，輯其學行幽潛生平始末，爲家傳行狀，以傳同志。有愛慕之心者，自能默識謹藏，或可待時發揚於萬一。遂輯方氏遺文爲侯城集。紳性至孝，初紳痛念父沒，每食必斥兼味。紳一遵遺志，子孫相承，閱千百年不變。居喪三年，酒肉未嘗入口。學問該博，從遊者日衆。郡邑交重之，禮爲鄉賓，分獻先聖廟。紳疏髯偉貌，出必儼然古冠服。人爭覩之，曰：此王先生也。所著有青巖聖廟文纂、金華賢達傳、續文章正宗。卒年五十九。門人私諡曰：莊先生。徐子汶舉進士，授中書舍人，亦辭疾不仕。弘治初，與陳獻章並薦，應召道卒。

孫炎，字伯融，句容人。面如鐵，跛一足，持辨風生，能爲歌詩。時丁復、夏煜以詩名，炎遊此兩人間，相切劘，好

立機括。觸紙爛然。雅能飲。與對引務出奇。得一爽句。輒浮白拍案大呼。拔劍起舞。亦以經濟自負。氣豪才雄。蔑視章句。常曰。孫炎男子。豈死蓬蒿下哉。太祖渡江。召見與語。請延攬賢士。以成大業。上悅。辟行省掾。論事慷慨激切。多合上心。從征浙東。擢池州府同知。尋遷華陽知府。已亥。擢行省都事。是年冬。處州初下山澤間。盜賊憑結不解。甚難治。上以炎才。授處州總制。聽其辟任。一切不從中覆。上實未嘗與一兵。但責以口舌安反側。乃匹馬入城。召父老。諭以天命所集。宜稟教化。不且爲僂。衆皆感悅。尋擇勇健者練爲兵。紀律嚴明。賊皆退縮。時才俊士因亂多伏居山谷不肯出。炎悉爲鉤至。劉基、章溢、葉琛皆知名。而基爲最。使者再往返不起。基以一寶劍遺炎。炎作詩以爲劍當獻之。天子斬不順命者。我人臣不可私受。封還之。草數千言論基。文詞瞻美。基不答。然已心折。炎久之相見。飲酒酣。炎論古今成敗之事。如傾峽。略無枝複。基乃深引服。歎曰。基自以爲勝公。審今基何敢望。會上來聘。遂送基京師。炎在郡日。悉反側子。而大寇充斥。日置身狼虎間。無所疑懼。壬寅。降苗叛。害將軍耿再成。炎被擒。幽空室守之。脅炎。炎始給以生。賊觀非本情。恐留自遺患。燼鴈斗酒。噉炎曰。以此與公訣。炎拔劍割鴈。舉卮酒曰。嗟呼。我乃爲鼠輩所陷。爾死。犬豕且不爾食。賊持刀睨炎。炎飲酒自如。賊叱解衣。炎罵曰。此紫綺衣。上所賜。吾當服以死。何可解。引枕而臥。賊猶不忍。伺其睡。乃害之。年四十事聞。追封丹陽縣男。炎妻亦爲賊擒。不屈死。炎事親孝。與人交。緩急可恃。遇匱乏者。解衣推食。所著詩文甚多。有散佚。弟子蔣敬編次傳於世。

葉琛。字景淵。麗水人。元季兵亂。從參政石抹宜孫守處州。時青田葉賢三等作亂。琛爲畫策捕斬之。其餘

山寇竊發者以次翦滅。行省承制授元帥守桃花寨。明兵下處州。琛謂其下曰：金陵兵有紀律，且氣候清明，必成大事。遂來降。而又爲孫炎所招致。僉院胡大海以琛偕劉基送建康。辛丑授營田司僉事。復命同佐鄧愈守洪都。祝康之亂，愈脫走。琛被執不屈，大罵死之。事聞，上痛悼，遣使往祭，追封南陽郡侯，復其家。塑像於院，耿再成之祠有司歲時祀。後友諒滅，配享洪都功臣廟。

許瑗，字栗夫，江西樂平人。聰明強記，至正中兩以易經舉於鄉。皆第一。會試不第，放浪吳越間。每醉輒大言自負，人未有知之者。戊戌太祖駐兵婺州，瑗以儒士進謁。因言于上曰：方今元祚垂盡，四方鼎沸，豪傑才勇之士，勢不能獨安。夫有雄略者，乃可馭雄材。有奇識者，然後能用奇士。欲埽除僭亂，宜攬收英雄。此急務也。上曰：民塗炭，予用英雄如饑渴。大善之。授博士，留帷幄，參謀議。以太平股肱郡，命知府。瑗至，厲士卒，修城池，撫黎庶。庚子漢友諒率舟師攻太平，與守將花雲拒戰，城陷被執，罵不屈死之。追贈高陽郡侯。王愷，字用和，當塗人。幼有大志，通經術，爲府吏。人服其平。乙未太祖渡江，召至幕府爲掾。參決戎事。時新下京口，民杌棼不安，遣慰撫之。效建中書省進左右司都事。遇事彌綸。元戎宿將咸信其言。戊戌，獠兵數萬自杭來降，待命嚴陵境。上遣馳至軍諭之，偕其渠帥來朝。是年冬，胡大海已戍蘭谿，命與愷定議取婺降之。己亥，克三衢，擢左司郎中，總制衢州軍民事。調度有方，兵食俱足。有警，以五丁應付，一丁攻守。凡得萬餘人。會常遇春屯兵金華，其部將或侵民，愷知之，悉械而撻諸市。遇春使人來讓，報曰：民者國之本，將軍天子股肱，肯令傷其本乎？撻一部將而民安。計將軍所樂聞也。遇春歎美之，開化馬宣挾舊印爲亂。江

山楊明特險劫掠。悉討擒之。部內大安。出粟賑饑疫。興學校。士民悅服。諸暨戍將謝再興與部帥王甲有遠言。幾致亂。力調解得安。往來李文忠軍中議事。多用其策。六月。漢寇龍江。上召嚴陵帥葛俊。擢廣信牽制之。愷謂俊曰。廣信爲漢門戶。彼旣傾國入寇。必以重兵爲守。非大將統全師往不可。乃止。俊請胡大海行。廣信乃潰。辛丑。分省於婺。控浙東。胡大海日治軍旅。以民事悉委愷。時力役無藝。乃核故田額數。糧多者爲里正。寡者副之。合計約一斗役一日。賤貴無苟免。金華周泰。義烏柳昌。恃挾蠹民。逮至獄。痛懲之。自是畏避。猾胥潘立。道操一已田賦柄。久緣爲姦。廉其罪狀。以聞。寘於法。綱紀肅然。苗軍亂。胡大海被害。擁愷而出。愷正色責以大義。賊帥劉震欲生之。其黨吳得真素隙愷。曰。無自貽患。乃被殺。并其子行及掾吏章城俱及難。愷年四十六。追封當塗男。愷善謀。能斷。常白事未許。卻立戶外。比暮不去。上出怪而問之。從容諫如初。上爲允行。尤長史事。以儒術飾案牘。辭簡而意周。喜爲詩歌。情意爽豁。上每語侍臣。以經濟材稱之。子三。長祿爲侍儀使。次行。同死於難。次升童。後官郎中。

熊鼎。字伯穎。臨川人。元末。鄉薦。入試禮部。以議論奇。棄不取。歸主龍溪書院。兵亂。立柵結民兵自守。一郡獨完。漢友諒禮致之。不應。鄧將軍愈下江西。聞其賢。邀至。欲薦授官。辭。上至江西。召見。慰勞甚。至。授以官。又以母老固辭。乃留愈府參軍事。母憂旣葬。徵與諸儒。撫作公子書。以調貴戚子弟。初平浙西。授德清丞。鼓鶴皋。反松江。德清震恐。民逃散。鼎坐鎮之。卒得無患。吳元年。召議禮儀。遷中書考功博士。尋任起居注。時上精求禮樂之事。嘗召翰林學士朱升等。陳樂器。俾辯磬聲。升對忤旨。上怒。欲寘升法。鼎從容論解。上

曰升每謂審音。顧不辯宮徵。何耶。對曰。石音難辨。自古而然。唐虞惟后夔能和磬聲。書曰。於予擊石拊石。百獸率舞。上曰。任此豎儒治樂。樂何繇和。鼎具言樂之和由人所致。人君能致中和。則萬民和。萬物和。而樂音和矣。上怒解。釋升。升既出。謝曰。非熊君。吾屬幾殆。會有自廣信還。奏郡縣官違法。茶稅多失實。時新行赦。上怒趨。中書遣御史往廉狀。丞相善長諫不聽。御史已受詔。丞相復諫。又不從。鼎與給事中尹正進曰。朝廷新立。將布大信於四方。今肆赦之後。復以細故而煩御史。按問既失信。且喪國威。上良久曰。止。追御史毋往。上詔浙西民輸糧京師。率五石致一石。民甚苦之。鼎曰。國家都金陵。以浙西爲根本。而遽困之。農作方興。僕僕道路。苟一年失耕。害不淺矣。上悅。卽詔罷之。明年。上卽皇帝位。凡創制更革之典。多預聞。上每字稱而不名。立浙江按察司。以爲僉事。分部台溫。二郡經方氏竊據之後。別部僞官悍將二百人。暴如虎狼。出奇計。盡刮遷於江。淮間。民始安枕。溫有邪師。自號大明教。飾殿堂極麗。民之無業者咸歸焉。以其警俗眩世。奏毀之。散其衆爲農地。多倡家。每朝使以事至。多挾倡飲。有司罷於供應。鼎下永嘉。令籍倡戶數千。械送之京。平陽州吏目杜乙。贓罪事發。下鞠。同知以下皆服罪。獨知州梅謚辯不已。民數百。庶門爭之。鼎將聽之。吏曰。奉詔按獄。而釋知州。情則得矣。知身受故出何。再進民詢之。辭不變。歎曰。法已誅罪。吾敢身畏。譴而誅無罪人乎。釋謚。以情聞。上可其奏。寧海強民陳德仲。以憾密支解黎異死。冤久滯。妻進牒。鼎覽牒疑。忽有青蛙立案上。曰。蛙非黎異乎。果異則止勿動。吾復爾冤。蛙果如言。明日。逮陳訊得實。誅之。凡事未便者。皆爲奏改。兩郡民灑然如更生。始兩郡旱。既至。輒雨。民曰。此熊使君雨也。是年秋。立按

察司於山東擇人行新政。上曰：無如熊鼎矣。改治濟南。論罷州縣貪私數十輩。六郡肅清。遷副使。三年。拜晉王右傅。治宮晉陽。坐事左遷。大同。衛知事。五年。召還。授晉府參軍。復以尚書授秦王經。明年。改刑部主事。八年。授衛經歷。時朵兒只把雖降。尚持兩端。鼎上書萬餘言。謂西涼、岐寧、漢、唐內地不可棄。朵兒只把非有歸向之誠。特假我聲援。脅服鄰邦。爲自安計。朝廷宜思制之之道。急之則必席卷而遁。雖得其地而無民。緩之則恐羽翼旣成。漸致跋扈。宜稍給種糧。撫其遺民。以安衆心。而以良將參守之。則彼特匹夫耳。又將安往。上覽奏。歎曰：人謂熊鼎迂闊。今不迂也。九年。徵還。次西涼打班驛。遇朵兒只把叛兵。擁之北行。以大義切責。兵脅之不屈。遂與中使趙成等皆遇害。年五十有五。上憾悼。遣使葬之。黃羊川立祠致祭。恤其家。時有黃政者。亦死難。政。碭山人。爲僉都御史。以事謫爲桂林府吏。或言其知兵習武。書召還。八年。命往宿。徐收集舊戰士卒。赴遼西從征。二十一年。復從征雲南。未幾。還至普安。遇夷寇。與其子琬力戰而死。

卹典比鼎。

胡深。字仲淵。處州龍泉人。穎拔有智略。涉獵經史。及天官術數之書。父鈺。仕元爲征東行省左右司員外郎。嘗對母趙談兵。父聞警之曰：才雖撥亂。智在識主。父宦游京師。深年十歲。往侍。父使高麗歸卒。奉柩南還。廬墓。益讀書。尤工文辭。元末兵亂。歎曰：浙水東地氣盡白。禍將及矣。結鄉里自固。石抹宜孫辟參軍事。募兵。浹日間得數千。引屯竹口。時盜賊所在結聚。往諭曰：爾皆良民。迫至此。棄伏卽良民耳。盜以深長者不欺。遂降。會韓虎等殺主帥。據城叛。深曰：城中叛者惟一二人耳。請往諭之。軍民見深。相泣曰：吾屬自度。

且暮鬼耳。若得更生，敢不惟命。遂以城降。從征鄱陽賊。青田潘惟賢聚衆不叛。龍泉長吏聞風遁去。賊焚縣治。深之師曰：王毅者，隱德教授，乃與門弟子集義兵，搗退之。里中惡少年疾其功，因害毅。時深在鄱陽，馳歸執肆害者盡殲之。移師攻遂昌。賊酋出戰，深望見笑曰：賊若堅守不出，未易即滅。今來是天授我也。分部諸校，以正兵接戰，奇兵夾擊之。別遣遊兵擣伏匿。比戰，賊三面被擊，大敗，生擒八百人。明兵取浙東，婺衢既下，獨處州爲石抹宜孫所守不降。己亥，太祖遣胡大海由間道取處州。宜孫敗，大軍入城，徇屬邑。葉琛來降，遣琛招諭深。遂來，上素聞其名，至京，擢左司員外郎，與論事稱善。詔還處州，招集舊部。曲從西征，上旣平江西，命守吉安。會浙東苗軍變，殺守將，已而復平。命總制處州軍民事。時寇竊發，人情未固，捕首惡誅之，防禦甚周。慮戍兵單弱，多方招募，遂得兵萬餘人。曰：兵足矣。諗於衆曰：兵少不足禦敵，師衆又無以餉，奈何？衆對曰：養兵所以衛民，苟不爲禦備計，子女玉帛且不保，而況於食。遂長民產勸輸粟，軍興以饒，請寬鹽稅。二十取一，商販大集，以沒入田代租。民甚賴之。薦進士吳世昌司學校事。文治大興，諸全守將謝再興叛，犯東陽。李文忠擊走之，深引兵來援，議以浙東屏障，度地去諸賢六十里，乃築城相犄角，其勢益固。時李伯昇大舉入寇，頓城下，堅不可攻，敗去。上聞，旌其功，賜名馬。遂平青田，方明善取平陽，出偏帥復之，并復瑞安侵地。統正軍攻温州。明善勢盛，與其叔國珍議歲幣，乃遣師。太祖卽吳王位，擢王府參軍，仍總制處州。命征陳友定，取浦城、崇安、建陽，敗將阮德柔兵四萬。友定恐，帥銳卒來鬪，深以氛惡，未卽戰。爲朱亮祖所迫，不得已進擊之，破其二柵，敵悉銳圍深數重。日暮，率精兵突出，伏起，馬蹶見執。友定

不敢害。會元使至督促，乃見殺。年五十二。追封縉雲郡伯。深智識絕倫。藝術無不精曉。個儻好施予。其守鄉郡凡五載。馭衆一以寬厚。用兵十餘年。未嘗妄戮一人。宋濂侍上白虎殿。忽顧問曰：胡深何如人？對曰：文武才也。上曰：誠如卿言。浙東保障。朕甚賴之。比伐閩。有星變。上曰：東南必失一大將。亟使諭之。深已被害。上聞痛惜之。爲之流涕。子楨。刻木具衣冠葬之。友定既死。上使楨樹其肉以祭。

贊曰：明明明祖。旌余祀。忠義相望。芳名載馥。銜命守土。捐徇弗劔。慷慨就刃。審義自剛。遇難實首。苟免無惡。開代傑。搗之冰玉。

史官曰：嗚呼！自王綱而下。皆以死事著聲。成仁取義。方之古烈。奚以尙茲。綱不受賊釋而死。烈哉。偉遲回。欲的當以報也。子孫孝義高一時。不愧其祖父矣。炎奇峭。獨以文章能得士。琛之洪都。瑗之太平。無負此士哉。王愷饒治材而兼武略。鼎雖倉卒臨難。而平日表表有足過人者。使胡深不死。大將才也。其心靡二。豈不足風。

于光、張子明

附徐明傳

于光字大用。南康都昌人。磊落有大志。初集鄉兵自捍禦。尋徐壽輝破都昌。以光爲元帥。守鄱陽浮梁。未幾。陳友諒弑壽輝。光誓不肯北面友諒。庚子七月。光及左丞余椿等擊走友諒部將辛同知。遂取饒州來歸。太祖命光爲江西參政。同鄧愈鎮饒州。已而令光開分省於饒州。與愈連營守禦。尋入金陵。謁上於龍

江授行樞密院判。俾伐徽州。比行召還。解金連環賜之。光頓首謝曰。臣被厚恩。鞠躬盡力。死而後已。辛丑八月。從上伐漢。至安慶。遂攻敗破其水寨。癸卯。從戰彭蠡。大捷。遷指揮同知。甲辰春。武昌平。進鷹揚衛指揮使。戊申。同大將軍徐達取陝西。下潼關。遂領兵守潼關。九月。元兵攻潼關。光出禦。舞稍大呼。橫貫其陣。敵衆大敗。已酉。移鎮鞏昌。飭號令。練行伍。繕甲兵。嚴警備。敵至。輒擊卻之。是冬十二月。屢戰。王保保走之。洪武二年。保保知大軍南還。盛衆襲蘭州。守將張溫以兵少不與戰。嬰城自守。光聞。卽赴援。比抵馬蘭灘。敵猝至。腹背受攻。被執。保保以光至蘭州。城下使諭溫降。光諾。則大呼曰。我不幸被執。公等宜厲城爲守。徐將軍五十萬衆且至矣。虜怒。批其頰。遂被害。城中聞光言。守益固。保保進攻不利。竟引去。光死事聞。上遣祭以少牢。配享功臣廟。光氣貌修整。幼讀書。知大義。善鼓琴。能詩。雅健可觀。兼通岐黃術。望之翩翩佳士。及持戟上馬。意氣雄壯。所向無前。旣死。人皆痛惜之。

張子明。張元帥之子。初以軍功任千戶。取南昌。從大都督朱文正守南昌。癸酉夏。漢友諒圍南昌數重。勢急。文正遣子明建康乞糧。子明取小漁舟。潛夜從水關出。越石頭口。夜行晝止。半日得達。見太祖具言之。上曰。兵勢如何。對曰。敵衆雖盛。而戰鬪死者亦不少。今江水日涸。巨艦將無所用之。又師久乏糧。若援至可破也。上曰。汝歸語文正。但堅守一月。吾當自取之。子明還至湖口。爲友諒兵所執。友諒語之曰。若能誘城降。非但不死。官萬戶。子明佯諾。比至城下。大呼曰。我張大舍。已見主上。大軍旦夕至。將軍無苦。需嬰城以待。友諒以見賣。怒。攢槊殺子明。文正得子明言。氣益倍。隨方應敵。城得不破。援兵至。友諒敗死。初贈武

毅將軍飛騎尉。後加贈忠節侯。廟祀南昌。時有徐明者。有膽力。善修飾。軍中呼爲胎裏蔬。爲管軍百戶。從守南昌。漢友諒圍城急。嘗夜出劫友諒營。獲其良馬以歸。友諒乃設坎以誘之。明善飲。一日浮白狂叫大醉曰。我此番當得友諒首矣。出賊覺。明遂射賊。失入坎中。漢執之歸。誘降不屈。見害。追贈合肥縣男。列祀南昌。

贊曰。兵以正勝。尤以奇應。誘敵成功。慨然殞命。不有所違。衆心奚定。破敵全城。允藉決勝。良馬之獲。膽氣壯盛。

史官曰。于光、張子明之死。若出一轍。皆有晉解揚之義。呼吸之際。足以鼓三軍之氣。而奪敵人之魄。身死城存。似詭實正。可謂烈矣。昔人以唐劉威事例。光謂崇報無聞焉。鷄鳴列祖。豈忘蘭州哉。

李仕魯、陳汝輝、青文勝、薛祥、葉伯巨、周敬心傳

李仕魯。字宗孔。濮州人。幼穎敏。嘗閉室讀書。不窺戶外者三年。賅博淵沈。益切尙友之志。聞婺人朱公遷得晦翁朱子之傳。千里負笈。一見深相契合。專精探究。盡得其所學而歸。元末隱居不出。然所在聲望奕奕。太祖龍潛時。已識其名。洪武初。詔求天下有能傳朱學者。所在以聞。有司乃舉仕魯。應召乘傳至京。上一見喜曰。吾求子久。何相見之晚也。對曰。陛下方以武定天下。臣縫掖下士。溺於章句。不能左鞭右弭。馳驅中原。冀禮興樂成之會。臣以文事進。故意有所待耳。上曰。文武初無異道。朕方收攬才士。以佐太平。乃以文武擇乎。遂除黃州府同知。仕魯曰。臣夙願惟欲朝夕備顧問。以行所學。上曰。姑以民事試子。乃奉詔。

抵任。風裁整峻。政理寬和。民之瘡殘者。卹之。吏之莠蠹者。斥之。期年。以治行卓異。聞於朝。召拜大理寺卿。律比精嚴。守正不撓。時有僧金碧峯者。應對稱旨。求爲僧建職。司授官。許之。仕魯曰。陛下建極之初。意所祈禱。卽爲後世子孫。天下臣民。標表。柰何不崇聖學。而信外道乎。疏至三十上。上堅不從。入涕泣叩頭曰。臣言不入。何以臣爲。願還陛下笏。放歸田里。上震怒。命武士捽搏之。立死階下。事亦不果行。

陳汝輝。字耿光。詔安人。幼攻儒術。兼通武略。尤邃天文地理及數學。結廬南皋。嘗與趙子貞。柳舜舉遊燕。越以觀羣雄者六七年。又與劉伯復。余叔紳。登臨衡湘。久之。歸隱於越。結雲庵。初溪潭上。樹種瓜果。以待嘯侶。恆卽景賦詩。笑傲自若。上旣渡江。秦元之。陳遇交薦之。降書徵辟。時張士德聘幣亦至。並不應。報元之。飛龍在天書。再徵。比之伊呂孔明。復不起。繼而徐達復遣使檄起。亦不至。天下旣定。遂以經明行修。應詔。使大臣校其學行。第一。稱爲八閩元士。時其門人陳元震同舉。元震觀法太嚴。懼甚。乞歸。汝輝留。毅然條論十事。詞氣英爽。授禮科給事中。按視吳松民瘼。吏弊。還奏吳松閩數千里之地。墟港所泊。無它貨。食物悉有征稅。此皆承襲元污。未盡更刷。一切宜掃除之。又言。自古文武並用。所以靖禍亂。綏太平。未聞有縉紳縉流。雜居同事。而可以相濟也。臣觀動舊有德。思欲去位。而縉流儉夫。加以譏間。如劉基。徐達之見疑。李善長。周德興之被謗。視蕭何。韓信之危。相去不遠。府生太學生之斥。視宋臣詠。檜貽譏之逐。能幾何哉。伏願自腹心以至耳目。啓沃喉舌之司。皆處以德行文。章之產。則天下之賢可收。天下之治可成。復承制奏論政疏。請法程灝所陳十事。言之至再。上謂其志大言迂。不達時變。徒滯成語。紛更朝事。汝輝因自

勅求歸不許。以爲大理寺丞。適有疑獄。又上疏曰。伏觀十二月大理寮屬所評張廉使。李知府諸刑。奉有內旨。不敢准理。臣聞張爲廉使。山東杖一僧人。李爲知府。忤一屯道。翰林學士但撰文犯諱忌字。皆非大姦惡。刑部及本寺寮屬。因得內降。但欲織獄。夫廉使知府。非一考六年可至。必疊課積資。以得伏惟念得賢之難。少加愛惜。既奉詔卹刑獄於山東。浙江歸遷本寺少卿。李善長之獄。復上書力爭。善長死。上思汶輝疏。召入賜宴。與侍臣賦詩。名黃花宴。宴畢。仍以鞍馬賜歸。一日。上問卿幾子。朕嘗擢用。對曰。臣有三子。長在太學。次蒙吏部選除序班。季尙幼。上復賜白金綵段。并及三子。汶輝挈子入謝。復留賜宴。因問閩中藥物。汶輝誤對稱俺。科臣劾汶輝倨傲無禮。汶輝謝罪乞休。不許。頃之。山東副使張甲不奉敕諭。鞭笞內戚。上欲處於大辟。汶輝力爭。封還御旨。上怒。遣御前指揮牽赴刑部。金水橋投水死。上聞而悼之。坐指揮不救死。製文諡祭葬鳳凰山。時年九十餘矣。著有南皋集。

青文勝。字質夫。蕪州大寧人。仕爲龍陽縣典史。龍陽治瀨洞庭。歲罹水患。賦額繁重。年徵課三萬七千有奇。積逋數十萬。斃於敲扑者相踵。文勝至。歲大稔。疏請蠲恤。不報。再疏。復不報。歎曰。吾爲民請命。不得。明主可以死悟也。袖諫章。擊登聞鼓。輒自經。鼓下。太祖聞之。爲改容哀其志。詔寬龍陽租二萬四千有奇。定以爲額。邑人貌祠之。扁曰惠烈。子孫貧困不能歸。因家焉。其後裔有登科者。

薛祥。字彥祥。無爲州人。元季。與舒城許榮各集義兵保鄉里。乙未。從俞通海來附。爲水寨管軍。鎮撫。屢從戰。得侍黃船。與議軍政。太祖語俞平章曰。汝之功。非彥祥不能成。以後攻浙。拔吳。定中原。皆與有功。洪武

元年漕運孟津。上遣人謂曰：聞有亡命潛伏來劫，毋得輕敵。夜半抵蔡沙，賊千人果至。祥理解散之。上聞甚喜。祥方患背疽，上親視之。顧延安侯曰：汝等其善護祥，且言其多軍功，勤供億，古蕭何寇恂也。特命爲都漕運使，自揚達濟，修築垣堰，衆勞無怨。諭以奏功，授職者三十餘人。時幽薊初附，官民南遷者皆賴之。海州亂，駙馬都尉黃琛討平之，擒萬餘人。祥與會問，無名號者皆釋之。所活甚衆。八年，召爲工部尙書。李善長奏鳳陽工人鬻鎮，祥面折曰：太師一言壞天下人。若此，恐不利子孫。乃命釋無罪者，活數千人。九年，營謹身殿，部奏誤匠役以中等作上等，上大怒。命有司皆棄市。丞相大夫不得復請。祥抗諫，得下腐復奏曰：是成廢人，莫若杖而復工，從之。是歲改天下行省爲布政司，授祥北平布政使。三年，爲天下治行第一。胡惟庸惡之，坐以營建擾民，降知嘉興府。十三年，惟庸誅，召復工部尙書。上問姦臣譏汝何不言，對曰：臣無所知。十四年，復以直諫死。杖下子四，凱能、政、宣，皆徙于瓊。

葉伯巨，字居升，寧海人，好讀書。年二十餘，有名於鄉黨。善說禮。凡朋友有婚喪，必延爲相。性耿介，不能藏人短，見不善，立折之，不顧其喜怒。人知其無它，終亦不恨也。以通經術進太學。未久，詔諸生分教河北子弟，得平遙。待諸生如子，人咸愛敬焉。洪武九年，星變，下詔求言。伯巨曰：今天下有三事最切，其二事易見，而爲患小，其一事難見，而爲患大。此三者積於吾心久矣，縱不求，猶將言之。況有明詔乎？卽爲書言三事，曰：分封太侈也，曰：用刑太繁也，曰：求治太急也。主上有天下，埽除羣雄，如踏草介，包絡豪傑，如臂使指。公卿大臣數十萬衆，戰勝攻取者，一介使召，拱手聽命，無敢後時。況敢有抗衡者乎？傳曰：都城過百雉，國之

害也。先王之制，大都不過三國之一，小九之一。國家裂土分封，懲宋、元孤立，然而秦、晉、燕、齊、梁、楚、吳、閩諸國，各盡其地而封之。都城宮室之制，廣狹大小，亞於天子之都。賜之以甲兵衛士之盛，臣恐數世之後，尾大不掉。然後削其地而奪之權，則起其怨。如漢之七國，晉之諸王，否則恃險爭衡，否則擁衆入朝，甚則緣間而起，防之無及也。議者曰：諸王皆天子親子，皇太子親骨肉，所謂磐石之宗，天下服其強耳。禮莫大於分，使王侯之國與京畿同，則爲列國矣。尙有君臣之分乎？今秦、晉、燕、齊、吳、閩諸國，連帶數十城，而復優之以制，假之以兵，無事則易驕佚，有事則易僭亂，何不據漢、晉之事觀之乎？孝景皇帝，漢高之孫也。七國之王，皆景帝之同宗父兄弟也。當時一削其地，則遽搆兵西向。晉之諸王，皆武帝之親子孫也。易世之後，迭相擁兵，以危皇室，遂成五胡雲擾之患。由此言之，分封除禍，患立生。援古證今，昭昭然矣。當賈誼勸漢文帝早分諸國地，空之以待諸王子孫，謂力少易使義，國小無邪心，使帝盡從誼言，必無七國禍。願及諸王未之國前，節其都邑之制，減其衛兵，限其疆理，亦以待封諸王之子孫。此制一定，然後諸王有聖賢德行者，入爲輔相，其餘世爲藩屏，可以與國同休。世世無窮矣。古者斷死刑，天子爲之撤樂減膳，而寓慘怛之意於其間，誠以天生斯民，立之司牧而教養之，俱欲其並生於天地之間也。故其子孫享國久遠者，六七百年，近者亦三四百年，豈偶然而已哉？笞杖徒流死，今之五刑也。用此五刑，旣無假貸，一出於大公至正可也。而用刑之際，多出聖衷，致使治獄之吏，務從深刻，以趨求上意。深刻者多獲功，平允者多獲罪，或至以贓罪多寡爲殿最，欲求治獄之平允，豈易得哉？今四方平矣，民庶思治矣，而不務以寬厚御之，視

誅殺人如滅螻蟻。使民不獲安息。欲以圖治。難矣。古之爲仕者。以登仕版爲榮。以罷職不敘爲辱。今之爲士者。以混迹無聞爲福。以受玷不辱爲幸。以屯田工役爲必獲之罪。以鞭笞捶楚爲尋常之辱。其始也。朝廷取天下之士。綱羅摺撫。務無遺逸。有司催迫上道。如捕重囚。比至京師。而除官各以貌選。故所學或非其所聞。而所用或非其所學。泊乎居官。言動一跌於法。苟免誅戮。則必屯田力役之科。所謂取之盡錙銖。用之如泥沙。率是爲常。少不顧惜。然此亦豈人主樂爲之事哉。良由激濁揚清之不明。善惡賢愚之無別。議賢議能之法。旣廢。以致人不自勵。而爲善者怠。有人於此。廉如夷。齊。智如良。平。一或不謹。少戾於法。上之人將錄其所長。棄其所短。而用之乎。將舍其所長。指其所短。而寘之法乎。漢之世。徙大族於山陵矣。未聞實之以罪人也。今鳳陽皇陵所在。龍興之地。而率以罪人居之。以怨嗟愁苦之聲。充斥園邑。非朝廷所以恭承廟意也。賊人僞四大王突竄山谷。捕之數年。旣無其方。而乃歸咎於新附戶籍之細民。而遷徙之。騷動四千里之地。鷄犬不得寧息。況新附之民。日前兵難。流於他所。朝廷許之復業。而來歸者。今旣附籍矣。乃取其數而盡遷之。是法不信於民也。夫有戶口。而後田野闢。田野闢。而後賦稅增。今責守令增戶口。正謂此也。近者納稅糧之家。雖承特旨分釋還家。而其心猶不自定。已起戶口。雖蒙憐恤。見留開封聽候。今軍士散漫村落。居民不知所爲。訛言驚動。況太原諸郡。外界邊鄙。民心如此。甚非安邊之計也。臣恐自茲之後。北郡戶口。不得復增矣。何者。小民易動而難安。今之小民。以爲新籍在官。乃見遷徙。反易逃匿。若欲遷徙。概而遷之。我奚先受其殃乎。主上切切以民俗澆漓。人不知懼。法出而姦生。令下而詐起。故或朝

誅而暮犯者有之。昨日所進今日被戮者有之。乃致令下而尋改。已赦而復收。天下臣民莫之適從。而不能相安者。甚不稱主上求治之心也。求治之道。莫先於正風俗。正風俗之道。莫先於使守令知所務。使守令知所務。莫先於使風憲知所重。使風憲知所重。莫先於朝廷知所向。朝廷知所向。則必以簿書期會。獄訟錢穀之不報爲可恕。而世俗流失敗壞爲不可不問。而後正風俗之道得矣。風俗既正。天下其有不治者乎。以農桑言之。方春。州縣下一文帖。里中申回文狀而已。守令未嘗親點視蒔次。第旱澇預備之具也。以學校言之。各處生師缺員者多。縱使具員。守令亦鮮有以禮讓之實。作其成器者。朝廷切切社學爲重。教民之急務。屢行取劾。師生姓名所習課業。如是之詳。今之社學。當鎮城郭。或但置門牌。遠村僻處。則又具其名耳。守令亦未嘗以教養爲己任。徒具文案。以備照刷而已。及至憲司分部按臨。亦但循習故常。依紙上照刷。亦未嘗差一人。巡行點視興廢之實。上下視爲虛文如此。小民不知孝弟。忠信爲何物。爭鬪之俗成。奸詐之風熾。而禮義廉恥。墮地矣。此守令未知所務之失也。風紀之司。所以代朝廷宣導風化。訪察善惡。條舉綱目。拯治萬事。至於聽訟讞獄。其一事耳。今以訟獄爲要務。一不稱職。雖有忠臣孝子。義夫節婦。視爲虛文末節。而不暇舉其始。但知去一賊吏。決一獄訟爲治。而不知勸民成俗。使民遷善遠罪。爲治之大者也。此風憲未知所重之失也。天下郡邑生員。考於禮部。升於太學。使歷練衆職。任之以事。可以洗歷代舉選之陋。而上法成周之制矣。然而郡邑生員。升於太學。或未數月。遽選入官者。間亦有之。臣恐此輩未諳時政。未熟朝廷禮法。不能宣導德化。上乖德政。下困黎民。開國以來。遷舉秀才。不爲不多。選任

名位不爲不重。自今數之。賢者寧有幾。豈不深可痛惜乎。夫圖治於陵剝之餘。猶理絲於焚亂之後。緩之則端緒可得。欲速則膠結而不可窮。今病民之不安。奸邪不止。朝夕異令。賞罰不準。君勞於上。臣困於下。治烏可致乎。書奏。上大怒曰。伯巨何物。乃敢間吾骨肉。我見之心憤切齒。可使吾兒見乎。速取來。吾將手射之。且啖其肉。逮至。丞相乘上喜。乃敢奏聞。瘦死刑部獄。

周敬心。山東人。太學生。洪武二十五年。訪求曉歷數善知來者。爵封侯。祿千五百石。敬心上疏極諫。且及時事。奏以爲臣聞國祚長短。在德厚薄。不在歷數。三代尙矣。三代而下。德澤最厚。莫如漢。唐。宋。國祚最短。莫如秦。隋。五代。如漢高之寬仁。繼以文。景。昭。宣。光武之廓大。繼以明。章。唐太宗之仁義。繼以肅。憲。宋太宗之誠愛。繼以眞。仁。是以有道長也。始皇之酷虐。煬帝之苛暴。五代之窮兇。是以無道短也。由此觀之。皆係人事。不在歷數。陛下以神聖之資。膺天眷命。掃滅胡夷。救亂誅暴。厥功偉矣。然神武過漢。不及其寬大。賢文過唐。宋不及其忠厚。是以御宇以來。政教行而民不悅。法度嚴而民不服。陛下若効兩漢之寬大。唐宋之忠厚。講三代所以有道之長。則帝王之祚。可傳萬世。何必問諸孤方小道之人耶。臣又聞陛下連年遠征。北出沙漠。臣民萬口一詞。爲恥不得傳國靈。欲取之耳。臣不知靈何始哉。聞楚平王時。琢以卞和之玉。秦始皇祕之曰。御靈。自是以來。歷代帝王。珍如執券。不得則若有所遺。然戰國之君。趙先得靈。其國不守。五代得靈。不旋踵亡。臣又聞莊宗滅梁。取蜀。靈併歸唐。及晉石敬瑭反。潞王從珂攜傳國寶登樓自焚。則秦靈雖在。固已燬矣。敬瑭入洛。更以玉爲之契舟。滅晉。重貴獻之。詰其非眞。言故乃止。女直之亂。遼王延

禮遺傳國寶於桑乾河。元世祖時有札刺爾者。漁而得之。今元人所挾石氏甕耳。昔者三代不知有甕。仁爲之甕。故曰聖人大寶曰位。何以守位曰仁。今陛下國則願富。兵則願強。城池則願高深。宮室則願華麗。土地人民則願廣。大征伐兵革。歲無虛日。此忽三代之大甕。而求漢唐宋之小甕也。臣聞自古不嗜殺人者能一天下。秦隋元魏好殺不已。迨其後世。至於滅絕。漢時誤殺孝婦一人。海潤三歲。人事天應。不可不謹也。臣見洪武四年錄天下官吏。十三年連坐胡黨。十九年起天下積年民害。二十三年大戮京民。妄言罪名不分臧否。一概被誅。夫其中豈無忠臣烈士善人君子。於茲見陛下之薄德而任刑矣。水旱連年。豐稔不臻。夫豈無故。臣又聞明主賞不僭而刑不濫。刑既濫矣。賞復無節。天下老人非功非德。賜鈔五錠。出征軍官位高祿厚。平寇禦侮。固其職事。而賞賜無藝。厚斂窮民。不嚴駁幸於無功。此亦明主所宜禁也。書奏上怒。旣而原之。後隱居不仕。

贊曰。危言觸諱。身撓逆鱗。風節矯矯。直氣嶙峋。力闢異教。冤抑爲伸。登聞死諫。楚庶獲春。刑威屢霽。終以諫殉。陳說痛切。無慚古人。

史官曰。犯顏抗對。折檻之風。邈矣。而仕魯以死爭儒。墨之辨。吾道關繫甚鉅。其孔孟之功臣乎。當汶輝壯遊四方。結廬南泉。迹其始類縱橫家。而應詔後所奏論切時要。皆廷臣所劾舌鼠項而避之者。徵書所謂伊呂孔明。卽不及。亦其流亞歟。文勝自毅以活人。不愧惠烈矣。祥敢言。卒死於言。安在明主可爲忠言也。使伯巨分封之議行。第王燕以數縣。卽鬚長過腹。寧遂貴不可言。敬心暴其所忌。得老死牖下幸矣。皆所

謂逢、比、九、鄂之選哉。

明
書
卷一百一



二〇三九



明書卷一百二

列傳二

忠節傳二

徐輝祖梅殷傳

徐輝祖中山王達長子。初名允恭。母謝。生輝祖。少而白皙。秀眉目。豐頤方面。及長。身八尺五寸。顧盼有神。舉止儼雅。父達數鎮北平。留宿衛。御家家衆肅然。理左府事。給月祿。達還自北平。道病疽。手詔遣往迎勞。達薨。又三年。己巳。襲爵。賜誥。稱揚中山之烈。而勉輝祖忠以立志。禮以守身。恪盡繼承之道。尋以皇太孫允炆嫌諱。改名。賜黃金三百兩。白金二千兩。鈔三千錠。綺綾四十端。俾還鳳陽。賜第。以歲時入覲。尋給兵百二十人爲衛。復賜鈔四百錠。詔還公田於官。仍太倉歲支祿五千石。時諸將皆老。輝祖以材器特見信用。數往陝西。山東。西北平。河南練兵治餉。降將阿魯帖木兒隸燕府。有異志。爲人所發。上密詔王訶實。而命輝祖以詔往。於是悉得實。合策捕誅之。還領中府。又遣諭燕王。送虜虜至京。并出獵勒兵之法。二十九年。國子學正吳啓請重臣甄別國子師生。上以輝祖同禮部翰林官。詣監試其文藝。分別送吏部銓用。上知其有文。故特遣之。人以爲榮。建文皇帝卽位。用爲肺腑。與曹公李景隆領朝班。加太子太傅。先是輝祖

嘗侍孝康皇帝於潛邸。同諸王講讀。學通經史。又從詹希原學書。時建武學於京師。教將臣子弟。與駙馬都尉梅殷往來提督。絃誦大興。時藩國興盛。齊秦等議削奪。亦與密謀。數宴見定進止。燕王尤以屬尊見疑。先太祖崩。遺詔各王臨本國。燕王不從。入臨。至淮。特敕阻歸。明年小祥。燕王入朝。行皇道。被劾不問。尋辭歸。世子兩郡王皆留。既猜嫌益甚。燕王稱病。請還。世子郡王朝議以遺命喪畢。方遣。不許。燕王固請。未決。建文皇帝以達女爲燕王妃。召輝祖及其弟增壽議之。輝祖執不可。且密奏高煦好勇無賴。自恃騎射。非惟不忠。抑且叛父。它日必爲大患。請收之。增壽以百口保無它。高煦已竊入輝祖廐。取其善馬馳去。輝祖卽以聞。欲追之。增壽與駙馬王寧力爲庇。黃子澄亦曰。留之生疑。并世子及二郡王皆遣歸。燕謀得行。仍數陰陰餌之。確然不撓。上益信重之。燕兵旣起。謀大將當屬輝祖。終以王妃相左。嘗一出兵。又有疑而言者。謂顧私親戰不力。亟召還。由是諸將連敗。增壽密爲內應。燕兵日迫。渡江。輝祖與開國公常昇分道出師禦戰。援何福於齊眉山。斬燕千戶李斌。燕兵再卻。尋召還。燕王入城。輝祖仍率兵巷戰。不支。獨守先廟。不迎。太宗卽位。廷臣論劾。令自陳狀。止書中山王達開國功子孫免死而已。太宗大怒曰。此與齊秦輩同罪。宜誅。沈吟久之。削爵。鋼私第。尋下獄。尋竟自裁。年四十餘。十八年。上念中山王達功。且以后恩。召其長子釋伽保見。賜名欽。襲魏國公。盡還誥券。歲祿賜田。欽乞守父墓。上怒。復削爵。徙鳳陽。仁宗卽位。欽來朝。復爵。尋卒。子顯宗嗣。太宗封增壽爲武陽侯。進定國公。世襲。萬歷初。詔錄建文死事諸臣。各以官稱立廟南京。而輝祖居首。

梅殷夏邑人。汝南侯思祖從子。初殷之祖以水卒從太祖軍中。號曰梅梢。鄱陽之戰。矢幾及上。梅梢僂上坐得避。矢從上左側過。僅一線耳。時力戰與死者甚多。上倉皇不能盡憶。亦不能一一頒賞。比上卽位。梢老矣。失明。無爲言者。他日候上郊。使殷掖之路隅。呼屬車下曰。皇帝皇帝。忘梅梢耶。上視之大驚曰。果忘公矣。卽召厚賜之。洪武十一年。殷尙太祖第二女甯國公主。爲駙馬都尉。恭謹有謀。勤問學。能騎射。諸駙馬中太祖尤愛殷。十九年。敕殷提督山東學校。兼理地方。敕語謂殷篤學。精通經史。堪爲儒宗。後受密命。輔建文皇帝。燕兵起。殷充總兵官。鎮守淮安。悉心防禦。號令嚴明。燕王遣殷書。欲進香金陵。殷報書云。皇祖有禁。遵者爲孝。不遵者爲不孝。時燕王稱兵已三年。所得燕南及山東州縣俱不能守。又大敗於東昌。甚窘。會有內間言。南朝諸重將皆分屯山東。京師空虛。遂引兵直趨南。南諸將反隔於後。倉皇追戰。咸不利。沿淮相持者數日。糧乏欲走。合勢出戰。俄以驚疑大潰。諸將皆被執去。而淮安實不聞。燕王遣使假道。遣書言興兵以除君側之惡之意。殷割使人耳鼻。授詞答曰。留汝口與殿。下言君父恩義。燕王憚其詞直。又城堅兵勢重不可攻。竟不敢道淮安。乃渡泗水。破盱眙。出六合。至京師。卽帝位。殷尙擁重兵。淮上太宗迫公主招殷。公主嚙指血爲書以達殷。殷得書慟哭。詢皇帝所在。使曰。去矣。殷曰。君存與存。君亡與亡。吾姑忍俟之。乃還京。見上。上曰。駙馬勞苦。曰。勞而無功。徒自慙耳。久之。殷不能平。時見詞色。上疑之。嘗夜遣小中官潛入殷第。察之。殷愈怒。都御史陳瑛言。殷招藏亡命。私匿胡人瓦剌灰。與女秀才劉氏。朋邪詛說。以公主故。隱忍不罪。而心銜益甚。永樂三年冬。早朝。召殷。都督譚深。指揮趙曦。令人擠殷死。笄橋下。曦水。

淺不能沒。奮舟駕其背而死。乃言殷自投水死。都督許成發其事。上乃罪深。曦二人對曰。此上命也。奈何。罪臣上大怒。立命力士持金瓜落二人齒斬之。諡殷榮定。公主以上果死。殺殷。牽衣大哭。問駙馬安在。上笑曰。爲公主蹤跡賊。無自苦。乃官其子順昌爲中府都督僉事。景福爲旗手衛指揮僉事。賜手書曰。朕不念爾母。爾安得至今日。後俱改孝陵衛指揮使。宣德中。與世襲孫純。成化辛丑進士。爲定遠知縣。忤上官棄歸。改襲前職。官至中都副留守。初燕兵起。公主嘗貽書以大義阻兵。太宗不答。兵至淮北。與公主書言。興師不得已之故。令遷居太平門外。勿罹兵禍。公主應不答。殷死。瓦刺灰乃持刀割深。曦手足。剖取其腸。持祭殷畢。遂自縊於旁。灰降虜也。向屬殷幕下。

贊曰。徐居元勳。梅受顧命。外雖懿親。內實君令。守死不移。國亡猶說。功憾其無。死得其正。一心靡二。親臣之鏡。

史官曰。書稱熊羆不二心者。保乂王家。而漢室帶礪之盟。爰及苗裔。助戚尙矣。矧開國元功。密受偶賣之命者乎。金川旣啓。喋血飛灰。忠義性生。自難委折。然椒塗有倪天之妹。瀉納有釐降之姬。少一移志。當以元舅帝甥居上公。備心肺。不亦以功名終乎。而輝祖恬然趨死。殷乃怏怏不忘。身可幽。名可榜。爵可停。榮顯如土苴。而志必不可奪。蓋此之所處極難耳。魯昭公之失國也。叔昭子祈死。君子以爲義而哀之。司馬孚曰。臣死之年。固大魏之忠臣也。予於徐梅亦云。

方孝孺

附林右

盧原質、廖鑑、胡子昭、葉惠仲、劉瑞、王高、鄭公智、劉政、鄭居貞、林嘉猷傳

方孝孺字希直一字希古浙寧海人祖炯子二長克勤次克家克勤洪武初由薦辟爲濟南知府學術治行名於一時生孝孺是夕有大星隊其所幼精敏絕倫雙眸炯炯如電日讀書積寸爲文雄邁醇深鄉人目爲小韓子年十四五從父宦遊齊魯間歷覽周公孔子廟宅考古聖賢遺蹟喟然曰無尼父安所瞻依如顏閔固未可企假令與游夏共遊孔門亦當比肩伯仲聞者以爲狂會克勤以空印事被誣逮繫孝孺疏乞身代不報曹公李文忠見之期以國士時宋濂以道義文章重海內克勤於獄中命孝孺往問學焉一見大加賞異曰吾閔士多未有如子者克勤尋歿孝孺扶喪歸是時濂亦乞還金華孝孺往來四年濂門多天下名士如胡翰蘇伯衡皆自謂弗如比於歐蘇濂每稱其凝重洞釋諸理孝孺顧末視文藝恆以明王道闢異端爲己任世咸以爲程朱復出嘗臥病絕糧家人以告笑曰古有三旬九食貧豈獨我哉洪武十五年濂入京侍宴受命作靈芝甘露頌歸醉臥忘之孝孺度未能興密爲代之比且濂愕曰死矣孝孺曰無恐某已代屬草未知當否濂卽攜入上覽曰此非學士筆也濂頓首以實對上曰良勝汝召見試以一論五策立成上改容歎曰異才也賜緋袍腰帶猶平巾往見東宮宴禮部則遣使人欲所坐几試之孝孺必正席乃坐上喜其端整而□其傲謂東宮曰此莊士當老其才留輔汝光輔太平也諭還家濂爲文送之期以遠大有曰予所許汝不獨以文後二十餘年當信予爲知言其秋濂徙蜀孝孺爲文籲天願

損己壽年益師。壬戌，與葉林、張陳四君子登巾子山絕頂，縱譚千古。曰：此樂蘇子瞻死後三百年所無也。杜門著述，適有仇家獲罪，詞連孝孺，有司籍其家，械送闕下。上見其名，曰：是方生耶？釋之，令奉祖母葉。挈妻子還。二十五年，以薦召之，入對。上方重賞，謂未遑教化，曰：今非用孝孺時。除漢中教授，日與諸生講明聖學。蜀獻王聞其賢，聘爲世子師，每見必陳說道德，王喜甚，尊以殊禮。召對不名，號其讀書之廬曰正學。丙子，考文京府，皇太孫卽位，召爲翰林博士，進侍講，尋陞侍講學士。預經筵，備顧問。孝孺每曰：治先制作，經制在周官。建文皇帝虛己以聽，德望旣隆，一時倚重，上每讀書有疑，卽召講解。臨朝奏事，臣僚面議可否，必命孝孺就辰前批答，預修太祖實錄及類要諸書，爲總裁官。會改護身殿爲正心獻銘，作凝命神寶，又作頌，皆規正君德。比定官制，改文學博士，燕兵起，日召諮議，詔檄皆出其手。先是燕王發北平，僧道衍送之郊，密啓曰：臣有所請。江南方孝孺者，學行高卓，必抗不降，乞勿殺之。天下讀書種子絕矣。兵及江上，孝孺畫策堅守，誓死社稷。建文皇帝旣去，宮中火熾，孝孺乃服斬，衰晝夜哭，鎮撫伍雲等執以獻。不屈繫獄。一日，王遣諭再三，終不變。復召草禪詔，及見背立，悲慟聲徹殿陛。太宗降榻勞曰：先生無自苦。予欲法周公輔成王耳。曰：成王安在？上曰：彼自焚死。曰：成王不存，何不立成王之子？上曰：國賴長君。曰：何不立成王之弟？太宗語塞。曰：此朕家事，先生無過勞苦。顧左右授筆札，曰：詔天下非先生草不可。大批數字云云。投筆於地，哭且罵曰：死卽死，草不可得。上大怒，叱曰：汝不顧九族矣。孝孺奮然曰：能殺我十族乎？命以刀抉其口，旁至耳。孝孺噴血犯御座，罵喃喃不絕。復繫獄以俟。據其宗支及母族林彥法等妻族鄭原

吉等示且脅之。執不從。上怒甚。乃括朋友門生爲十族誅之。然後詔磔之。聚寶門外。慨然就戮。爲絕命詞曰。天降亂離兮。孰知其由。姦臣得計兮。謀國用猶。忠臣發憤兮。血淚交流。以此徇君兮。抑又何求。嗚呼哀哉。庶不我尤。時年四十六。詔收其妻鄭。鄭與二子中憲。中愈。先已自經死。二女投水死。宗族坐死八百七十三人。時外親族盡數鈔沒。發興州等衛充軍。尋調三萬衛。再調甘肅衛。坐死者復千餘人。距濂惜別時。恰二十年矣。孝孺和粹貞亮。事親孝。處師友篤恩義。先當宋濂死。葬夔州。孝孺自漢中走荆榛往祭。哭盡哀。言於蜀王。厚恤其孤嫠。道變。復艤舟哭移時乃去。每私居念及。或見其手跡。或對客譚及。輒泣不能止。與林右。王紳。郭濬。劉浩。葉見泰。諸名士友善。切磨道義。被薦時。王叔英與書。大率以時措之宜爲言。及與政。輒慕古王政。盡欲見諸行事。以故多紛更。其文章大類蘇氏。而正論過之。嘗謂道之於事。無乎不在。列爲二十八箴。雜誠三十八章。以自警。謂化民必自正家始。作宗儀九篇。謂先王之治。先德禮而後政刑。作深慮論十首。以篡臣女主夷狄。雖一天下。不可爲正統。作釋統三篇。多先哲所未發。四方夷裔得一字寶於金壁。死後遺骨。門人廖鏞。王稔等瘞之。聚寶門外。有分攜還鄉者。故各處多孝孺墓。同時文學用事之臣。際會功名。作實錄。極詆孝孺。後彭澤作哀江南詞。有曰。後來姦佞儒。巧言自粉飾。叩頭乞餘生。無乃非直筆。仁宗嘗諭羣臣曰。若孝孺輩。皆忠臣也。詔姦臣黨與從寬典。方氏遺族始有赦還者。一子婦魏氏亦得歸。因卽故居立祠祀之。後王稔輯遺文爲侯城集。謝方石鐸與黃文選。孔昭蒐集得三十卷。拾遺十卷。爲文千二百首。所稱遜志齋集。孝孺自號也。又著有周禮考次。大易枝辭。武王誠書注。帝王基命錄。文統。

宋史要言諸書弘治中給事中金谿吳世忠請表祠孝孺等台人繆恭走京師上六事亦以爲言皆不報至萬歷初始詔許寢錄建祠祠於南京朝天宮前位居第二南都察院司務余養蒙建顯祠於聚寶山之木末亭方氏旣無噍類惟克家子孝復於洪武二十五年湯和城海上加賦寧民羣赴闕奏減孝復與焉謫寧夏慶遠衛軍攜宗圖以行及孝孺死難鈔逮不及軍故孝復以軍支幸脫仁宗大赦孝復子琬援例調海門衛軍尋釋爲民繇是方氏之嫡胤始歸成化十八年謝鐸謁祠琬孫志淵出迎鐸喜先生有後因題詩贈之有孫枝一葉是君恩之句乃志淵故有仇人曰葉瑛者遊於海鹽得見鄭曉恣其說遂以人傳又乞王世貞爲復姓記天啓中松江人俞斌原竈丁欲脫其籍販於寧豔慕卹改縣志於名宦魏澤下摘去黃萌三行竄入托孤一節指幼子名德宗以爲俞允任勉等求王世貞作復姓記松江益張大其事造祠立碑募歸宗錄至寧海瀾告侵奪知府洪都松人主其說訟者數年後始審查明確黜革方氏揭奏於朝始定總之遺族赦還京者其實錄也兄孝開字希學少有至性十三喪母輒稽典禮蔬食水飲越三年及父卒居宿於外祖母亡亦如之每一號慟聲盡氣極嘔出血扶而後起寢成羸疾守禮益確家素貧吉凶之禮儉而不陋平居未嘗去書徧學五經而邃於易德器完粹爲文章理深意遠議論風偉從學者甚衆孝孺嘗曰某所以竊知斯道者非特父師之教抑亦吾兄之訓飭也卒於家弟孝友字希賢庶母董出與孝孺訣詩曰阿兄端不淚潛潛取義成仁在此間華表柱頭十載後旅魂依舊到家山士論壯之後亦見收其友有林右者字公輔浙臨海人洪武中爲中書舍人嘗奉詔行邊有勘定功進春坊大學士輔導

皇太孫以事謫中都教授尋掛冠歸聞孝孺死爲位哭於家永樂戊子島夷訶海上台被毒甚地方官聞右才請爲閩里計右勉起視兵督郡子弟勦平之上以此知名遣使召之不赴令武士械至京然猶以溫語相慰勞欲錄用右對曰罪人逃死已久藉令可仕當與方孝孺同朝矣上怒命劓之竟死

盧原質字希魯初名質寧海人母方氏孝孺之姑也文學得於方氏爲多洪武戊辰舉進士第二授翰林編修庚午以父喪歸歷遷太常少卿建文中多所建明密參謀議壬午孝孺死原質坐黨族其家與弟原林等太宗皆收殺之

廖鏞德慶侯永忠之孫父權嗣封鏞以適子任散騎舍人歷官至都督建文中與兵事時宿衛殿廷燕王既破京師以鏞與其弟銘嘗受學方孝孺令召之孝孺怒曰汝讀幾年書還不識箇是字復命太宗大怒殺孝孺鏞銘拾遺骸骨葬聚寶門外山上甫畢而廖氏亦見收鏞銘逃去永樂元年四月錦衣衛奏獲鏞送刑部論死弟銘鉞及從父淮安指揮僉事昇俱謫戍邊鏞母東甌王長女也并銘女送浣衣局從兄基指揮同知投獄死

胡子昭字仲常初名志高字伯尙四川榮縣人富經術性耿介少從學方孝孺游漢中蜀獻王重之贈以詩以明經薦爲榮縣訓導建文初陞翰林檢討遷山東僉事進刑部左侍郎四年九月十一日坐方黨死臨刑高唱詩曰兩間正氣歸泉壤一點丹心在帝鄉年四十一閩族被擒父復初母郭皆年八十餘子五人紹緝繼等皆謫戍妻女給功臣爲奴正德中巡按御史熊相立祠祀之弟子義一名志遠洪武時薦辟

歷蜀府典寶。聞兄死，棄官辟丹陵。蜀獻王深憐之，令削髮爲僧，以親遺體辭。有子二人，方數歲。子義曰：我兄無後，天不絕吾生。二子當免難，竟攜二子避去，莫知所之。

葉惠仲，名見恭，以字行。浙臨海人。與兄刑部主事夷仲，名見泰，並有文名。時稱二葉，各有集。惠仲性亢直，雅爲方孝孺所知。初任廣武衛知事。建文初，以知縣入史館，與修太祖實錄。二年，爲會試同考。陞南昌知府。未行，永樂元年二月，坐實錄書燕兵爲逆，黨上怒，追以孝孺黨，磔籍其家。年六十四。妻蕭，給功臣家爲奴。

劉瑞，王高俱南昌人。建文二年，同舉進士，相友善。端由給事中遷大理寺丞，高爲刑部郎中，皆廉明執法。壬午之變，端約高棄官去，跡露被執，召問練安。方孝孺何如人，端曰：忠臣也。上曰：汝逃，忠乎？端曰：存身以圖報耳，命與高俱劓之。太宗笑曰：看你這副面皮，端嘗曰：我到有顏，卽死可見皇祖。上大怒，立捶殺。戊其家。先是孝孺見收，端高俱爲法官，息孝孺樹陰，上已心惡，至是殺之。端著有儒行十二篇，懷古詩集，百家輯錄行世，後建大節祠，並祀之。

鄭公智，字叔貞，浙寧海人。力學好古，工文辭。與林嘉猷皆方氏姻戚。孝孺薦之蜀獻王，召至成都。王與語，史論詞藝，公智數數稱述河間、東平賢行。王說之。建文初，從孝孺至京，尋舉賢良爲監察御史。吏事精敏，持法不阿。燕兵至，坐方黨論死。而宋濂孫情又坐鄭黨，陳瑛請並罪之。太宗曰：濂名儒，開國時事，皇考有勞，宥之。獨殺公智。

劉政字仲理長洲人幼聰睿力學居恆以忠義自許建文己卯舉應天鄉試第一考官方孝孺以託孤寄命命題得其文驚曰此他日臨大節而不可奪者批有羣鳥孤鳳之語一時稱爲得人及燕兵起感憤不食成疾乃草平燕策將獻之臥病未得行數問其家人曰燕兵得無渡江乎恐疾劇不以告後聞京師破孝孺被收乃責其家人曰胡不早言使余得一伸志以死也因擲足榻前啞血死

鄭居貞初名久成改士恆以字行徽州人豐頰美髯善書從父潛官閩中因家焉從尙書賈泰遊洪武中舉明經授鞏昌判陞禮部郎中建文時爲河南參政永樂初坐方黨論死有閩南集關隴行葦歸來葦隨葦檜廷葦子孫因留居福州之瓜山

林嘉猷初名昇以字行浙臨海人師同邑王琦琦坐累雲南族姻無敢顧者惟嘉猷徒步千里遠送泣別人高其誼後與鄭公智負笈六千里至漢中師方孝孺時學於方氏之門者踵接而孝孺獨以得二人爲喜曰匡我者二子也洪武末以儒士校文四川蜀王訝其名字不相蒙更名良顯建文初薦修太祖實錄入史館爲編修遷陝西僉事嘗被燕邸召入居久之得其隱情以告孝孺達於建文皇帝遣錦衣千戶張安持書詣燕許世子王燕燕內使黃儼因問世子計且得行世子竟先發事遂洩燕兵入京坐方黨逮人謂僚友曰此大丈夫見義勇爲時也太宗遂殺之

贊曰讀書種子烈烈志節萬段已甘十族亦決氣厲岳搖忠精日揭不有斯人維傾軸折二廛二廬爲師駢殉志高見恭屠僇蹈躐二鄭能吏嘉猷名俊黨禍連結不隕厥問高瑞俠烈仲理畢命臣義交情千古

之正。

史官曰。嗚呼。昔生於盛明者。著書立說。謂孝孺平日以周孔自處。海內之人。亦皆謂程朱復生。及其得君。而格心之學。經術之業。無聞焉。又謂諸紛更。去新莽無幾。噫。亦未會其時而易言之耳。予生明末。見所謂君死臣囚之會。慷慨就義者。百無一二焉。始服孝孺輩之不可及也。孝孺方駕格澤。嗚呼。故主而賓於帝所。一死之烈。天日爲之悽慘。正氣沸鬱於天壤間。眞星日其名。而金石其言矣。至使雷霆之怒。不能快意於其間。其遺烈足千古矣。身處清平。何輕置喙。若盧原質以下數人者。皆死孝孺者也。以太宗之智。不能自用諸人。而使諸人爲孝孺用。計亦左矣。死孝孺多一人。則事燕殿下少一人。諸人可謂有君有師有友。而太宗於君臣之義。其謂之何。死見高皇一語。尤足刺心哉。人謂太宗之勢如火烈。而不知其氣大沮。孝孺之氣且長伸歟。自孝孺及程通。皆殉難者。故其傳以次第敘焉。

齊秦黃子澄楊任傳

齊秦溧水人。初名德。洪武二十年。舉應天鄉試第一。明年進士。歷禮兵部主事。會雷震謹身殿。太祖禱郊廟。擇歷官九年無過者陪祀。德與焉。賜名秦。時上年高皇太子參機務。召與語。甚悅。曰。此經濟才也。三十年。陞兵部左侍郎。明年進本部尙書。上嘗召秦問邊將姓名。歷數無遺。又問諸圖籍。秦出手冊袖中進。簡要詳密。上大奇秦。是年閏五月。受顧命輔皇太孫。時諸王皆尊屬。擁重兵專制。地嫌勢逼。遣詔諸王臨邸中。毋奔喪。王國所在吏民聽朝廷節制。諸王頗不悅。謂此齊尙書言於新君。矯皇考詔問我也。比燕王入

臨至淮安。秦請急出符勒歸國。王益恨秦。秦嘗使燕厚餽。歸上於朝。上嘉之。益信重。遂與太常卿黃子澄建策。凡諸王有罪。輒除國。秦欲先燕。以王英武志廣而氣剛。可借以讐諸國。子澄不以爲然。其後諸王有罪。輒除國。而周、齊、湘、代、岷相繼罪廢。及燕兵起。秦慷慨任兵事。建文皇帝得自寬。日召學士輩坐便殿。議行周官法度。君臣廣歌。闕外事一委秦。秦請削燕屬籍。移檄聲罪致討。或難之。秦曰。名正言順。敵乃可克。衆不能奪。而燕遂以誅秦爲名。時諸老將惟耿炳文、郭英在。而炳文子尙主最親。英在太祖時未嘗特將。遂拜炳文平燕大將軍。會兵五十萬。進征北平。時上遣諸王監督諸軍。秦以谷王穗漏師遁還。又慮遼寧二王近燕爲變。皆奏召還。遼王植汎海至。寧王竟不至。炳文旣戰敗。使李景隆代。秦極言其不可任。建文皇帝直以門第肺腑至親。必遣之。師大衄。四年。燕兵已逼淮。泗上猶以燕眞甘心秦等。謫秦。子澄官。而令景隆致書燕請罷兵。燕王曰。給我也不聽。進兵益急。乃復召秦。未及還。金川門失守。上遜去。秦追之。廣德不及。至欲往。他郡起兵興復。所乘馬白。慮爲人所識。乃以墨塗馬。旣而行遠。汗流墨脫。有見者曰。此齊尙書馬也。遂被執。送京師。不屈。死之。籍九族。從兄弟敬宗等皆死。叔時、永、時彥等謫戍。妻及姊甥媳俱發教坊。女至死守節。兒甫六歲。戍邊。洪熙改元。赦還。其後有存者。嘉靖中。知縣謝廷藩爲祠祀。稱中山書院。

黃子澄。初名湜。以字行。改字伯淵。分宜人。先世嘉宋靖康間。爲太學生。從陳東伏闕上書。請誅蔡京。復責開封尹王時雍。姦邪。爲廉州司法參軍。子澄少從歐陽貞受易。周興學。受尙書。梁寅受春秋。博學負俊聲。洪武十七年。江西鄉試第二。明年。禮部第一。揭榜。五色雲見。廷試第三。授編修。陞修撰。東宮伴讀。累官太

常寺卿。建文爲太孫時，嘗密召於東角門。屏左右曰：「諸王尊屬，擁重兵，奈何？」對曰：「諸王僅有護兵，僅自守，不足恃。萬一有變，六師臨之，誰其能支？」漢七國非不盛，卒底亡滅。大小強弱之勢不同，而順逆之理異也。太孫喜曰：「茲事終仗先生。」及卽位，命兼翰林院學士。曰：「先生無忘東角門之言。」子澄頓首曰：「謹奉命。」遂出與齊秦議，削奪諸王兵權。秦欲先燕，子澄曰：「燕王雖桀，今無所跡，不可。」周、齊、岷代在太祖，每以不法見督。何況今日？須先周。夫周、燕之母弟，辟手足，翦一則燕必來爭，可以并坐。秦曰：「善。」時燕世子及兩郡王俱在京，秦欲先收之。子澄不可，曰：「彼知而先發有名，不如遣歸，坦懷無疑也。」乃白上，會周府人告周王，遂襲執周王。檄歸，敕燕王議其罪。王上書言周王所爲形跡曖昧，幸念至親，曲垂寬宥。如其顯著，祖訓具在，臣何敢私伏望陛下體祖宗之心，廓日月之明，施天地之德，上覽之惻然，謂事且中止。子澄、秦爭之未決，明日復言之曰：「周王已獲，可慮者獨有燕。擒燕則大事定矣。否者燕威名日盛，今不去，後難圖也。」上猶豫。且曰：「朕在位未久，連去數王，何以自解於天下？燕亦疑懼，稱病不出。」子澄曰：「成大事者不顧小信，因其久病，正天與之時。先人者制人，上曰：「燕王智勇善用兵，雖病，恐難猝圖，宜更審之。」乃以備邊爲名，出兵開平諸鎮，及更置北平守臣，伺燕府中事。燕兵遂起，自以周公輔成王，且索諸大臣，及耿炳文諸將相繼敗，上憂之。召問子澄，對曰：「勝負兵家常事，以天下富強區區一隅，豈能當哉？今以兵五十萬，四面並進，旦夕且成擒矣。」遂薦李景隆爲大將，代炳文。臨行，惓惓授以兵略。景隆庸懦，不能用。旣戰輒敗，棄其師遁，召還，赦不誅。子澄哭爭之曰：「景隆觀望懷二心，不誅何以謝祖宗？」厲士卒，練子寧，亦執景隆於朝，哭而數其罪，請誅之。

上不聽。自是江淮諸將連敗。或投入燕軍。子澄拊膺慟曰。事去矣。錯薦景隆。誤國萬死不足贖罪。燕兵至淮上。不得已。逐子澄。秦然密使募兵。而以竄齊。黃告燕。冀緩師。不得。燕王書給請。悉召平安。盛庸。吳傑。師還。卽已。上更遣少卿薛巖。罷兵。又不許。兵抵江干。子澄奉密詔。攜妻子由洞庭。微服至蘇州。與知府姚善。倡義勤王。善乃編子澄子崑山珪爲道士。更名玄微。守譜籍。王爲里正。更名彥修。奉母。許相約同死國事。善又止言。子澄才略足捍國難。不宜屏棄閒遠。以快敵人。方亟。召子澄未至。而燕王金川。遽卽位。購子澄急。太倉武士湯華。縛詣京師。見不屈。稱殿下抗言。臣知殿下以兵力取富貴。不知殿下忍卽此位。若欲用臣。是不欲以綱常治天下乎。上解顏曰。聞卿博學善讀書。不比方孝孺執迷。朕將悉赦若罪。曰。經史柔翰。治世所用。亂世將安用耶。況富貴瞬息。何足輕重。殿下向來悖謬。恐子孫有效尤而起。何以爲訓。上變色曰。此天命有在。汝欲借兵日本抗我乎。曰。皇祖起義兵。定天下。以殿下勇力冠世。與東北大藩。得典兵永衡王室。而烽煙塞北不能靖。願反內噬。若臣引彝內攻。與殿下逆謀。何異。上曰。此細人言。不足信。朕亦不以此罪汝。今以魏徵。趙普不足學。則迂甚矣。今引江西所錄族屬六十五人。妻族外親三百八十人。齊至。哀號震天。子澄色不變。太宗謂曰。知汝必不爲我用。當認何罪。給筆札自供。大書曰。溟本爲先帝文臣。不職。諫削藩權不早。以成此兇殘。後嗣慎不足法。太宗大怒。命截其手。曰。雖汝不入烏森。足跡已至海上。復命截其足。磔死。年五十三。族人無大小。籍江西皆斬。獨彥修能作崑山語。充解役。收骸骨藏焦山。一妾在繫所。爲紙牌祀之。忽一日。晝雷大風。飄互懼其主去。久之來。會漢王高煦謀逆。上乃追思子澄之言。削

漢護衛徒居樂安州。謂侍臣曰。卿等謀國。勿以黃子澄臨刑語爲諱。洪熙元年七月。移葬崑之馬鞍山。御史劉連爲立傳。銘曰。天生忠臣。孝之力。天植綱常。死之力。天祐眷屬。友之力。天護骸骨。子之力。死而不亡。君之力。百世芳風。山之力。藏名於中。萬年出。至萬曆四年。其孫黃熊與蔣乾同以祭塚爭地致訟。縣令至山勘。忽地中震雷。化青氣上沖西北去。裂溝得劉御史舊志。令大驚。上聞。因表墓立祠。其在分宜葬者。亦曰馬鞍山。永樂初。舉發革除之黨者。亦曰蔣乾。易世爲讐。人皆異之。兩地各有以裔孫一人主祭。

楊任。嘉興人。母章氏。初生有胡僧過之。聞啼聲。歎曰。此兒異日必顯。終不免刑戮耳。任性至孝。嗜學。洪武間。由人才擢知袁州府。黃子澄一見。以國士許之。守袁州。政多宜民。燕兵起。引疾歸。壬午。子澄出徵兵。往約姚善圖復。共至任家。與任謀求舊君。以舉大事。咸奮誓死。收集義勇。事泄。俱被擒。至京。磔於市。籍產族誅。凡九十人。爛廟金。莊。章。范諸姓。戍邊者百餘家。

贊曰。秦稱受遺。澄比家令。削濶召戈。除藩生疊。謀之不終。得死則順。任志勤王。欲燃餘燼。天命有歸。同隕厥命。

史官曰。葉伯巨分封太侈之言。真至言哉。太祖且怒。謂況使吾兒見之。使當日聽其言。稍一裁抑。諸王孰不弭耳類首以安之。而身骨未寒。疊生嫡胤。使帝宮飛咸陽之焰。空山有罌曇之跡。伊誰咎也。太宗英武雄揚。其立太孫之日。已藏虎視熊攬之思。卽削亦反。不削亦反。而論者乃欲援漢文賜几杖不朝之例。何其迂也。齊黃誤國之言。亦永樂諸臣發論耳。然秦不爭炳文。而子澄乃薦景隆。挫輒不支。未嘗不憾其謀。

之不滅也。秦走廣德，擬復起事，卽無成。有文信國之風焉。子澄喃喃一再殿下，語溫而亢，使太宗追思效尤之言，亦一快也。任以林居急國難，考之古人不多得。

鐵鉉附高附黃陳迪附黃暴昭傳

鐵鉉，祖父原色，目人，居鄧州。爲鄧州人。鉉生聰敏剛決，入大學，通經史，選授給事中，調都督府斷事，奏對詳明。太祖每試以事，知其能，甚喜，賜字曰鼎石。時朝政威神，羣臣奔走奉職，救過不贖。鉉獨以材能稱任，使有藩府大獄，刑官久鞫不能決，屬鉉治，立具。上益喜，令法司諸疑獄盡屬鉉。建文初，遷山東參政。燕兵起，耿炳文戰敗，李景隆代將師五十萬駐德州，命鉉給餉。飛鴛輓粟，軍興不乏。十月，景隆進圍北平，敗績。明年四月，師再進，又敗。燕兵追襲鉉，與參贊高巍竝轡南奔，道出臨邑，灑血同盟，以口舌激義，大集民丁，固守濟南。僅十日，燕兵逼城，以書傳矢射城中，招降。而城諸生高賢寧作周公輔成王論，以破其解。傳矢答之，堅守不爲下。城夜壞，則縫蓋幕裹葦，藩塞破，望之若城。旋卽補築。燕王堰濟水灌城，城中大懼。鉉曰：無恐，計且破之。令人登陴哭求降，出千人伏地請命。時燕王甚苦諸郡縣旋陷，旋守，至是大喜。諸將曰：濟南中原要會，得此可斷南北，卽不下金陵，畫而自守，徐圖江淮，可以得志。軍中皆呼萬歲。遂下令退軍受降。鉉乃暗懸鐵版城門上，伏壯士闔堵中，約燕王入城。轟呼千歲，輒下版，旋卽斷橋。燕王乘馬率勁騎度橋而登，導者入門，伺燕王至門中，望之呼千歲。版下稍急，傷燕王馬首。燕王跌急，乘馬奪從馬走至橋，橋

堅不可動。乃得馳去。大怒。麾兵力攻。鉉令守陴者羣噪罵。燕兵攻益急。以大礮擊城。城且破。鉉復多書高皇帝神牌懸受擊處。遂不敢擊。每因機變化。計盡毀北兵攻具。出城累敗之。相持者三月。燕王不得志。舍之南去。圍卒解。捷聞。賈金帛。進左布政使。時歷城侯盛庸代景隆將。合兵戰東昌。大捷。召鉉趨朝受賞。宋參軍說鉉曰。北兵去濟而南。其留守北平者類老弱。且永平保定雖叛。諸郡縣堅守者實多。守臣郭資輩書生不知兵。公能出奇兵疾馳真定。我諸將潰遺者稍稍收合。不數日竟取北平。其間豪傑有聞義而起者。便宜署部號。召招徠之。此走魏都計也。破則北兵顧家室心亂。勢必敗歸。徐沛間素稱驍健。若檄諸守臣倡集義勇。乘勢晝夜躡之。而公館殺北平休養士馬。逆其至擊之。彼背腹受敵。大難旦夕平耳。鉉以軍餉盡於德州。城守既久。士卒憊甚。而南將皆鷙材。無足恃。莫若固守濟南。使江淮有備。北兵不能越淮。歸必道濟。吾邀而擊之。以逸待勞。全勝計也。乃設宴天心水面亭。輻問辛苦。述賦廣歌。激發忠義。尋進兵部尙書。佐盛庸軍事。燕兵既至滄州。十月。徐凱見擒。復命鉉守濟南。與高巍賦詩慷慨對泣。庸帥兵往來邢博間。燕兵以鉉故不敢近濟南。竟趨東昌。辛巳。由萊河還戰藁城。遂略彰德。真定。壬午春。由德州取道東阿汶上。直抵靈璧。至宿州。鉉率兵踵其後。邀擊。大勝於小河。中原震動。燕王幾欲棄師而歸。會中官有招者。諸將亦請乘虛直進。遂督兵渡淮。不踰月。京師不守。鉉感憤不自裁。左右拂之。燕王踐位。尙擁殘兵駐淮南。已而擒鉉至京。見太宗。背坐廷中。不肯屈。令一仰。願終不可得。割耳鼻。終不肯願。碎其體。以肉納口中。問曰。甘乎。曰。忠臣肉甘。至死罵不絕聲。時年三十七。父母安置海南。男福安。年十二。編伍河池。康安。七

歲充匠。尋皆斃死。妻楊並二女發教坊司。楊憂憤死。二女終不受辱。上聞曰。渠竟不屈耶。赦出之。皆適士人。鉉以非常之才。匡難殉國。遭天命已改。志不克就。然剛毅果敢之氣。耿耿激烈。不可屈撓。自其蚤歲受知太祖。已負託孤寄命不奪之節。乃卒以烈誠奇畫。震耀古今。太宗每對羣臣。特稱其忠焉。後高賢寧被執。太宗曰。此作論秀才耶。欲官之。賢寧固辭。其友紀綱勸令就職。賢寧曰。君學校棄才。舍而事新主。固無妨。吾食餼有年。義不可上不罪而遽之。卒年九十七。

陳迪。字景道。宣城人。祖宥賢。國初從征有功。調撫州百戶。因家焉。父仲康。嗣百戶。迪幼。儻有志操。洪武八年。薦辟爲郡學訓導。嘗代郡草萬壽表。太祖覽而異之。十二年。薦召爲翰林編修。遷侍講。預修大典。二十四年。陞山東左參政。捕蝗弭盜。民德之。二十七年。內艱。奪情起復。辭不允。明年。進雲南右布政使。時普定等諸彝煽亂。迪率土兵擊破之。賜金幣。建文皇帝卽位。改官制。定六部一品。徵迪爲禮部尚書。燕兵起。上疏陳大計。請擇大將知兵者。委以成功。李景隆方視師。極言姦庸不可用。恐損國威。二年。知貢舉。水旱詔集議條奏。迪言刑獄未清。宜敕法司。擇公廉仁厚者。分詣郡縣。審覈獄囚。無令久淹。致傷和氣。又言。逃民家業旣喪。且畏逋負。失今不卹。必嘯聚爲患。宜使有司招徠。其不願歸者。聽附籍。暫免差役。凡二十餘事。皆從之。三年。加太子少保。辭兼俸。景隆及諸將屢戰敗。乃受命督軍儲。過家不入。聞變。卽赴京師。太宗已卽位。召迪責問。迪抗聲索故君。慢罵不屈。并收其子鳳山。丹山等六人。同就戮。命割鳳山等鼻舌煎熟。與食。問迪好否。曰。忠臣孝子之肉。香美無比。彼逆輩狗彘。且不食。俱凌遲死。宗族被累者二百人。旣死人。

於衣帶中得詩云。三受天王顧命新。山河帶礪此絲綸。千秋公論明於日。照徹區區不貳心。又有五噫詞。並悲烈。蒼頭侯來保拾其遺骸歸葬。邑計家橋。幼子珠。生五月。乳母蒨潛置溝中。得免。八歲。爲怨家所訐。太宗宥之。詔戍撫寧。尋徙登州。遂爲蓬萊人。洪熙初。詔釋迪宗。姻邊戍者還鄉。給產業。成化中。郡人祀迪鄉賢祠。甲辰。郡守徐觀。吏部郎李默。謫判寧國。相繼祠祀故居。私諡曰靖獻。敖英贊曰。江漢之水。濯濯精靈。不瑞於物。鍾爲詰人。蜚英翰苑。人文有紀。天馬行空。一日千里。乃參東藩。乃伯南詔。政懋師和。匪舒匪敖。天子曰都。宗伯汝諧。直哉惟清。上副虛懷。痛泣流涕。昌言時疾。宮保峻秩。臣何敢有。鼎鑊如飴。臣死臣職。方練同歸。青天白日。宛陵大節。百世惟公。嚴祀在郡。尸祝曷窮。時有黃魁。不知何許人。爲禮部侍郎。行高古。有文學。習典禮。與迪共事相善。亦不屈死。四世孫鼎。字文相。號大竹。弘治乙丑。登第。授禮科給事中。劾廖愷。子倖舉鄉試。會流賊起。條陳弭盜機宜。與臣璫爭辯不屈。坐繫獄。罷歸。嘉靖改元。詔復陝西參議。撫治商洛。時逆賊猖獗。聲震三輔。督兵平之。擢副使。兵備延綏。番彝叛化三十餘年。比至。撫循有方。所在寧帖。及處哈密事竣。擢浙江按察使。尋陞應天府尹。未任卒。子其學。博聞。嘉靖甲辰。進士。作御史。彈劾緹帥陸炳。擅作威。縱諸校乘傳驛騷。自立錢法。禁切民間。至於罷市。又使私人崔甲。結京山侯。崔元。專擅鹽利。詔下甲獄。權姦惶然。戊申。按兩淮鹽法。多所建議。商民稱便。庚戌。出爲陝西僉事。尋參議榆林。備兵肅州。時哈密諸彝爲亂。出堵定之。以參政守花馬池。尋進山西按察使。晉僉都御史。撫大同。虜俺答。几慎入犯。左衛督將軍劉漢等破走之。遷副都。屢有戰捷。先是韓藩歲祿大萬。而宗室日繁。額逋且六十萬。至是

秦國將軍融燭等百四十餘人入會城大譟。其學設法賑其急。詔廢融燭爲庶人。燭不受詔。卒戡寧正法。以戶部侍郎總陝西軍務。陞右都。敵入花馬池。禦之。斬獲三百七十餘級。以原官調總宣大。逆人邱福等入犯弘賜堡。督趙總兵迎戰。敗之。斬首二百級。召理戎政。復陞南刑部尚書。尋致仕。卒。諡恭靖。子琛。官至太守。

暴昭。山西浮山人。洪武中。以薦授大理寺務。歷北平布政司參政。二十八年。陞左都御史。二十九年。陞刑部尚書。清介有峻節。服官布衣麻履而已。三十年五月。奉旨取大誥條例附載於律。名曰大明律誥。六月。署政平。訟理二。靡論罪囚。上諭昭曰。人言法家少恩。此後世用法之過。故有是言。朕觀唐虞之世。好生之德。洽于民心。亦安有此。爾等毋論囚引陞見。一時裁決。恐未得情。自今論囚。惟武臣死罪親聽。以外悉令奏聞。所司引囚至外朝。命行人持訟理。靡傳諭之。其無罪應釋者。持政平。靡宣遣之。繼令府部院科等官詳審。寃者。卽爲奏聞。無寃者。實犯死罪以下。悉如律。其難犯死罪者。准贖。建文皇帝卽位。充北平采訪使。甫至境。知有變。亟歸言於朝。請爲備。燕兵起。設北平布政司於真定。昭以原官掌司事。與鐵鉉等悉心經畫。平安等敗。召還京。金川失守。執之。不屈。上怒。命先去齒。斷手足。猶罵不絕口。斷頸乃已。贊曰。耿恭守亞夫戰。鉉兼之。當一面。昭與迪各宣勞。事弗濟。死無逃。常山舌。睢陽齒。三人烈。同一軌。史官曰。戮力行陣。嘔心轉輸。功有相等者。鐵鉉守濟南。智計百出。幾殲燕。及參盛庸軍。捷東昌。顧邢。博。與平安戰小河。而卒無救於燕兵之南。誠以參預不若專制之得爲也。使得三數人者。塞眞。鄭。滄。德之間。燕

能飛越乎。陳迪以遠智芻輓，赴難如歸，何其純一也。初弭盜山東，再靖彝雲南，兵事練矣，而不委之麾鉞，惜哉。暴昭請爲備而不及事，勢覬體解，乃以簿書勞之，亦可謂不知計矣。然同效死，其馨骨蓋壽河山哉。而鉉之賦詩天心水面亭，憂喜易形，兵法所忌，甚爲鉉不取也。悲夫。



明書卷一百三

列傳二

忠節傳三

練子甯、附徐子樞、卓敬傳

練子甯，初名安，以字行。新淦人。父儻，伯尙，善詩。洪武間，爲起居注，直言忤旨，出爲廣德州同知。遷判臨汀，調鎮安。卒於官。子甯幼卽英邁，從鄉長者竹莊先生學，多解悟，稍長，與金幼孜相友善，謂曰：異日子必爲良臣，我必爲忠臣。過安慶謁余闕祠，弔以詩曰：將軍忠節著荆揚，千載精神日月光。血戰孤城身已殞，名垂青史漢猶香。殘碑墮淚空秋草，折戟沈沙自夕陽。我亦有懷追國士，爲君感慨奠椒漿。洪武十八年，會舉入對，上自發策。子甯對曰：陛下以得人之難，詢草茅之陋，謀之至廣，求之可謂切矣。臣不知陛下果聽之與，抑姑試之與。雖然，君以名求，臣以實應，好言以招禍，觸諱以亡身，非臣敢恤也。陛下所謂敬事而畏神人，此乃唐虞三代命官之語也。陛下臨御十有八載，孜孜求賢，至於數用弗當，雖臣亦疑之。夫人君之道在知人，知人之職在任事。君有知人之明，臣有任事之責。故唐虞用人，必敷奏以言，而後明試以功，必

明試以功。而後車服以庸。未嘗造次任之也。陛下孜孜求賢。而數用弗當者。亦察之不詳。用之太驟之過也。陛下擢用天下之士。責望非不深。委任非不專。然迄無報國之效。何耶。徇名而不求實之故也。古之用人者。必其人足當是任。而後用之不疑。今則不然。以小善而遽進之。以小過而遽戮之。且天下之才。生之甚難。成之尤難。陛下既知生之成之爲難。又忍以區區小故。而卽付之刀鋸斧鉞之地哉。漢武以英武之資。朝奏暮召。小不如意。誅戮隨之。以有限之才。縱以無窮之誅。若此無已。奈何爲治。陛下興天下之學校。育天下賢才。而教之之術未盡。故士之成就者未至也。臣願陛下選師立教。求胡瑗之法。分治經治事之科。歲考其成德至矣。能詳於始。則可略於終。能勞於先。則可逸於後。陛下命臣以志根名世。自斯舉始。是欲臣以古人自期也。臣報陛下。請服膺敬事畏神人一語。至於委曲求恩。逢迎將順。非臣所學也。策奏。上善之。賜第一甲第二。授翰林院修撰。益以名節自砥。文學行誼。一時推重。滿三載。內艱。杜門屏跡。力行喪禮。復除。陞副都御史。調工部侍郎。建文卽位。與方孝孺並見信用。改吏部左侍郎。以賢否進退爲己任。多所建白。辛巳。改都察院爲御史府。拜御史大夫。燕兵起。李景隆用兵屢敗。召還。子甯執景隆於朝。數其罪。請誅之。不聽。憤激叩首大呼曰。壞陛下事者。必此賊也。臣備員執法。不能除姦。請先伏誅。因大哭求死。上駭而罷朝。燕兵渡淮。靖江府長史蕭用道。衡府紀善周是修。上書論大計。指斥用事者誤國。書下廷臣議。用事者怒而詬之。子甯曰。事已至此。尙不能容言者乎。願所論。吾輩有則改之。無則加勉。詬者愧而止。燕王卽位。指揮劉傑縛至。語不遜。斷其舌曰。吾欲效周公輔成王。子甯噴血直前。手探舌血。畫成成王安在。

四字。遂族其家。姻戚逮死者百五十一人。戍邊者數百人。越數年。吉水錢習禮。其姻也。每爲鄉人所持。恆懷不安。以告楊榮。榮乘間以聞。太宗曰。使子甯尚在。朕固當用之。況習禮乎。子甯與方孝孺同朝。孝孺稱其多學而文。弘治辛亥。郡丞王佐刻其遺文曰。金川玉屑集。正德壬申。提學副使李夢陽刻其集。并建金川書院祠其父子。名其堂曰浩然。嘉靖壬午。提學僉事邵銳祠伯高於鄉賢。子甯被逮之前夕。以血大書一練字於裙幅。令侍腰。抱匣。歲子甯民間得免。展輪入閩。備保。六世孫綺爲新甯陳舉。掌書記。萬歷戊戌。陳計偕入浙。有江右生同舟。一夕夢子甯持刺來謁。心異之。比入舟。見書記雅哲不羣。問其姓。答曰。姓練。生心動。叩曰。得非吾里練中丞後乎。綺不應。泪交頤。生固叩之。則從衣領中出故裙幅。發之。有光灼然。上冲者久之。生以百金贖之。陳不受。遺綺。綺不肯行。曰。以死殉國。人臣之恆。且九族赤矣。歸將何爲。生益賢之。歸白當事。以幣聘之。授衣巾。俾奉先祠。爲置廬田百畝。一時聞者歎息。泣下。萬歷改元。詔錄諸臣苗裔。後。得子甯妾秦氏。娠生戍所者。曰善慶。俾主祀。子甯本淦。東山之三洲人。嘉靖初。以流賊亂。割分峽江縣。東山實隸峽。淦與峽爭立祠。詬訟。知府錢琦議兩祀之。其同邑有徐子權者。舉洪武乙丑進士。爲刑部主事。太宗立。聞子甯死。慟哭賦詩。有翹首謝京國。飛魂返故鄉之句。遂自縊死。

贊曰。力請尙方。志在除蠶。手探熱血。豈必存舌。悲纏友生。香霏玉屑。方駕侯城。精光爲規。

卓敬。字惟恭。浙江瑞安人。後徙滄州。少讀書。十行俱下。終身不忘。七歲。與羣兒嬉。有異人相之曰。此奇兒也。骨法殊異。必爲名鄉。惜血不華色耳。長出就塾。性至孝。不以道遠廢定省。讀書寶香山。夜歸。值風雨迷。

路極望微有火光。尋得一小院。見老叟。與僧帽不受。求歸。與一牛馮之。行及門。縱之。則黑虎也。虎馴去。洪武戊辰進士。拜給事中。好直言。或以大剛則折爲戒。曰。吾諫職。居其位。則直其道。道苟直。死不可回。禍福豈所計哉。時諸王在宮中。服飾與太子無辨。一日。乘間言於上。曰。朝廷視效。全在宮中。此紀綱所先。今陛下於諸王。不早辨等威。而使服飾與太子埒。嫡庶相亂。尊卑無序。何以令天下。上笑曰。爾言是。朕慮不及此。一日。與同官入奏。適八十一人。上命改爲元士。尋以六科爲發政本源。又改爲源士。尋復稱給事中。敬歷宗人府經歷。進戶部侍郎。建文初。燕王來朝。敬密奏曰。燕王智慮絕人。酷類先帝。夫北平者。強幹之地。金元所由興也。宜徙燕封江南。以絕禍本。夫萌而未動者。幾也。量時而爲者。勢也。勢非至勁。莫能斷。幾非至明。莫能察。上覽奏大驚。袖入翼。日語敬曰。燕王骨肉至親。卿何得及此。曰。楊廣。隋文非父子耶。上默然良久。曰。卿休矣。事竟寢。太宗卽位。執敬責以不迎。曰。此非前日奏裁諸王者耶。敬厲聲曰。若用敬言。王安得至此。太宗怒。欲殺之。憐其才。且曰。姦臣欲害朕。敬止欲徙朕內地耳。繫獄。或諷以管仲。魏徵事不聽。姚廣孝以敬素不見禮。銜之。獨曰。昔吳王不殺范蠡。而蠡卒沼吳。王衍不殺石勒。而勒終斃衍。陛下所藉爲重。全在地勢。使敬言見用。離北平直囊中物。豈有今日哉。上猶使中官諭之。堅不屈。臨刑。從容歎曰。變起宗親。略無經畫。敬死有餘罪。神色凜然。經日猶如生。誅三族。太宗嘗曰。國家養士三十年。不負其君。惟得一卓敬。敬有高世之才。立朝慷慨。美丰姿。善談論。凡天文地理。律歷兵刑。悉能察究。詩文峭拔磊落。有詩文五十餘卷。又著書發明周子通書。邵子經世之學。宣德間。門人黃朝光作年譜行狀。侍講劉球爲之傳。

私諡曰忠貞。

贊曰：鳳跂鷹游，山奔海峙。伊周媿才，龍比同志。猛虎可馴，亢龍有悔。自託夷齊，媿彼管魏。史官曰：觀人於忠節，取其氣。尤宜取其度。觀子甯，尚不能容賢者之語。卓敬從容，徒燕之奏。其度越諸臣遠矣。子甯執法，必欲殺景隆。卓敬毅然不爲管魏，而俱慷慨同歸。又何毅也。不容於道，行是以動老叟嗟耳。觀子甯對策，有經濟之材，惜不柄用。黃練同稱，吾有以疑之矣。至於死君死友，子權無讓焉。

景清附傳

景清，本耿姓，陝西真甯人。倜儻尚大節，領鄉薦，遊國學。時同舍生有祕書，固不與清觀。清固請，約旦日持還。生果旦日來索，清謬曰：吾初無假書。生忿，訟祭酒。清卽持書往見，曰：此清故所業書，當卽與生並誦。清爲撤卷不遺，生瞠視不能出聲。既退，清以書還生，曰：吾以子珍祕太甚，特相戲耳。初清赴舉時，過宿淳化。主家有女，爲妖所憑，是夜妖不至，去。卻復來，女詰之曰：避景秀才，女以告父。父追清語之，故清爲書景清在此四字，令持歸揭於戶，妖絕不至。洪武二十七年，試禮部第三，廷對及第。第二授編修，三載改御史。三十年春，召見，嘉其才，命署左僉都御史，與實德、會臺、臣、鄧文鑑、劉觀及清奏事罷。以疏字訛，懷印入刑科。更疏爲科臣劾，下詔獄，尋宥之。出川陝巡察私茶，改金華知府。建文初，陞北平參議，往察燕邸動靜。太宗讜之，清言論明快，大被可賞。尋召還爲左都御史，改御史大夫。燕兵入金川，諸臣競死節，清素與兵謀，且

與方黃等密善。約慷慨殉國。獨迴回覘建文所在。審知其出亡也。猶思興復。詭自歸附。太宗喜曰。吾故人也。仍故官。委蛇侍班。若不意。與燕邸故僚比。人頗疑之。會司星奏文曲犯帝座甚急。太宗因疑清。是日早朝。清獨衣緋入。命收之。得帶間所藏匕首。詰責奮起。慢罵曰。清所以至此者。欲爲故主報仇。上大怒。數之曰。若卽不謂天子。卽親王敢爾乎。言愈不恭。命抉其齒。且抉益不恭。頃之。含血若有所啓。直前噴御衣。上命剝其皮。草椽之。械長安門。鐵蒂刷肉。至盡碎。磔其骨。族其家。是夜。上夢清仗劍繞遍。晨駕過。其屍索忽斷。乘風奔三四步。爲犯駕狀。乃命燒之。猶時入殿庭爲厲。命籍其鄉人。轉相攀染。謂之瓜蔓鈔。村里爲墟。清同里人劉固。字永貞。以儒士授青州教諭。建文初。以母老乞歸。許之。清爲都御史。以書招固。因與姊適楊氏者。及弟國來京師。以避五藩之亂。清薦固學行可大用。未及授官。燕兵迫金川。國勸固出城。固曰。母老甥幼。不可去。況固受朝廷恩。雖未及用。而義已許國。惟有死而已。知禍必及己。乃潛寄甥於王氏。城陷。固衣冠開門。兀坐以待。尋清以行刺被殺。罪連姻婭。固與弟國。母袁。妻張。同受刑。聚寶門外。固一子超。年十五。有勇力。一怒縛斷。奪刑人刀。連殺十餘人。事聞。命磔之。萬歷中有降於虜者。曰。予劉永貞也。名固。以耿大夫禍連死。詩曰。且酌盃中酒。黃花向坐開。不須談往事。致死野猿哀。人間先生今何仙。曰。方入童初宮。踰年。又降於虜。詩曰。短劍光飛雪。還疑練帶鋪。龍吟豐邑獄。鬼嘯蜀王都。燕客窮圖見。秦官擁陛呼。白虹徒貫日。回看繼人無。靖難罪臣劉固書。又詩。鳥行白沙上。鳥去跡不滅。鳥往不復來。鳥巢枝已折。涼火不生煙。枯蒲葉堪結。衣鶉那緞蘭。椒漿沁心熱。明月照寒霜。離離清且冷。樹上棲烏啼。幽人未能寢。空

山來磬聲。幽韻流雲結。獨行森林中。復聽猿悲徹。書法遒宕。南工部侍郎徐良彥。大學士錢士升前後爲之記。

贊曰。詭跡專嚮。幽懷孔烈。山魘避名。文曲象赫。一劍之憤。十族之滅。厲魂驚夢。槁穢斷繼。固靈英英。橫豎通徹。死而不亡。虛空有舌。

史官曰。景清緋衣進刃。與荆卿俱厲。惜皆不成。而蒼涼報國之意。千載並見。智氏已滅。豫讓擊衣。猶足愧二心。況遜荒故辟。無恙哉。恨司星無漸離之筑。徒使奮屍犯駕。厲鬼無能。悲夫。劉固降。亂事人多以爲誕。若然。則邪之避夢之入。屍之行。亦同誕矣。

茅大芳。林英。周濬。司中。甘霖。王玘。李文敏。董鏞。謝昇。連楹。丁志芳。王度傳。

茅大芳。一曰毛大方。名誦。以字行。秦興人。博學能詩文。負奇氣。走鄒魯。謁孟廟。有千古難忘義利關之句。嘉興陳堯道。父友也。嘗贈以詩。比之陸機。賈誼。洪武中以儒士應辟。典教淮南。擢秦府右長史。上勉以董子輔相之功。大芳諫諍彌綸。不亢不諂。甚得大體。嘗顏其堂曰希董。以彰聖訓。方孝孺稱其志偉才傑。而敦大和雅。深有會於正誼明道之旨。建文元年。擢副都御史。執法嚴正。尋調吏部左侍郎。燕兵起。憤國日蹙。常以詩寄梅殷曰。幽燕消息近如何。聞道將軍志不磨。縱使火龍蟠地軸。莫交鐵騎過天河。關中事業蕭丞相。塞上功勳馬伏波。我老不才無補報。西風一度一悲歌。蓋燕兵起。爲鐵鉉等所拒。尙未渡淮時也。太宗卽位。得所作詩。執之。詰責不屈。與其子順童。道壽皆死。至永樂四年。獲幼子文生。殺之。孫二。添孫。歸。

孫死獄中。妻張發教坊死。正德末。祀於鄉。郡人侍郎儲懋輯其遺文。曰希董集。

林英。字章叔。古田人。洪武末。由貢士選授御史。有言英書生。卒難重任者。太祖以狀授英。諭使供職。英竭心奉詔。屢建讜言。每以重郡縣順民心爲本。太祖深嘉之。賜廐馬楮幣。建文初。請裁抑宗藩。在行。主父偃之策。不報。復劾奏李景隆誤國。其語激切。反爲所中。下都察院拷訊。謫知瑞安府。時民多逃亡。存者苦稅差。爲按畝丈量。所餘虛糧。令墾荒補之。立鄉約。行文公家禮。建立齋舍。與諸生講學。燕兵起。用御史大夫景清言。還英舊職。命與翰林修撰王叔英募兵廣德北。至勢不可爲。歎曰。臣生無補於時。死有負於國。天命將傾。力難以濟。再拜自經。時年三十有四。太宗卽位。取英家屬。妻繫獄中。自經死。

周璿。山東諸城人。建文初。以神策衛經歷言事。擢左僉都御史。燕兵起。戮力戰守。後爲燕王獲。不屈死之。妻王。子蠻兒。皆繫獄死。

司中。鞏昌人。洪武二十九年。以監察御史署都察院。三十年。擢右僉都御史。燕王入金川。聞中名。召見。不屈。命以鐵箠刷其肉。至盡而死。姻親同死者八十餘人。

甘霖。宣府懷寧人。洪武丁卯鄉薦。爲御史。剛正敢言。中臺推重之。燕兵至。被執求死。從容就戮。子孫相戒。不復求仕。正德中。知府胡纘宗祀之鄉賢祠。御史王玘。蘇州人。以薦辟爲御史。坐匿姦黨論死。李文敏。蔚州人。以監生爲監察御史。遷四川按察使。未行。亦不屈死。

董鏞。長沙人。以文學薦入太學。建文時。爲御史。諸御史中有氣節效忠本朝者。時時會鏞所。相誓效死。將

校懷二心不力戰者。輒露章劾之。金川失守。執殺之。女發教坊。姻族死戍者二百三十人。

謝昇。沛縣人。建文時爲御史。練兵給餉。夙夜效力。燕兵入金川。不屈死。父旺。子咬兒。誦戍金齒。

連檀。襄垣人。洪武中以太學生授左春坊太子贊善。啓沃甚多。太祖美其剛正。改監察御史。十餘年。彈射不避權貴。燕兵起。與御史董鏞相誓死。廷臣有二者。輒露章劾之。城破。立金川門下。冒燕王馬前欲犯。被擒。詞色不屈。引頸受刃。有白氣冲天。尸僵立不仆。人咸異之。

丁志芳。聊城人。洪武乙丑進士。初任吳橋知縣。考取擢御史。燕兵逼京城。謂妻韓曰。師至。城必克。吾惟一死報國。汝攜其幼子潛去。撫之以延丁氏。後及兵入。被執不屈。死之。子賢。甫十歲。易姓爲龐。孫毅。中成化丁酉鄉試。後復其姓。

王度。字子中。廣東歸善人。少力學。通經史。能文章。爲鄉里師。洪武中。以明經薦爲監察御史。糾繩不避權要。疏十餘上。多見采行。燕兵起。度預調兵食。時盛庸代李景隆。度密陳便宜。有東昌之捷。及景隆還。不誅反用事。忌庸。並譏度。度見疏斥。燕兵南下。益急。度請募兵。又有小河之捷。敕度勞軍徐州。比還京師。鳳陽失守。方孝孺與度書。誓死社稷。燕王卽位。坐方黨戍賀縣。而以出語不遜。復殺之。葬其族。萬歷中。詔赦。惠州守黃時雨查度宗三十五人。皆放還。

贊曰。嶽嶽執法。遺詩雪涕。濟濟豸冠。共持風紀。滅洪同遊。快然一死。柏峻烏騫。千秋映碧。

史官曰。西臺爲綱紀所由出。大芳峻節。賦詩慷慨。有古唾手燕雲之風。林英饒治。不負其初論矣。而周濬

以下能以觸邪之職爲如佻之歸。方之古烈。復何慝焉。聞同時御史繩城去者四十餘人。惜名沈野草。弗勒金石。不然亦當與大芳等同樹軌鳥臺矣。

胡閏 附張仲禮 高翔 鄒瑾 附子機 陳繼之傳

胡閏字松友。鄱陽人。博學修行。與吳存、何英、徐素爲同志友。講業長沙王吳芮祠中。以忠義相砥礪。歎曰：天下何時平乎？畫一松於壁。題曰蒼虬出壑。系以詩云：幽人無俗懷。寫此蒼龍骨。九天飛雨來。飛騰作靈物。元至正二十一年。太祖爲吳王。下饒州。過而見之。甚喜。因召見。洪武四年。郡舉閏秀才。上曰：此題詩鄱陽廟壁者耶？授都督府都事。進經歷。建文卽位。改官制。以直諒選爲右補闕。燕兵起。與齊泰等日夜密謀。設法防禦。東昌捷至。陞大理少卿。燕王入京。著方孝孺草詔。繼召閏及高翔。皆衰絰至。哭聲徹殿陛。太宗召閏先入。諭令更服。閏曰：死卽死。服不可更。太宗以彝族恐之。閏不屈。命力士以金瓜擊其齒。齒盡。冒聲不絕。太宗益怒。縊之。死。以石灰水浸脫其皮。實以草。懸武功坊。子傳慶與其族二百七人皆市斬。次子傳福方六歲。發鞍轡局習匠。宣德十年。宥爲民女郡奴。自有傳在烈女。其地胡家橋城西隅。鈔提後。左右荒榛時見光。惟有一猿。獨哀鳴徹曉。稍夜。人不敢行。嘉靖初。提學副使邵銳祠之學宮。萬曆中。御史屠叔方疏請盡釋戍籍人。得允。文移長丈許。榜邑門。忽爲旋風捲入天際。若素鸞翔迴。自午迄申。復墮邑廷中。人以爲異。先是凡與閏有連者。悉爲陳瑛腹役柴斌簿錄。老弱婦女死道路。及特掠死者無算。幼男女置

竹篋挑赴戍所中道困多棄之得至戍所者率一丁一衛骨肉四散如閩外祖顏名關父子五人三死獄兩遠戍閩姑夫張應原戍死陳鎮住父子遠戍閩壻史秉方其祖父俱特死三子與近宗四人皆戍閩弟壻祝靖安與三子皆分遠戍閩母舅江賢祖父子分戍賢祖之壻劉童祖等父子皆分戍閩妻之母舅方君之壻傅繼祖父子皆分戍閩祖母之姪婁克政全家遠戍閩前祖母之姪于善興一家十人皆分戍于之壻董道源父子七人戍閩之甥陳徐李三家皆分戍徐之壻余姓者亦遠戍閩男之妻家雷氏全家戍閩男妻之姨夫李慶童父子六人亦分戍閩曾祖母之姪張福緣父子三人一戍海南一戍塞北一戍西涼閩妻之姨夫翟玄童翟之壻程閩生閩妻之舅祖蘇得民三家皆分戍閩之中表親周劉黃左包史張七姓皆分遣遠戍□□□□□江普華等閩母之姨姪劉午孫等皆遠戍從來族法之慘莫有甚於此者故詳書之以志感云張仲禮者饒州人國初以賢良徵初爲教官歷惠州知府居官清儉多善政民感之以閩曾祖母族逮籍沒無所有陳瑛疑有私匿復用柴斌自惠州加犒琴縛歸饒士民災爭賂斌求寬至饒而仲禮無居無他族親遂以非刑苦之遠戍甘州

高翔朝邑人有文學矜名節洪武中以明經徵爲監察御史所論奏皆國家機要多被采納建文時戮力戎事相與激發忠義初翔與程濟並徵翔厲名節濟好術數翔每以小道止濟勿爲不聽已而兵興濟每勸翔學其術翔曰我願爲忠臣也金川門破翔約濟同死濟曰我願爲智士燕王素聞翔名卽位召之翔持喪服入見大哭語不遜遂沒其產諸給高氏產者皆倍稅曰令世世罵翔也親戚悉戍邊又發其先墓

雜犬馬骨焚灰揚之。而以其地爲漏澤園。

鄒瑾、永豐人。洪武中，嘗官重慶。金華王紳稱瑾志篤才敏，議論磊落，忠義人也。建文二年，爲大理寺右丞。燕兵旣入，與其子樸、甥魏冕等俱死之。樸，字爾禺。建文初，以儒官仕周府，直言諫沮其邪謀。王不聽，嚴刑禁錮甚密。王逆謀覺，大臣以朴諫疏聞，上嘉其忠義，召至京。陞御史，尋陞秦府長史。聞父死難，憤激不食死。魏冕時爲御史，勁直有才名。燕兵至，徐增壽私謀開門迎納，冕與鄒瑾率同僚十八人，卽殿前毆增壽幾死。會輟朝，大呼請速加誅。臣等義不與此賊同生，聲聞禁中，而御史曾鳳詔等復力請。建文皇遂手刃之。明日，宮中火起，或謂冕宜急迎附，厲聲曰：「使吾改臣節，明君亦所唾棄，奈何徒自壞也。」遂自殺。陳瑛請追罪，葬其族。

陳繼之，莆田人。建文庚辰進士，授給事中。嘗以江南僧道多占腴田，蠶食百姓，請爲限制。僧道人給五畝，餘以賦民。從之。燕兵南下，建白抗禦，多所指斥。又言於朝曰：「徐增壽燕之至親，必有陰謀，宜先事誅之。」不聽。已而果然。燕王卽位，召責問，不屈。磔於市。葬三族。父四秀，母黃氏，年垂七十，發甘肅編伍，皆卒於道。男徵仔，四歲，隨母姚氏給配象奴。女阿宗，給武臣爲奴。弟余翺等坐戍邊，弟婦發軍中，女皆送浣衣局。

贊曰：胡三十姓，鄒四百人，翔冕繼之，同罹苦辛。髮倪不恤，墓骨亦焚。哀猿泣雨，正氣干雲。毒哉賊瑛，長君逢君。

史官曰：蒼龍誠有骨，旣召不卽錄用。僅以一經歷終太祖朝。然建文亮節，在太祖時，率不甚顯。知國初官

人以福不以才。其或繼周者。雖百世可知也。斬經易以草實。孤猿哭其墟里。哀哉。高翔怒燕及先墓。其慘更甚。知其於戎行必有大過人者。鄒瑾與其甥冕擊姦自裁。其有先見之智乎。繼之能發增壽之陰謀。使此姦一去。燕豈不瞭如瞽哉。若鄒樸郡奴。蓋不愧其父矣。

郭任、盧迥、戴德彝、宋徽、巨敬、韓永、盧振、黃彥清傳

郭任、丹徒人。廉慎有吏才。建文間。爲戶部侍郎。朝廷用齊、黃之策。討諸藩之不靖者。欲以次及燕。任奏曰。天下先其本而後末。則易成。除惡不去其本。臣誠以爲迂也。今日儲財粟以備軍需。果何爲者。然北討周、南討湘。舍其本而末是圖。此豈上策。且兵貴神速。曠日持久。銳氣旣竭。姑息隨之。所謂強弩之末不能穿魯縞。有坐困耳。燕王聞而惡之。及兵出。給餉不貲。燕兵入金川。任不屈死之。子經亦坐死。少子金山保戍廣西。三女給配。嘉靖中。鎮江知府劉儲秀祀之鄉賢祠。

盧迥。一名珙。仙居人。性疏爽。不屑曲謹。然大節皎然。少喜飲酒。飲酣輒長歌。人目爲盧狂。卽仕。顧折節恭慎。建文三年。歷戶部侍郎。燕兵至。不屈。縛就刑。長驅而死。台郡立入忠祠祀之。

戴德彝。奉化人。洪武甲戌進士第三。入編修。陞侍講。上諭以翰林雖職論思。然政治得失。民生利害。當知無不言。以唐陸贄、崔羣、李絳爲法。德彝與侍讀張信等皆頓首謝。由是感奮。思所以稱上意。章屢上。直聲震於朝。後改御史。益善於其職。建文中。改右拾遺。燕兵迫。與黃子澄、齊泰等。日夕畫策防禦。燕王卽位。召見。不屈死。族其家。有媵匿其遺孤。法吏追索。斲兩乳。見五臟。終無所承。德彝因有後。邑人立忠烈祠祀之。

宋徵建文元年爲宗人府經歷。上疏請削罪。宗藩屬籍。諸王聞之。皆恨徵。徵又嘗與謝昇、牛景先數言耿、李諸將失律懷二心。當治罪。燕王旣立。得其章疏。責問不屈死。蘇族。

巨敬。平涼人。初爲御史。抗直敢言。建文中改戶部主事。充史官。清慎有聲。後與陳迪同被逮。責問不屈。死之。蘇其族。

韓永。陝西西安人。不知所自起。建文時爲戶科給事中。豐軀美髯。吐音宏朗。每慷慨論兵事。建文皇帝喜之。金川失守。杜門不出。與陳迪、巨敬、戴德彝等同逮。太宗欲官之。對曰。吾王蠲耳。奚以官爲。不屈而死之。時同逮死義者三十五人。惟黃福、尹昌隆以歸。命居官如故。

盧振。不知何許人。建文中爲兵部郎。燕兵起。與齊泰等謀畫戰守。效力爲多。燕兵入金川。縛至。振厲聲數太宗罪。乃榜掠而死。蘇其族。其時燕護衛指揮亦有盧振。

黃彥清。徽歙人。建文末爲國子博士。燕兵旣入。以曾在駙馬都尉梅殷軍中。私諡建文君。坐死。并逮從子池。貴典史金蘭等繫獄。殷言彥清實不在軍中。金蘭等得釋。後官知縣。又有黃清者。以都御史出巡撫。太宗詔拒不受。欲圖興復。下皆效命。願兵力不足而死。

贊曰。當門之闢。不待不殺。七尺可捐。此志不奪。郭、盧而下。事異趨同。清議匪私。千古英風。

史官曰。郭任先制燕。誠上策。觀燕之起甚難。若一舉而圖之。如振落耳。曠日持久。四字洞肌髓矣。迨長歌以終。死協金石。德彝以詞。臣具骨鯁。宋徵以卑秩關國。是皆烏鸞而獸麟也。敬抗直。永慷慨。人才中豈易

得盧振數罪。彥清私諍。皆磊落可欽。數百年而後。猶令人想見風采焉。

張昺、謝貴、葛誠、余逢辰、杜奇、湯宗、倪諒、彭二逸傳

張昺，澤州人。洪武中舉人。材累官刑部左侍郎。建文初，諸大臣言周代岷谷、湘相繼告變，藩國所在宜簡精強謀略有威望者爲守臣。彈壓乃出昺掌北平布政司事。與都指揮使謝貴並受密命。未幾詔讓燕。燕王皇恐謝衆疑不測。昺貴知燕必反。乃集兵部署防守王城。飛章奏聞。燕王稱疾不出。昺嘗問疾殿中。燕王擁爐四圍火。猶寒顫。昺等以爲果然。長史葛誠伺報昺謂王無病。病僞也。昺且信且疑。顧兵備已嚴。睨王府在陷窅中。不甚加意也。張玉、朱能請王起兵。燕王曰：非計擒昺。貴不可。建文元年七月六日。會朝廷遣人逮府中官校。燕王盡縛置庭中。召昺、貴入付之。二人猶豫未進。燕王促南使者急趣之。二人謂燕王實窘。不得已應朝廷命。遂入端禮門。伏發被縛。燕王時詐病扶杖。擲杖起曰：我何病。爲爾輩所迫耳。昺不服。死之。昺初至北平。以李友直機警。寄心腹。令刺事燕府。友直輒先事泄昺謀。以故燕得爲備。昺死。僞署友直北平參議。渡江後。昺抄家。株連親戚。法司以程亨等五人見。太宗曰：張昺之親。與鐵同頑。直須鑪冶。引出生燒之。疏遠及里人並戍邊。一子亡去。久之。太宗屢夢昺披髮爲厲。令焚其屍。面色如生。洪熙元年。詔昺戚屬戍邊者家籍一人。餘悉縱還。正德十五年。知州馬汝驥立祠祀。

謝貴，洪武中以錦衣指揮僉事陞河南都指揮僉事。署山西行都司事。二十八年。坐法當死。宥之。降河南衛指揮僉事。建文元年。議削諸藩。時燕王稱病。朝廷名爲備夷。齊秦薦貴才。以爲北平都指揮使。與布政

使張昺通王府官屬伺變練兵先發後聞六月貴等在城七衛并屯田軍士布城內圍王城外牆又以木柵斷端禮諸門燕王聞之曰我病不出雖塞可也貴等乘馬張蓋過王門不下又殺王城守卒軍士登城擐甲執兵飛矢入王城四面鼓噪欲激燕以擒之有名而王知其故爲備甚嚴不爲動七月有醉卒磨刀於市隣媪問故張目曰殺王府人媪竊以告指揮張信信入語王乃召指揮張玉朱能等集護衛勇士八百人議先擒貴昺王曰彼防守如此猝難動須以計致之事在張昺傳乃匿壯士譚淵等擒昺貴王親臨詰斬之其從者猶未知移時不出稍稍散去遂攻九門黎明已克其八惟西直門未下王命指揮唐雲往諭守者皆散乃稱兵

葛誠不知何許人以進士爲燕府長史建文皇帝卽位燕王使誠奏事京師觀朝廷所爲上召問府中事誠具以實告遂密有委託使爲內應誠許諾遠燕復命王覺其詞色有異深疑之王佯病官司入問疾皆懼危篤獨誠知王僞私告昺貴使勿信宜爲備又使人上變於朝及昺貴死猝誠下殿斬之後族其家余逢辰字彥章宣城人爲燕府伴讀燕兵未起逢辰頗聞其謀遺書戒其子自分必死起兵時逢辰涕泣以諫不從死之

杜奇北平人燕兵初起欲廣置羽翼下令境內舉賢良方正有司以名上奇極諫當守臣節勿二語懇篤王怒立斬之時方急兵事未暇逮其家及卽位乃族

湯宗贛州人爲北平按察僉事上言北平按察使陳瑛密受王府金錢有異謀逮瑛謫廣西燕王入京卽

位日。乃召瑛還爲都御史。窮治建文諸臣。多坐彝滅。恨宗尤甚。捕至族死。株連頗多。

倪諒。燕山左護衛千戶。上變告府中事。府中官旗盡逮。詔獄于諒。周鐸誅死。太宗卽位。收諒不屈死。籍其家。壯者戍邊鄉。幼者而刺離間親王四字。發鞍轡局。

彭二。逸其名。以行稱。建文初。爲北平都指揮。驍勇善戰。有威名。聞昺。貴被害。二急上馬。挺槊大呼市中曰。燕府反。從我有賞。集千餘人。攻端禮門。遇燕健卒龐來興。丁勝格殺二。衆亦散去。

贊曰。兆徵大橫。事殊顯成。昺。貴。誠。振。正疑爲傾。徒傷賁勇。慘歸鎖烹。侃侃不替。乃有奇辰。宗。諒與二。庶幾成仁。

史官曰。昺。貴而下。或防燕。或諫燕。皆不能制燕之命。回燕之心。嗚呼。疏而愚矣。疏則值。愚則忠。卽值不礙。忠。予以爲諸人皆忠也。豈可以成敗論英雄哉。若倪諒以燕千戶而不與謀。能上變告。尤足取焉。聞有何奉常者。不與燕謀。卒免於難。何賴是奉常爲。死見余。杜面孔奚施。彭二事雖不成。蓋首襪燕魄矣。

龍鐔、石撰、程通傳

龍鐔。字德剛。萬載人。洪武十七年。以國子生超授浙江按察使。有罪。左遷長洲知縣。尋陞晉府左長史。燕兵起。朝廷徵兵於晉。鐔引大義。力主發兵。燕王卽位。械鐔下獄。不屈死。有收其遺骨。得所自書。贊曰。捐生固損。弗事二主。別父與兄。忍慟肝腑。盡忠爲臣。盡孝爲子。二端於我。歸於一所。

石撰。山西平定人。洪武中。爲甯府左長史。燕兵起。諸郡縣皆下。撰在大甯。力請主將。爲嚴守備。以抗燕。久

之。燕王怒攻拔之。得撰。不爲屈。遂支解而死。

程通。字彥亨。績溪人。祖平。字德正。性溫厚。素與友張德良。羅法。株連者衆。波及平。御史喻曰。灑於衆則汝免矣。平謝曰。家世儒業。非義不敢爲。不幸爲人所誣。而反又誣人。是欺天也。御史歎異之。尋謫延安。與郡人朱仲傑偕行。仲傑悍戾。盛暑同憩樹下。仲傑囑守行囊。趨酒家飲。俄驟雨水大至。平自救不暇。仲傑還責償于平。乃如數還之。至延安。仲傑依于梅百戶。明年。仲傑臥疾。以所有寄之。梅曰。待子至付之。既卒。梅調守他郡。平爲理後事。或曰。彼待子如是。獨無憾耶。平曰。同里無依。我當自致。聞者歎服。後朱氏子德生。以母命來省。行至汴。聞仲傑死。而囊篋爲梅百戶挈之。他往。中道還。給其母曰。吾買地葬父矣。出所攜衣曰。此遺物也。越三年。平子實來省。遂命負其遺骨歸。報朱氏子。令迎葬。德生藪不顧。尋平自延安歸。知朱氏柩尙留殯後園。乃曰。延安數千里。尙爲負之歸。績溪距休寧百里。豈可不一送。既命孫通負至其家。實剛直尙義。兄純。洪武中。以人材爲湖之程鄉知縣。有治蹟。其子泰。將省。父程鄉。稚不任行。實與俱。中道聞兄被逮。且瘴作。偕行者詠秦反走。實怒曰。汝父坐事。正當赴救。歸何心耶。遂徒步至潮。冒瘴死。通其長子也。少有至性。動必遵禮。嗜學不倦。洪武乙丑。貢入太學。徒步走廣。扶父柩還葬。廬墓三年。哀毀至。妻子不相識。時祖平老。謫延安。通上書乞骸骨。極懇切。太祖憐之。持其章不下。私驛召平。既至。乃召通對立。玉階下。顧問平。汝識此人否。祖孫相對哽噎。不能仰視。上歎曰。孝哉。若人。命兵部除其籍。驛送平還鄉。庚午舉應天鄉試。時遣諸王將兵行邊。以封建策諸貢士於廷。對稱旨。親擢第一。授遼府紀善。辛未。從王閱武臨

清祖喪歸。復廬墓三年。復任。太祖上賓。從王渡海南還。燕兵起。草封事數千言。陳備禦之策。進左長史。明年。從王徙國荊州。悉心輔導。王敬禮之。國事皆咨焉。先是在遼。衛士紀綱者。山東黜生也。狡猾善詞事。通每召而笞戒之。及太宗卽位。綱得見。留爲錦衣指揮使。被寵。乘間言通前有封事。械通詣京師。庾死。家人發戍邊簿錄其家。得輜田數十畝。遺書數百卷。牯皮數張。黃希范方知府事。雅與通善。至是亦連坐。并籍其家。初遼王雅敬重。命圖其像。又錄世譜。親爲贊。後十年。異母弟彥迪以事至荊州。王召見。語及舊事。曰。汝欲見汝兄否。彥迪頓首不知所對。王出遺像示之。彥迪哭失聲。並請其世譜以歸。永樂中有讐家欲訟之。官適彥迪。他出。家人懼而焚其像。獨遺世譜。通厲志聖學。居常抑抑。如有弗逮。至臨事則毅莫能奪。故所立如此。詩文辭氣超越。有集百餘卷。悉毀於官。

贊曰。藩垣屏翰。寧與晉。遼惟三長史。乃心王朝。龍石守口。通讚於鶚。移孝爲忠。維音曉曉。

史官曰。急國難者。不在受恩之淺深。官爵之崇卑。三長史皆閒曹。亦梁園老耳。而慷慨發兵。嬰城固守。封事備禦。纒纒千言。何其謀遠而欲壯也。奚必常依日月之光。早備心膂之寄。而義烈扇世。有古國士之風焉。



明書卷一百四

列傳二

忠節傳四

黃觀

附金有聲、張同知

黃鉞、陳性善

附黃興、陳子方、彭與明、劉伯完

黃觀字伯瀾一字尚賓貴池人初從父贅姓許幼穎敏受學元侍制黃昇昇死節觀益砥礪博通今古有聲性至孝洪武甲子貢入太學是歲領鄉薦第一外艱服闋仍入監嘗繪父母墓圖自隨閱之輒泣辛未會試第一廷對禦戎策大要以天道福善禍淫之機人事練兵講武之法爲言稱旨復擢第一拜修撰日侍御前敷奏明爽上甚愛重每賜顧問命編寫省貪等錄上以其有政事才凡法司諸榜文令觀撰成卽書之兼理軍職貼黃及管註銷諸司案牘侍東宮講論累遷尚寶卿禮部侍郎復姓建文初更官制每部增侍中一員位次尚書命觀爲之仍掌尚寶司事與方齊並見信用燕兵起索齊黃急時觀草詔極其詆斥四年燕兵已迫密奉詔募兵上游且督諸郡勤王燕王已卽位列文職奸臣罪狀觀名第六先是索寶不得或言已付黃觀出起兵矣於是索觀急觀至安慶聞變痛哭謂人曰吾妻翁有志節必不辱招魂葬

之江上。明日家人自京奔至。言夫人暨二女同被執。有象奴得之。夫人給以釵釧。出市酒殺。急攜二女。率家屬十人。投淮清橋下死。觀者傷哭。至李陽河。朝使見迫。知不可爲。給曰。入賀新朝。禮當豫習。朝服東向再拜。投羅刹磯。湍流中急。鉤挽之。僅得珠絲棕網以獻。太宗命東芻蒙觀帽。而對於市。年三十九。逮烟黨百餘人。繫獄。仁宗初放還。友人柯暹爲之傳。是後清溪居民時見冠裳者一人。攜二女郎立溪畔。皆識爲觀也。駭歎立祠。景泰中邑人進士孫仁使遼。於老卒朱黻處得其文集。黻故諸生。從觀遊。以累戍。觀故宅在學宮西偏。貴池令龔守愚卽其所立祠。而南京祠亦益拓。有金有聲爲刑部侍郎。與觀及張顯宗等徵兵浙江。至南昌。將入援。爲取部百戶劉恩縛送京死之。又有松江同知周繼瑜。聞觀奉勸王詔。乃榜募義勇入援。極言大義。感動人心。痛詆燕王乖恩違義。太宗卽位。械至京。磔於市。初翁夫人及二女屍順流至賽工橋。相持而立。顏面如生。烏鳶不敢近。久之。土人瘞於橋側。萬厯中。青陽施益臣爲封樹立墓。夫人投水時。嘔血於通濟橋石中。成小影。陰雨則見。相傳爲大士影。衆戒勿踐。有僧昇致菴中。夫人見夢於僧曰。我黃公妻翁也。僧因沃以清水。悲愴之容。恍然側立。東向。髻鬢鬢髮。人咸異之。戶侍郎徐良彥移置祠中。題曰翁夫人血影石。太學生許重熙刻銘於上。曰。湯湯淮流。炳炳梁石。爰滯貞魂。乃昭靈跡。金光隱見。玉顏映覲。冤並飛青。怪疑藏碧。昭哉侍中。有赫烈媛。命際蛇窮。時逢龍戰。神逐魂浮。光垂睡現。年歲可遷。精英不變。儼然法相。恍同梵侶。鬱影沈雲。幽香陰雨。蓬髮悽容。嚴凝悴宇。僕固留痕。明月印礎。靈修容典。義義淒淒。孝義聖母。騰螭駕。寬飭我巾幗。嗟彼鬚眉。貞砥不毀。千載傳彝。

黃鉞字叔揚常熟人少明敏好學貧無藏書日從書肆流覽倚徙終日不歸主者憐其少多與觀時天下新定重法繩下士不樂仕而詔求賢急鉞父見其好學恐爲郡縣所知數懲之兒何爲自速不祥不能止則潛走友人借書道中披覽比至輒盡每以無餘爲恨楊濩者元末隱士也學古行高嘗避雨泊舟鉞舍旁見鉞持書於無人處竊吟哦不休異問之曰豎子好學如此日能讀幾何答曰兒不省事得觀古人爲樂苦貧不能多得也濩曰我多先人遺書去此不遠子能從吾遊乎可以遂子樂鉞喜再拜卽從濩至其舍與數冊去輒卽來易濩怪其頻舉所借書問之悉誦如流濩大喜曰吾架書且萬卷寶惜不能舉付汝汝當就吾舍讀因令其子福同起處三年盡其書郡縣聞之辟鉞賢良并及福濩悲曰吾不幸遭世亂家破族散獨攜一子避遠郊畢此餘生曩以子好學乃用相餉奈何不自晦卒爲人知累我福福死矣鉞徐曰第毋患當爲公說尹罷之乃教福結束如農夫誠曰卽尹有問子但操吳音勿有所對因與詣尹曰鉞與福同居數載知甚深福才能無所長而福父老病不可行卽行恐不足應詔旨君且得罪時福詞訥故作不解尹心知其詐也乃罷福獨上鉞以生員除宜章典史洪武二十二年舉湖廣鄉試明年成進士授禮科給事中居職封駁甚多建文中外艱歸方孝孺往弔屏左右密曰北兵日南蘇常鎮京師左輔也君吳人又朝廷近臣今雖去當有以教我鉞曰三郡惟鎮江最爲要害守非其人是撤垣以納盜也指揮童俊狡獪不宜獨任吾近見其奏事上前視遠而言遊此其心不可測蘇州知府姚善忠義激烈有國士風能獨當一面但仁慈有餘御下太寬此治郡之良才恐不足定亂然國家大勢不在江南待戎馬至此而

觀之晚矣。孝孺是之。因附書致善。以忠孝相勉。期戮力王室。濟時艱。善得書。與鉞相對慟哭。自誓必死。鉞守父殯。在陂上築廬居。御史按部至常熟。問曰。此有黃給事何在。邑中無知者。鉞鄰乃引御史舟至陂。時暮秋。收禾堆積。村巷路又泥淖。御史徒步抵舍。鉞從幕中對語。移日。家人欲割雞具饌。鉞曰。豈有居喪而殺牲禮客者。卒以菜粥對食。而別燕兵至江上。善奉詔總蘇、松、常、鎮、嘉五郡兵馬。勤王以書招鉞。鉞即日營葬畢。詣軍慷慨曰。明知無益。義不可諉也。既而董俊果以鎮江降。燕王既即位。詔暴善罪狀。急收之。善麾下許千戶性權譎。因得親近。縛善邀賞。鉞聞。遂絕食。閉目三四日。或傳善款服。已得宥歸。矐目曰。豈有從逆姚蘇州哉。且少俟之。善事定。吾乃引決。脫果不死。吾將下報希直。遂復稍稍食。七月十一日。報善死。鉞起祭琴川橋。西向再拜。哭曰。吾與君同受國恩。不幸有國難。義同許身。今君與希直同死國。烈矣。吾何忍背義獨生。祀畢。給家人歸祭具。遂從容整衣冠。奮身入水死。時捕善黨急。縱橫郡邑中。且訛言併錄鉞家。親族悉驚竄。楊福獨具棺衾。晝夜泣橋側。求屍不能得。更數日。屍忽自出。立水中。容貌如生。福慟哭。親抱而起。易其衣。體猶不敗。竟成禮葬之。復弔以詩曰。江風夜夜鼓橫波。江雨朝朝溼薜蘿。九辯不回哀郢志。三軍難奪採薇歌。手披宿草孤蹤滿。夢落空梁月影多。誰謂百年臣子恨。獨聞野老淚滂沱。葬虞山北麓。邵圭潔爲立石。

陳性善。初名復初。以字行。浙江山陰人。洪武乙丑。進士上第。臚唱過御前。太祖見其容止凝重。矐目久之。謂侍臣曰。君子人也。授行人司副。遷翰林檢討。初。誠意伯劉基卒。上遣御史李鐸往取其遺書。簡工書者。

數人入便殿繙錄。性善與焉。諸人憚天威嚴重。多戰汗不成字。性善動止安雅。書法妍正。上嘉悅。賜飲饌。時誅譴叵測。性善留中。竟日。家人以爲死矣。既出。乃大驚。拜禮部左侍郎。薦起薛正言。韓宜可於戍籍。皇太孫在東宮。久熟性善名。卽位。一日退朝。獨留賜坐。問以治天下之要。使書以進。性善益感知遇。盡所欲言。上面允行。而中多止。一日請對曰。陛下不以臣迂。猥承顧問。臣旣僭塵聖聽。許臣必行。今而詔書云然。所謂爲法自戾。何以信天下。上爲動容。未幾。燕兵南下。改副都御史。監平安軍。戰靈璧。遂與大理丞彭與明。欽天監副劉伯完。指揮王資等十餘人。皆被執。燕王旋縱之歸。性善曰。辱命罪也。而又活於燕。何以見吾君。朝服躍馬入河死。後徙邊。洪熙初。赦還。時餘姚黃暉。陳子方與性善同死節。與明。萬安人。建文時。以大理承督諸將。有風裁。伯完精占候。多奇中。預知靈璧之敗。後被釋。不知所之。

贊曰。矯矯伯瀾。忠壯之殫。赴江投淮。一家若安。叔揚就義。從容爲難。復初抱憤。去不復還。怒隨濤立。悲咽

湍浚。吁嗟汨羅。萬世斯丹。

史官曰。嗚呼。從容就義。古今所難。若其懷翔翔之情。昧舍生之概。避經瀆之小節。忘見義之大勇。卽梯榮顯勢。君子醜之。黃觀奮發勤王。名居第六。如斯馨壯。可不謂烈焉。黃鉞畢葬。赴難。失其同人。忍須臾以待。克一之殉命。而自沈。不棘以曼禍。不紆以苟生。孝不遺親。忠不後君。琴川俎豆。信不媿友。備美哉。性善縱不偷生。情非畏罪。均無傷勇之譏。成樹成仁之軌。其垂名皦潔。與河流俱永矣。

王良程本立曾鳳韶張泰傳

王良字天性祥符人洪武二十六年任僉都御史尋遷刑部右侍郎建文初轉左辛巳坐末減燕軍校罪出爲浙江按察使謁岳飛墓誓曰苟愧步武非人也金川之變慟哭誓殉國太宗以前事頗德之特召將大用使者至良執下獄詰旦且縛以徇道中忽衆鼓譟奪去良還坐堂上抱其印及其餘九印悉騰置於篋攜歸謂妻曰我分應死顧思所以處汝未決爾妻應聲曰君爲男子乃爲婦人謀乎從容餽良食抱其子歎歎如廁投池水死良往覓子匍匐池旁屍浮起矣殮殮畢積薪閉戶戒其家人毋得出命妾抱其子往僚友某僉事延其祀遂舉火以印投之身赴火死事聞太宗曰死自其分乃毀吾先皇印詔徙其家於邊旣而風雨晦冥人恆見其神出沒後至者不敢居正德中按察使梁材始卽司門內水鑑亭爲祠祀之

程本立字原道系出伊川徙杭再徙桐鄉父德剛通書史法律負才氣不仕元將路成兵過暴掠爲陳利害成悟戢其部衆欲奏官之以疾辭本立少有大志從邑人鮑恂貝瑗游讀書不務章句海鹽沈壽康時稱爲孝隱先生嘗執手勉之曰學者爭務科舉以經學爲名而無實子質厚年富當務聖賢之學本立遂篤志修檢乃從金華朱克修得考亭之傳復往學于白雲許先生國初舉明經秀才除秦府引禮舍人後改周府從王之國大梁二十年春進長史從王來朝被累謫雲南馬龍他郎甸長官司吏目留家大梁攜一僕之任時六詔初附叛服靡常曾施可伐煽誘百夷爲逆本立單騎入夷巢諭之曾咸悅附西平侯沐英布政使張統皆禮重之委以統領守禦本立深憫民夷之患矢心盡瘁創爲賑濟安撫之策未嘗以文

法自委。歷道險遠。山行野宿。自楚雄、姚安、大理、鶴慶、麗江、永昌、徧往撫綏。民夷稍安。三十一年。奏計入京。應天府尹向寶、翰林學士董倫薦其學行政事。宜留中朝。徵翰林充纂修官。預修太祖實錄。未幾。陞試左僉都御史。作御史箴。尋卽真。俸入之外。不通餽謁。時稱清御史。建文三年。坐失陪祀。調俸。仍留翰林編纂。明年。實錄成。改江西按察副使。未行。燕兵入京。痛哭自經死。燕王卽位。追奪官籍。其家無遺資。所著有巽隱集十卷。

曾鳳韶。廬陵人。洪武末年進士。建文中。爲御史。會諸藩王入覲。馳皇道入。且不拜。鳳韶侍班。大言殿上。宜展君臣之禮。宮中乃敍叔姪之情。由皇道不拜。大不敬。建文皇帝曰。至親勿問。燕兵逼。朝議遣書燕諭罷兵。無敢行者。鳳韶毅然請行。姚廣孝言於燕王。勿納。乃取竹通節。入書鼓風遠之。亦不報。建文皇帝出亡。鳳韶請從。曰。多人不能無生。得失。麾之去。鳳韶泣曰。臣頃以死報陛下。太宗卽位。召復御史。不至。加吏部侍郎。召。又不至。刺血書憤詞襟上。曰。予生廬陵。忠節之邦。素負立朝骨鯁之腸。讀書而登進士第。仕宦而至繡衣郎。旣一死之得宜。可以含笑於地下。而不愧古文天祥。屬妻李。子公望。曰。我死。勿易衣斂。遂自殺。時年二十九。李亦自經。

龔泰。字叔安。義烏人。少聰敏。日記數千言。洪武十九年。領鄉薦。明年。入太學。奉命閱齊府獄。監安東倉。盡力搜剔。獄清弊絕。吏部策試第一。除試給事中。建文時。遷都給事中。燕兵逼。命泰巡城。泰與妻傅訣曰。國事至此。我自分必死。爾第攜幼穉歸。否則無辱也。妻諾。俄宮中火起。泰馳赴。爲燕兵所執。見燕王於金川。

門不屈。王以非奸籍，不殺。因曰：主辱臣死，況已亡耶？乃奮身投城死。妻負骸歸。子永吉，累官兵部侍郎。贊曰：誓岳無愧，書襟以血。自勵有箴，去家則決。懷懷忠忱，四人一轍。

史官曰：王良，斬使不遂，縛而過市，邁斬衣矣。火其身不火其名，赫炎哉。程本立，撫夷有方，奮鳳凰池而猶徇國，可謂無怨矣。曾鳳韶，直聲動殿陛，且屢卻寵召，其孰能之。龔秦巡城死於城，與雉堞俱崇也。若四人者，蓋不徒臨難勿苟，而平時之略，有足嘉焉。

王叔英、王良、陳忠、廖昇、周是修傳

王叔英，字原采，黃巖人。少孤，從母嫁陳氏，因姓。久而後復，負至性。往往聞孝子友弟，卽爲之感，激流涕。好樊進士類，洪武中，與楊大中、葉見泰、方孝孺、林右並徵至京，辭還鄉。二十年，薦起仙居訓導。歷漢陽知縣，有禱雨文三首，約四日不雨，減一食，五日減二，六日絕食，以俟神之顯，其誠如此。隨澍隨止，皆應其請。遠近異之。建文初，孝孺被召，詒書曰：凡人有才固難，能用其才尤難。子房之於高帝，能用其才者，賈誼之於文帝，不能用其才者也。子房察高帝可行而言，故高帝用之。一時受其利，雖親如樊、呂，信如平、勃，任如蕭，何不得聞焉。此子房能用其才也。賈生不督而易言，且言之太過，故絳、灌之屬，得以短之。此賈生不能用其才也。方今明良相遇，言而行之，千載一時。雖然，天下事固有行於古而亦可行於今者，亦有行於古而難行於今者。夏時周冕之類，此行於古而亦可行於今者也。井田封建之類，可行於古而難行於今者也。可行者行之，則人之從之也易。難行者行之，則人之從之也難。從之易，則民樂其利，從之難，則民受其

患此君子之用世貴得時措之宜也。時孝孺欲復井田。故言及之。孝孺得書。感其意。薦之。召爲翰林修撰。上資治八策。曰務問學。謹好惡。辨褒正。納諫諍。審才否。慎刑賞。明利害。定法制。皆援證今古。可見施行。又曰。太祖除姦剔穢。抑強鋤梗。如醫去病。如農去草。去病急。或傷體膚。去草嚴。或傷禾稼。是故體膚病去。則宜調燮其血氣。禾稼草去。則宜培養其根苗。并論行限田法。甚具識者。知其有經濟遠略。上深嘉之。與孝孺日見信重。燕兵渡淮。上遣使四出募兵。叔英奉詔行。至廣德。聞建文皇帝遜。燕王卽位。慟哭。會齊泰出奔。相值。曰。秦貳心矣。急擒泰至。密問之。故乃相抱慟哭。圖後舉。已而知事不可爲。止移書於祠山道士盛希年。葬我祠山之麓。命治棺。書絕命詞藏裾間。沐浴冠帶。自經。玄妙觀柏樹。詞曰。人生穹壤間。忠孝貴克全。嗟予事君父。自省多過愆。有志未及竟。奇疾忽見纏。肥甘空在案。對之不能嚙。意者造化神。有命歸九泉。嘗念夷與齊。餓死首陽顛。周粟豈不佳。所見良獨偏。高蹤邈難繼。偶爾無足傳。千秋史官筆。慎勿稱希賢。又題其案曰。生旣久矣。未有補於當時。死亦徒然。庶無慚於後世。年三十七。壬午六月二十七日也。道士斂之。葬於城西五里橫山。尋窮治姦黨。妻金已自經死。二女赴井死。弟原默。變姓名匿京師商旅中。鄉有金寬者。告捕受戮。正統中。楊士奇題其墓曰。嗚呼翰林修撰王原采之墓。爲文以祭曰。先生之學。聖賢是師。先生之行。綱常自持。先生之心。金石其貞。先生之道。霜雪其明。浩然歸全。乘雲翩翩。我懷先生。崇山長川。祠山之藏。旣固且深。遙致觴奠。神其來歆。蓋士奇徵時館漢陽村落中。叔英行部過之。聞讀書聲。曰。兵革之後。久不聞此。入視。士奇避去。見案上詩文一編。稱賞。亟署其面曰。此公輔器也。邀見以文字相推。

重尋薦爲訓導。復贊陞審理。有幼子名期。謫戍大同。士奇以百金與同鄉涿州同知張璣。治中孟範。訪得教誨甚篤。卒無成。士奇曰。奈何。抱持痛哭。復與金遣之。遂不知所終。後祀學宮。成化中。知州莆田周瑛修其墓。嘉靖中。編修安福鄒守益謫州判官。立懷忠祠。太平知縣曾才漢又建忠節祠。妻及二女有貞烈祠。在黃淡礮山。叔英自號靜學。卽以名集。

王艮。字敬止。吉水人。建文元年。舉鄉試第一。明年。廷試已定第一。以貌不揚。易胡靖居首。靖後名廣。靖對策有親藩陸梁。人心搖動等語。見擢艮次之。又次同邑李貫。並授修撰。如洪武十八年故事。設文史館。待之陞秩一等。分類祕閣書目。預修太祖實錄。總集類要。及時政記。屢上書言時務。飭身正色。不可褻玩。聞燕兵起。常憂懣不食。日就羸。金川門變。羣臣多往迎附。艮獨闔門痛哭。告其母曰。兒且死。有弟三人。足侍養。母請勿念兒。亦訣妻子。遂自鳩死。燕王卽位前一日也。文章雄偉。常曰。悖於理而工於辭者。非不知理悖也。欲希世而盜名也。吾竊恥之。詩調高古。一以理爲主。字畫精楷。皆稱其爲人。子修。後鄉試亦第一。靖貫皆事太宗。永樂初。上建文時羣臣封事千餘通。令解縉等編閱。非軍馬錢糧諸涉於犯者。悉令焚之。因從容問貫。縉等曰。爾等宜皆有之。衆未對。貫獨頓首曰。臣貫實未嘗有也。上曰。爾以無爲美耶。食其祿。思任其事。當國家危急。官近侍獨無一言可乎。朕非惡夫盡心於建文者。但惡導誘建文以亂政耳。爾等前日事彼。則忠於彼。今日事朕。當忠於朕。不必曲自遮蔽也。貫大慙。久之。貫遷中允。累繫獄十年。竟死獄中。

陳忠字思中鄞縣人洪武甲戌進士第二官翰林編修素有志操以道義自持燕兵入金川忠不屈死之
廖昇襄陽人以學行知名進與方孝孺王紳輩友善洪武中由左府斷事上知其賢超擢太常少卿建文
初留翰林修太祖實錄爲纂修官昇博雅有史才朗達負氣書南北用兵事語多直聞茹常等自龍潭敗
還請割地不許燕兵逼金川慟哭與家人訣自經死徇義諸臣昇死最先都御史陳瑛奏昇黃觀王叔英
周是修王良顏伯璋等皆不順天命效死建文計其存心與叛逆等並宜追戮上特有昇家
周是修名德以字行泰和人少孤貧元季兵亂奉母避難苦行力學十餘載學成不仕洪武末薦明經爲
霍邱訓導入見太祖問家居何爲曰勸人爲善子弟孝弟力田上喜擢周府奉祠正先是有異人送藥上
嘗之甘占云當得善人至是符夢賜書褒美在周府每應教賦詩援筆立就王甚重之踰年從王北征至
黑山還陞紀善尋得侍皇太孫大承恩眷建文元年王有過盡逮府中官屬於獄是修以嘗諫得免改衡
府紀善衡王者建文皇帝弟也上聞其母賢書賢母二字賜之因言胡樵渚賢復書樵渚二字賜之一日
帝檢古樂府作思美人賦以賜王未就國留翰林預纂修好薦達知名士數陳論國家大計燕兵渡淮與
蕭用道上書指斥用事者誤國下集議用事者怒共挫折之屹不爲動燕兵將入金川留書別友人付以
後事具衣冠入應天府學拜先師畢自銘其衣帶略曰在藩國欲不負藩國在朝廷欲不負朝廷欲繼先
哲之淳風開後來之正學越十餘年而言皆不行豈非天耶歸於聖人之門庶無罪悔因自經於尊經閣
年四十有九其帶至今子孫寶之祭必以陳太宗卽位都御史陳瑛言是修不順天命請加追戮上曰彼

食其祿。自盡其心耳。勿問。是日中書舍人臨川聶同文因迎燕王。天熱徒步急。暈死途中。先是修嘗約楊士奇、解縉、胡廣、金幼孜、黃淮、胡儼同死國難。燕兵入廣方。問家人飼豕亟。餘悉負約。後是修子轅請士奇作傳。士奇語轅曰。當時我亦同死。今誰爲若翁傳者。聞者以爲笑。是修內貞外和。孝友忠信。非其義不苟取。性行恒直。寄懷沖澹。其學自經史百氏。下至陰陽醫卜。靡不通究。好吟咏。每旦伸紙濡毫。自述所懷。文先理致。若不構思。雍容雅贍。皆可傳誦。所著有詩小序、詩集義、詩譜、論語類篇、廣衍、太極圖、綱常懿範、邇言、家訓、芻蕘集、進思集。嘗曰。忠臣不以得失爲憂。故其言無不直。烈女不以生死爲慮。故其行無不果。因取先忠節遺事輯爲觀感錄。朝夕省覽。不負其志。蓋燕兵渡江。翰林諸臣先死者。惟是修。轅有文名。萬曆中。卿史饒位卽尊經閣旁立祠祀之。

贊曰。節義二字。禹光不識。所讀何書。古今大惑。二王諸人名蜚翰墨。節義文章。忠亦其匹。彼餵豬者。千古怍色。

史官曰。王叔英等英才卓犖。飛聲翰苑。旣無軍旅之嫌。復不參帷幄之寄。儘可效志鴻冥。避薰臆鼠。乃皆從容就義。不負所學。嗚呼。與見執而不得不靖者。蓋有間矣。蓋有所慕與有所激。又未免二時哉。王叔英、通達時變。王良名理暢徹。陳忠雖乏表見。而義存。周是修目靖聖域。蓋優入聖域者矣。不然。卽爲楊、解、胡、黃金、李奚難。

高巍字不危遼州人。事母蕭至孝。蕭老而痼疾。奉湯藥不懈。母亡。廬墓蔬食三年。洪武十五年。貢入太學。十七年。以孝行旌。尋授督府試左斷事。上疏欲墾河南山東北平兵後荒田。及抑末技。慎選舉。惜名器數事。太祖嘉納之。後因它事坐罪不測。以議賢謫戍貴州關索嶺。仍許其諸子代役。建文皇帝即位。放歸里。知州王欽應詔辟巍赴銓曹。上書論政事。其略曰。太祖有文王紀一之德。皇后有后妃不妒之行。百男君王。上齊三代。分茅胙土。先據形勢。星羅碁布。比之古制。雖皆分封過當。然太祖之意。莫不欲護中國而屏四夷也。今各處親王。故多驕逸不法。違犯朝制。無所顧忌。不削則朝廷紀綱不立。削之則傷親親之恩。此我皇上所難處也。賈誼曰。欲天下之治安。莫要於衆建諸侯而少其力。力少則易使。以義國小則無邪心。真哉制諸侯之良策也。以臣愚見。勿爲晁錯削奪之謀。當行主父偃推恩之策。秦晉燕蜀四府子弟。分王於齊。竟吳楚。潭湘。齊。竟吳楚。潭。湘。分封於秦晉燕蜀其餘寧遼谷代慶肅等府。類比而分王之。少其力而減其地。如此則藩王之權不削而自弱矣。其賢如河間東平。下詔褒賞。驕逸不法如淮南濟北者。初犯則容之。再犯則赦之。三犯而不改者。當合親王告太廟。削其地而廢處之。豈有不順服者哉。修身齊家。宣父明訓。睦族和邦。帝堯盛德。惟皇上覽焉。上深奇之。會燕兵已起。命從李景隆參贊軍務。巍復上書言。臣願使燕披忠膽。陳義禮。曉禍福。明親親之宜。以折之。遂遣往燕。巍自稱國朝處士。臣某。上書燕國大王。其詞曰。志慕仲連子。善與人排難解紛。名世不朽。我太祖升遐。遺詔內外臣民同心輔政。我聖明天子嗣登寶位。誕布維新之政。下養老之詔。天下感戴。奚啻考妣。朝野皆曰。內有聖君。外有骨肉藩翰。帝王之治可待。

不意大王與朝廷有隙。張皇三軍。抗禦六師。竟不知其意何出。在朝諸臣。執言仗義。以順討逆。臣以爲動干戈。孰若和解。使帝者復帝。王者復王。君臣之義大明。骨肉之親愈厚。臣所以得奉明詔來見大王者何哉。誠夙許太祖。生當殞首。死當結草。故求盡一言。卽頸血汗地。所不惜耳。昔周公聞流言。卽避位居東。若大王收諸始謀者。檻送京師。或戮而奏聞。或解其護衛。或質所愛子孫。釋骨肉猜忌之疑。塞讒賊離間之口。須當與周公比隆。而慮不及此。乃傳檄遠邇。大興甲兵。襲奪疆宇。任事者得藉口。以爲殿下假誅左班文臣。實欲效漢吳濞。倡七國以誅晁錯爲名。家必自毀。然後人毀之。恐有奸雄。鳩集無賴。因時乘釁。數萬突起而橫擊之。萬一有失。大王獲罪先帝莫挽矣。今大王據北平。取密雲。下永平。襲雄縣。掩眞定。易若建瓴。但自興兵以來。經今數月。尙不能出區區叢爾一隅之地。較以天下十五而未有一焉。大王將士殆亦疲矣。況朝廷天下無限之師。大王以一國有限之衆應之。大王同心之士。大約不過三十萬。大王與我聖天子。義則君臣。親則骨肉。尙生離間之疑。況三十萬異姓之士。可保終身。困迫而死於殿下乎。大王信臣言。上表謝罪。按甲休兵。朝廷寬宥。再修親好。天意順。人心和。太祖在天之靈亦安矣。不然。執迷不回。大喪未終。毒興師旅。恐與伯夷。叔齊。秦伯。仲雍。求仁讓國之義徑庭矣。幸而兵勝得成。後世公論爲何如。儻有蹉跌。取譏萬世。於是時也。追復臣言可得乎。巍白髮書生。蜉蝣微命。生死不懼者。但久蒙太祖教養。無能補報。死孝死忠。臣至願也。書再上。不報。景隆兵屢敗。巍自拔南歸。建文二年五月。遇鐵鉉於臨邑。相持鬪。哭共誓效死。遂趨濟南守城。拒退燕兵。飛書報捷。巍與鉉燕天心水面亭。作賦志喜。有曰。至濟南而被圍。

思張巡之忠堅。遇知己之鐵相。更從英輩以雲聯。若徐將軍之赳赳。盛統兵之桓桓。僉憲高公之糾慢。大
秦宋公之周旋。掠陣張都統之能勇。給儲王太守之從權。吾道王府校之論議。斯文王肯播之勉旃。衆資
羣策。屈力保全。盛統兵者。盛庸也。餘不可考矣。京城破。巍縊死。驛舍後弟宣。謫戍南海衛。
贊曰。指大於臂。古今所疑。推恩散權。假策實奇。巍言若行。可以杜危。借漢徒喻。學魯莫移。死忠死孝。志願
可悲。

劉環字仲環。基之子也。弱冠涵濡經傳。喜談兵。究極韜略。握奇諸書。偉貌豐髯。議議英發。基嘗以二子見
太祖。太祖曰。阿連明秀。阿環凝重。父歿不仕。甌賊葉丁香叛。延安侯唐勝宗討之。決策於環。破賊。還薦環
才略。太祖喜曰。環真伯溫兒矣。召見。謂曰。朕欲汝日夕左右。惟閣門使如儀禮司。立百官上。宣達爲職。處
爾無逾此官者。遂授之。賜第馬衣帶。諭以糾正時諸司。每事執法。以剛直聞。都御史袁泰奏事件旨。當殿
呵駁。上曰。可謂不負此使。因金書除奸敵。佞四字於鐵簡。賜之。會谷王封宣府。詢侍臣。擇可爲輔者。諸大
臣故忌環。對曰。閣門使劉環。忠勇果敢。可任。上頷之。授谷府長史。且曰。王年少。凡事執正。谷在宣邊。兵機
尤不可忽。環設險足兵。諸胡屏息。嘗至燕。王與環奕。環勝。王拂曰。卿獨不少讓。我耶。環正色曰。可讓處。環
不敢不讓。不可讓處。環不敢讓。燕兵起。環隨谷王馳還京。獻十六策。不聽。令參議李景隆軍事。九年。救政
景隆。又不聽。景隆戰敗。環夜半渡蘆溝河。水陷馬斃。環力破冰。跳躋岸。冒雪走良鄉。趾裂。跛行三十里。環
子貊自大同赴難。涿州遇環。翼上馬南奔。知景隆決誤國。稱疾求歸。見許。建文三年。輿疾赴闕。進聞見錄。

千萬言又不聽。辭歸。燕王既卽位。凡仕建文者。悉令趨朝。否有重罰。璟稱疾堅臥不起。陳瑛論璟逃叛。逮至京。臨行。宗族以魏徵事勸。璟曰。吾志決矣。入見。但稱殿下。且云。殿下百世後。逃不得一箇字。詔下獄。辯髮自經死。法官欲坐其家。上以基故不許。得歸葬。嘉靖中。提學副使萬潮肖像配享基祠。贊曰。矯矯仲璟。英偉剛直。父志持運。子自行。是一奕不苟。而況生死。勇過孟賁。一字正史。達天信心。懷然不緇。

史官曰。高巍之學。其用近晁錯。錯議削其所守。而巍乃分其所疎。所謂施行有漸也。處士上書。大義炳烜。周公不恤流言。九畹何歌矣。協守濟南。燕不得志。誠如宋參軍之謀。疾走北平。天下事未可知也。卒使賦詩不足退敵。悲哉。劉璟風烈。逾拔。以奕褫燕魄。再上書皆不用。其志行不亦悲乎。然太宗終不能逃一箇字。千古定評。又何謬焉。

張安國、劉原弼、何申、方法、王省、陳思賢、張倫、儲福

附妻范傳

張安國。浙定海人。建文中。爲工部郎。燕兵逼京師。安國與妻曰。大事去矣。無能爲也。予職非司馬。旣不能帥兵應敵。又不能羔鴈以事人。奈何。遂相與乘舟入太湖。忽聞人言。燕王卽位。安國大慟。於崖上致祭。與妻曰。食人之祿。而存身於讐主之世。恥莫大焉。遂登舟。鑿其底而共沈。崖人哀之。爲立石誌。

劉原弼。字良輔。扶溝人。洪武中。以貢任刑部主事。燕兵入。原弼率家人巷戰。遇害死。案遺骸不可得。其家

刻木爲人葬之。六世孫自強。萬厯初任至刑部尙書。自有傳。

何申。嘉興人。爲中書舍人。建文末。奉使四川。聞太宗卽位。慟哭嘔血死。

方法。字伯通。桐城人。少孤。母程氏教之。奉訓勵志。以儒術顯。魁梧奇傑。聞朝廷利害。輒奮激慷慨。欲以身任。建文己卯。方孝孺典應天試。庚辰。授四川都司。斷事。剛正廉直。執法不撓。太宗旣立。諸藩入賀。有表當署名。法獨投筆奮袂出曰。舊君安在。此名節所關。死矣。庶可見方先生。尋詔逮登舟。謂家人曰。及安慶告我。旣至。望拜先墓。慨然曰。得望我先人鄉。可矣。拜訖。踴沈於江。求屍不獲。妻鄭收其爪甲於巾。箝藏之。鄭守節幾四十年。卒。遺命以伯通之髮爪納懷中。櫛而葬。其後裔如大美。大鎮。大任。大鉉。孔炤。拱乾等。多顯宦。

王省。字子職。吉水人。洪武五年。鄉薦。至京。詔免會試。命吏部次第擢用。獨乞歸養。尋以文學徵。上親試稱旨。當殊擢。自陳才薄。親老。乞便養。得浮梁教諭。外艱。起復。改睢陽。凡八年。又改濟陽。燕兵至。爲前哨所執。從容引譬。詞義慷慨。衆義而舍之。歸坐明倫堂。伐鼓聚衆。諸生會曰。若等知此堂何爲。稱明倫。今且勿多論。只說君臣之義何如。因大哭。諸生皆哭。遂以頭觸柱死。女靜。適邑人周鳳岐。爲卽墨主簿。聞北兵至。濟陽。女泣曰。吾父必不生矣。三遣人訪。竟得遺骸歸葬。後有司祀之學宮。子禎。成化中。爲夔州通判。亦抗節死於賊。

陳思賢。廣東茂名人。質直好義。洪武末。爲漳州教授。以忠孝行誼最諸生。隨材教誨。多所成就。太宗卽位。

詔至。慟哭曰。明倫之義。正在今日。遂堅臥不出。率其徒伍性原、陳應宗、林珏、鄒君默、曾廷瑞、呂賢。即明倫堂爲舊君位。哭臨如禮。郡人執送京師。思賢暨六生俱死之。嘉靖中。提學使邵銳立祠祀之。六生侍伯焉。張倫、河北人。爲衛指揮。勇悍負氣。常喜觀古忠義事。嘆曰。恨不身親爲之。建文元年十二月。薊州衛官兵兵攻北平。不克死。倫聞之發憤。合兩衛官率兵南歸。結明報國。初從景隆。已而從盛庸。並有功。燕兵南。尙率殘兵據砦守。太宗卽位。招倫降。倫笑曰。倫將自賣爲丁公乎。伏劍死。

儲福。無錫人。洪武初。隸燕山衛籍。年二十餘。頗好義。建文末。挈母韓。妻范。逃去。太宗卽位。詔甸戍卒入位。調福曲靖衛。復挈母妻以行。舟中日夜涕泣曰。吾雖一介賤卒。義不爲叛逆。竟不食死。母妻爲營地葬之。妻少有姿色。居貧奉姑甚謹。每哭其夫。不忍傷姑意。則走山谷中。長號而返。有貴官躡甚。慕其姿。聘之。范執刀誓曰。吾持此以待。貴官聞之曰。此節孝婦也。我安忍犯之。一日。范往澗邊浣衣。見其旁有草若蘇。蔕因取織蓆。養姑。賴以存。姑年七十餘。終。營葬爲廬於墓旁。年八十餘卒。澗蓆草遂不生。土人異之。卽其廬。葺爲菴。集尼居之名。崇孝菴。

贊曰。江湖可隱。乃不忘君。巷戰遇害。霄壤迎奔。申法表表。抗節致身。卓哉賢省。教先明倫。韎韐附注。實惟成仁。炳茲史冊。餘芬風人。

史官曰。張安國身旣隱矣。又何以死。其有薇不食之意乎。部曹開冷。巴蜀萬里。此非計畫無之不能苟活者。而必以身殉。誠明於義也。儒官之秩卑矣。王省身任綱常。陳思賢從容盡道。且能使諸生就死不悔。執

意海邦荒僻。乃有若人。張倫武弁。羞稱賣主。儲福賤卒。志能殉君。其妻亦終盡節。孝忠義之在人心。豈限愚夫婦哉。南京故老言。建文中。法網疎闊。道不拾遺。有得鈔於塵土中。輒拂之置高潔處。以石鎮之而去。一時士風樸茂。尚義者多。聞燕兵入城。百官遁者百餘人。惜其名不傳。蓋名節之漸深矣。

姚善、附王賓、
錢序、陳彥回、附黃
希范、張彥方傳

姚善、字克一。安陸人。初姓李。志行淳實。學識高遠。自題其讀書處曰待旦軒。工詩。與會稽唐之瀟相唱和。洪武中。鄉薦爲祁門丞。同知廬州。重慶三十年。擢知蘇州府。初太祖以吳承元俗僭靡。違式繩以重法。歸惡者更持短長。訟蜂起。難治。善洞曉政體。諳悉人情。數延郡賢。詢求治道。商略民生休戚。因俗救正。由是衆皆易嚮。轉稱大治。高隱王賓。字仲光。獨居陋巷。善躬往候。舍車徒步。叩門。自稱太守姚善。賓乃開門。延語盡歡。及賓報謁。望門再拜而返。善自邀還。辭非公事不敢入。又將候韓奕。奕避入太湖。善歎曰。韓先生所謂名可聞而面不可見者耶。奕潛心理學。尤精於醫。洪武初。累薦不起。所著有韓山人集。錢芹。字繼忠。少好奇節。自守甚高。洪武初。辟大都督府掾。從出絕漠。解職家居。善初願見不可得。會俞貞木以明經見重於善。月朔望必延致學宮。講經書訓士。一日遣菜貞木。誤致芹所。芹受之。吏覺其誤。詣貞木以告。貞木曰。錢先生不苟取予。今受不辭。必仰府公之賢耳。善喜。使人先道意。芹對使者曰。芹誠幸見公。然芹民也。禮不可往。若明公弘下士之風。請月朔會學宮。善如期致迎。芹上坐。質應義。芹曰。此經生業。今事有急於

此者方煩公料理耳。善棟然跽請教。芹出一簡授善。竟不交言而去。視之。則皆戰守制勝之策也。善心嘉之。時燕兵已南下。善密結傍郡起兵赴難。薦芹爲行軍斷事。芹道卒。善尋至京師。畫策防禦。時朝廷用漢破七國策。貶齊黃以緩燕。善言於朝曰。人有文武才略。可扶顛濟危者。孰有過黃太卿者。反置散地以快敵。今事已狼狽。盍急召之。乃召泰。子澄還。而善奉詔還督蘇松常鎮嘉五郡兵。勤王未及戰。燕王已卽位。索子澄急。子澄走蘇。約善共航海舉兵。善曰。公可去。善不可去。公朝臣。可四往號召。圖興復。善職守土。義當與城存亡。子澄遂去。善尋爲麾下許千戶等縛見太宗。詰善曰。若欲以一郡。乃敢舉兵抗我耶。善曰。燕亦不過一郡耳。語多不遜。死之。時年四十三。子節。謫戍。幼子繼兒。坐配保兒習匠。正德中。巡撫秦金祀之鄉賢祠。王賓未冠父歿。終身不冠。夙善姚廣孝。後廣孝掃墓歸吳。謁賓。再閉戶不見。已徒步往。乃納之。語未卒。遽墮茗甌而仆。口目俱歛。廣孝後復往。不見。從門隙窺見。呼曰。仲光。仲光。賓作吳音曰。和尚差哉。有光庵集行世。

陳彥回。字士淵。莆田人。父立誠。洪武初。舉秀才。爲歸安丞。被誣論死。家破。彥回謫戍滇南。弟彥困。戍遼東。大父及母郭僅存。會赦。又弗原。監送者憐而縱之去。顧貧不能歸。聞邑人黃積良。知合州定遠縣。往依之。更姓名曰黃禮。未幾。閩中教諭嚴德政。薦彥回明經。爲保定府學訓導。三考至京。承顧問者四十日。太祖器之。陞平江知縣。上崩。彥回應入臨。廷臣薦其文學廉幹。擢知徽州府。至徽。政教一新。士民感悅。建文元年春。以循良受上賞。是冬。祖母卒。當承重。徵父老。走京乞留。因請復故姓。詔許之。釋前罪不問。除彥困戍。

籍。又乞覓服。不許。許襄事畢。卽蒞郡。再疏。又不許。葬郭徽郡北山之陽。彥回召徽人泣諭曰。吾故莆田前罪人也。向所蒙恥而受祿者。以吾祖母耳。祖母歿。固宜自請死。上矜宥之。恩大何以報。日走墓下哭甚哀。方回視事。徽人名爲太守山。先是恆以亡命冒宗爲愧。悒悒不自安。因號曰訥齋。屢欲陳首。輒自籌曰。祖母年高。卽蹉跌奈何。隱忍二十餘年。始得行其志。燕兵至江上。奉詔糾義勇勤王。適彥回至。自遼東邂逅旅邸。郡士往賀。彥回泣曰。此身蒙朝廷再造恩。今骨肉重聚。予固有以處之矣。當遣吾弟歸治家事。此勤王報命之秋。予身許國。他不卹也。乃書務本二大字以遺弟。俾其歸。以孝弟力田。修身克家爲務。未幾。太宗卽位。彥回猶糾衆奮力入援。爲新安卒。真興縛至京。不屈死之。年四十七。籍其家。彥回旣去。代守徽郡者黃希范。政令嚴明。士民信服。修武備待戰。聞變。素服不治事。後坐與長史程通義嘗共議條上防禦策。爲錦衣邏卒捕去。論死。籍其家。而彥回逃去。

張彥方。龍泉人。建文元年。由給事中。以便養告。改江西樂平知縣。四年。勤王詔下。彥方舉旗糾義起兵。一邑響應。或沮之。彥方大哭曰。君父在水火。吾可以自緩乎。遂率所部抵江口。遇北來游兵。執至樂平。梟首暴屍。譙樓下。時暑月經旬。顏面如玉。無一蠅集。父老竊葬。縣治之清白堂後。

贊曰。勤王之旅。寥寥罕覩。五郡方糾。中台已沕。彥回投袂。慷慨決策。彥方纓冠。毅然植髮。偉哉丈夫。鬚髯如戟。相彼青蠅。聞風辟易。

史官曰。夫封疆之臣。則死封疆。固其所也。不又曰。謀人之軍師。敗則死之。謀人之邦邑。危則亡之乎。若姚

善諸人竭力以抗。不濟則以死繼之。斷不忍須臾之苟活。受萬代之詬。爲縣賁父所竊笑。或以王珪、魏徵事爲解。夫珪、徵受命爲青宮庶僚。其不可與委質任事者同日而論。明矣。人臣之義。當以王陵爲正。若姚善虛懷下士。更爲人不可及。



明書卷一百五

列傳二

忠節傳五

顏瓌

附子有爲唐子清黃謙

向朴、鄭恕、鄭華傳

顏瓌字伯璋以字行廬陵人聰敏介直能文辭建文元年徵賢良擢沛縣令以善政撫民未幾南北構兵官軍駐德州淮北之民終歲給餉瓌布置有方民不告勞三年九月設豐沛軍民指揮司集民壯五千築七堡爲防禦計尋調三千益山東軍所存皆疲弱不任戰四年正月燕兵來攻急呼弟珏子有爲曰兵勢如此孤城無援瓌與城俱義也歸語大人無過傷且爲我善養得令終爲孝瓌旣爲人臣子職弗克盡矣因題詩察院壁有丹心不改人臣節青史誰書縣令名之句燕兵夜入東門指揮王顯迎降瓌具冠帶升堂望南再拜自經死有爲不忍去半道還自刎父傍以從俄而諸軍至主簿唐子清典史黃謙俱死珏脫走濟寧踰月還沛詢邑人知父子屍已爲縣丞胡先理瘞乃至徐告同郡徐守晏璧璧有行義能文章因爲瓌傳言其孝友敦內行嘗與同督運德州連牀共食談論慷慨練達機宜以其屬吏深惜之後楊士奇

過沛。悼之以詩曰：平生金石見臨危，就義從容子亦隨。千載山河遺跡在，一門忠孝史官知。故鄉住近文丞相，先德傳從魯太師。欲酌邱墳何處是，離離荒草淚空垂。瑗，顏真卿後也。正統初，御史彭勛起墳祀。唐子清者在沛，有善政，民愛之。伯瑋令專調兵食，司一切選察事。子清矢力不懈，燕兵執子清，欲殺之。將兵者欲活子清，子清曰：吾誓不令顏父子獨死。願相從地下，乃及難。黃謙以儒生爲沛典史，果敢能戢下。伯瑋禮遇之，益效盡職。燕兵執之，使至徐招降，謙曰：不能招我降之，能令我招降人耶？死之。

向朴，字遵博，慈谿人。宋向敏中嫡裔也。父壽，宗慈湖之學，世稱爲樂齋先生。朴益精究其旨。洪武二十五年，以人才應詔，陛見。太祖問家居何爲，對曰：種田。其容秀而文，上心知其非耒耜中人也，因詢麥何以四節。對曰：以其占四時也。授獻縣令，單車就道，不攜妻子。兵燹之餘，闢荆榛，教農桑，與同甘苦。流移漸復，燕兵起，獻當兵衝，無城郭，乃集民兵，激以忠義，與燕將譚淵迎戰，力不敵，被執，懷印死。獻民哀之，拾遺骸葬道左。已而陳瑛亦獻人，請追戮死事諸臣，最酷。有楊姓父子懼瑛知其葬處，拙夜負骨潛更葬邑北十里，微識之。永樂初中，書王尹實北上，夜夢朴服血污葛衣，共談往事，起秉燭爲文，乘星月往哭之。涪川令韓彥復匿其二子於任，司諫顧道輯其遺事，書於寶峰菴佛座。三人皆義士也。二子道澹，道微，道澹被微稱痼疾不赴。有王偉元攀柏悲號之風，嘉靖間，朴祀本縣鄉賢祠。隆慶五年，又祀獻縣名宦祠。萬厯初，奉詔撫按建祠本縣北門外。王尹實、韓彥復、顧道附祀別室。楊氏父子臘食焉。

鄭恕，字本忠，仙居人。治尙書，工詩，好古博聞。蕭然斗室，與生徒數十人，日講論經義，高標勁節，一時傾嚮。

之聘爲昌國縣訓導。尋陞知蕭縣。大得民心。建文四年。上平燕疏。不用。燕將王聰來攻。力竭城破。不屈死。之後籍其家。妻彭妾夏蓮及二女當配。亦死之。子濂。從子溫。沒。謫北平種田。祀台八忠祠。

鄭華。字思孝。臨海人。洪武十八年進士。初授行人。奉使川廣。稱旨。太祖亟稱之。建文元年。詿誤謫東平州吏目。燕兵起。與其妻蕭訣。蕭亦以義相勉。以家託友人。無錫丞趙次進。亟還州。州長貳以下盡棄城走。華獨率民吏憑城死守。憂勞病甚。水漿不入口者三四日。燕將宋能攻陷東阿。分兵取東平。華曰。守土之臣。義不苟生。乃力疾戰。不屈死。年甫三十。祀台州八忠祠。

贊曰。獻。鄆河上沛。蕭淮南。兵衝地要。螳臂奚堪。朴。華前死。瓌。恕甘殲。闔城殉義。乃有□濂。一時烈禍。千古奇男。

史官氏曰。剖符列宿。吏動星躔。微祿下僚。能扶綱紀。斯固守土之英。忠良之選也。瓌之於沛。朴之於獻。恕之於蕭。百里符重如是哉。子清與謙。何其感義而興起乎。鄭華以吏目。獨以守城自予。顧其所許大也。以視迎麾投獻者。其相去不啻天壤矣。噫。

侯泰、葉福、陳植、樊士信、王彬

附鄆
崇剛傳

侯泰。字順懷。南和人。累官刑部尚書。燕兵起。上抗禦之策。督餉山東。屢進言於李景隆。不能用。濟寧不守。輜船陷沒。還京。建文四年。又出淮安督軍餉。經畫苦心。嘗徹夜不寐。京師失守。泰至高郵。與其隸上高人

茅卯仔同執不屈。與其弟敬祖、子玘皆死。籍其家。幼子京兒。永樂九年尙繫錦衣獄。時有尙書者。坐匿。建文又縱之去。誅死。一女屬樂。樂官陳儀。儀能執義。不令汙玷。洪熙初。遇赦。儀爲擇嫁良民。

葉福。字叔疇。侯官人。建文庚辰進士。授刑科給事中。燕兵起。福守金川門。勢危。自期盡節。遣家人歸報其母。曰。福爲王臣。不得爲孝子矣。或勸之。曰。所欲有甚於生。吾人不當爾耶。爲內叛者殺於門。祀闕三忠祠。陳植。廬江人。元末舉鄉試。不仕。洪武間。爲吏部主事。建文中。歷兵部侍郎。監戰江上。慷慨督師。有督將金某謀降燕。植責以大義甚厲。督將恨。殺之。出迎降。自陳邀賞。太宗立誅之。使人斂葬。植家不知上意。逃匿。無敢會葬者。

樊士信。應城人。洪武十八年進士。建文中。以兵部主事守淮河。燕兵南下。士信禦之力不支。遂死。後追族。王彬。字文質。東平人。洪武中進士。御史巡按江淮。燕兵日南。彬方在揚州。括饑糴。備樓櫓。飭器械。銳意守禦。指揮鄧崇剛。沈鷲。善謀。彬使贊其軍。因相與躬履艱危。激示忠憤。日夜巡城。率勵將士。七日不解甲。燕兵畏之。揚州衛指揮王禮。謀以城降。謂知之。執禮及其黨下獄。有力士能舉千斤。彬恆以自隨。燕飛書城中。有縛王御史降者。官三品。禮弟崇及其黨欲應之。憚力士莫敢睨。乃厚賂力士。母誘其子出。彬適解甲。洛宗等與千戶徐政突入。縛彬并剛。縋城送燕。破獄出禮等。與俱降。燕將欲降彬。彬不屈死。剛亦死。府衛官皆降。江都知縣張本率父老降。即以本知揚州府。後歷官兵部尙書。贊曰。乘城捍圍。惟力是視。天欲廢之。金湯曷恃。隸也同死。弁也倒戈。賣國邀賞。被戮則那。

史官氏曰：侯泰等或任守土，或司防禦，皆能矢志不回，與職俱盡。雖勳績無成，而風烈有餘也。如張本卽終躋巍顯，遺唾萬世矣。彼區區武弁，又何誅焉。

馬官

附曾、宋忠、附余瑛、孫潘、秦彭聚

楊松、潘忠、朱鑑、瞿能

附小馬王

鄧戩、陳鵬、莊德

附楚智、卓旗張

楊本、宋瑄

附徐讓、衛健、周拱元

馬官北平都指揮使。燕王兵起，殺張昺、謝貴，宣巷戰，度不能勝，東走薊州，悉發守兵。西逆戰，不利。復還。張玉等來攻，與鎮撫曾濬共閉城堅守。燕王遣人反覆諭之，兩人終不聽。燕兵力攻，宣出戰，被執，罵不絕口。死。建文帝寢卹其家，曾濬繞城大罵，亦力戰死之。

宋忠，錦衣衛指揮使，智勇有名。洪武末，有屬百戶論死非其罪，忠疏救，御史劾忠。太祖曰：忠率直無隱，爲人請命，何罪爲？并有百戶戍邊，尋以臺押忠作威福，邀名譽，調鳳陽中衛。明年，平羌將軍都指揮齊讓討西夷無功，以忠爲參將，從征虜。前將軍楊文凱旋，復官錦衣。建文初，防燕名備虜，敕忠以都指揮總邊兵三萬屯開平，盡簡燕兵護衛壯士從忠，聽節制，護衛胡騎指揮關童者，素驍勇，忠遣童入京。北平有永清、左右衛，左調屯彰德，右屯順德，都督徐凱屯臨清，耿獻屯山海，與忠相犄角。約北平藩關張昺、謝貴、長史葛誠爲內應。燕王旣殺昺等，稱兵，忠率兵三萬詣居庸，而守將俞瑱爲燕所敗，退保懷來。燕兵奪居庸，忠不及救。燕王曰：宋忠握兵懷來，必爭，須乘其未至擊之。衆皆謂衆寡不敵，宜固守。王曰：用兵當以智勝，論力則我不足，以智則有餘。彼衆新集，其心不一，且忠輕躁寡謀，先擊之必破。乃以精兵八千人，卷甲倍道。

趨懷來。獲謀言忠勸諸將士云。公等家北平者。盡爲燕府誅滅。盍努力復家讐。報國恩。衆奮。燕王聞之曰。知所以破忠矣。令其家人張故旗幟爲先鋒。衆遙識。又見其父兄弟相問勞。家故無恙。輒喜。罵忠欺我。倒戈走。忠率親兵食卒渡河。戰大敗。被執不屈。死之。諸將以得忠。頗有喜色。王笑曰。忠庸才。得之不足爲喜。喜則驕。驕則不戒。不戒則敗。幾萌矣。爾曹戒之。燕使人給余瑱曰。石頭城破矣。瑱曰。石頭城破。吾與此城共存亡。力盡被執。亦不屈死。時都指揮孫秦。彭聚並從宋忠戰懷來。秦先登。頗有斬獲。燕兵叢矢射秦。流血被甲。慷慨裏瘡。與聚皆力戰奮呼陷陣。皆死之。時諸將燕俘者。多不肯降。發憤死者十八九。多不可考。

楊松、潘忠俱都指揮使。耿炳文帥兵三十萬駐真定。遣松爲先鋒。都督徐凱壁十萬於河間。潘忠屯鄭州。松帥驍勇九千人。進據雄縣。約忠爲繼。燕兵乘中秋不爲備。圍雄城。忠兵來至。松乘城守禦。黎明城破。松率麾下南走。燕王度忠在鄭。必引衆來援。遂伏兵月漾橋。忠果至。伏兵起據橋。忠戰敗。急趨橋不得。燕兵腹背夾擊之。生擄忠。並追獲松。二人皆不屈死。

朱鑑、北平行都司都指揮守太甯。勇冠諸將。虜皆畏避之。燕兵至。諸將陳亨、房寬皆降。鑑力戰不支。被縛。罵不絕口死之。建文皇帝加卹典。

瞿能、字世賢。合肥人。驍勇有名。洪武中以四川都指揮使與同知徐凱統兵從藍玉擊西番有功。又從都督聶緯討建昌叛酋月魯帖木兒。又改副藍玉。能破賊雙狼塞。建文初。從李景隆爲裨將。攻北平。能力戰。

勢甚銳。與其子通帥精騎千餘人，殺入彰儀門。景隆忌之，以大軍未至止之。於是北平連夜汲水沃城，天寒冰凝而滑。明日，南軍欲登城，不可得矣。景隆率師駐白溝河，與燕兵迎敵。能父子奮躍所向披靡，殺傷燕兵甚多。燕兵遂卻。日已暝，各收軍還營。燕王曰：「彼軍雖衆，明當破之。」及朝復戰，王先以七騎馳擊之，且進且退。南軍飛矢如注，馬三被創而三易之。射矢亦盡，幾爲能所及。王佯招後兵疑之，脫去。薄暮，能復引衆躍前，大呼滅燕，斬其騎百餘人。僉通淵、滕聚復引衆來會，會旋風起，王見陣少動，乃以勁騎繞出其後，突入馳擊，與高煦騎兵合。能父子皆死於陣。通淵、聚亦皆死。有小馬王者，失其名，官指揮，臨淮人，嘗乘一小馬，故名。白溝之敗，脫胄付其左右曰：「吾爲國，以此歸報家人，立馬豎槍而死，不異生時。」

鄧弼、陳鵬爲都指揮，與都督吳傑等守真定。燕王曰：「若傑等嬰城固守，是爲上策。偶來求戰，下策也。當設奇以誘之。」乃散軍四出，聲言取糧，又令人荷擔言抱嬰兒，佯作避兵奔入城云。燕軍各散取糧，營中無備。弼等信之，乃出兵與燕兵遇於藁城，突入奮擊，矢集燕王所建旗如蝟毛，擒殺甚衆。忽大風起，發屋折樹，燕兵順風乘之，戢軍大潰，與鵬俱被擒，死之。

莊德、洪武末爲西涼都指揮，召至北平，爲燕兵右翼，出塞有功。建文初，隸宋忠麾下，懷來之戰，惟德一軍獨全。後盛庸戰夾河，德力戰，斬燕將譚淵。明日方戰，勝負未分，忽逆風起，塵埃漲天，咫尺莫辨。燕兵乘風大呼縱擊，乃大敗。時有楚智爲都指揮，嘗從馮勝、藍玉出塞有功。軍中稱驍將，力戰死之。張某者，亦都指揮，充偏裨，力挽千斤，每戰輒搴卓旗先登，屢有俘馘，人皆呼爲卓旗張，亦力戰死。手猶執卓旗不仆，人以

爲異。

楊本中牟人。火色雄幹，頸無髮。初爲太學生，精法術。建文初，徵才略之士，本起應聘，曰：「惜事不成，奈何？」既試，授錦衣鎮撫。時吳王撫軍一日，本請王出觀兵，及登將臺，見大水淼茫，而一軍皆不見。王及左右並駭問故，本曰：「此水道也。」及帥師北禦，本常持一鐵棒，重三十斤，臨陣馳突，燕兵披靡，不敢前。屢破之，景隆忌本功不上，已而本約日出戰，請諸軍爲後繼。景隆謂諸將曰：「今日譬如一團瓜，我輩種熟，乃被別人採去，耶竟擁兵不救。」本上疏略曰：「刑屬三千，罪莫大於不孝。人倫有五，德莫大於盡忠。忘君虐民者，不可以不懲。喪師失律者，不可以不罪。今都督袁宇與耿炳文征討北平，喪軍士二十萬，皇上憐其爲太祖故舊，不忍加刑。又如魏國公徐輝祖征燕，私存姊妹之情，虧喪士馬，皇上召還，業已洞燭其情。曹國公李景隆自進兵以來，喪失軍馬無限，皇上責問，乃歸罪羣下，此實總兵之罪，而邪說得行，支吾廢法，將何以勝？乞假臣柄，用賢能官員，召募義勇，招撫軍伍，凡先鋒參謀、軍政稽考等官，臣自當保舉，仍特命親王爲監軍，疾馳燕師，以成戡定，庶可免生民於塗炭，奠宗社於泰山矣。」疏入，未報。本率孤軍獨出力戰，燕衆共扼之，被擒。

宋瑄，鄆國公晟之長子，洪武中爲參隨舍人，立功遷指揮僉事。建文初，陞指揮使，數從諸將禦燕，有功。靈璧之戰，披甲躍馬先登，斬首數級，已而諸營兵敗，瑄猶格鬪，力屈死之。後晟功名大著，封西寧侯。永樂中，兵部上列侯子孫名，乞嗣封。瑄宜嗣，上惡瑄，以弟琥嗣侯。琥尙安成公主，琥弟瑛尙咸寧公主，琥罪廢，瑛

嗣侯沒於土木。時有王賚以指揮守淮北。有膂力善射靈璧之役。率步卒護軍餉。諸將兵敗。輜重芻糧委棄狼籍。不能獨完。燕兵執之。詭得脫。走鳳陽。從知府徐某防禦。然事不可爲。後爲人縛獻死之。又軍前效力徐讓。爲山西布政司理問。材氣磊落。有口辯。孝義縣丞衛健讀儒書。達吏事。膽量過人。與讓應募。齋書至北平。議和解兵。受而不答。還並授衛鎮撫。尋皆戰歿。周拱元。沅州人。少讀兵書。出入辰沅蠻中。相交易。蠻人信重。建文初。應募入京。試騎射對策。授鎮撫。於軍前占候輒中。每引兵防餉。舟有功。被燕兵執。不屈死之。

贊曰。赳赳武夫。裹革是誓。蹙陣陷堅。洞膺決臂。有疇不死。若得死所。大風驚沙。天意如此。熊羆同盡。邦家之瘁。賁父有誅。以愧竄鼠。

史官曰。觀諸力戰而死者。皆偏裨也。而大將徒建旗鼓。擁麾鉞。莫展一籌。莫效一臂。坐使燕山之馬。漸飲江波。藩國之旄。立掃帝闕。嗚呼。誰之罪哉。諸武臣死。綏鼓若此。足以見燕無倒戈之迎矣。自馬宣宋忠等而外。滄州之戰。則有都督徐凱。程暹。陳暉。都指揮俞琪。趙濟。胡原。李英。張傑。德州之掠。千戶蘇獻。真定之戰。都督宿忠。都指揮劉燧。朱榮。白溝河之戰。都指揮何清。指揮滕聚。定州之戰。都指揮花英。鄭琦。王恭。指揮詹忠。渡涑水。則指揮賈榮。陷東平。則指揮詹瑄。失汶上。則都指揮薛鵬。渦河之戰。則胡騎都指揮林帖木兒。哈三帖木兒。如火耳灰。則降燕矣。婁鬼里及淮河之戰。則丁良。米彬。靈璧之戰。則都指揮孫晟。王貴等。一百八十餘人。嗟乎。燕事不成。豈不金書鐵券。廟祀榮世世者哉。

程濟、葉希賢、楊應能傳

程濟、陝西朝邑人。有奇術。洪武末，以明經爲四川岳池教諭。岳池去朝邑數千里，濟寢食朝邑，而治岳池學事不廢。建文初，上書言某月日西北兵起，朝廷謂非所宜言，繫至京將殺之。既入見，仰面大呼曰：陛下且囚臣，至期無兵，臣伏罪，遂下獄。已而燕兵果起，上異之，赦爲翰林編修，充軍師，護諸將北征。徐州之捷，諸將樹碑敘戰功，及統軍者姓名。濟一夜往祭碑，人莫測其故。後燕王過徐，見碑問故，大怒，趣左右以鐵椎椎碑，再椎，遽曰：止。爲我錄碑文來。其後按碑族之，鮮得脫者。濟姓名正椎脫處，得免。曩之祭，蓋禳之也。其神術如此。淮上敗，聞召濟還京。初，濟與邑人高翔並以明經徵，翔厲名節，濟好術數，翔止濟勿爲此。此小道耳。濟曰：吾所好者，可以預知吉凶，其大可以占國護君，次亦可以居身備世，公何小之乎？翔曰：不然。翔聞君子之道，自盡而矣。子盡孝，臣盡忠，殺官盡廉，戰陳盡勇，何事預知？既有兵事，濟又勸翔學之。翔曰：我願爲忠臣，金川門破，翔招濟同死。濟曰：我願爲智士，翔死之。建文皇帝素知濟神，急召入問計。泣曰：天數已定，惟可出走耳。立爲帝祝髮，遂從之出。每遇險，以術脫，相從數十年。濟嘗病，帝親爲羹糜，有所往，必令濟筮，從隨帝至京師。人尙有識濟者，曰：此程編修也。自著從亡隨筆，其文繁，茲載其略曰：燕兵入金川門，帝徘徊殿庭，欲自殺，召羣臣問計。羣臣多散亡，至者數人。濟請出亡，帝曰：敵兵四集，且朕病足不能行，奈何？濟曰：臣卜出南方可免難。時司禮少監王鉞以太祖遺篋爲請，帝命取發之，有僧牒衣具三，帝遂與御史葉希賢、吳王教授楊應能各祝髮，分其牒。濟袖出黃冠，自易，漸羣臣至者約三四十人，忘其姓。

名願隨亡。帝令散之。以太子文奎付廖平先行。帝獨與濟及梁良用潛出西華門。時燕王坐金川。燕兵在外朝未入。詣河得小舟。良用易服鼓柁而行。抵南門。舍舟而徒。良用自赴水死。濟掖帝出城。晚走神樂觀。宿道士王昇家。時宮中火起。燕王不及追捕。是夜應能、希賢及金焦、吳成學、趙天泰、蔡運、梁中節、梁良玉、梁田玉、宋和、郭節、馮灌、王資、牛景先、劉伸、郭良、史仲彬、鄭洽、王之臣、黃直、內官周恕、何洲先後會。帝曰：以後以師弟稱。各訂約散去。適史仲彬有舟在通濟門橋下。師入舟。楊葉、鄭史、程五人從。時壬午六月十四日也。泝江由丹陽抵吳江。至仲彬家。仲彬栖師於水月觀。成學來會。已祝髮。即辭去。八月。縣丞鞏德至其地。蹤跡。師同希賢、應能、濟至京口渡江。從六合走襄陽。入廖平家。平寓師於西山中。景先至。尋朝有捕索令。平舉家遁。師留景先山中。自與希賢、應能、濟入蜀。遇馮灌於途。灌寄食荒村。留三日而去。癸未正月。投雲南永喜寺。命灌訪廖平家事。六月。灌來。知梁良玉死。甲申正月。離雲南。三月。仍還襄陽。就景先於西山。五月。命景先入吳約仲彬。六月。師行。八月。至仲彬家。師一宿遂行。仲彬問故。師曰：昨道中遇一冠蓋者。瞪目視。速去爲爾也。相與泣下。與濟先行。希賢、應能、景先、仲彬以次會於吳山。九月。遇焦運、灌。仲彬於天台山。尋遇廖平於耶谿。冬。離台州。乙酉二月。西至重慶。結菴於善慶里。遂留居焉。夏六月。將如雲南。命濟筮得乾之姤。曰：恐有偵者。已胡濞、鄭和果入雲南。遂止不往。冬十一月。黃直至。留三月去。丙戌三月。別菴行。夏四月。至沐晟家。旬日。有朝臣以使事過。滇見師去者。晟恐。請師遁。五月。希賢、應能結茆於白龍山。請師居之。丁亥三月。師病。七月。濟出乞食。出遇郭節、程亨。史仲彬來視。八月。節、亨辭去。十二月。師祭死難諸臣。爲

文哭之。戊子二月，仲彬來。夏六月，菴災。七月，菴賴道者張靜成之。濟筮得小過之旅。曰：烏焚其巢，不久將毀。冬十二月，成學、焦、黃直皆至。己丑正月，師東行，留賢能守菴。濟及成學、焦、黃直從。三月，復至善慶里。成學留。五月，復過襄陽。知廖平家徒蜀。庚寅三月，師還菴。辛卯春，有司毀菴。夏四月，師至浪穹。賢能復募建菴。成濟筮得剝之坤。曰：剝盡而順，吉卦也。然龍戰之詞有凶。壬辰三月，應能卒。四月，希賢卒。師哭之過慟。病並葬於菴東。師納弟子應慧。十一月，灌直來。癸巳正月，辭去。五月，師南行至旬。濟及慧從。六月，還菴。納弟子應智。十月，鑄應明鐘。師爲銘篆之。甲午秋，師學易數。冬，應慧死。納弟子辨空。乙未三月，師夢賢能來。慟覺，設奠爲文祭之。夏，師出遊，路遇灌直，留其主家數日。八月，師與濟至衡山，還訪灌。已如滇。師還滇，偶寄宿野寺。見廡下有二病者，卽灌直也。因留視之。灌直相繼卒。葬寺東。師題石曰：兩忠之墓。十月，還菴。立從亡死者之主於舍東。丙申冬，師自敘從亡傳。藏之山巖。丁酉二月，別築靜室於鶴慶山中。七月，成學弟子了空來。知成學已卒。冬十一月，胡濬、鄭和復至滇。物色師往衡山，作感慨詩曰：我行自東，自南自北。黑霧毒霧，燭龍沈色。我行自西，陰雨霏霏。弓矢野施，我悽我惶。何道可行。戊戌三月，返至黔。五月，命濟爲圖。己亥，師註楞嚴法華經。署曰文和尚註。九月，命濟輯禽遁諸書。庚子七月，仲彬來。八月，辭歸。十月，師與濟遊蜀。登峨嵋。師有登高不耐，東翹首，但見雲從故國飛之句。辛巳四月，復入蜀。七月，南行入粵。遊海南。冬，還菴。師蓄髮爲道士。日翫太元老、莊、壬寅春，遣空智主鶴慶靜室。師別居淥泉。癸卯二月，師與濟遊楚。登章臺山。六月，至漢陽。登晴川閣。師有江波猶湧憾。林竊欲翻愁之句。七月，留大別山。甲辰二月，東行。九月，

遇仲彬於途。十月至仲彬家信宿。彬族人宏送至杭。十一月師與濟至寧波渡海。乙巳正月。至潮音洞。五月自閩粵還山。十二月命濟出丐。丙午正月。命濟往河南視王資。金焦六月。濟還。知資。焦皆卒。八月祭諸人於菴。丁未二月。師移居鶴慶之靜室。命空智還主浪穹。四月師復祝髮。八月滇寇亂。師與濟入蜀。冬宿永慶寺。師有杖錫南遊歲月深。山雲水月傍閒吟。塵心銷盡無些子。不受人間物色侵之句。戊申春。聞仲彬獄死。遙祭之。秋遊牛渚磯。師詩云。嶺猿夜泣湍波急。樹上霜紅含淚色。雲愁烟慘雨冥冥。野老吞聲談故國。十月至漢中。遇廖平弟子。乃知平已死。會稽文奎妻平妹三歲矣。己酉五月。還浪穹。菴已焚。六月至鶴慶山中。九月師復蓄髮。庚戌四月。師欲廣其菴。濟空出募。七月成。師顏之曰潛志軒。辛亥二月。師遊秦。濟從。四月至延安。七月入蜀。九月抵夔。絕糧。幸有二道人給之得度。壬子正月入楚。至公安。宿野寺。二道士初不識其貌矣。既去。乃知爲郭良。梁中節。五月師至武昌。登黃鶴樓。仙棗亭。有何年化鶴歸之句。八月舟下九江。九月復至吳山。十一月至天台。留赤城觀。癸丑。師在赤城。甲寅五月。至吳江。訪仲彬之子晟。留五日。八月還至夔。十月還山。乙卯三月。師遊粵西。七月濟遇何洲於市。洲隨行。十二月洲死。丙辰八月。還滇。仍卜築浪穹。丁巳二月。師復祝髮。欲東歸。命濟筮得兌之歸妹。曰此女子之貞。男子則否。三月從師復入漢中。五月遊峨嵋。十一月還至浪穹。戊午冬。智遁。師恐跡露。遂復入粵。己未正月。濟勸師還滇。不果。庚午春。師決意東歸。復筮得歸妹。濟拊几曰。大凶。師快快題詩寺壁。時有僧自詭稱帝。藩司以聞。詔械入京。下御史鞠。僧名揚行祥。鈞州白沙里人。以不實論死。師乃曰。吾老矣。歸葬故都何如。乃是年八月。自陳所

司上聞。九月。至京。命中官舊侍者吳亮診視。師語疇昔事數條。亮大慟。不能語。返奏。詔迎入大內。號老佛。養之。濟聞而嘆曰。今日方終臣職矣。紀始末付了空遁去。不知所終。後人以爲仙去云。葉希賢。浙松陽人。以進士爲御史。侃侃自負。建文中。屢言用兵事。嘗劾耿李二大將軍失律。楊應能。杞縣人。爲吳王府教授。壬午六月。京師陷。與建文皇帝同時祝髮從亡。初出亡。諸臣皆衣葛。宿六合野店。濟抱帝足睡。希賢應能皆盡脫葛衣覆之。已從遊吳楚蜀滇間。死鶴慶。並葬於浪穹。

贊曰。臣也抱足君也。養糜一心相從。萬死不移。探易之秘。決筮以奇。爲竇爲璞。匪彝所思。草莽君臣。間關生死。朝夕一堂。靡進靡已。生兮同袍。死兮同壘。彌次骨香。千秋不毀。

史官論曰。昔徐偃王愛民無權。曰吾賴於文德。而不明武備。及走死彭城。羣臣之不忍去。中山君出亡。挈戈隨死者二人。曰得士之報。要於大義。有不可解者。若夫枕股易爨之事。君則失矣。臣亦未爲得也。趙襄子賞功。高赫無功而上賞。曰拘厄之中。惟赫也不失臣主。噫。臣主之義。無所逃於天地之間。甯得以有位無位論也。五蛇從龍。周流天下。四蛇入穴。皆有處所。亦計及十九年後之富貴耳。孰與程濟輩三十七年之窮老且萬死哉。善乎宛支之臣言曰。我君是事。非事國也。臣曰從君。豈曰從國。嗚呼。使人流連於此。甯能以宮中之焰。輕爲抹殺耶。

明書卷一百六

列傳二

忠節傳六

牛景先、徐厚、高巽、志、豐、寅、初、劉、亨、王、進、孫、鎮、石、允、常、孫、岳、周、縉、傳

牛景先，官御史，金川門失守，易服宵遁。至丹陽，遇一僧云：徐行吉，速行，凶。遂改姓名徐行，死杭州寺中。後追論，執景先妻劉氏，沒入教坊。劉氏死，遺子名能，能生智，智生誠，誠生鑑，鑑生濱。凡五世，皆正偶，不失身辱祖。萬麻中，禮部祠祭郎葛寅亮訪確，除樂籍爲良民。

徐瑩，字宗實，以字行。黃巖人，穎銳豪邁。弟宗茂，宗原皆有才質，自相師友，抱負雄富，慨然有經綸天下之志。慕范仲淹之爲人，每誦先憂後樂之語。元末，居永嘉，授徒自給，性嚴毅，教務實理，不尚浮詞。諸士咸知振勵。洪武壬戌，以薦聘入京，敷奏剴切，授御史，辭。除銅陵尉，請歸迎母就養。上怒，謫役淮陰。人爭延致爲師，尚書楊靖率先受業，尋召還，教駙馬胡觀。常講中使援例設駙馬位，南向。師席東向，瑩毅然曰：師嚴道尊，然後民知敬學。豈以我布衣故黜師道哉！引駙馬位使下，明日位如前，拂袖出。貽書責以三事大義，及富貴驕人之說，觀爲下泣，執弟子禮。上聞嘉之，復命爲梅。王二駙馬講古今典故，屢主文衡，號稱得人。陸

蘇州通判奏發粟二十萬賑饑。當春暴漲，興治水之役，諸上官以爲妨農，止之。壘力言：水不退，則田不可耕，妨孰甚焉。且有田者出募，則貧者得食，佚道使民，夫豈爲勞。水旣通，其歲大獲，請旌前節婦王貞婦樓禮部以前朝事難之。壘曰：武王封比干墓，非前朝耶。遂著爲令。海州有盧氏女，未嫁夫死，如夫家成喪，鬪髮自矢，請旌。禮部以未及格爲疑。壘上言：立志卓異，非尋常比。上從之。未幾，擢兵部侍郎，使兩淮。以過家稽留，左遷尙寶丞，尋復官。上十事，皆切時要，與諸大臣議，侃侃不相下，頗爲所嫉。上獨知之，復奉命使浙中。工部需銅數千斤，民無所措。壘令毀銅佛，易以泥土，人難之。壘曰：佛法慈悲，今官民迫切，勿靳，乃真慈悲也。況佛若有靈，視銅土何殊哉。嘗道遇旋風，迎壘，壘令蹤風至湖，芟上有數屍，檢衣中得布印，戒勿泄。給言奉旨買布甚急，且溢其價，應者雲集。窺驗得賊，衆驚以爲神。浙西郡庫與寺鄰，庫焚，坐僧失火。壘審庫多桐油，嗟曰：非僧罪也。取油置日中，晝而火發，僧得釋。燕兵起，奉詔集兩浙義勇勤王。燕兵入京，棄官去。法司以爲言，太宗亦不追罪。居田，著經史詳要錄數十卷。

高巽，字士敏，號齋菴，先蕭縣人。元末，父德爲浙東宣慰都事，遂僑寓嘉禾。幼好學，嗜古，爲文深純典雅。成一家言。年二十五，以薦爲邵山書院山長。洪武二年，徵修元史，入翰林，爲編修。轉秦府紀善，累官侍講。學士未幾，引退。又召爲試吏部侍郎，以事去官。謫居胸山。建文元年，召爲太常少卿，兼學士。庚辰，會試。巽志爲同考試官，取吉水王良、常熟黃鉞、莆田陳繼之、廬陵胡廣、崇仁吳溥、建安楊子榮、新淦金幼孜、石首楊溥、武進胡濬、太康顧佐。時稱得人。太宗立，巽志棄官去。

豐寅初字復初先瑞昌人後徙於鄞洪武中爲國子司業抗疏諫張燈。謫德化教諭。建文壬午棄官躬耕年百五歲卒。子慶正統己未進士兵科給事中諫南城及易儲事繫詔獄。景帝方怒章鍾廖有言痛與杖。偶忘慶得免。英廟復辟陞河南參政論周府內官不法事。上嘉之。陞左布政。正糧稅。清徭役。循聲大著。一日行部有貪令懼無以紓解。乃以白金爲燭。餽之。諭數。初未知省也。旣而廳子以告。慶佯曰。試然之。廳子曰。然而不然。又曰。不然則還之。次日從容謂令曰。汝燭不然。盡出之。以易可然者。自今無復爾矣。令大恐。棄印綬去。終亦不明其爲銀燭事也。子耘教授。耘子熙字原學。少穎異。志趣卓絕。讀書署其壁曰。立志當以聖人爲的。遜第一等事於人。非夫也。十六母王氏喪。廬墓。郡守姜昂器之。曰。此吾郡顏子也。宏治乙卯鄉薦。己未廷對。孝宗親閱卷。奇之。置第一。已易第二。賜狀元袍帶。授編修。陞侍講。與修孝宗實錄。轉諭德。逆瑾用事。出掌南院。世宗立。陞學士。詔定大禮。議不合。用事者憾其危禍。卒守前議不變。遂得罪。戍鎮海衛。居十三年。杜門著書。絕口時事。嘉靖丁酉卒。熙性嚴重。不妄交。博極羣籍。潛心六經。尤邃於禮。文古雅典。居十三節。白菴集。一齋集。子長坊。嘉靖癸未進士。南吏部主事。工書法。

劉亨字嘉會。廬陵人。博通經史。洪武中以賢人君子徵。辭親老。久之。復舉經明行修。入對稱旨。命說書華蓋殿。尋出爲壽州訓導。建文皇帝立。詔求言。上言文武並用。長久之術。而六卿秩卑於五府。當並爲一品。國子祭酒師表天下士。不當在太僕下。諸武臣子弟宜立學教之。使知文義。下禮部議之多見采用。陞武

進丞。修學政。課農桑。恤孤寡。表節義。毀淫祠。縣傍作善教坊。再思亭。風厲民庶。訟省野闢。流亡來歸。建文三年。賜璽書褒美。四年。縣民李德茂等作亂。亨率衆擒首惡。戮之。諭散其黨。燕兵逼。尙遣使勞以金帛。太宗卽位。有言亨在建文時。上書改舊制。罷歸。遂杜門不出。薦修永樂大典。力辭。湖廣廣東聘考試官。皆不就。宣德中。廷臣復薦亨。學行可爲師表。亨言。年老不足任教事。上曰。伏生九十尙傳經。八十何不可。亨懇辭。聽還鄉。正統中。年八十二卒。

王璉。字器之。日照人。學通經史。長於春秋。以明經任教授。譴謫遠方。洪武末。以賢能薦。超授甯波府知府。清儉律己。平易近民。杜私謁。革吏弊。每丙夜。升堂秉燭。讀書聲聞於外。或詣學課諸生。諸生恆乙夜赴。無間。寒暑風雨。諸生成就者多。境內淫祠悉毀之。或懼殃。璉曰。如有靈。宜降割我。不汝累也。政教兼舉。德化大行。下邑俗皆丕變。自奉儉約。一日。饌有魚肉。璉戒內人曰。汝不憶吾食草根時耶。命左右。斂人縛。人稱埋羹太守。時武職橫暴。璉痛抑之。建文四年。燕兵至江上。璉造舡取海道。勤王爲衛。爲左右。奸人縛。獻京師。太宗已卽位。問造舟欲何爲。對曰。泛海直趨瓜州。截路耳。太宗曰。舟今無用矣。釋還田里。閉戶著書甚富。卒無長物。

孫鎮。字希武。合肥人。洪武中。爲諸生。應經明行修科。入太學。除戶部度支主事。通敏練達。太祖嘉之。賜鈔以旌。尋上以課程事。連坐諸司官。鎮進諫。以天子爲利。不問臧否。概爲處分。殊傷國體。爲言。詞秀氣直。上怒。謫戍滇南。己卯。以廷臣薦。復官。應制賦禁柳詩。稱旨。拜衛輝知府。毀淫祠。徹浮屠。興學課士。教民樹畜。

驅蝗禱雨。神能效靈。燕兵起。郡當南北衝。夙夜防衛。民賴以全。兵既南下。守備內臣倡謀迎附。鎮堅守不下。太宗卽位。以抗節不附。逮下獄。謫戍山海。宣德初。赦還。臺薦復官。不就。卒於邸。別號沖玄子。有集。行世。石允常。甯海人。洪武甲戌。進士。歷官河南僉事。廉介有聲。人稱石清潭。嘗徼行民間。聞哭聲甚哀。廉知其女爲闈宦。逼奪而死。奏於朝。捕宦抵大辟。羣宦銜之。巧誣左遷常州同知。燕兵起。率郡兵防江。諸將皆降。部兵潰。棄官歸。太宗卽位。追錄建文間廢毀周府官僚事。逮者五十餘人。允常與焉。衆悉洵懼服罪。太宗命各贖米五十石。於原官加一秩用之。獨允常鍛鍊百端。堅不服繫獄。謫戍北邊。躬擐甲胄。幾三十年。年七十。遇赦還。過南京。於故宮前感愴。仆歸邸。卒。遺稿曰遇安集。

孫岳。洪武中。從大將立功。官至都督同知。建文中。充鳳陽守將。燕兵起。大修戰守器械。撤寺村爲戰艦。樓櫓戈甲。咸有法。列寨淮西。水陸有備。燕兵不敢近。竟從下流渡淮。京城破。尙堅守中都。太宗卽位。法司劾岳。逮至京。宥死。謫戍海內。

周縉。字伯紳。武昌人。洪武中。以明經入太學。授永清典史。居官廉謹。攝令事。捕蝗弭盜。措置有方。俄燕兵起。一時守令多迎降。永清密邇北平。縉極力爲拒守計。而民皆爭先逃散。不與守。懷印南奔。道聞母喪。還家葬畢。卽出糾義旅。勤王。戰艦戎器。略具。京師不守。有司捕送京師。慷慨就行。至下獄。謫戍興州。居三十餘年。子代還。作唾下公文。年八十。卒於家。

贊曰。不激不隨。遇險弗躓。而諸君子文武是力。令終有俶。何慚忠義。烈烈秋霜。存此春煦。魚不竭澤。亦云

微德。

史官曰：雷霆之威，何物不震；山岳之崩，何遇不碎；而有不震不碎者，非威與崩之所不加，有天焉行乎其間。天不欲盡殲善類，故威與崩有所不施。牛景先得不梏紕，徐屋以下，或解組遠遁，或稱兵拒命，均無喪心之語，蒙而之迎，似足以嬰誅戮，而皆獲壽考，真天幸矣。豈太宗如天之量，能容已乎。

陳洽、劉儁、馮貴、侯保、史安、何忠、劉子輔、易先、李任、劉安、徐琪

附蔡顯 傳

陳洽，武進人，淹貫經史，謹敏有才識。洪武中，薦布衣，善書，授兵科給事中，憂去。建文中，起復，文選郎中。太宗卽位，陞吏部侍郎，左改大理卿，討交趾，出參軍，兼給餉交趾，平覈將士功罪，建授士官，經理兵食，分守隘塞，剖決如流，皆中節。復吏部左侍郎，是時尚書黃福兼掌布按兩司事，專務寬大，嘉意撫輯，洽甄拔才能，振以風紀，交人悅服。還朝，陞兵部尚書，復鎮交趾，仍參軍事。洪熙元年，召黃福還，洽代兼兩司事，仍參軍事。未幾，內官馬琪苛斂橫暴，交人再叛，攻交州城，敗，賊去。王通復引兵渡河擊賊，戰甯橋，洽力陳利害，言賊狡，有伏誘我，不可出，通不聽。遇賊，洽奮身力戰，不支，被賊執，不屈，罵賊死。事聞，上曰：大臣以忠徇國，一代幾人，贈少保，諡忠愍，官其子樞刑科給事中。

劉儁，字子奇，江陵人，父從政，感異夢書儁字，是夕生，遂名儁。幼磊落不羈，讀書日記數千言，既壯，志益堅，遇事勇決。登洪武乙丑進士，歷官兵部尚書。永樂丙戌，交趾反，以儁贊軍務，往征之，屢捷。太宗深嘉之，未

幾交趾又反。命僞同張輔往征。僞曰：此行當以死報國。既至，屢出奇制勝。一日轉戰至大安海口，風沙大作。人馬莫辨。僞嘆曰：天乎！夷賊背天，我實奉天，而遭時如此。豈天未欲邊民平治乎？力戰援絕，陷賊。賊囁以富貴使降，不應。戲使之揖，罵曰：堂堂華夏衣冠大臣，豈爲爾狗鼠輩屈耶？死之事聞。仁宗語禮部曰：婦人盡節於夫，有旌褒之典。況大臣捐軀爲國，當優異。詔加太子少傅，諡節愍，遣官致祭。

馮貴，字孟敬，武陵人。登洪武庚辰進士，授給事中。尋出爲交趾左參政，善爲撫輯，交人多歸之。練訓士卒不倦。比三年，得土兵二萬餘，皆勁勇善戰。時朝廷命中官馬騏往監軍，妒貴盡奪其兵，至是黎利反，貴欲戰。騏止以羸卒與之，遂戰死。贈左布政使。

侯保贊，皇人。由國子生任襄城令，有善政。擢交州府知府，尋陞交趾右參政。永樂十八年，交趾黎利復叛，保出禦，力戰死。仁宗贈右布政使。

史安，字志靜，豐城人。以文學初任兵部主事，性謹厚廉正，雖職務填委，好學不倦，而疏達勤敏。六卿爭欲爲其屬，尤見知于仁宗。屢被嘉獎。宣德二年，陞禮部郎中。是冬，參軍務征交趾，時大時柳升失策，喪師，安赴賊死之，加贈卹。

何忠，江陵人。登永樂進士，爲御史，廉慎持正。人莫敢干以私。永樂十九年，三殿災，言事，出知政平州。明敏有吏才。居州廉慈，忠計事上。藩司會甯橋軍敗，賊乘勝逼城，成山侯詭與賊和，且請赦朝廷。賊遣□陳渭老表謝，密令忠及千戶桂勝同渭老行，請兵征勦。至昌江，內使徐訓泄其謀，賊拘忠等，欲降忠，忠不聽。刀

鋸臨忠不降。且鋸忠。忠瞋目視賊。大罵曰。我天朝臣子。恨不斬汝。以歸報朝廷。以肯從汝。求生耶。益罵不絕口。乃從容賦詩曰。萬里邊城受困時。腹中懷奏請王師。紅塵失路關山遠。白日懸心天地知。死向南荒應有日。生歸北闕定無期。英魂不逐西風散。願共天戈殄叛夷。遂父子及勝俱死之。事聞。宣宗深悼之。遣官致祭。贈廣西南甯府同知諡忠節。勝亦贈卹。

劉子輔。廬陵人。以太學生爲御史。持身謹行。儉約如布衣。用法公平。不見喜怒。巡浙江。有風菽陞廣東按察使。坐累左遷。守諒江。撫民如子。民亦愛戴。子輔賊攻城。勢猖獗。旁郡縣皆陷。子輔獨效死守。援久不至。食盡。城破。城中兵民盡鬪死。不肯降。子輔曰。郡亡我亡。義不污賊。自經死。一子一妾皆先死。事聞。贈參政。易先。湘陰人。以國子生爲諒山知府。有善政。任滿當還。交人乞留。進三品祿。留諒山。城陷死。贈參政。

李任。金華人。襲父官。從燕有功。交賊獲都督蔡福。福至昌江城。呼任等降。任罵福叛君賊。狗彘不如。與指揮使顧福。劉順。內官馮智且守。且戰。前後三十餘戰。輒破賊。賊益兵象攻。九閱月。糧盡。衆困。賊雲梯登城。奪其門。任復率死士三戰三敗賊。賊擁兵象大進。不能支。任。福皆自刎死。順。智自縊死。城中人不肯降。死者數千人。後贈任都督同知。福。順都指揮同知。智太監。復其家。

劉安。征交趾功。爲指揮僉事。留官交趾前衛。守備。又安將還保東關。至富良江。遇賊被執。安密與衆謀。候討賊兵至。內應。千戶包宜以告賊。賊將殺安。安與指揮陳麟奮起。奪賊刀。殺數人。自刎。都督蔡福。都指揮朱廣。薛聚。于瓚。指揮魯貴。千戶李忠皆伏誅。福鎮守。又安不與賊戰。率廣等降賊。又教賊造攻具。破東關。

時有官軍九千餘人發憤欲劫焚賊營。福又遣百戶牟英告賊。賊盡殺九千餘人。遂攻破昌江等城。又輒至各城說降。至清化。知州羅通罵福反賊。宣德三年。黎利歸福等京師。盡棄市。籍其家。

徐騏以指揮使同千戶蔡顯守立溫。賊攻城。悉力防拒。糧盡城破。猶率罷卒巷戰。無一人降者。賊屠城。騏顯皆死之。贈騏都指揮使。顯指揮僉事。

贊曰：炎海濤飛。崖照不輝。盡節遐滄。豈曰幽微。棄爲異域。英爽奚歸。事雖敗。色動紫微。

史官曰：南交梗衝。再稱雪刃。將星隕於旌側。白骨暴於鷓江。至不得歸者十餘萬人。噫。勤兵於遠者。甯無惜。但哉。洽等仗節而死。誠得其正矣。說者謂宣宗輕棄已獲之邦。若猶屯戍餽饟。反側終不可靖。而所失更甚。予以爲宣宗決然獨斷。睿慮過人遠也。然輕以祖父艱難之所獲。若敝屣。然要不可爲訓耳。

陳祚傳

陳祚字永錫。吳縣人。性忠確。登永樂壬辰進士。選庶吉士。尋拜河南右參議。嘗疏奏時政得失。太宗怒。謫太和山佃戶。惜其疏。留中不傳。比至。躬自耕食。有不堪其憂者。處之裕如。凡十年。宣德改元。召爲監察御史。巡按江西。具疏大略言帝王之學。莫先於明理。明理在於讀書。讀書貴乎知要。惟真德秀所著大學衍義。載聖賢格言。甚爲切要。乞常御經筵講說。庶知孰謂道義可遵。孰謂嗜欲可絕。孰謂忠賢可親。孰謂邪佞可遠。孰謂民利可興。孰謂民害可革。古今若何而治亂。政事何由而得失。疏入。有惡之者。摘一二語以動上。怒。逮至京。下詔獄。并籍其家。十六口。錮獄中。父瘐死。子弟下蠶室。凡五年。英宗卽位。詔復其官。釋其

家屬。是時祚有父母喪。藁葬未成服。乞終喪不允。明日復上章。言極痛切。略以爲古人立德。必孝以基忠。聖主任官。必求忠於孝。俾不居喪之子。而求爲仗節之臣。是欲以負叛之宦。而求爲歸順之士也。豈公論所宜容。盛世所宜有。自當投諸四裔。尙可列諸士朝。加諸官爵耶。上嘉其懇。許之。河東薛瑄重其累親以忠。感君以孝。作文送之。有勁節苦心。如金更百鍊無改色。殆可匹休古人之語。數年起擢福建僉事。閩人素聞祚威名。相戒不敢犯法。泉漳諸郡多淫祠。悉毀之。毀旣而得寒疾。不能視事。民有謠曰。山櫛節題。神焉繫之。公厲乎神。亦自厲之。未幾盜起。巡按藩臬皆被罪。祚獨以疾免。民復謠曰。拒杯貉麀。公我糧服。公毆我青。自求多福。居閩七年。年七十乞歸。自號退翁。杜門不接雜賓。不談時事。李東陽嘗稱之曰。祚孝友。足以厚倫理。材識足以繼政事。氣節足以厲風俗。其存其亡。關於天下者甚重。又謂國朝文臣。忠直不以死生二其心者。二人焉。李時勉陳祚。

贊曰。玄嶽之石。其高巖巖。於以田之。黍稷藎藎。表表南服。惟是永錫。雖曰累親。氣凌星霽。史官曰。陳祚于太宗怒。至於竄耕。必有大中其隱者。惜其疏不傳。宣宗夙稱寬仁。能任賢。而亦使祚有十六口之慘耶。其諫疏雖不傳。而陳情之奏。懇惻悲切。至性溢毫楮間。厥後閩中之政。見一斑矣。古人以死義爲大節。以不怕死爲勁節。若祚者可謂勁節矣。亦奚必其疏之傳。

曹鼎傳

曹鼎。字萬鍾。其先爲宋武惠王彬。世居靈壽。祖徙甯晉。遂爲甯晉人。資賦明敏。自幼有大志。日誦數千言。

純一剛篤事繼母以孝稱舉鄉薦第二人授代州學正自陳年少不可爲人師願得吏職自效改泰和典史邑常衝置郵無虛日。韶酬役井然卽冗中每攜書卷自隨仍修舉子業其尹諂之曰欲作狀元耶韶曰人生進學何有已時恐不獲試耳試當如公言宣德壬子督部工匠赴闕上疏入省試中第三明年癸丑登會試高第楊士奇一見奇之廷對策問義禹河洛象數韶獨稱旨擢進士第一授翰林修撰因從楊溥遊所得益深正統丙辰英宗初御經筵充講讀官又同修宣宗實錄成轉侍講五年庚申入內閣與政每議大事咸決於韶而疏通俊爽怡中事機視中官王振正色不少假振每憚之甲子進學士乙丑陟吏部右侍郎兼學士己巳秋九月北虜也先大舉入寇車駕親征韶扈時王振挾勒車駕進兵諸大臣禁無一語惟韶曰臣子固不足惜主上係社稷安危豈可遽進而欽天監正彭德清諫曰象緯示警不可復前若有疏虞陷乘輿於草莽誰職其咎振嘗之曰倘有此亦天命也八月辛酉次土木虜大至我師敗績死者十餘萬人韶於軍中乘馬索上駕不得遂與諸臣五十二員皆死之尋詔贈榮祿大夫少傅吏部尚書文淵閣大學士諡文襄欽賜衣冠葬之官其子恩爲翰林修撰英宗復辟加贈太傅改諡文忠仍予孫錦衣百戶韶學瞻行端內剛外和識達正體才智出人士林重之贊曰矯矯倫魁耿耿大節其身雖隕其神孔烈人亦有言泰山鴻毛之子之死常辨秋毫史官曰自古夷狄之禍未有甚於土木之難者夫漢之冒頓桀黠方張唐之祿山荼養已久宋之遼金及元則海澨偏安勢匪其敵而明以全盛之業王用三驅獲狐射隼乃受制闔豎親勞六飛至使全師覆沒

天子蒙塵而善人殄瘁如斯者真然大儒將來夾輔之功殆不可量而身膏草野血濺黃沙不亦可悲者乎。

章綸、廖莊、鍾同傳

章綸字大經初名崙樂清人正統四年進士授南京禮部主事景泰初爲儀制郎中屢有論建又條上太平十四事一曰躬攬乾剛在聖德英明二曰緝熙聖學在儒臣直說三曰面議大政在委任公卿四曰爲政得人在愛惜名爵五曰肅正朝綱在激勸憲諫六曰廣開言路在聽用忠良七曰敬畏天戒在下詔求言八曰精慎選舉在舉主得人九曰嚴明考覈在黜陟公常十曰守備邊境在選將練兵十一曰征討不庭在專任將帥十二曰禁止罪犯在恪守條律十三曰兵吏養廉在沙汰冗職十四曰作興人才在教養有道皆切中時務反覆萬餘言時瓦剌也先行成綸言宜暫結和好力圖修攘懷獻太子卒人心危懼御史鍾同諷禮部請復立沂王東宮禮部大臣縮首咋舌曰作死綸聞發憤卽具疏陳修德弭災十四事其大者如內臣不可干外政佞臣不可假威福後宮不宜盛聲色又言上皇君臨天下十有四年陛下親爲臣子又以天位授陛下稱太上皇帝天下至尊也月朔望及歲時節旦宜率百官朝見延安門復汪后於中宮以正壺儀復沂王於東宮以定國本景帝見疏大怒下詔獄炮烙煅煉迫公引大臣及通南城狀體無完膚公竟不承以鍾同先嘗上言并逮欲殺二人會天大風雨黃霧四塞乃止廖莊自南京來亦嘗請復儲遂縛三人於午門前杖一百鍾同死廖莊遠謫綸錮禁獄中越二年英宗復辟輒嘆綸好臣子爲朕

家事受苦毒。出之獄中。脫桎梏。拜禮部右侍郎。上令內侍檢給十四事疏不得。內侍從旁誦數言。上亟稱歎曰。好官人。襄憲王來朝。問給。稱給節義。天順二年。山東大水。民饑。守臣請免田租。不允。給再疏。請得減租十之五。給繫獄久。因有足疾。會石亨招公卿飲。給不往。短給上前。改南禮部。上面諭。賜金幣。文華殿遣行。尋改南京吏部。憲宗即位。有司以遺詔請大婚。給上疏曰。山陵尙新。元朔未改。百日從吉。心實未安。釋服除。雖有常制。願諒陰大婚。情禮自別。乞敕禮部來春舉行。成化元年。兩淮饑。條救荒四事。四年。給會南掌院都御史高明考察。給欲盡去諸不職者。明不可。給獨疏上。南諸司搆給。激言官怒。並誣章劾給。上特遣侍郎葉盛。給事中毛弘。即訊留都。給誣得白。五年秋。星變。自劾。不允。秩滿轉左。十二年。請老。卒。孝宗即位。贈尙書。諡恭毅。官其子立爲鴻臚主簿。成化初。謝鐸修英宗實錄。檢給復儲疏不得。輒嘆息泣下。曰。公疏動千萬言。竟一字不傳。何以示天下。後世數白總裁劉定之。應曰。奏疏留中者。例不書。鐸曰。景泰數年間事。孰此爲大。不書此。奚書。盡請上。增入錄中。竟不從。子玄應進士。爲南京給事中。給嘗著論。謂學者須大其心胸。蓋心大則萬物皆通。必有窮理工夫。心纔會大。又須小心。必有涵養工夫。心纔會小。不至狂妄。論學術程。朱後又大壞矣。必須真聖賢出。方能救得。論政體。第一是格君心。收人才。固民心。爲本。然後政事可舉而行也。論世道。惟唐虞三代之盛。皆是聖人在上。致中和。下此是一泰一否。祇憑氣運推盪耳。論家法。如鄭義門。弟兄讓死。爲義如此。其家安得不悠久乎。論風俗。須做橫渠復古之志。行藍田呂氏之鄉約。庶可一變而厚。論居常處困。每誦伯夷。叔齊餓於首陽之下。民到於今稱之。語便覺自警拔。論居

敬自謂於專一上見功。覺得心中無甚放僻邪侈之雜。論窮理自謂於精義處得力。見進退辭受之節。頗分明。不敢放過。其篤論如此。學人稱爲楓山先生。

廖莊字安止。吉水人。宣德五年進士。八年。選庶吉士。十年。爲刑科給事中。正統六年。出陝西賑饑。便宜從事。當是時。楊士奇在內閣。莊抗章劾其不職。不報。八年。陞大理丞。尋陞南大理少卿。景泰五年七月。災異。下詔求言。莊上疏。仰惟上皇。被留虜庭。皇上撫有萬方。屢降詔書。以大兄皇帝鑾輿未復。虜讎未報。爲意。皇上之心。卽堯親九族。舜徵五典之心也。賴郊廟神靈。皇上勝算。迎歸上皇於南宮。臣遠臣。未知皇上於萬幾之暇。曾時朝見。以敍天倫之樂。敦友愛之情否也。臣自爲翰林庶吉士。刑科給事中。大理寺丞時。伏觀上皇卽位之初。遣太師英國公張輔。吏部尙書郭瑾。爲正副使。冊封皇上。奄有大國。每遇正旦。冬至。令羣臣朝皇上於東廡。百官感上皇兄弟友愛如此。今幸上皇迎歸。伏望篤親親之恩。萬幾之暇。時時朝見上皇於南宮。或講明家法。或商確治道。仍令羣臣時得朝見。以慰上皇之心。如此則孝弟刑於國家。恩義通於神明。災可弭而祥可召矣。然所係之重。又不特此。太子者天下之本。臣愚竊以爲上皇諸子。皇上之猶子也。宜令親近儒臣。誦讀經書。以待皇嗣之生。使天下臣民。曉然知皇上有公天下之心。蓋天下者太祖。太宗之天下。仁宗。宣宗之繼體守成者。此天下也。上皇之北征。亦爲此天下也。今皇上撫而有之。必能念祖宗創業之艱難。思所以繫屬天下之心。近年日食星變。地震且陷。山崩水溢。災異疊見。非止霜雪不時而已。臣謂弭災召祥之道。莫過於此。詞意悲懇。不報。明年閏六月。以內艱來京。適章綸。鍾同二疏入。

景帝忽念莊往年有疏。大類二人。并逮三人。杖午門前。幸不死。謫定光驛丞。英宗復辟。召還。時內艱未闋。繼遭父喪。上憐其忠。特并與祭葬。除服。改南大理。言官羣勸之。乃請老。上曰。莊有大節。不許。逾年卒。贈刑部尚書。諡恭敏。莊任性易直。而好剛尚氣。言辭憤激。好面折人。人不能堪。中雖無芥蒂。人故益恨之。又不屑細行。遠嫌疑。好存謝賓客。諸遊知爲懷狎。卒無以爲殯斂。衆率錢相哀助。人始信其廉靖。而闕達。固天性然也。

鍾同。字世京。吉安永豐人。景泰二年進士。明年授監察御史。當景帝易儲時。每獨坐深思泣下。已而懷獻太子卒。同入朝待漏。與禮部郎中章綸論儲位事。慷慨流涕。五年九月。遂上疏請復立沂王東宮。以固宗社。并陳時政闕失。疏入。下詔獄。械繫極苦。杖之不死。又下獄。六年八月。又杖之闕下。竟死獄中。時年三十二。骸掩園土。莫敢收葬。英宗復辟。曰。鍾同忠誠節義。可貫金石。贈大理左寺丞。官其子啓知縣。憲宗又憐同以忠受慘禍。祿同妻羅。官其子通政知事。啓上疏請遺骸。得出園土歸葬。時同歿久矣。血漬臂間。洗出倍鮮好。成化二十三年。援綸例請諡。禮官謂同應詔陳言。中及復儲事。不若綸言詳切。執不與。衆共嗤笑。禮官恥之。得諡恭愍。

贊曰。轉喉觸忌。黠異咸避。其識既真。其氣復厲。發言成經。聿光信史。誦茲三人。宮僚愧死。

史官曰。南城之錮固非。然英宗可爲太上皇。而景帝則無藏身法。景之立東宮。則戾不可解矣。然景方欲千秋萬世傳之。其後而綸等暴其戾。侃侃朝廷。大義山立。詩云。邦之司直。此之謂也。使景能聽其言。復憲

宗東宮且令名無窮焉詎以七年戀戀展黼拚其社稷功悲夫三人中莊同死輪獲生能終不二其節誠
儒宗哉



明書卷一百七

列傳二

忠節傳七

劉球、岳正、楊瑄、附子源、林俊、鄒智傳

劉球、字求樂，安福人。永樂十九年進士。初爲禮部主事，薦侍經筵。預修宣宗實錄成，改翰林侍講。正統八年夏，雷震奉天殿，應詔陳十事。其一，勤聖學以正心德；其二，親政務以總乾綱；其三，別賢否以親正士；其四，選禮臣以隆祀典；其五，嚴考覈以督吏治；其六，慎刑罰以彰憲典；其七，罷營作以蘇人勞；其八，寬逋賦以憫民窮；其九，息兵威以重民命；其十，修武備以防外患。而其間總乾綱，親正士，皆言中官王振。振見疏，怒甚，欲置球死地，不得。會翰林修撰董璘乞爲太常卿事，疏下詔獄。以球疏中第四款，曾言太常官必得儒臣，馬順附振，喜曰：「此可并殺球矣。」遂酷考璘，誣服球爲畫此疏者。矯旨逮球，當朝掉球去。球不知何坐，大呼死訴。太祖、太宗乃縛至暗獄中，斧磔暴下，碎其體，極慘毒。其邑人成器設公位龍泉山巔，爲文哭而祭之。人名其地爲祭忠臺。球天性忠潔，議論堅正。沈思積學，好義力行。文詞鏗鏘，金春玉應。人共寶之。如

月蟻天犀也。正統十四年冬，贈翰林學士。諡中愍。子鉞，鈺舉進士。鉞官廣東參政，鈺雲南按察使。岳正，字季方，直隸灤人。正統十三年會試第一進士，及第授編修。至天順改元，歷官左贊善，兼修撰。王翱薦其有宰相才，召對文華殿。正神采秀發，上遙見，遂曰：「好。」及登殿，又曰：「好。」好問年幾何，對曰：「四十。」又曰：「正好。」問家安在，對曰：「灤縣。」曰：「又朕北方人，甚善。」問讀何經，對曰：「尚書。」問舉進士科，對曰：「正統十三年。」上益喜。曰：「朕固取汝，朕今用汝。」內閣許彬老矣，不足恃，汝爲朕努力。正頓首受命，出赴閣。至左順門，遇石亨、張軏，愕然問曰：「何爲至此？」正不對。二人者忌正才名，比見上，上又言：「朕今擇一內閣臣甚佳。」二人請爲誰，上曰：「岳正。」顧正官小，須與吏部左侍郎兼翰林學士二人者，陽頓首賀。陛下旣得人，俟果稱職，進官未晚。上默然。然時召見，正感知遇，意切功名。欽天監湯序奏災異，請盡去奸臣。上問正對曰：「奸臣無主名，卽求之，人人自危，且序術疏淺，不足信。」事遂止。亨與呂原同見，上曰：「爲政有體，朝廷豈可自榜購募，奏始皇杜諫，亨吉祥努力，請上榜購告捕者官三品。」正與呂原同見，上曰：「爲政有體，朝廷豈可自榜購募，奏始皇杜諫，下妖言誹謗，令以不聞過亡其國，乞以秦爲戒，上不出榜。」正又言：「曹石驕橫，不早制，恐禍起肘掖。」上諭正曰：「汝往告朕意。」正徑造亨所，諷令戢斂。二人者謂正許其短，願以上意劫我，益大恨。是年承天門災，下詔罪己，正歷數諸弊政，詞極切直。二人者造飛語，岳正草詔出時，時對人言：「此非上意，我欲諷上改過也。」正賣直諫，君父不數日，中旨降正欽州同知。欽極南海，多瘴毒，正便過家辭母，留數日，兵部尚書陳汝言者黨二人，又憾正嘗言其不可用，嗾邏者誣以私事，逮詔獄考掠，謫戍肅州鎮夷所，未及行，都督季鐸竟奪。

公廬時猛虎石者太監鎮河西上密諭石正須生不須死四年石坐法誅明年曹又反誅上思正言解士伍放歸田憲宗卽位朝議請復正官吏部擬調南京上曰勿調復故官充經筵講官預修英宗實錄未幾楊溥欲薦爲南國子祭酒正不應忌者僞爲正劾溥章示溥遂大疑正成化元年出爲興化知府正至興化勤力民事操利權興修水利積穀出羨餘補助民役興化士人覩利弗遂者騰謗書彭韶獨曰太守節財愛民無他也三年入計乞致仕時季鐸敗朝廷還正故廬未幾卒正文章氣節名滿海內抱負經濟屹屹不肯下人再起再廢竟不盡其用嘉靖中贈太常卿諡文肅正自述云有自京師來者傳上語曰岳正倒好只是大膽或以賀正曰上念公如此行召公矣乃寫容題於上曰岳正倒好只是大膽惟帝念哉必當有感如或赦汝再敢不敢臣嘗誦古人之言蓋將之死而靡憾也正貌偉美髯言論洒洒動循矩度石曹事或議其迂又曰未信而諫正應曰渠謂我諫官邪我道當如是人有不可意事雖權貴人當言卽言無藏宿以奇故正者雖多忌者亦衆所著有類博稿

楊瑄字廷獻豐城人景泰五年進士英宗初爲御史印馬圻內民羣訴曹石奪民田甚多乃疏劾二兇怙寵擅權勢上喜其敢言稱職命吏部記其名且大用旣還京替李連見祥亨勢益張瑄與十三道御史議班劾之有洩其語者二人乃先詣諸御史上前暨彈章入上怒召諸御史詣文華殿俾誦彈章詰責瑄與御史周斌且誦且對歷陳其罪狀甚悉下諸御史詔獄逼瑄誣引大臣刑慘酷數瀕死卒一語不他及理刑者文致瑄坐死掌道者謫戍餘貶斥有差奏上會大風雹拔木壞屋走正陽門下馬牌於郊外得從末

滅瑄戍鐵嶺道遇赦還。或謂瑄宜詣曹、石謝。庶免後禍。瑄不可。復謫戍廣西南丹。曹、石相繼誅。釋歸。憲宗卽位。復官。尋爲浙江按察副使。定海城北捍海塘。縣西走馬堤。霏衢所裏外海塘。健跳所海鹽海塘。皆力爲修築。海鹽塘踰二千三百丈。工尤巨。禦患尤大。陞按察使。力振憲度。察吏奸。斷訟明敏。無留獄。禁官署勿蠶奪民利。禁婦女勿入寺觀。墮風俗。甫半載。病亟。察寮問候。尙諭築海塘法。及濬西湖之利。無片言及私。立祠海鹽東海上。著祀典。子源。弘治間任五官監候。正德元年七月。上疏言。占候得大角及心中星動。搖天璇。天機。天權星不明。乞安居深宮。絕遠遊獵。罷弓馬。嚴號令。毋輕出入。闕除內侍寵幸。遊逸小人。節賞賜。止工役。親元老大臣。日講習詩書。疏下禮部。部言。源占候之言。深切時弊。源復疏言。十月。候得連日。霾霧交作。爲衆邪之氣。陰冒於陽。臣欺於君。小人擅權。爲下叛上。引譬甚力。劉瑾怒。矯旨杖三十。源又疏言。自正德二年來。一向占候得火星入太微垣帝座前。或東或西。往來不一。乞思患預防。瑾又大怒。罵源爾何官。亦學爲忠臣乎。矯旨又責三十。謫戍肅州。行至懷慶河陽驛。卒。妻斬蘆覆尸葬之。

林俊。字待用。莆田人。少力學。有文。成化中。以進士授刑曹主事。日習法。執比櫛密。而歸之平恕。時憲宗方寵僧繼曉。及寺人梁芳。俊以災異上疏曰。臣惟人君之德。莫大於聽納。臣子之罪。莫加於欺罔。今年以來。災異迭興。兩京地震。陵寢搖動。日月薄蝕。野熊入城。鑿戒之昭。莫此爲甚。而醜虜陸梁。犯我北鄙。邊氓騷擾。戍卒怨咨。然臣愚謂此手足之疾耳。未甚害也。山西、河南連年饑荒。而關、陝尤甚。人民流徙。被於荆襄。日數萬計。甚者闔縣無人。倉廩懸罄。拯救無法。樹皮草根。採取盡竭。飢殍盈路。惡氣薰天。道路聞之。莫不

隕涕而撫按三司等官肉食其地。願盼徘徊。專事朦蔽。民飢至此。漠不爲言。夫物極則變。草澤之中。禍深難測。此誠腹心危急之疾。治之當如救焚拯溺。不可少緩者也。謂宜下寬恤之詔。重欺罔之罪。卽遣才力大臣。及科道廉能官。分賫帑金。馳詣近地。其臨清起運。及鄆封蓄積之糧。聽令願車裝運。兼程以行。隨在贍濟。則未死飢民。抑猶可及濟也。抑臣又有說焉。孟子有云。死我所惡。所惡有甚於死者。故患有不辟。臣說一行。可以洩天地神人之憤。快聖祖神宗之心。彰陛下爲聖明納諫之主。奠億萬年無疆之休。萬一忤旨。禍止一身。臣何惜一身之禍。而不爲陛下陳之哉。臣聞修養之說。佛氏之教。怪誕無稽。其事不見於堯舜禹湯文武之世。其誣每見於漢唐宋史之間。可考也。妖僧繼曉。市井無賴。猥挾邪術。詐欺楚府。竄身逃罪。潛往京師。多方蚤緣。致蒙聖眷。敢復惑亂聖聰。發內庫銀數十萬兩。蓋造寺塔。是必繼曉小人。過爲誕說。謂此寺一建。則聖壽益綏。國祚彌昌。民命咸永。邊疆底宿。以此啗陛下也。不知以可用之財。供無益之費。國計且日削矣。以陛下超三邁五之資。蹈唐憲梁武之轍。聖譽且日損矣。下人師師。爭先事佛。聖教且日壞矣。居民重遷。上役不息。人怨且日興矣。縱盡如繼曉之言。先王之政。然且不爲。況萬無定理。而有大害也哉。昔衛懿公好鶴。鶴有乘軒者。將戰。國人受甲者。皆曰使鶴。鶴貴有位。予將焉戰。夫鶴之好未害。其失人若此。臣懼夫不斬繼曉。異日之禍。誠恐未涯也。然薦之者。梁芳。芳傾覆陰狡。引用邪佞。附之者。驟得美官。觸之者。動遭竄逐。欺罔若趙高。奢侈若石崇。數年間。以進貢買辦爲名。盜國帑藏。費財山積。尚銘汪直。未能或先。乃復薦繼曉。陰求建寺。夫天下猶身也。賢才元氣。財用骨肉。小人疾病也。梁芳耗元氣。削骨

肉而爲疾爲病。臣切爲身危之。今內而大臣。外而百官。下及閭井。飢餓之民。咸欲食梁芳。繼曉之肉。而無一人敢以此言進者。獨惜官而畏死耳。臣何忍畏死不言。而以爲陛下仁聖之累耶。奏上。下詔獄。謫判姚州。孝宗立。擢雲南按察副使。俗崇釋信鬼。鶴慶元化寺稱有大佛。歲時集士女以金泥其面。俊行部。命焚之。父老言。犯者能致雹損稼。俊與之約。積薪伺之。果雹卽止。已無驗。遂焚之。得金數百鎰。輸官償民。逋毀淫祠三百六十餘區。撤其材。新學宮。遷湖廣按察使。風儀整肅。屬吏不敢犯。會境內雨雪震電。引咎疏。時政言貴州調官軍。軍苦戰鬪。民疲轉輸。德安。安陸。創造興岐二王府。吉府復增修蓋。工役浩大。費動鉅萬。民不堪命。且府大則心侈。侈則驕。驕則踰分。府大則難於創建。而又難於修葺。又居人難充。疾易生。臣謂興岐二府宜小而不宜大。吉府宜修而不宜增。乞循甯襄得故事。勿用琉璃及白石雕欄。爲著例。奏入。不報。俊引疾乞休。不待報竟歸。得允。後以言官薦。拜僉都御史。巡撫陝西。陝西地震水涌。俊疏言。變不虛生。必有其應。歷述漢唐宋元內侍柄臣之禍。乞減齋醮。清役占。汰冗食。止工作。省供應。節賞賜。戒逸欲。遠佞幸。親賢士大夫。語甚明切。時武宗在青宮。上嗣胤未廣。俊特以爲言。已又疏言。昔殷武丁爲太子。父小乙使居民間。與小民出入同事。其在祖甲。高宗也亦然。漢宣帝少居民間。涉艱虞。故甯周悉民情。爲守成令主。蓋處境太順。驕惰易生。未必福而伏禍也。今農畝細民。家無十金之產。猶慎教子。以守先業。況太子國本。天地祖宗華彝所付託耶。今皇太子年與幼學。趨向大幾。正次於此。而多處宮中。少就外傅。非古人早教豫養之意也。乞召禮侍郎謝鐸。太僕少卿儲璠。南光祿少卿楊廉充講讀官。其資序不合。實行可取。

如致仕按察副使曹時中。渾厚澄瑩。粹然和氣。處士劉閔。恭慎醇粹。學行高古。於勸講宜稱。仍乞禮致時中。使爲宮僚。而令閔以布衣入侍。更敕各部翰林院科道官。精訪純德雅望之人以充。則涵養薰陶。宜有裨益。而推立教之本於聖躬。奏入。又不報。乃屢疏乞休。又薦時中自代。不允。以左僉都御史巡撫江西。時江西歲饑。盜起。條災異。預備奏。均徭里甲賦稅事宜。所至宣上德。汰官弊。問民疾苦。以風俗教化爲大務。賑荒勸蠲。褒表賢孝。一主於阜俗靖民。雖險僻山縣。未嘗見上官至者。靡不畢遣。撫循勞來。吳城毛竹宏山賊巢。單車深入平之。一省以安。民至今追頌。時甯廬人貪猾爲伎害。取祿米過倍。官校豪奪民利。俊至。約束之不爲動。奏請定祿米歲額。布政司徵收貯庫。每季長史司支領。爲著令。已濠奏府殿請易琉璃瓦。俊力言。當斷以大義。毋涉吳王几杖之賜。濠大恨。時濠雖暴橫。然未有逆萌。或以爲過。後卒反。人服其先識。內艱歸。後起晉副都御史。再撫江西。俊恐爲濠所倚。力辭不赴。四川盜僭王號。賊藩省大臣起。巡撫四川。宣布威德。勦撫並行。四川平。會瑾誅。上疏言。昔夙沙衛殿國。楊思勛平亂。春秋綱目書之。以爲功出闕寺。國爲無人也。今賊瑾謀逆。危於千鈞一髮。而舉朝文武。無一人言之。獨幸一永。傷文武之無人也。文武無人。以陛下信文武不如永也。信文武之臣如永。豈不能早發其奸。致危迫若是也。今瑾雖誅。黨魁猶在。終曰失刑。請擇宗室育宮中。而召用先朝舊臣。劉健。謝遷。林瀚。王鏊。韓文。許進等。以修復舊政。上不納。意指斥用事者。故大臣交忌之。時諸邊征勦。宦官必屬其子弟。私人寄兵籍冒功。俊一切拒絕。權幸愈益。惡會與總制洪鍾忤。乞致仕。忌者謂盜衰。易與。無所事。俊可其奏。朝論大駭。蜀人號哭。追送者數千人。俊

去蜀而兩川之寇復作矣。宸濠反，俊聞之，卽夜範錫爲佛郎機銃，并抄火藥方，手書與南贛都御史王守仁，勉令竭忠討賊。廷臣交薦不起。世宗在藩邸，知俊名，入卽位，召起工部尙書疏三辭，敦促轉刑部尙書。未至，卽疏祖宗親儒臣故事，乞傾心延接，加意採納，使邪念消，妄心息，驕氣平，以出政布令。又言：今太倉之儲，盡於無名之冗食；小民之蓄，盡於無名之誅求。陛下初詔所革，皆其壞極而不得不革者也。然貴近之臣，往往稱不便，冀萬有一更，誠更之，則諸所革者盡復，而天下之公議廢矣。又言：移風易俗，乞身先率之士大夫先奉行之，成約質渾樸之風。旣至，命侍經筵，會暑罷講，俊又疏言：祖宗勤學故事，以諫且言學貴緝熙，禹惜寸陰，經筵聽講，頗不謂勞，文華清燕，亦不謂熱。如陛下天稟全智，年方志學，願毋輒罷廢。又舉古師臣坐講故事，以廣上德。上嘉納之。俊在位，於親大臣，勤聖學，辨異端，節財用，數數爲上言。諸正德中結黨倖于政納賂者，通政張龍、廖鵬、齊佐、王獻俱奏伏法。時內官如葛景、盧良、劉寶、李朝用、劉孟陽，諸不法事連發，爲科道所糾，旨勿問。下司禮監發落。俊具言：法立於祖宗，守於陛下，而奉行於法官。諸葛亮有言：宮中府中俱爲一體，臧否賞罰不宜偏私。使內外異法，所以防官邪，齊民志也。今法于內臣親屬者俱得免，是法獨行於外而不行於內。今雖陛下盛德，左右革心，萬一有作奸犯科，而無法以制之，其流之弊安可止耶？竊揆陛下見近日參論內臣之多，以人情不甚相遠，論細謹內臣豈無縱恣，外臣難免。近日參論，意必外臣有輕重於其間也。竊惟大小臣工有六年之考察，三載之黜陟，而又有科道之糾劾，有撫按二司之摧擊，一干吏議，終身不齒，不三數年而沙汰去者數千人矣。是皆內臣所無，而內臣犯法事無

大小法皆具奏。故陛下祇見參論之多。而不知爲執法之平也。惟陛下下法司公訊。以昭平明之治。上不聽。案宦豎私人獄。且具內降送鎮撫司。俊奏言。祖宗設立刑部都察院大理寺。謂之法司。大小罪犯。無不畢由錦衣衛。謂之親軍。所以偵伺機密。察奸細。鎮撫司則鞫訊大盜妖言者也。太祖以鎮撫司非法凌虐。燒其獄具。申鞫刑之禁。並送法司。列聖恪遵。無易。自劉瑾。錢甯。以所忌惡。付鎮撫。文致成獄。此法之所以壞也。今宋鈺所告太監文事。不待法司問結。而輒送鎮撫。非祖宗之舊。疏上。獄竟。付鎮撫。俊復言。此途一開。恐後有重大獄情。皆將扳求內降。以圖幸免。將亂階始此。上怒。詰責俊。以不得其職。乞致仕。疏入。上乃允。俊平生不戀官爵。不趨權勢。不擇利害。不畏強禦。用兵以殺降爲大戒。以撫綏爲上策。性簡儉。居官猶廉約。不取隸金。不發公廩。蕭然若寒素。深厭末俗侈汰。以身爲表率。一時同德諸老臣。每推先焉。及遭疾。遣表薦尙書羅欽順。王守仁。祭酒魯鐸。修撰呂柟。宜留輔德。襄大政云。

鄒智字汝愚。合州人。少穎敏。過人。年十二。能文章。經史一目。卽不忘。家貧。嘗讀書龍泉庵。墻樹葉焚。照至徹夜不寐。如是三年。文思警拔。千言立就。成化丙午。舉鄉試第一。明年。上春官。道謁三原王恕。以進君子。退小人爲言。恕笑而不答。成進士。改翰林庶吉士。星變。應詔陳言。極論陰陽之理。言少師萬安。持祿怙寵。殊無厭足。少保劉吉。附下罔上。漫無可否。太子少保尹直。挾詐懷奸。全無廉恥。世之所謂小人也。南京兵部尙書致仕王恕。託志忠勤。可任大學。兵部尙書致仕王竑。秉節剛勁。可寢大奸。直隸巡撫右副都御史彭韶。學識醇正。可決大疑。世之所謂君子也。乞盡斥小人而進用君子。又言。君子所以不進。小人所以

不退。大抵宦官陰主之。疏入不報。由是知名。頗爲儉邪所嫉惡。與御史壽州湯肅友善。孝宗卽位。每勸肅視班時復先朝而奏之事。肅不聽。未幾。王恕起至京。智先見曰。公必未就位。請見上。陳時政之不便者。恐一就立難言矣。恕亦不答。弘治三年。湯肅勸安吉直安。直去。吉獨留。恨肅甚。時御史魏璋附吉。吉嘆璋能去。肅陞僉都御史。璋卽草疏私署陳景隆等名。勸肅與壽州知州劉槩妄言朝政。嫉智者。因入智。下詔獄。身親三木。僅餘殘喘。猶賦詩不輟。獄官苦訊。智操筆供云。智與今湯肅等往來相會。或論經筵不宜以大寒大暑輟講。或論午朝不宜以一事兩事塞責。或論紀綱廢弛。或論風俗浮沈。或論生民憔悴無賑濟之策。或論邊境空虛無儲蓄之具。議者恨智。坐智及肅。槩妖言惑衆罪死。刑部侍郎彭韶辭不判。大學士徐溥亦力言。吾輩不可使朝廷有殺諫臣名。始獲免。謫廣東石城所吏目。肅亦謫戍。智旣謫。毅然就道。衣結屨穿。幾不能存。親識饋遺。堅卻不受。至石城。視事甫兩月。廢政悉舉。遠近仰焉。人爭師事之。時總督都御史秦紘檄董修巖政書。得居廣城。與陳獻章遊。四年。暴疾卒。年二十六。囊無百文。順德令胡廷舉爲治喪。適左布政使劉大夏至邑。廷舉不暇出迎。大夏廉知其故。反加禮待。且資恤還其家。廷舉由是知名。贊曰。瑣耳可虞。血忱徒瀝。讒佞蔽明。千古嘆息。球乃裂膚。正乃屢躓。瑄乃覆蘆。智乃困斃。俊獨完身。直終不易。攬冊興思。誠爲臣則。仗馬寒蟬。胡不投裔。

史官曰。球之言行。必無己巳八月之事。正與瑄之言行。必無辛巳七月之事。俊之言行。必無邪道醜縉紳之禍。智之言行。必無政府喪廉恥之風。忠憤所激。遇事當言。見死不避。可謂志貫金石矣。視彼受頤指爲

權貴鷹犬博一笑語者。真天淵哉。

韓文何遵黃鞏

附陸震及諫死諸臣又張英附

舒芬傳

韓文字貫道。洪洞人。母妊。夢紫衣人言。與爾文潞公。因名文。成化二年進士。授給事中。劾都御史王越。薦故吏兵尚書李乘。王竑。語頗涉兩宮。越又附汪直。以故。逮文華殿拷訊。幾死。出爲湖廣參議。累官都御史。侍郎南兵部尚書。孝宗知文名。召爲戶部尚書。時時召見。一日。顧文長嘆。文頓首謝不職。上曰。朕欲理鹽法。苦人撓阻。今邊儲日急。奈何。文又頓首謝。出上疏。請革七弊。一。開中引鹽。二。興販私鹽。三。賤賣官鹽。四。買補殘鹽。五。夾帶殘鹽。六。越境市鹽。七。轉運乏人。上盡行其言。武宗卽位。青宮舊內侍劉瑾等日導上。犬馬鷹兔舞唱角觝。廢萬幾。文每朝退。輒泣。員外郎李夢陽說文曰。公大臣。義共休戚。徒泣何益。比言官交勸。諸內侍。章下閣。閣持劾章甚力。公誠及此時。率諸大臣死爭。閣中又得諸大臣爭。持劾章必益堅。去瑾輩易耳。文乃具疏以進。曰。臣等侍罪股肱。值主少國疑。瞻前顧後。心焉如割。中夜起歎。臨食而泣者屢矣。近日朝政日非。秋來視朝漸晚。仰觀聖容。日就清瑣。皆言太監馬永成。谷大用。張永。羅祥。魏彬。劉瑾。邱聚等。置造巧僞。淫蕩上心。擊毬走馬。放鷹逐犬。或俳優雜劇。錯陳於前。至導萬乘與外人交易。狎曠嫖。無復禮體。日遊不足。夜以繼之。勞耗精神。虧損志德。遂使天道失序。地氣靡甯。雷異星變。桃李秋華。考厥占候。咸非吉徵。切緣此等細人。唯知蠱惑君上。以便己行私。不思皇天眷命。祖宗大業。皆在陛下一身。今大

婚雖畢。儲嗣未建。萬一起居失節。雖將此輩。盡粉菹醢。何補於事。昔我高皇帝艱難百戰。取有四海。列聖繼承。傳之先帝。以至陛下。先帝臨崩。顧命之語。陛下所聞也。奈何姑息羣小。置之左右。累聖德乎。今馬永成等罪惡既著。若縱不治。將來無所忌憚。爲患非細。伏望奮剛斷。割私愛。上告兩宮。下諭百僚。將馬永成等明正典刑。以回天變。洩神人之憤。潛消亂階。以保靈長之業。疏入。上驚泣不食。瑾等大懼。初閣中持言。官章不肯下。閣瑾等窘甚。相對泣。會諸大臣疏。又入。上遣司禮監八人詣閣議。一日三至閣。益持議不肯下。明日。忽召諸大臣入。大學士劉健語王鑿曰。事且十成七八。諸公第堅持。至左順門。太監李榮手諸大臣疏曰。有旨。諸先生愛君憂國。言良是。第奴僂事上久。不忍卽置之法。幸少寬。上自處。是日瑾等益窘。自求去。南京安置。因閣議堅持。猶不肯下。瑾等無奈。何乘夜繞上前跪伏哭。頭觸地曰。微上恩。奴僂且磔餓狗。上色動。瑾等益復伏地痛哭不止曰。狗馬鷹兔。何損萬幾。左班官敢譁無忌者。司禮監無人耳。有則唯上所欲爲。誰敢言者。於是上立詔。瑾入司禮監。而斥劉健。謝遷去國。自是瑾益專弄權。矯詔奪文官。二子士聰。士奇皆削籍。又矯詔逮文詔獄。欲殺之。會有投匿名書者。事不果。坐贖米先後三千石。破文家。瑾誅復官致仕。世宗卽位。廷臣交薦。加太子太保。賜誥存問曰。起文彥博於九裘之餘。人心攸屬。繼韓魏公於百代之後。家慶彌長。卒贈太傅。諡議稱文愚。同甯子。而竟保其身。老似武公。而不弛於學。諡忠定。何遵。字孟循。南京欽天監人。少爲諸生。一日師策問范滂母事。感之。歸告母曰。兒設爲滂。大人能慨然爲滂母乎。母笑而許之。正德癸酉。舉鄉試。甲戌。第進士。吏部尙書陸完器重之。未幾。當試臺諫。獨引疾弗出。

曰吾不資人以進丙子拜工部營繕主事明年權木荆南故事多昵奸胥歲增羨以自潤商人苦權過於虓虎遵更置一切而壹以廉率之無何出羨千金左右勸以獻績怒斥之曰來者將何繼耶乃令下商自百金下減算三之一風水敗貨者勿算以羨足常數但令相等入算者手實其數幾何自識之藏於郡帑其或越貨敗令與以謁至者盡沒入之威惠並舉至今守爲權令比歸行李蕭然其時劉瑾江彬相繼用事導上遊幸禱祠名山將入江南而宸濠方謀以侍子入朝恃彬爲內應比南巡詔下彬幸得便窺伺懼中阻乃爲危言撼衆衆亦相視搖手戒莫敢出語甚則以諛言媚彬彬氣益盛兵部郎中黃鞏翰林修撰舒芬首以疏入諸曹稍稍踵之上大怒彬復揚言鞏等旦夕且死冀以脇衆遵疏力言淫祀無補敗亂且曰萬一宗藩藉口奉迎潛懷不軌則福未降而禍已萌蓋指濠也彬畏事泄匿不以聞遵慮衆爲彬所脇又鞏罪叵測復與同官林大輅蔣山卿上疏乞罷巡幸勿爲左右姦邪蠱惑鞏等無罪願寬宥毋使後世有殺諫臣名不爾臣與同死彬旣欲杜衆口聞是言愈自懼乃矯詔下遵等於獄復嗾其黨勸言者懷奸訕上無人臣禮武宗益大怒榜示朝堂無得効尤遵等獄上被旨荷校暴午門外五日杖五十罷遣彬自請視杖者故視賄爲輕重至是密奉彬意而賄又不至杖視他人爲甚遵體故羸又憤所言不達越三日卒邸舍獨僮奴何安一人當草疏時詞覺之前持哭曰主縱不自計獨不念老親幼子耶遵執筆從容曰無多言歸見大人爲謝萬死兒子令勿廢學足矣草章已書託鄉人太僕卿周金編修陳沂後事語不少亂常遵被杖時父鐸與家人墓祭有烏悲鳴而前心異之比抵舍聞工部有以言獲罪者鐸長號曰遵

其死夫已而果然。嘉靖初，贈尚寶寺卿。廢子世守爲國子生，祀鄉賢於應天府學。禮部又請得建專祠，題曰直方。

黃鞏，字伯固，莆田人。弘治十八年進士，授德安推官，陞刑部主事。鞏十五司讞牘，改兵部，歷遷郎中。內艱服除，會武宗北巡，人心危疑，或沮鞏行。鞏題書屋曰石田茅屋，爲生太拙。鴟夷馬革，自許何患。衆不能沮。竟北上補武選。正德十四年春，上將南巡，時甯庶人久蓄逆謀，蕭敬、朱甯、張銳走司禮錦衣東廠，與庶人交通。江彬握勁兵在上左右，公卿交疏不聽。兵部司屬倡諸司上疏諫。鞏曰：上巡遊本起彬誘惑，彬方席寵擅兵，無敢斥言彬，吾不可舍彬爲支語。恐上不悟，獨疏六事。其略曰：陛下臨御以來，祖宗之紀綱法度一壞於逆瑾，再壞於佞倖，又再壞於邊帥之手。至是將蕩然無餘矣。天下知有權臣，而不知有陛下。甯忤陛下而不敢忤權臣，陛下弗知也。亂本已生，禍變將起，竊恐陛下知之晚矣。試舉六事於今爲最急者陳之一曰：崇正學。嘗聞先儒周敦頤有曰：吉凶悔吝生乎動，吉一而已。動可不慎乎？故唯聖人爲能慎動。仰惟陛下聰明天縱，有古帝王之資，然所以盤遊無度，流連忘反者，論思勸講之臣於是不能辭其責矣。伏望陛下高拱九重，凝神定慮，屏紛華，遠佞人，招延故老，延訪忠良，以陶德性。二曰：通言路。夫言路者國家之命脈也。切見近時臣僚奏牘間或言及時政，往往匿不以聞。其或事關權臣，則又留中不出，而中傷以他事。由是雖有安民長策，謀國至計，無因以達。卽有必亂之事，不軌之臣，陛下無由而知。伏望廣開言路，不責以出位，不加以好名，則忠言日進，聰明日廣。雖亂臣賊子亦將有所畏而不敢肆矣。三曰：正名號。孔

子曰。名不正則言不順。以至民無所措手足。陛下近日以來。無故自稱爲威武大將軍。太師鎮國公。遠近傳聞。莫不驚疑竊歎。以爲怪事。夫陛下自稱爲公。誰則爲陛下者。天下不以陛下事陛下。而以公事陛下。是天下皆公之臣。而非陛下之臣也。伏望陛下卽日削去鎮國公等名號。以昭上下之分。以明示天下之人。庶幾體統以正。而朝廷自尊。不然。古之天子。亦有號爲獨夫。與欲爲匹夫而不可得者。竊爲陛下懼焉。四曰。戒遊幸。嘗聞大禹罔游於佚。罔淫於樂。周公告成王。毋淫於觀。於佚。於游。於田。陛下始時。遊戲不出。大庭馳逐。止於南內。論者猶謂不可。旣而幸宣府。幸大同。幸太原。幸陝西。榆林諸處。所至費財動衆。郡縣騷然。至使民間夫婦。不能相保。陛下爲民父母。何忍使民至此。虧損盛德。貽譏萬世。陛下自視爲何如主也。近者復有南巡之命。南方之民。爭先挈妻子避去。流離奔踣。敢怒而不敢言。卽今江淮間。父子兄弟相食。天時人事如此。加以休息愛養。尤恐不支。況又重以威之。其何不流而爲盜賊。速而爲流亡也。奸雄窺伺。待時而發。變生在內。則欲歸無路。變生在外。則望救無及。陛下斯時悔之晚矣。彼居位大臣。用事。中官親暱羣小。皆欲陛下遠出。而後得以擅權自恣。乘機爲利也。其不然。則亦袖手旁觀。如秦人視越人。休戚不相涉也。夫豈有一毫愛陛下之心哉。彼誠愛陛下。獨忍使陛下馳遠蒙塵。而莫之救止也。伏望翻然悔悟。罷南巡。撤宣府行宮。示不復出發。內帑以賑江淮之饑。散邊軍以歸卒伍。斥不御之女。以各還其家。雪旣往之謬舉。收旣失之人心。如是則尙可爲也。五曰。去小人。常聞開國承家。小人勿用。謹按今之小人。簸弄威權。至於首開邊事。以兵爲戲。使陛下勞天下之力。竭四海之財。傷百姓之心。至今紛紛未已。則江彬

之爲也。彬本行伍庸流，兇很傲誕，臣等但見其有可誅之罪，而不見其有可賞之功。今乃賜以國姓，封以伯爵，託以心腹，付以提督京營之寄。此養亂之道也。彬外挾邊卒，內擁兵權，騎虎之勢，不亂不止。天下之人，切齒唾罵，皆欲食彬之內。彬不誅，天下之亂必自彬始。陛下亦何惜一彬，以謝天下哉！伏望陛下大奮乾綱，將彬下諸廷議，明正典刑，以爲奸邪小人迷亂之戒。六曰：建儲貳，嘗聞漢人有言曰：太子天下本，一搖則天下震動。夫有本而搖，天下猶震動，況無本其何以安。恭惟陛下春秋漸高，前星未耀，祖宗社稷之託，懸懸乎無所終寄。方且遠事觀遊，屢犯不測之區，此必危之道也。陛下徒知收置義子，布滿左右，獨不能豫建親賢，以承大業。臣以爲陛下始倒置也。伏望陛下早及是時，將近時羣臣建儲章疏，通行檢出，宣付皇親勳舊，及在廷文武大臣，共圖大議。卽於宗室中遴選親賢一人，養於宮中，使視皇子，以繫四海之望。待他日誕生皇子之後，俾其出就外藩。如此則繼體有人，國本以固。實宗社無疆之休。惟聖明留意。車駕員外郎陸震見之，卽碎已疏草，曰：願同署名進疏。二人自分必死。彬見疏，果大恨，必欲殺震。震縛下詔獄，紺校於廷。五日三訊，杖百餘，坐繫逾月。除名，鞫體最羸，衆咸痛其必死。乃死得甦。震竟死。當是時，海內盛傳鞫疏及歸，杜門著述。家素貧，客至留飯，或至日中未舉火。貸米鄰家，恬不屑意。世宗改元，召爲南京大理寺丞。未幾卒。無子。贈大理寺少卿。鞫嘗曰：人生仕致公卿，大都三四年。惟立身行道，斯千載不朽。世之人顧以此易彼何邪。鞫沈敏好學，雖疾病支離，手不釋卷。詩文清粹和婉，自成一家。陸震，字汝亨，蘭谿人。正德三年進士，爲江西泰和知縣。有善政，去之日，民立祠祀。爲武庫主事。孝貞皇后喪，武宗自

宣府奔歸。又復欲出。震抗疏諫。上大怒。罪且不測。幸諸大臣力救得免。陞車駕員外郎。杖於廷。死矣。復甦。書與諸子曰。吾筆亂。神不亂也。竟以瘡故卒。卒後三年。贈太常少卿。子體仁。廢國子生。爲通政知事。是時諫而杖死者。後贈主事劉校。尙寶卿。主事林公黼。行人司副余廷瓚。太常寺丞。刑部昭磨。劉珏。兵部主事。行人詹軾。劉槩。孟陽。李紹賢。李惠。王翰。監察御史。各廢子姪一人。入國子監。嘉靖初。禮部主事。件瑜。上疏曰。正德間。給事中御史挾勢凌人。超權擇便。交遊貴俠。飲宴園亭。凡朝廷大闕失。羣臣大奸惡。緘口閉目。不復救。一時犯顏敢諫。視死如歸。或拷死廷闕。或流竄邊隅者。皆郎中員外主事。評事。行人。庶吉士等官。又張英本一武夫。入諫就死。行道悲傷。諸給事中御史揚揚出入。若罔聞知。今幸聖皇御極。褒恤忠諍。此輩更何面目復立清明之朝耶。章下。吏部爲寢。張英者。京衛指揮使。聞武宗南巡。挾一刀。囊土數升。持諫。疏常蹕道。跪哭諫。不允。卽拔刀自刎。血流滿地。侍衛人縛送詔獄。問英囊土何爲。曰。恐汚帝廷。灑土掩血耳。殞命獄中。無子。嘉靖初。憐其忠。贈都指揮官英弟雄都指揮。

舒芬。字國裳。進賢人。生而穎異。六歲時。授孝經。論語。諸書。輒了大義。年十二。郡守祝瀚修封漚。至。獻馴鴈賦。大奇之。薦補博士弟子。督學蔡清試。輒首。語人曰。此天下士也。中正德丁卯。鄉試。卒業南雍。誦讀晝夜。分不寐。勵志聖學。最喜濂溪。嘗稱之爲中興之聖。所著有太極通書釋義。又作易箋問。書論。詩稗說。春秋疑義。一時名士咸推讓焉。丁丑。進士十一人。廷對萬言立就。是科制題獨詳。上自義農。以及近代。凡經史所載爲治之。悉以咨焉。芬敷陳道法。直言時弊。甚詳切。而卒澤於道德仁義。御批第一。授翰林修撰。時

武宗巡幸不時。芬憂之。戊寅春二月。孝貞皇后崩。踰月。卽欲往親山陵。又革一應擺路軍馬。芬度其且至。宜府。遂上隆聖孝疏。謂三年之內。當深居九重。無復外出。雖釋服之後。儼然禁禁在疚。如成王免喪朝廟之時。又謂自古萬乘之尊。非奔竄避難。未有輕身不嚴侍衛者。既而又上車服疏。謂天子等威。莫大於車服。而下同於庶人。甚非所以辨上下定禮儀也。時虞有意外之變。故每疏之中。三致意焉。會江西大水。乞恩終養。辭極悽愴。疏五上。不允。己卯。上議以三月十九日壬子。警道東巡。祀岱宗。歷徐揚。抵南京。下蘇州。復溯江浮漢。登太獄。且遍中土。繁麗。先是甯庶人宸濠久蓄異謀。結陸完。錢甯輩爲內應。士大夫多懷疑貳。以故一聞駕出。人情洶懼。皆謂天下事大債矣。芬乃慷慨曰。車駕出必不利。此社稷安危之所繫也。十五日早。疏先入。乞留駕。言甚激烈。有曰。痛哭泣血。不忍爲陛下言者。江右親王倡吳濬之計。大臣懷馮道之心。陸完以祿位爲故物。以朝署爲市塵。以陛下爲奕棋。以革除年間事爲故事。復痛刺閣中。謂一切危安之迹。不苦言以救。而聽主上之自懷。時完以智術幸高位。利於主上遠出。則已得以自恣。以濠之謀。俾遂。則已又有非望之福。故造爲惡語。沮抑諫者。謂主上聞直諫。便舉刀爲刎狀。且曰。今撒賴矣。初以此沮之。芬不聽。復以此沮諸欲諫者。芬乃邀考功郎夏良勝。儀制郎萬潮。太常卿陳九川。至寓舍。酌之酒。贊之曰。匹夫不可奪志。是夕。復連疏入。時號江西四君子。明日。吏部張衍瑞等。兵部黃鞏。陸震等。刑部陸倬等。疏俱入。又明日。禮部姜龍等。兵部孫鳳等。行人司余廷瓚等。疏俱入。又有太醫院醫士徐鑿。以醫諫。車駕遂不果出。上震怒。命舒芬等百有七人。跪午門外。日朝入。西退者五日。芬嚴整無異平時。二十五日戊午。

命皆褻衣杖三十。芬以疏首杖特甚。神色不喪。是日水溢內海。子四五尺。至不了橋。折鐵柱七。若斬。杖幾斃。移臥翰林院中。掌院者懼禍。至。標出之。芬屹不爲動。曰。吾官此。當死此。謫福建市舶副提舉。昔羅倫以劾大臣。遭喪起復。亦謫此。後閩人欽其道。德風節。立祠並祀之。芬裹病就道。既至。布德宣威。遠夷心服。暇則講學不倦。生徒日衆。庚辰。外艱歸。世宗卽位。肆赦諸竄謫者。服闋。復官。翰林道濟。謁先師。與聖公講。士相見禮。聖公固讓。因撰謁闕里記。畫闕里圖。夫子宮牆圖。釋菜禮儀。及士相見禮儀。題曰東觀錄。甲申春二月。昭聖慈壽皇太后聖旦節。上疏謂皇太后奉陛下宗社大計。而陛下承繼大統。觀夫成王。周公儀禮經文。與我太祖制服之意。則是陛下於皇太后。雖欲疏之。有不能者。是宜率天下懽心。以事其親。而不可使皇太后之淒涼也。嗣屢乞致仕。不允。時世宗欲尊與獻王爲皇帝。爲皇考。命下羣臣議。芬執議。謂爲人後者。爲之子。不得顧私親。疏凡三上。固爭不得。與朝紳慟哭於廟。上震怒。杖如前。幾死。奪俸。明年乙酉。內艱歸。乃作周禮五官序辨五卷。六官圖釋一卷。別僞一卷。既校定正經六卷。題曰周禮定本。嘗謂周禮者。至誠盡性之書也。未幾卒。芬貫串經史百家。於天文尤精。觀望星氣。有占必應。又言鍾律度量。所以治麻明時。康節粗得大意。而不能建律運麻。將舉禮樂。必也周公。觀大司樂。則律麻備矣。識者聽之。嘗語人曰。心術與學術相符者。也。懷居與懷利相因者。也。意勝敬。欲勝義。則其心死。與學僞。吾儕格君。其豫在此。謂太極圖亦則河圖。與伏羲同功。而不滿先儒本於易之說。謂濂溪得斯道之正脈。而直責程正叔之外師。至於周禮一書。嘗責漢儒多附會之罪。宋儒乏表章之功。謂周禮與儀禮。戴記。猶蜀之於吳。魏也。賈氏以

儀禮爲本。周禮爲末。謬妄已甚。朱子乃不正之。是其所惑也。獨立敢言。不撓不懼。端居終日。未嘗晝寢。夜必計過自訟。言動必準諸禮。奏論必要諸大道。通籍十年。義氣激烈。每以聖賢自期。嘗悼異學之謬。曰。空言無補。不若修其本以勝之。因著論說甚詳。至於權倖奄官有求通者。拒之如釋老。居閩。未幾憂歸。琉球人莫不哀號追送。自京扶母喪入江。忽雲垂波立。乃爲文顯祭。風濤頓息。與朋友相劇切。無幾微矯飾。尤善成就後學。嘗語之曰。士常爵祿不入於心。溝壑不忘於念。卒之夕。大風雷電伐木。鳥巢覆屋瓦飛。其關係有如此。臨終沐浴與衆揖別。長子泣問家事。不答。跪請所欲。乃瞪目謂曰。六經大明於世。惟周禮未獲表章。余生平精力盡在此書。第未及進御爲歎。爾其無忘乃父之志。言畢而逝。世宗有精醇端介文魁天下。賢名大振。及陳仁義格君心之寢。世稱爲忠孝狀元云。

贊曰。瑞佞煽焰。炙手可熱。禍烈冠裳。人多結舌。鳳鳴朝陽。鷓鴣驚翻。或死或竄。愚不可及。何以方之。歲寒松柏。

史官曰。武宗之不亡失也。顯不幸哉。傾聽姦回。溺情狗馬。星旂曳於遠塞。桂檝鼓於洪波。閩左驛騷。賢哲灰氣。直無解昏德矣。韓文力闢狂且。足稱破寐。鴻章丹炳。而李夢陽之力爲多。至於萬乘南遊。何遵黃鰲等奮螳臂。當龍御。有古斷紉之風。舒芬爭近幸於前。持大禮於後。忠孝天植。作世斗山。嗟嗟。有臣如此。不能爲止。輦之受。而爲斷梗之棄。坐使臣則名成良顯。君則冒貢非幾。詩曰。讒人罔極。交亂四國。不能不致恨於瑾等也。

孫燧許達傳

孫燧字德成餘姚人弘治六年進士授刑部主事歷郎中正德六年起遷福建右參政再遷河南右布政使劉瑾亂政甯庶人宸濠已蓄逆謀瑾誅又結錢甯大爲恣口朝議選才節大臣摧其機牙陞燧副都御史巡撫江西燧聞命歎曰投艱於我死生以之攜二家僮往南昌洵謂濠旦暮得爲皇帝諸省臣附黨及羣賊依附者相助爲聲勢燧探體濠奸黨言動輒告濠先是濠中傷胡世甯下詔獄得燧力爲滌雪不死至是雖逆謀有迹願宗室不敢先事訟言但託觀他寇曲爲備首城進賢又城南康又城瑞州南康安義鄉者盜賊淵藪近割地開爲縣饒撫二府罷兵備燧曰緩急曷倚奏復饒撫兵備不果復請救湖東道分巡兼理兵備與饒相爲犄角九江常湖衝最爲要害請重兵備權兼攝南康甯州武甯瑞昌及湖廣興國通城廣信橫峰青山諸窳地險人悍設官駐其地兼督六縣又恐濠一旦起劫兵器假以討賊盡出會城兵器外府濠逆謀急乃屢密疏言濠必反又盡爲濠伏途諸奸所得卽達京亦爲諸權倖盜致濠所索金璧燧不得已乞休不允積憂勞數日髡髮盡白十三年江西大水濠所蓄賊凌十一等出沒鄱陽湖行劫燧與按察副使許達議調兵勦之賊遁沙井乃出不意乘夜出江外掩捕遇大風雨不克濟賊竟走匿濠林墓中不可踪迹會言官發濠反狀朝廷遣大臣卽訊濠懼十四年六月丙午伏賊府中俟諸守臣入大言曰太后密旨召我監國燧毅然應曰安得有密旨者又曰天祚暗移汝獨不知也益憤應曰安得妄言又曰我取南京汝保駕否燧益怒張目直視厲聲罵遂縛燧許達奮起爭孫巡撫朝廷大臣爾安得辱

侮無禮。又縛許且縛且罵。賊鍾折燧左臂。併遼殺之。濠竟用諸賊爲牙爪。僞稱將軍。濠遣婁伯招誘賊黨。至進賢。知縣劉源清斬伯。乘城拒守。濠又遣人招黨賊黨。則有官司在。不得發。又大索兵器城中。不得賊。不得兵器。皆持梃。比至安慶。王守仁等起義兵。擒濠。湖中諸通賊。至安義縣。有守吏不能走。故盡獲湖廣。浙江以饒撫。故不被賊禍。燧死節久之。阻於奸倖。未得褒贈。嘉靖改元。贈禮部尙書。諡忠烈。立祠祀江西。敍其子堪。錦衣正千戶。歷官都督。次陞進士。第二人。歷官南京禮部尙書。

許遠。字汝登。固始人。正德三年進士。長身巨口。猿臂燕頤。沈靜有謀略。初爲樂陵知縣。流賊猖獗。他縣閉門自守。或遺賊芻粟。飲食弓馬。或棄城走。遠獨募死士千人。持大梃。隨賊向。往突擊。人馬俱斃。賊不敢近。以功進山東僉事。分巡遼海東甯道。禮神愛民。下士詳獄。邊鎮懷輯。遷江西副使。時宸濠蓄逆。內外構結。莫敢誰何。遠每紮其黨。引法批繩。翦其羽翼。又密勸巡撫孫燧先發。後聞燧以爲不可。使賊反有名。然亦重寄之。凡規防機宜。悉與議。宸濠反。遠不屈。語在燧傳。濠並縛遠。遠罵曰。賊汝反。萬段磔汝。汝悔無及。宸濠令縛燧。遠出。遠顧燧曰。早聽我言。當不至此。益罵賊不絕口。至惠民門。挺立。賊刀斫其頸。屹不動。賊衆共摧抑令跪。竟不得一跪。遂死。遠父家居。聞江西有變。殺都御史副使二人。卽爲位。易服哭。人怪問。故父曰。副使必吾兒也。吾兒素直烈。必不屈。旣而果然。嘉靖改元。贈副都御史。加贈禮部尙書。諡忠節。立祠祀官。其子瑒。錦衣正千戶。進指揮同知。

贊曰。張許嬰壘。鯁骨喉牙。莫肆懸潰。勳節並嘉。有時孫許。能折藩角。烈烈方張。魄陰以奪。何待石礮。乃爲

醜獲。

史官曰。范氏云。凡言成事者。以功著易顯。謀初幾者。以理隱難窮。斯固原情比迹所宜推察者也。當甯庶未反時。燧。遠日夜爲防奸遏亂。自分必死。卽死。所畫城戍。調兵食。出器械。足以困滅賊。燧。遠死。忠憤貫天。日。士民爭奮。義兵雲合。此王守仁之所以成功也。守仁生而名成。燧。遠死而功隱。隱顯之際。可不悲哉。





明書卷一百八

列傳二

忠節傳八

張原、陸燾、楊爵、馮恩

附子
行可傳

張原字士元別號玉坡三原人師事故戶尚書王承裕講理學與馬谿田爲友言動一於古人弘治乙卯舉於鄉正德甲戌成進士授吏科給事中遇事敢言卽上書言十二事曰正守令擇將帥理刑獄汰冗食省征斂慎工作恤士卒明賞罰禮大臣開言路崇天道進德業忤旨降貴州新添驛驛丞至貴州學者聞其名莫不裹糶負笈而從經所指授輒充然有得居夷八年困心衡慮用是造詣益精閱歷益熟夷方士風爲之一變世宗卽位復召兵科給事中原感激益以諫諍爲己任言皆剴切凡論國家大計及進賢退不肖詞嚴色正懷然風生上亦多嘉納之三年七月以諫大禮被逮杖死闕下先是原有停司禮監請乞一疏羣閣銜之以故廷杖獨重竟死年五十一時禁方嚴弔客無敢至者獨都給事安磐與原同杖幸不死爲之經紀後事因哭以詩曰七載夷方謫三年諫議班家聲續臺史封事動天顏弔客何人至秦川有櫬還不才同逐放後死淚潺湲穆宗初詔恤諸言事者贈太常少卿錄其子爲國子生

陸燾字子餘一字浚明長洲人爲人疏眉目美髯長尺骨稜起聰慧目數行下嘗讀書貞山後學者稱曰貞山先生長洲陸燾盛傾邑族人完嘗領太宰大司馬重於天下燾守諸生絕不附依及完敗而獨燾岿然乃自以經術藝文爲王鑿所知曰是子也成將掩我舉應天鄉試明年成進士皆以春秋冠其經比對策大學士石瑤奇之拔第一有忌之者匿其策他所俟半而出之瑤大恨曰吾爲人所賣燾聞之不肯名石公客選改翰林院庶吉士凡七試皆第一究心經世之學以其餘爲古文辭每片言人以爲整復生應授官大學士楊一清復取第一時張璠桂萼以議禮驟貴幸爲密疏以諸庶吉士皆故輔宏私人上惑之俾出就選人格因得工料給事中拜命三日卽上疏言京邊諸要務因及人才學術國家理亂大策楊一清讀而嘆曰嚮以文士待陸生幾失之彼家敬輿何遜乎彼上時政四事皆時所不易言者月中疏凡三上一清愈欲一當燾燾引避又不肯名楊公客尋巡青乃剔其羸馬疏請斥市之歲省芻粟數萬司廢中貴人不便之爲蜚語中之燾發其奸因列牧政十事皆報可諸閹氣奪主浙江省試所收多知名士時慶陽伯之奴張與他人鬪而其人不能勝輒殺其母將以誣張法司讞得之麗大辟其人迫行賂東廠而慶陽爲武宗外家閹窺上心內薄之卽疏誣張實毆其母死非其子殺欲以動上果下法司會讞而都御史熊浹等力持前獄上怒爲奪浹官餘鐫秩其差燾抗章謂浹不當奪官獄不當反廠閹不當徇其辭甚危上怒逮廷杖之仍奉職如故璠萼時並相挾上眷凡事凌一清萼尤驚尋與璠角寵而孽燾奮曰決癩者乘將潰此非時耶夜草疏千餘言力陳璠萼之橫以爲不蚤去必亂天下其攻桂尤切方屬草而鬼笑於庭

粲叱曰：非二氏家鬼耶？何自阻我？草且亟上之。上大感動，爲罷璉、萼，而特鑄萼保傅，以示傾聽。粲然猶難輔臣體，置粲獄。會詹事翟縉故與璉、萼議禮合，失黨而孤，且疑出一清意，遂抗章涅一清，而爲二人鳴不平。上卽日召璉入輔，還萼所鑄保傅。粲擬杖誦貴州都勻驛丞，而一清遂去國。都勻在深山中，粲裹創以單車往，不攜家。至惟著書不輟，居歲餘，量移江西永新令。永新方苦劫而樂訟，以訟爲生，比至，首嚴保甲法，奸無所容，乃鉤得舍劫者主名凡數家，出不意撲禽之，而其最雄者彭震，徒黨數千，出沒鄰郡，不可捕。粲稔郡獄有大俠，故嘗與震好，能知其處，召謂曰：若欲生乎？欲生爲我縛震來，因授以方略，使壯士數輩挾之往，遂縛震。又計縛舍劫之豪者，皆斃於獄。訟師積猾，悉捕執之，數辯冤獄，人驚以爲神明。粲乃曰：害去矣，可進之教。乃摹四禮儀式，雜他條約，講之學宮，而後布之。士民懽趨，他邑視以爲準。會當內遷，念母老而璉方在事，曰：我猶墮彼，匪眈耶？拂衣歸。吏民以數萬計哭，扳之爲祠祀。歸杜門，多購異書，經史子集，以至方釋方技、黃衣稗官之書，亡不通曉。皆手校讐，尤精先朝典故，與客談，纒纒若貫珠，其披擿精義，指縱經略，尤出人意表。客亡不恍然自失也。爲文節奏經緯，斐然成章，爲詩匠心古調，不欲悅俗，絕不通京中貴人問，當其論糺璉、萼時，嘗譬及嚴嵩，嵩貴用事，重於二人，其修隙又倍之，以故卒不出。翟縉頗自侮，嘗列薦之，又使人鄭重通殷勤，粲夷然不屑也。縉亦爽然，人兩賢之。事母孝，母老失明，所以娛悅者備至。家具聲伎，人或訾之，粲笑而不答。及母卒，開閣散遣，後粲病革，歎曰：虛此五尺，不以馬革裹而朽之，腐下也。卒久之，穆宗卽位，詔錄故言事者，粲以嘗遷他官，格小迂，又二載始贈太常少卿，所著有春秋鶴附注。

胡傳釋煙霞山房文集庚巳編見聞隨筆鉤元挾秘禮記史記注釋行於世

楊爵富平人以進士歷官爲御史廉直有聲世宗中疏請慰人心以隆治道言臣惟人主一身用人行政萬化之本原也是非得失方在乎幾微而民心之向背天命之去就關焉甚可畏也聖帝明王深察乎此事無微而不謹時無暫而不懼爲大於細圖難於易故能天人與交而有以延祚於靈長今天下大勢極矣內而腹心外而百骸莫不受病因仍苟且兵戎廢弛奢侈妄費公私困竭奔競成俗賄賂公行遇災變而不憂非祥瑞而稱賀諛說面諛黨同伐異士風民俗於此大壞臣早夜耿耿至痛心流涕誠不忍默默保位以上負洪恩下負所學也惟聖明垂聽焉夫天下之患莫大於以危爲安以災爲利以可憂爲太平法家拂士日遠而快意肆情之事無敢齟齬於其間此積弊而蠱所以爲不可救藥之病也往年夏秋恆暘不雨幾輔千里無禾歷冬無雪暖氣如春元旦僅雪卽止民失所望洵洵無聊此正陛下撤樂減膳率羣下祈祐之時也而大學士夏言數人者方以爲靈瑞而稱頌之不幾於安危利災以大可憂者爲樂耶孔子告顏淵爲邦在遠佞人如言等所謂佞人非耶大臣之職當輔君當道志仁先天下以爲憂無忠亮體國之心而居人臣之極位是所謂小人乘君子之器者也夫翊國公郭勛中外皆知其爲天下之惡朝廷之蠹也迹其舉動亦豈能有逃於聖鑒哉顧聖德優容不忍卽罪神謀遠慮自有所處臣愚以爲奸不可近惡不可長若止之於微遏之於漸則朝廷優禮大臣體貌未失而武動餘裔亦得以善其終或使稔惡肆毒潛干政柄羣邪趨赴善類退處於天下國家之禍必深矣治道去其太甚此其失人心而致危亂

者一也。天生斯民，立之司牧。君人者奉天安民，而使之各得其所也。古者民勤於食，則百作廢。今民勤食不得，而顛連無告，委命溝壑，以至於死亡。臣近巡南城，兩月中凍餒死者八十一人。此南城一郭耳，其諸五城，尙未知有幾也。千里之遠，耳目之所不及，又不知其有幾也。此皆陛下之赤子，望豆蔬延須臾之生而不得。正陛下憂民惜財，與天下休息之時也。而土木之功，累舉無止。工部屬官，添設至數十員，又以一方士之故，差官萬里，建修雷壇，浚民膏血，而不知卹民惟邦本。本固邦甯，窮民之財，盡民之力，其無乃自蹙其根本也乎。昔漢文帝惜百金之費，而不營一臺。故海內富庶，隋氏以盛修宮室，而至於亡。今北敵跳梁，內寇竊發，加以頻年災異，上下一空，百計取之，愈爲不足，而興作未已，以結怨於天下。此其足以失人心而致危亂者二也。唐虞三代君臣，每每以勤敬之道，交相警戒。如堯兢兢，如舜業業，如禹惜寸金，如文王日晏不暇食，武王以敬勝怠，故能壽躋耄期，治隆熙泰。陛下卽位之初，勵精有爲，不遑甯處，嘗以敬一箴頒天下。於堯舜三王之道，蓋已心得而服行之矣。數年以來，朝儀間闕，經筵輟講，大小臣庶，朝參辭謝，未嘗得一觀聖容，未嘗得一聆天語。今庶官入覲，遠自萬里，孰不欲一望天顏，以慰快觀之心，而咫尺闕庭，不得一見，臣恐人心日益怠惰。中外日益玩蔽，非隆古君臣同寅協恭，以臻太平之氣象也。此其足以失人心而致危亂者三也。聖王之世，執左道以惑人者必誅，而保傅之職，坐而論道，古所道官不必備，惟其人者也。今舉名器之重，而畀諸迂怪之徒，異言異服，列於庭苑，金紫赤綬，延及方外，而名器之濫，極於此矣。陛下以天縱聖資，爲上天元后，遠宗帝王之道，近守祖宗之法，細旃廣廈，與公卿賢士講論治道，則

心正身修。與天地合德。日月合明。和氣致祥。罔有天災。山川鬼神。亦莫不甯。安用假此妖誕邪妄之術。列諸法禁。而藉之爲聖躬之福耶。甚非天子所以崇正遠邪。平平蕩蕩。奉三無私。以化天下之道也。臣恐風聲所及。人趨異教。貽四方之笑。取百世之譏。於聖德國政。所損不細。此其足以失人心。而致禍亂者四也。陛下臨御之初。延訪忠諫。虛懷納諫。狂直敢言之士。往往矜宥。故一時臣工。恃陛下能容。敢以直言。干冒天聽。言過激切。而不獲罪者。亦多有之。比年以來。震之以天威。加之以危禍。如往年太僕寺卿楊最。言出而身立死。近日左贊善羅洪先等。皆以言爲罪。而斥。故臣下懷危慮禍。無復有犯顏直諫。爲匡救逆耳之言。夫成湯大聖人也。仲虺稱其改過不吝。從諫弗咍。高宗商令主也。傳說以木從繩。則正。后從諫。則聖勸之。古今以來。有天下國家者。未有不以任諫而興。拒諫而亡者也。臣恐自今而後。雖懷忠義之心。非灰心仕進。甘退邱園。亦必深自晦藏。爲保身之計。孰敢發口論天下之事。以取死亡哉。忠蓋杜口。則諂諛交進。上德不達。下情不通。堂陛之近。遠於萬里。此其足以失人心。而致禍亂者五也。伏願皇上念祖宗創業之艱難。思今日守成爲不易。戒敕夏言。務篤忠貞。以報國。於郭勛。預裁抑而保全之。止土木之功。開諫諍之路。屏邪罔之術。一主於慎獨。以養天德。達王道。則莊敬日強。而眉壽千億。虛明照物。而忠邪莫逃。宗社萬萬年無疆之福。聖子神孫萬萬年無疆之規。端在此矣。疏入。上大怒。下詔獄。械繫者數年。雖處夏抑中。端疑正直。獄卒咸敬信之久。之得釋。會尙書熊浹有所陳論。上大恚曰。我固知釋爵。諸妄言歸過者。立至矣。命卽與給事中怡。郎中魁。俱就逮。爵時抵家。方十日。忽錦衣校至。曰。若復來乎。校素敬爵。慰之曰。吾欲有

他往。特一省公。爵笑曰。吾知之。與校同飯。飯糲食。校不能堪。爵啗茹自若。食已曰。行乎。校曰。宜一入爲別。爵立屏前曰。朝廷有旨見逮。吾行矣。卽攬挾行。復再踰年乃出。歸老田里。終身不言仕進。

馮恩。字子仁。吳人。嘉靖癸未進士。爲行人。出勞兩廣。總督王守仁。遂從守仁學。守仁嘗語人曰。任重道遠。其在馮生哉。選授南道御史。故事。御史有所執訊。甫具。移刑曹。卽俾爲獄。不復相關。恩必從曹錄獄牒聞。諸曹郎噪其尙書。謂御史屬吏我。尙書以語恩。恩曰。御史非欲屬吏公諸曹也。欲因以知事首尾。衛可否耳。尙書屈道著爲甲令。尋疏論留守魏國公不當越江役諸衛卒。魏公懼不敢役。已巡上江。故事。邏卒獲盜多寡爲殿最。恩歎曰。是必有孽盜。以免殿者。下令卒畫地而程之。以不被盜爲上功。獲多而核者次之。民自是不虞盜誣。時汪鉉爲南掌院。指揮張紳最幸。挾而殺人。恩立訊寘之法。鉉時以上寵故勢張甚。請大計時南諫臺毋得先論摘。候畢事始論摘其尤者。部院更衷之。恩謂南諫臺論摘在先。北在後。皆所以詳核官邪。司察漏網。今乃欲自收寄而奪耳目之任。不可。上疏力爭。得如故事。鉉復險。能伺上旨。沮折其屬。又阿諛時相。數更職守以自固。恩復極論之。時上方喜任張孚敬等。議建南北郊。又欲令皇后出蠶北郊。而摘其不合者。著論以邪徒關之。中外惴惴莫敢抗。恩獨上疏。以爲陛下必不忍以敢言之士爲邪徒。此殆左右奸佞欲售其說者。陰詆之耳。今天下士風日敝。以緘默爲老成。以順與爲平易。以持立爲矯激。有所建白。咸指爲沽名。言及左右。輒置之遠。不惟父母妻子。怨其不能持祿保身。而朋友故舊。絕迹往來。以避權臣之怨。陛下尙猶以邪徒目之。則惟有甘心作仗馬而已。古者天子躬耕藉田。以供粢盛。后親

桑蠶室以資黼黻文章。未聞出郊而蠶也。今士庶之家。少習禮教者。必以男不言內。女不言外爲美俗。朝廷爲四方取則焉。可舍九重而遠出郊宿外。是禮行後世。有特書者。曰。后親蠶於郊。譏外也。視陛下爲何如主。至於南北郊。高皇帝未定制也。分十年而合。合百餘年。而列聖繼之。未有改也。今陛下一旦改之。行夏之時。而顧復周之祭。先天後天。則尊卑之義不明。分天分地。則神明之志不通。夫百年而成。一旦而毀。中人之家。守先業者。尙知其不可。而況陛下爲天地子。爲宗廟社稷主哉。陛下服歷大位。九年於今矣。以爲治耶。亂耶。安耶。危耶。太倉水衡。供億不足。那貸盡至矣。三輔近畿。關陝河洛。赤地千里。人且相食矣。兩淮旱蝗。草莖木葉。亡子遺矣。江省大水。歲課不登。爭流竄矣。閩海叛卒。至殺兩長官矣。地震星孛。產妖作異。草木變怪。禽獸爲孽。置郵不絕。書靈臺不絕。奏陛下。了不知卹。而沾沾焉以爲治安。今日殞手詔。明日降敕諭。紛更變亂。欲以追前王。軼後世。臣故知其不可也。乞速停二議。宏開言路。以堯舜之用元凱爲勉。以唐宋之徇林甫。安石爲戒。僅報聞。當恩自以爲必得逮。而上寬之。益感奮思報。會彗星見。遂極論。汪鉉爲腹心。彗。并及時相臣。遂做范希文百官圖例。悉品諸大臣。以某賢當簡用。某不肯當。斥其詞旨。喻厲。上大怒。馳逮下詔獄。苛究所主名。榜掠慘酷。執語不移。尋移刑部獄。得從輕比。上奪尙書王時中職。侍郎聞淵偉。郎以下皆遠謫。乃比附上言。大臣德政。律論斬。時鉉以北掌院遷太宰。王廷相代之。上言。恩律不合。不聽。尋當論報。例會審闕門。鉉宜執筆。故令校卒持恩轉膝面之。恩起立不跪。鉉怒。謂汝上書欲死我。既下獄。復欲爲厲鬼以死我。今我死汝矣。恩叱曰。若安能死我。若欲弄天子法耶。鉉益怒。謂囚何敢叱大臣。

恩曰。大臣而無君。人人得而誅之。何但叱。鉉撫謂爾獄。因何得受人餉。恩笑曰。如若言。不過以義藁饋耳。不至如若以選人市。且實以數事。鉉怒甚。推案下欲毆之。廷相曰。馮御史何絮爲。祖宗不殺諫臣。百七十年矣。豈以爲快心。破祖宗法。謂鉉曰。有法在。以法論御史。則可以怒論御史。不可禮尙書。夏言亦曰。此豈宰公私家耶。乃止。鉉捉筆直署情真。恩挺身出。觀者嘖嘖稱歎。謂其膝鐵口亦鐵。膽骨皆鐵。因目爲四鐵御史。上頗聞其事。是冬。得不死。初審後。有遺以鴆者。曰。毋再辱。恩不受。曰。不聞王新甫語。我豈兒女子耶。御史陳言不當。伏毆刀都市。以伸明主法。何言辱。恩在獄。其子行可甫十三歲。卽伏闕上書白冤狀。括髮短後衣。覽覽長安街中。見一要官舉過。卽攀跪泣請。其辭絕酸楚。不忍聞。皆掩耳促鼻者。疾過之。如是二年。年十五。會冬事迫。乃刺血書疏。大略言。臣父恩幼而失怙。祖母吳含飴哺之。以長成。有今日。不幸私憂過計。欲爲陛下作一吠奸之犬。而頓忘逆鱗之戒。遽陷大辟。塗炭都市。竊念祖母吳已八十餘。憂傷之深。僅餘氣息。臣父今日死。祖母當以今日死。臣父明日死。祖母當以明日死。臣父死。臣祖母復死。臣焚然一孤甯得不死。惟冀陛下哀憐之。縛臣置辟。而赦臣父。得以苟延母子二人之命。陛下戮臣。不傷臣心。臣被戮。不傷陛下法。謹延頸以俟白刃。上有旨。下法司更審。刑尙書聶賢乃以前律不合請報減死。戍雷州。時鉉亦以姦事露罷。至雷州。里父老紳紳皆師事之。居六載。赦歸。雷人祠之。十賢堂。以配宋之遷客寇準。李光輩。時母吳年九十。恩亦六十。每盡色養。猶蒸蒸孺子慕。恩材大。蚤廢亡所施。居恆慷慨。謂猶可以爲德於鄉。乃拯計然之策。久之。橐大裕。爲贖其宗族親友之貧。不啻數十百指。或授之室。或資之學。或卹其死。

又爲贖人之子。及產賑餓。施藥餌。始恩急治生。人多疑之。旣伺其所爲。乃曰。馮公殆爲他人治生耳。穆宗卽位。旌諸言事者。恩已七十。銓曹欲用之。而難其老。乃疏進大理寺丞。禮部請特旌行。可爲孝子。表其廬。行可懇辭。不許。於是父子忠孝事大著。年八十五卒。祀鄉賢。行可後官光祿署正。歷遷應天通判。剛正如其父。有事預中貴人。皆憚之。戒曰。此馮御史兒。勿犯也。致政歸。大約行宜皆不愧先躅云。

贊曰。疾惡如仇。執理如石。原死大禮。祭致鬼泣。爵本昌言。恩稱四鐵。禮義洞徹。發議正直。兼麗星雲。何須榮遇。

史官曰。世宗稱英明。自詡博雅。以彊毅爲用。恥見誦於讜議。而忽受蔽於姦欺。以尊親之過。夷管賢俊。原之死也。惜哉。瓊。夢以議禮貴。貴縱矣。擢其縱錄。必廢。祭之不死命也。爵正直可感獄卒。緹騎而獨格於懷主。然其言千古壯之。恩父子忠孝。足以風世。其有功名教大矣。孔子曰。吾未見剛者。若此者可以當之矣。

楊繼盛、沈鍊、海瑞傳

楊繼盛。字仲芳。其先小興州人。洪武中。小興州數被寇。詔徙其民內地。繼盛始祖百源。徙容城。家焉。七世生繼盛。幼有奇質。父富謂人曰。日者言吾門當驟大。豈是子乎。七歲。母曹卒。其父腹陳始日夷公於豎。使牧飯牛。牛肥。踰年。從牧所開往里塾。觀里中兒誦讀。揖遜而心好之。歸謂兄繼昌。請得受里塾學。兄曰。若幼何學。乃斃然曰。夫幼任牧牛。詎不任學。兄言於父。富奇而聽之。繼盛竟學。然不廢牧也。十餘歲。父卒。久

之兄坐邑賦踐更。繼盛往代踐更。至十三始從師受經。十八補邑諸生。讀書僧舍。自勵刻苦。恆讀至夜分。燈且盡。瞑坐而思。屬文誼會寒。無下襦。邊屋行。且溫誦日所臆。令脛以上微暖。得稍假寐。五鼓起。汲水。手凍屬於纆。呵之乃解。其明年春。諸僧病疫。且甚。同舍生俱亡去。繼盛獨曰。吾去。僧誰爲治湯藥者。乃吾死僧矣。則爲之親爨事。問醫調藥。餌僧以次愈。而兄病疫亦作。報至奔歸。日夜不解衣而侍。尋愈。時人異之。爲語曰。疫無鬼。以爲不信視。楊子庚子舉鄉試。明年辛丑。下第。入太學。繼昌以入太學。有負笈費。乃乘其出。子嬪以八石穀廢箸。及游太學。有聲。薦紳遞館穀之。稍稍具囊中裝。而婦治農有天幸。輒歲。竟事歸。爲酒。召其姻族。奉兄觴。曰。始弟所以默而從廢箸者。懼不勝負笈費爲兄累。今幸有餘。足佐兄朝夕。請得復從。字下爨。兄愧許。會復當計偕。有司以十三金爲路費。悉推兄。使輸邊。獲散官級。曰。吾道近可徒也。甲辰。復下第。再入太學。丁未。舉進士高第。授南京吏部驗封主事。署郎事。與考功郎鄭曉。友善。曉素負鑒以裁。一世士。而獨愛重之。謂人曰。夫夫非吾所及也。剔宿弊。立章程。吏曹肅然。曹事簡。稍用力詞章。久而厭去之。是時關西韓邦奇爲兵部尙書。邦奇大儒。繼盛始從之。而受樂。三月而得其數。乃謂邦奇曰。樂體於理。而用於聲者也。有器而後有聲。夫器理所寄也。乃搆桐竹絲漆。手製管和矣。已製琴。已瑟。若簫笙埙篪之類。諧而合奏之。若一。以復邦奇。邦奇大悅。曰。技更進是乎。居。吾語汝。吾欲製十二律之管。管各備五音。七聲而成一調。何如。繼盛退而凝思。廢食寢者三日。夢大舜坐堂上。投以金鐘。使擊之。謂曰。此黃鐘也。繼盛醒而汗。悅若悟者。起篝燈。促復製管。至明而成者六。已而十二管成。邦奇撫膺高蹈。曰。得之矣。始吾輯

志樂成而九鶴飛舞於庭。其應乃在子耶。邦奇既歸老。語繼盛。樂不止以盡子。吾爲子悉吾天文地理太乙六壬奇門兵陣之書而授子。繼盛乃徧習焉。而會諸寮有講聖門之學者。又從講學。人或謂此曹子什伍賣聲譽。奈何中之繼盛曰。道在人志耳。子不聞夫商邱中誘而投火以得寶者耶。庚戌秋。敵大舉躡京師而南。南中議發兵入援。嘯嗒當往者。繼盛奮曰。主辱臣死。卽無一兵從我。丈夫獨身取單于耳。會敵退而止。辛亥。遷兵部車駕員外郎。時咸甯侯仇鸞以雲中騎勤王。驟得兵政。天子虛己聽之。而鸞驕且內畏敵。敵請於二邊互市。市馬。鸞主之。奉以中國幣帛。議遣使。繼盛乃上疏條論其十不可。五謬。大略謂互市。市馬者。和親別名也。敵踐躡我之陵寢。虔劉我赤子。而先之和。忘天下之大仇。其不可者一。往北伐之詔下。天下曉然知聖意。日夜輸兵食以助京師。而忽更之曰和。失天下之大信。其不可者二。以天朝堂堂而下。與犬羊互市。冠履倒置。損國家之威重。其不可者三。天下豪傑。日夜磨厲其長技以待試。而甘心於敵。今謂國家厭兵無所用。墮豪傑效用之志。其不可者四。庚戌之變。天下頗講習兵事。無故以和弛之。使邊鎮美衣輸食而自肆。懈天下飭武之志。其不可者五。往者邊臣私通敵使。猶得以法裁之。今導之使通。其不句結而危社稷者幾希。開邊方通敵之門。其不可者六。伏羌之莽。在在有之。往者厭國威不敢肆。今謂縣官懼而奉彼乃爾。其何有於我。開百姓不靖之漸。其不可者七。敵昨深入時。我雖不敢逆一矢。然彼知我無備也。備之已半歲。而互市終之。彼謂我尙有人乎。長□族輕中國之心。其不可者八。敵狡詐出沒叵測。我竭財力而釐之邊。敵負約不至。未可知也。因互市而伏兵。若吐蕃清水之盟。未可知也。或互市畢卽入寇。入寇矣。而駕

誘他部。我既無所攝問之。未可知也。或以下馬索上價。或責我以他賞。或望我以壽禮。未可知也。墮口族狡詐之計。其不可九。大約歲帛數十萬。得馬數萬匹。十年之後。敵馬少而我帛亦不繼。將何以善其後。不爲國家深長之計。其不可十矣。凡爲謬說者有五。不過曰。吾外假馬市以羈縻之。而內寬吾以修武備。夫敵至無髮也。至無知也。吾安能一一而應之。是終兆釁也。且吾果欲修武備。而何所藉於羈縻。此一謬也。曰。吾乏馬。吾藉此一資吾軍。則又非也。既和矣。無事戰矣。得馬將焉用之。且敵安肯捐其壯馬而予我。此二謬也。曰。互市不已。彼且朝貢。夫至於朝貢。而中國之捐資以奉。彼益大矣。此三謬也。曰。彼既利我。必不失信。又非也。夫中國之所開市者。能盡給其衆乎。不給則不能無入掠。此四謬也。曰。兵危道也。佳兵不祥。夫敵加於己。而應之。胡佳也。人身四肢皆癩疽。毒日內攻。而憚用藥石。可乎。此五謬也。夫此十不可五謬。非爲公卿大夫知之。三尺童子皆知之。然而有爲陛下主其事者。蓋其人內迫於國家之深恩。而外懼敵之重勢。內迫國家之深恩。則圖倖目前之安。以見效。外懼敵之重勢。則務中彼之欲。以求寬。然公卿大夫知而莫爲一言止之者。是止則身任其責。而危。開則人任其責。而安。陛下振獨斷。發明詔。悉按言開市者。選將練兵。聲罪致討。不出十年。臣請得爲陛下勒燕然之巔。懸俺答之首於藁街。以示天下萬世。疏奏上。壯之下相嵩等八臣議。咸唯唯。仇鸞愧憤曰。豎子目不知口。宜其易之。乃密疏入。上意遂中變。下繼盛詔獄。就置訊。持論侃侃不屈。獄具。貶狄道典史。狄道在陝西之臨洮山中。其民不畏法。而狄道令嚴重之。不敢煩以事。繼盛請曰。余典史也。不敢有他請。得從典史事。令賢其意而許之。繼盛務益共敬其職。冬月受

請讞。竟莫弗倦。臨洮民翕然稱其神明。卽監司以難獄猶豫者。輒問其云何。不以及令也。少暇。則進邑諸生。爲講說文義。大指諸生人人得意。恨見之晚。捐俸祿。益之東贄。買東山超然臺。翦棘立書院。以居諸生。祀伏羲而下至周孔。配以濂洛關閩諸賢。狄道之旁地故多回夷。其子弟悉習梵典。繼盛召而約束焉。爲立經師。而身誨其稍異者三十人。諸生日益衆。無所取食。乃集邑夷。搜飛灑者伏糶。得三十石。而霧所乘馬及妻張服裝。買民間最重賦地二千畝。自於府以伏糶予之。做故井田意。剖授諸生父兄。使畝入粟。以給筆札及婚喪費。又買城西廢圃。使茹蔬。而引洮河之水灌溉之。地益以肥饒。給諸生勝讀矣。邑故有煤山。生番制之不能開。而仰給薪於二百里外。繼盛挾衝指揮單騎往。召生番諭之。咸服。曰。楊公卽須吾穹廬。且舍。而況此煤山耶。邑遂不苦薪。時有稱巡按御史使下邑。責霧褐者。乃持其人曰。御史無責褐也。責褐卽御史。吾且得請之。其人大窘。郡守尉爲旁解。得脫去。自是無來責邑褐者矣。居狄道將三年。其吏民愛之。呼楊父。諸生稱爲關西夫子。是時口數敗。約入寇。仇鸞奸復露。罪至族。繼盛言大售。上念之。稍遷諸城令。之諸城月餘。卽遷南戶部主事。之南戶部三日。而遷刑部員外郎。道復調兵部武選。當是時。嚴嵩最用事。惡仇鸞刺骨。而善繼盛筮。以不得立貴之爲恨。然天下之惡嚴嵩甚於惡仇鸞。繼盛始遷刑部。卽欲移疾歸。旣復調兵部。則中夜起坐自詫曰。天子遇我厚矣。我何以報塞。妻張旁笑曰。公休矣。且歸耳。曰。何謂也。曰。夫一仇鸞而困公幾死。今相嵩父子百鸞也。公何以報爲。休矣。且歸耳。繼盛霍然大悟曰。吾乃今而知所以報也。於是夜密草疏論嵩。抵任之十二日。爲癸丑元日。將上之。會上方怒諸給事。有所行遣。繼

盛已抵闕門矣。趨出。更十五日而齋。齋三日。乃上疏。其辭曰。臣先因阻馬市罪。應下獄。逆鸞威屬。問官鍛鍊。必欲置臣於死。陛下持寬其罰。不二年間。復至今職。夫以孤直罪臣。天地隆恩。不死逆鸞之手。而又遷轉如此之速。則自今已往之年。皆陛下再賜之年。而臣身亦陛下再生之身也。臣夙夜祇懼。思所以捨身圖報。蓋未有急於請誅賊臣者。方今在外之賊。惟強敵爲急。在內之賊。惟嚴嵩爲最。賊有內外。攻宜有先後。未有內賊不去。而可以除外賊者。故臣請誅賊嵩。當在剿絕強敵之先。且嵩之罪惡貫盈。神人共憤。徐學詩、沈鍊、王宗茂等嘗勸之矣。然止皆言嵩貪污之小。而未嘗發其僭竊之罪。嵩之姦佞。又善爲撫飾之巧。而足以反誣言者之非。陛下之仁慈。又冀嵩之感恩而歸於正。故嵩猶得竊位。至今爲嵩者。乃日懼言者之多。而益密其彌縫。幸於得陛下之留。而愈無忌憚。衆惡俱備。四端已絕。幸賴陛下誠敬格於皇天。天心仁愛。屢示災變。以警。去年春。雷久不聲。占云。大臣專政。夫大臣而專政。孰有過於嵩者。又冬。日下有赤色。占云。下有叛臣。凡心不在君而背之者。皆叛也。夫人臣而背君。又孰有過於嵩者。如各處地震。與夫日月交食之變。其災皆當應賊嵩之身。乃日侍左右而不覺。上天仁愛警告之心。亦恐怠且孤矣。不意陛下聰明剛斷。乃甘受嵩欺。人言不見信。雖上天示警。亦不省悟。以至於此也。臣敢以嵩之專政。叛君十大罪。爲陛下陳之。我太祖高皇帝詔天下罷中書丞相。而立五府九卿。分理庶政。殿閣之臣。惟備顧問。視制草。故載諸祖訓有曰。以後子孫作皇帝時。臣下有建言設立丞相者。本人凌遲。全家處死。此其爲聖子神孫計至深遠也。及嵩爲輔臣。儼然以丞相自居。挾陛下之權。侵百司之事。凡府部題覆。先而稟而後敢起稿。

嵩之直房百官奔走如市府部堂司嵩指使絡繹不絕一或少違禍顯立見其至失事又駕罪於人是嵩雖無丞相之名而有丞相之權有丞相之權而無丞相之責天下知有嵩而不知有陛下此壞祖宗之成法一大罪也。權者人君所以統馭天下之具不可一日下移臣下亦不可毫髮踰僭嵩一以票本自任遂竊威福之權陛下用一人嵩卽先謂之曰我薦之也及黜一人嵩又號於衆曰此人非我所親故罷之陛下宥一人嵩卽謂之曰我救之也及陛下罰一人嵩又號於衆曰此得罪於我故報之嵩竊陛下之喜以市己之恩假陛下之怒以彰己之威所以羣臣感嵩甚於感陛下畏嵩甚於畏陛下臣不意陛下之明斷乃假權於賊手如此此竊君上之大權二大罪也。善則稱君過則歸己人臣事君之忠也書曰爾有嘉謨嘉猷則入告爾后於內爾乃順之於外曰斯謨斯猷惟我后之德人臣不敢彰己之能以與君爭功如此陛下苟有一善嵩必令子世蕃傳於人曰上故無此意我議而成之又將聖諭及嵩所進揭帖刻板印行爲書名曰嘉靖疏議欲使天下後世謂陛下所行之善盡出於彼而後己也人臣善則稱君之忠果若此乎此掩君上之治功三大罪也。陛下之令嵩票本蓋取君逸臣勞義也嵩何所取而令子世蕃代票又何所取而約諸義子趙文華等羣會而票擬屢更數手機密豈不漏泄所取題疏方上滿朝紛然已知天語既下前講若合符契如錦衣衛經歷沈鍊劾嵩疏陛下發大學士李某票擬某卽使所善問世蕃乃同趙文華擬票停當令文華袖入封進此人所共知也卽劾嵩之疏世蕃猶得票擬餘可知矣是嵩卽以臣而竊君之權世蕃復以子而弄父之柄百官孰敢不服天下孰敢不畏故今京師有大丞相小丞相之謠此

縱姦子之僭竊。四大罪也。邊事之廢壞。皆原於功罪賞罰之不明。嵩爲輔臣。乃爲壟斷之計。欲令孫冒功於兩廣。故先置伊表姪歐陽必進爲總督。姻親平江伯陳圭爲總兵。御史黃如桂爲巡按。朋姦比黨。譁張爲幻。先將長孫嚴效忠冒兩廣奏捷功。陞所鎮撫。又冒瓊州一人自斬七級功。造冊繳兵部。效忠告病。乃令次孫嚴鵠襲替。鵠又告併前效忠七首級功。陞錦衣衛千戶。今任職管事。效忠嚴鵠皆世蕃養養臭乳子也。何嘗一日離左右而至軍。卽至軍亦豈能一人自斬七首級。而假報戰功。濫竊官爵。以故歐陽必進得入爲工部尙書。陳圭託疾得掌後府。黃如桂驟遷太僕寺少卿。是嵩既竊陛下爵賞之權。以官其子孫。又以子孫之故。顯拔其私黨。此僞既作。倣效成風。蔣應奎等令子冒功。杖死遣戍。皆嵩有所倡之也。夫均一冒功也。在蔣應奎等貪冒。科道則勅之。在嵩貪冒。人所共知。科道乃不敢勅。嵩積威足以箝天下之口。可知矣。此冒朝廷之軍功。五大罪也。逆賊仇鸞。總兵甘肅。貪虐論革。嘉靖二十九年。大同帥張達等敗沒。正強敵竊伺之時。使嵩少有爲國家之心。豈肯用此債帥。以寄干城。而世蕃乃受鸞銀三千兩。指逼兵部。薦爲大將。及鸞冒哈舟兒軍功。世蕃亦藉以陞廢。嵩父子於時嘗自誇以爲有薦鸞之功矣。及鸞勢出嵩上。反肆凌侮。故嵩嘗自歎以爲引虎遺患。後又知陛下有疑鸞之心。恐其敗露連累。始互相誹謗。以泯初黨之迹。蔽陛下之明。然不知始而逆鸞之所以敢肆者。特有嵩在。終而嵩與鸞之所以相反者。知陛下有疑鸞之心故耳。是句敵背逆者皆鸞也。而受賄引用鸞者。嵩與世蕃也。進賢受上賞。進不肖受顯戮。嵩之罪惡。又出鸞之上矣。此引背逆之姦臣。六大罪也。前胡虜犯內地。深入經時。兵法擊其墮歸。此一大機也。

而兵部尙書丁汝夔問計於嵩。嵩乃曰：京邊不同勢，敗於邊可掩也，敗於京不可掩也。且寇飽自退耳。故汝夔傳令不戰。及陛下逮治汝夔，求救於嵩。嵩又曰：無恐也。吾爲密疏保若。及汝夔臨刑，而後知爲嵩所給。乃大呼曰：嚴嵩誤我矣。是嵩以不戰給國，而以死給汝夔也。此誤國家之軍機，七大罪也。黜陟者，人君之大權，非臣下可得專其私也。刑部郎中徐學詩以論劾嵩與世蕃革任爲民矣。嵩於考察京官之時，逼令吏部將學詩兄中書舍人徐應豐罷黜，荷蒙聖明洞察，留用。夫應豐乃陛下供事內廷之臣，嵩猶敢肆其報復之私，則在內之臣，遭其毒手者，又何可勝數耶？戶部都給事中厲汝進以論劾嵩與世蕃降爲典史。嵩於考察外官之時，復逼吏部將汝進罷黜。汝進言官也，縱言不當，陛下既降其官矣，其爲典史，則無過可指也。嵩乃以私怨罷黜之，則在外之臣，被其中傷陷害者，又何可勝數耶？夫考察大典也，陛下持之以激厲天下之人心，賊嵩竊之以中傷天下之善類，此專黜陟之大柄，八大罪也。今府部之權，皆撓於嵩矣。而吏、兵二部大利所在，尤其所專主者。嵩於文武之遷陞，不論人之賢否，惟論銀之多寡，各官之任，亦通不以報國爲心。惟日以賄嵩爲事。將官既納賄於嵩，不得不剝削乎軍士，所以軍士多至失所。有司既納賄於嵩，不得不濫取於百姓，所以百姓多至流離。利歸一人，毒徧天下，人人思亂，皆欲食嵩之肉。皇上雖屢加撫卹之恩，豈足以當嵩殘虐之害哉？如是臣恐天下之患不在胡虜而在域中。此失天下之人心，九大罪也。先朝風俗淳厚，近古，自逆瑾用事，始一少變。至嵩爲輔臣，諂諛欺君，貪污率下，通賄慝勸者，貪如盜，賍而亦薦用，奔競疏拙者，廉如夷，齊而亦罷黜。守法度者以爲固滯，巧彌縫者以爲有才，勵節介者

以爲矯激善奔走者以爲練事卑污成套牢不可破雖英雄豪傑亦入套中從古風俗之壞未有甚於此時者究其本源嵩先好利天下所以皆尙乎貪嵩先好諛天下所以皆尙乎諂源之不潔流何以清風俗不正而欲望天下之治得乎此壞天下之風俗十大罪也嵩有十大罪昭人耳目以陛下之聰明而若不知者陛下待臣子之心出於至誠賊嵩事陛下之姦入於至神以至神之姦而欺至誠之心無怪乎墮其術中而不覺也臣請更以嵩之五姦言之知陛下之意向者莫過於左右侍從嵩欲託之以伺察聖意先用重賄結納於陛下一言一動無不報嵩報則酬以重賞凡聖意所愛憎舉措嵩皆預知故得遂其逢迎之巧以悅陛下之心陛下悅嵩之能盡合而謂之才不知其先有人以通之也是陛下之左右皆賊嵩之間諜其姦一也通政司納言之官嵩欲阻塞天下言路故令義子趙文華爲通政使凡疏到文華必將副本送嵩與世蕃先閱而後進疏內情節嵩皆預知少有干涉卽爲彌縫聞御史王宗茂劾嵩之疏文華停留五日方上故嵩得以展轉擁飾是陛下之納言乃賊嵩之警犬其姦二也嵩既內外彌縫周密所畏者廠衛衙門緝訪之也嵩則令世蕃將廠衛官籠絡迫結姻親夫既與之親又豈忍發露其惡不然嵩籍江西去京四千餘里而結親於此欲何爲哉不過假婚姻之好以遂其掩飾之計耳陛下試詰嵩諸孫所娶者誰女立可見矣是陛下之爪牙乃賊嵩之瓜葛其姦三也廠衛已經親矣所畏者科道言之也嵩於進士之初非私屬不得與中書行人之選知縣推官非通賄不得與給事御史之列考選之時又擇熟輿圓融出自門下者方補科道既選之後或入拜則留其飲酒或出差則爲之錢贖或心有所愛憎則授之論

刺爲嵩使令。至五六年無所建白。卽陞京堂方面。夫受嵩之恩。既如此。附嵩之效。又如彼。以故科道諸臣。甯忍於負陛下。而不敢於忤權臣也。是陛下之耳目。皆賊嵩之奴僕。其姦四也。科道雖入其籠絡。而部臣如徐學詩之類。亦可懼也。嵩又令子世蕃將各部之有才望者。俱網羅門下。或援之鄉里。或託之親識。或結爲兄弟。或招爲門客。凡部中有事欲行者。先報世蕃。故嵩得預爲之布置。各官少有怨望。亦先報世蕃。故嵩得早爲之斥逐。連絡蟠結。深根固蒂。合爲一黨。互相倚附。各部堂司。大半皆嵩心腹。陛下自思左右心腹之人。果爲誰乎。此真可爲流涕者也。是陛下之臣工。多賊嵩之心腹。其姦五也。夫嵩之十罪。賴此五姦以彌縫之。五姦一破。則十罪立見。陛下何不忍割愛一賊臣。顧忍百萬蒼生之塗炭乎。臣前諫阻馬市。謫官邊方。往返萬五千餘里。道途艱苦。妻子流離。宗族賤惡。家業零落。幸復今官。僅將一月。臣雖至愚。非不知與時浮沈。可圖報於他日。而顧履危冒險。攻難去之臣。艱難成之功。取必至之禍哉。願陛下以再生之恩。賜臣。臣安忍不捨再生之身。以報陛下。況臣狂直成性。忠義鬱結。每恨壞天下之事者。惟逆鸞與嵩。鸞已殛死。獨嵩尚在。嵩之姦惡。又倍於鸞。將來爲禍更深。舍此不言。更無可以報陛下者。陛下聽臣之言。察嵩之姦。或召問二王。令其面陳嵩惡。或詢諸閣臣。諭以勿畏嵩威。重則置之憲典。以正國法。輕則諭令致仕。以全國體。賊臣既去。豪傑必出。賞罰旣明。軍威自振。胡虜畏陛下之聖斷。知中國之有人。將不戰而奪其氣。聞風而喪其膽矣。內賊去。外賊除。其致天下之太平。何有。疏奏。上悲其懇。而嚴嵩方以他事得上意。搆之。復下錦衣獄。詰以何自引二王。對曰。非二王時不懼嵩者。且王家事。渠甯不憂爲嵩敗耶。獄具。詔

杖至百有遺。以蝻蛇膽。謂服之可以禦杖。繼盛笑曰。吾自有膽。何蝻蛇爲。卻之。第飲一卮酒。畢。受杖。送司寇獄。公創甚。至夜半而蘇。獄吏內畏嵩。屏去藥食。乃碎羹盃。手破諸腐肉。血稍稍起。刑部擬以詐傳親王令旨。律絞。中外駭且怪。以人臣阿私。侮三尺。不宜至此。郎中史君佐。稍持獄。謫之。擬重辟之。侍郎王學益遷矣。繼盛以冬月行論。從容讀書不輟。且曰。丈夫會有死。死分耳。天得無稔嵩而後僂之耶。將奈國體何。是時海內傳錄奏疏。至紙爲貴。繼盛當出朝審。諸中貴人夾道指目。勞以酒肉。袖白金而遺之。至枳道。不得發。悉謝不受。或謂中貴人是不齟齬若曹者。曰。楊公天下義士。今得見之。幸也。卽齟齬固當。而又竊指所繫三木歎曰。奈何不以囊嚴嵩。而囊楊公也。上意且惜之。欲免死。居二歲。而嶽有失律。逮冬月行盡。人藉藉謂且不免。司業王材謁嵩。請曰。公不憂萬世耶。嵩曰。吾行當爲救之。且卜之。材復前說曰。卜之鬼乎。人乎。夫人則奚卜也。而卿胡某。鄒懋曰。不可。公不聞養虎自遺患。言已。嵩頷之。已更有蜚語聞上。竟以十月朔論死。乃爲詩二章。其一曰。浩氣還太虛。丹心照萬古。生前未了事。留與後人補。其二曰。天王自聖明。制作高千古。生前未報恩。留作忠魂補。慷慨曼聲長嘯以死。既死之七年。而嵩姦狀大露。上采御史鄒應龍言。逐之歸。戍其子世蕃。又二年。而御史林潤白發世蕃大逆狀。論棄市。籍其家資巨萬萬。嵩削籍。寄食於人。餓而死。又三年。世宗崩。遺詔褒錄諸死諫者。名居首。贈太常少卿。錄子應尾。太學生。隘忠愍。立祠保定。額曰。旌忠。後人稱之曰。椒山先生。妻張。婉嫻。有志操。嘗上書請代死。不允。有許其婚而悔匿者。都御史王遴爲兵部郎。當繼盛下獄。慨然以女女其子。先是踵繼盛抗疏論嵩者。有給事中吳時來。主事張紳。董

傳策皆相繼竄謫焉。

沈鍊字純甫，越人也。生具異質，少慧挺，長從王守仁學，守仁一與語，即奇之。曰：沈生千里才也。嘉靖辛卯，舉鄉試。又七年，成進士，爲溧陽令。其治以搏擊豪強，衛赤子爲急。用伉倨忤御史，調簡莊平。以外艱歸，除補清豐。錦衣帥陸炳每仰其風，請得爲衛經歷。至則與鈞禮，不敢以分相加。炳與嚴氏父子深相結，以故鍊間從世蕃飲。世蕃虐所狎客，給事者飲非其任，強灌之。鍊取解灌，世蕃曰：吾代客酬也。喜與尙寶丞張遜業飲，少飲輒醉，醉則擊缶鳴，高唱出師二表，已慷慨，曼聲長嘯，或泣數行下。於時，闖入塞，都門不啓，世宗御齋宮憂之。會，獲璫，上內官爲媪書附以進，曰：子我幣通貢，卽解圍，不者歲一髡而郭。時禮尙書徐階要諸大臣以御朝，請下其書。會文武羣臣計執便，國子司業趙貞吉曰：何所謂貢也？彼傅城而軍，我爲城下盟，竊以爲天子宜御奉天門，出內帑饗士，譯言者旌功臣。固當自退，而檢討毛起，囁嚅言：吾姑寬，以子貢而出之。而後議守便。貞吉廷叱之，爭之堅。鍊復爲申貞吉理，不休。吏尙書夏邦謨怪問曰：若何小吏也？鍊目攝之曰：大吏嚙弗言，故小吏言。胡怪也？古不云主辱臣死耶？邦謨意不自得，罷而階維持衆議上，竟弗子貢。次日，上出視朝，有所誅進矣。是時鍊氣甚壯，欲力吞，幾得以身當一面。畢見其長，乃上疏言：請以萬騎護陵寢，萬騎防通州餉，而合勤王之師十餘萬，鼓而薄其惰歸，必大勝。報聞罷。蓋是時嚴嵩獨貴，幸用事，數寢抑邊事，不以報見事急，則若爲開言路有所誅進者，將帥當事臣迫誅，益入隸居間，嵩以免，而其進有時賄，賄價暴起。言者日以益，嵩日以重，於是鍊泣語遜業曰：詩不云乎：歛歛

誠誠亦孔之哀。謀之其賊。則具是遠。謀之不賊。則具是依。已矣。亡所信吾謀矣。吾卽不死。而苞苴日蠶。然過我而集於西第。何也。夫社稷何賴焉。乃抗疏言。嚴嵩父子翼虎鼠社。誤國大計。請僇之以謝天下。邦諱阿私。亡所異同。宜從坐。詔以鍊昔喧嘩亡人臣禮。今復誣詆大臣自爲名。廷杖六十。謫田塞外。先是貞吉亦坐他事謫斥。鍊當田保安。倉卒寄妻子。廣柳車未有舍。而保安賈某者。傍睨鍊曰。公非上書請誅嚴氏者耶。揖之入。徙家而家鍊。里長老問知鍊狀。咸喜。助薪粢。各遣其子孫來從學。鍊稍與語。忠義大節。則又大喜。而塞外人。競爭爲晉嵩。以快鍊。鍊亦喜。里人至爲偶人三。象李林甫。秦檜及嚴嵩。而射之。語稍稍聞。嵩父子銜之。適侍郎楊順。總督宣大。順故嵩客。前總督樊繼祖。選僕不敢拒敵。俟其解。則縱吏士取死人首。或夜微避兵人。僇之以爲功。鍊廉得其首主名。貽書誚之。繼祖恨甚。旣得代。屬順曰。是故撓乃公事者。丁巳。敵大入。破應州堡四十餘。順見以爲失事。當坐。益縱吏士殺僇避兵人。上首功。以自解。鍊復廉其狀。貽書誚順。語加峻。且賦詩及樂府者二。或謂鍊遷人。非有言責。毋爲鍊怒。曰。吾向者豈有言責耶。若視吾眼在否。而欲盲我。夫殺人而欺其君。以要賞。吾誓不與共天。順聞。益恚。以其私人。經歷金紹魯。指揮羅鎧。走嵩子世蕃。所曰。是夫也。結死士。擊劍習射。將以間。而取若父子。世蕃曰。吾固知之。卽以屬巡按御史李鳳毛。鳳毛謬爲謝曰。有之。竊陰已解散其黨矣。鳳毛得代歸。遷爲光祿少卿。而御史路楷來。又嵩客也。世蕃爲酒毒楷。而使謂順曰。幸爲我除吾藹。事成。大者侯。小者卿。順則與楷合筭。捕諸白蓮教通夷者。竄鍊名藉中。以謀叛聞。而繼祖時理兵部。無異取中旨。僇公籍其家。遂子順一子錦衣千戶。楷候卿寺用。順猶

快快曰。丞相負我。薄我賞。猶有所不足乎。謀之。楛取鍊二子。袞杖殺之。移檄越。逮鍊長子。諸生襄至。則日掠治。困急。且死。會給事中吳時來。上疏論順。楛誤國大罪。上怒。嵩不及爲之地。急下緹騎。捕治順。楛而襄得釋。久之。嵩敗。世蕃磔死。御史維新復論順罪。而微爲襄理。還其諸生。穆宗卽位。詔褒言事者。鍊冤始白。贈光祿少卿。賜祭錄。少子裘太學。襄應貢。乃上春官。伏闕上書。極言順。楛殺人奸黨狀。會科臣羣劾。詔下順。楛司寇獄。論抵罪。當寇掠近郊時。都門閉。鍊急謂炳。勿閉門。閉門予敵民矣。炳言於上。許之。所入男女。以巨萬計。鍊詩文。援筆立就。奇麗甚。而不能盡削其牢騷憤激之氣。往往多楚聲。以故人咸讀而憐之。海瑞。字汝賢。瓊山人。以鄉舉爲南平學諭。初至。謁上官。止長揖曰。吾師席也。可屈膝乎。因著論云。孟子言爲貧而仕者非也。抱關擊柝。委吏乘田。無在非道。而尤莫如教職。蓋人材所由造。世運所由理。其職亦何尊且難。乃稱爲貧哉。自世沿此說不察。故居此官者。多媿媿不舉其職。士習蠱而吏治媿。所從來矣。持論若此。尋進瀆安令。瀆巖邑也。地瘠而民畜。所產茶竹杉柏外。無他物。且重巖複嶂。民易逃匿。山下田畝。悉歸右姓。窮民卒歲不粒食。又當新安下流。諸官勅日五六至。夫役迎送不可支。瑞慨然思拯之。至則召丞尉。若學官弟子。若耆老。以次列。備陳所爲奉法字下意甚悉。竟日散去。人皆畏服。無何。度田定稅。不使窮富得上下其手。官署中有隙地。課老僕樹禾麥蔬芥。旦夕取自贍。胡宗憲總制浙直。權甚重。家僮過瀆安。瑞無所饋。宗憲竟無讓。一日。語藩臬曰。昨聞海令爲母壽。市肉二斤矣。蓋異之也。豐城鄆懋卿。由中臺出理鹽政。勢張甚。所至縣令如上。供以得無叱辱爲幸。維揚三臺使醴燕之費。至千餘金。鄆將往徽齊雲。驥

所過郡縣供辦令甚峻。及瀋安瑞乃爲書上懋卿。甚言邑小不足奉迎。至且見罪。願取他道往。且言太侈不可爲。與小民不常虐者甚具。懋卿得書色變。久之遂罷齊雲行。曰。令言是也。藩臬郡守聞之股慄。曰。令何憊。幾累我輩矣。瑞時已遷嘉興通判。懋卿私人袁御史者。迎懋卿意。以他事摘瑞。從舊職論調興國。興國地故單薄。歲賦不入。民苦浮糧爲患。瑞述八事上之撫臣。獨亟清丈以甦貧民。而均其賦。已陞戶部主事。時世宗尙玄修。朝政多曠。公慷慨言天下大計。謂興土木爲傷民。數推廣事例爲鬻爵。以師陶仲文爲非體。以仙桃藥丸爲怪妄。甚者以不見二王不還大內。誹謗猜疑。僂辱臣下。爲薄於父子夫婦君臣。其言皆敵以下所不能堪者。上震怒。投其章於地。已徐閱之。意若爲勦者。留跡月不下。會上意有所不可。乃下詔獄。中外縉紳相顧失色。而瑞直聲遂太著。尋世宗崩。穆宗立。奉遺詔出瑞於獄。還其官。尋改兵部主事。歷陞爲左通政。未幾。以僉都御史撫應天。時瑞威名籍甚。中外墨吏往往望風解印去。權豪怙勢之家。率相戒毋敢犯。一顯者繕其門以居。聞公至。卽易緒而黜。中人監造者以八人肩輿行。見瑞亦減其半云。吳故有松江。匯震澤入海。瀕江田藉其灌溉。已爲潮蓄淤爲陸。瑞斥羨募工。乘輕舟躬督畚鍤開濬之。不旬月而成。又吳俗貧富相傾。弱者率獻田於其豪。以爲奸利。輸不必入。瑞獨卵翼窮民。而摧折士大夫之豪有力者。是時吳中貴人無逾大學士徐階。按問其家無少貸。而弟侍郎陟武。斷殘民輒逮治如律。盡奪還其侵田。自是士大夫之名貪暴者多竄迹遠郡以避。民乃獲甯。瑞嘗論欲天下太平。惟有井田一法。井田之壞而不復也。惟有亟奪民田一言。至於不得已而限田。又不得已而均稅。策斯下矣。然猶爲井田之遺。

意故其令敵邑撫三吳皆以清丈爲急而力行條編一法令額外征徭不至重困之民得保守田業者相率繪像尸祝然瑞竟以奪富民田府怨而議者亦以此中之遂解官歸里居十餘年公卿臺省薦相踵神宗立聞瑞名起南僉都御史尋遷南吏部侍郎瑞至首陳治安要機謂今日貪墨爲姦決不可縱而歸本君身多責難語奏入上鑒其忠欲召大用有陰沮者乃以爲南京右都御史浹歲三遷皆出特簡海內端人舉手相慶以爲特達之知而小人之不便者顧目爲迂闊詆之甚力章以寢不下乃屢疏乞歸不允歲丁亥卒於官卒之日貧無可給棺槨士大夫贖金以殮士民哭之至罷市者數日祭於塗累數百里不絕訃聞上震悼久之贈太子少保諡忠介

贊曰：撥鸞刺嵩名章炯炯翼虎社鼠尙方斬佞中人主忌岸狴何病鸞鳳羽儀終屠豺豕。

史官曰：明之人田夫野老街談說忠臣直聲傾聽聞者未嘗不口楊繼盛沈鍊海瑞斯亦可徵品矣繼盛有社稷功天下知世宗怒而傷其身而不知用其言獨鸞嵩之奸是繼盛之言終行矣鍊爲國擊嵩不勝而戍然爲嵩擊鍊則鍊死鍊死神轉轉不死而嵩蕃順楷真死矣瑞夙號鐵漢所言切世宗膏盲惜世宗之不悟以崩瑞以直起終以直抑甚矣直之難也繼盛精於樂理鍊長於詩文瑞優於治績誰謂僅以言動天下後世哉。

明書卷一百九

列傳二

忠節傳九

吳中行、趙用賢傳

吳中行字復庵。趙用賢字汝師。常熟人。俱以隆慶五年進士。選改翰林庶吉士。神宗卽位。中行授編修。用賢授檢討。常萬歷丁丑十月朔。彗星見西南。麻笄尾芒。互天狀若練。氣成白虹。輦轂洶洶。先四日。大學士張居正聞父訃。時內閣馮保挾沖主。握重柄。居正固交卑事之。共擠元輔高拱去。壹意擅威福。專賄賂。以諸子爲馮之義勇。因冒制科鼎甲。而自居太師。刑名刻覈。其間耳目牛馬。藉氣力。齟齬人者。率多卿寺省臺要職。奴游守禮橫倨甚。睚眦縉紳間。具以楚濱呼之。先是御史劉臺上疏發其奸。語切直。逮赴詔獄。謫戍去。且乙聞訃。昧爽時。特旨從中出留之。內豎將保之。命絡繹至。附耳聽。而居正時作擊曲狀。授意指於二輔臣。引奪情例以聞。神宗慰勉。損貶殊至。居正初疏云。守制是常禮小節。且云。有非常之人。然後有非常之事。又一二日。卽平章幾務於苦塊中。辭疏僅至再。忽自請留京守制。以次馳驛回籍營喪事。時中行爲編修。稱疾杜門。用賢爲檢討。與修撰沈懋學過學士王錫爵所。慷慨歎曰。波流瀾狂。砥之障之。豈

無其人乎。臺省諸諫官望頤承旨。聯名乞留。疏既上。而位九列者復四出囑其長爲倡以效之。士大夫咸垂口結舌。噤不敢出一語。翰林中行用賢皆觸目激衷。各有伏闕上書之思。而各不相聞。各草疏。具謂史臣無言責。姑俟有先發者。足以明大倫。伸正義。久之。用賢過中行所。抵掌談時事。詞意激昂殊勃勃。因徵洩王錫爵痛憤語。次述沈懋學貽書戶尙書李幼滋云。師相之歸宜決。臺省之留宜寢。李蓋爲居正周親所雅善者。幼滋答書以若所言。宋頭巾語。此宋之所以終不競也。今師相不奔喪。是聖賢之道直接揖遜。征誅而得其傳者。本朝維新建可與言。羅生正不達此耳。次日。沈懋學私相語曰。臺省有疏。則臺省無言矣。翰林風化之原。繼文毅而起者。誰與中行。遂出袖中草示用賢讀之。扼腕拊膺。茫茫然策馬歸。亦草疏。錫爵曰。三綱淪。九法斁。舉國若狂。世道陵彝至此哉。索疏草讀曰。此所謂笑嘻之怒。甚於嫚罵者。君能置死生乎。不能則不可爲也。中行頷之曰。齋心舉念時。業已辦此矣。錫爵爲之墮淚。奏上。居正聞之。大怒曰。豎子且須何旨。禮尙書馬自強讀之。拊掌擊節曰。本院生光。吾黨負愧。我與典禮之宗。不忍囁嚅。特以地位相通爲嫌耳。明日。用賢奏亦上。二疏俱留中。諸內侍皆縮頸吐舌。居正怒益甚。招編修劉城入幕。語之曰。吳子者我極愛之。且有厚望。望其爲伊。周何乃做一箇羅一峰。便了他一生。羅一峰有甚好處。繼之者趙子。二子將座主先生立名。可乎。語多悖戾。城承命中行。謂若好名。不宜以座主爲餌。中行應曰。不獨我好名。亦欲以好名成師相忠孝之節。正所以報座主。座主之名完。則門生之名不得成矣。師相豈以刑威殺僂足以錯愕人。人固有視死生如旦晝者。城返命而怒不可解。自強錫爵率翰林數十人求解於居正。

居正拒不接。而錫爵獨徑造喪次。曰：兩生狂妄，望宥之。居正云：疏留中，我不得預聞。聖怒不可測。錫爵曰：卽聖怒亦爲公怒。語未訖，江陵忽屈膝舉手作劾頸狀。曰：你來殺我，你來殺我。錫爵大駭，遂趨出。中行用賢席蓆待罪朝房，而中書秦柱改服挾醫周旋於左右，竟坐黨削籍。明日，刑部外郎艾穆主事沈思孝共上疏語尤激切。居正亦徬徨，遣飛騎走卒伺探諸曹中消涉形影，亟囑其所私客慰諭以阻之。雨夜，徵傳四人皆杖戍。中行用賢語其子弟曰：事屬綱常，言傳簡冊，吾得死所矣。是日，都人集者千萬，願望見忠臣丰采。朝房陋不能容，至壞楹八，晴煦中陰雲陡結，天鼓大鳴，慘黯失光者移時。而校尉數十出，遂扭繫四人。四人辭色從容，笑而入。旁有內官私相詫曰：朝廷且不知也。各六十，血肉糜潰，畢曳出長安門，以板關昇之行，赴戶部。赴京兆，赴縣，馳頓自己至酉，而道路嗟吁，追隨擁塞不得行。晚昇中行用賢絕復甦，思孝加鎖鎖禁獄中三日，始僉解發戍。翰林講讀趙志皋等二十餘人俱有援球之奏，格不入。而進士鄒元標則懷其疏俟於廷，見四人受杖，旁觀發憤，切齒頓足。俟杖畢，上疏亦廷杖如四人。都中羣歌云：科道羣狐搖尾，翰林雙鳳鳴陽。又云：居正身不正，用賢相不賢。思孝心何死，中行道始全。蓄艾能醫病，元標欲轉天。五賢一不肖，千載定須傳。而居正已襲冠裳於衰絰，登朝辦事，出朝房見客未幾，衣緋懸玉與吉典矣。南京六卿暨六科復羣奏乞留，尙書潘晟、太常呂養、給事中傅作舟、御史王蔚、張一鯤、林應訓爲之倡。獨僉都御史張岳疏請居正奔喪以全大節。御史朱鴻謨疏乞宥狂愚諸臣，懋學分貽書當路及居正子，伸經權忠孝之辨。妮妮數千言。居正怒不止。中行用賢皆於路中剝去肉數十，大盈尺，深入者餘寸，竟空

一股云錫爵。懋學皆棄職歸。中行用賢家居六年。居正敗。皆以原官召用。中行歷官學士。致政歸。隱居不仕。用賢爲南禮部侍郎。改禮部侍郎。轉吏部侍郎。移疾歸。中行爲文章。華藻有晉。唐之風。用賢爲文博達。詳贍。尤長於奏疏。各有文集。而用賢著有三吳文獻制。國朝典章因革錄。大約二人出處絕相類云。贊曰。懂懂雅流。雄擁百城。文麗卿雲。擊豺振聲。前有一峰。後有吳趙。綱常所關。弗沈厥抱。木天煜燿。陋彼坐嘯。

史官曰。傳曰。求忠臣於孝子之門。又曰。移孝作忠。忠與孝無二理。無二心。居正嫁忠以滅孝。梟獍矣。尙望其成夾輔之勳。陳堯舜之道。沖主何賴焉。解之者曰。居正功在社稷。過在身家。綱常倫紀之際。聖道絕續。爭於斯。豈眇末耶。予謂解者之罪。通於天矣。中行用賢以風化所本。毅然軌之以正。而居正作市井之態。爲毒螫之行。曾不旋踵。身死家破。而二人者榮祿休暢。提而較之。其相去遠矣。

楊漣

附魏大中黃尊憲
李應昇魏昌期

左光斗傳

楊漣字文孺。號大洪。漢楊震之後。流入安南。宣德中。從英公張輔歸附。賜居應山。遂爲應山人。曾祖鐸。好任俠。爲人報讐。祖萬春。以好施。予破家。里人稱之。父彥翹。好儒。尙氣誼。生漣。雄幹鬚鬢蔽胸。孝友誠篤。家貧。喪父。躬營葬。勞瘁得疾。幾殆。夜聞鼓樂聲。有神人降其室。爲處方。病良已。少落拓。自喜。里中呼爲狂生。與陳愚交。每以豪傑相期許。常雪夜。兩人行歌。徧邑中。倚柱而嘯。畫地而書。狂呼痛哭。人莫能測。萬歷

癸卯舉於鄉。三十四年丁未成進士。授常熟知縣。其爲治好古教化。豪強大姓爲姦猾亂吏治。必收案致法。吏人捧手索氣。丞尉嚴事如大府。字養小弱。問民所疾苦。徒行阡陌間。執手慰勞如家人父子。以此察知謠俗。及閩里姦利。訟衰盜息。邑以大治。大計舉天下清官第一。己未擢給事中。歷進兵科都。四方貨賂不敢窺其門。條奏天下大計。多中要緊。先是光宗居東宮。久聞於鄭妃。儲位危。孰神宗寢疾。光宗爲皇太子。希得召見。每徬徨寢門外。連走告閣臣。當直宿閣中。日率百官問安。效宋文潞公阿內侍故事。傳語伴讀內監王安。太子當力請入侍。遲明而出。日暮還宮。以備非常。光宗卽位五日而病。趣封鄭貴妃爲皇太后。及久侍東宮。選侍李氏爲皇貴妃。傳旨旁午。中外奸邪。訥知上病不起。陰扇鄭李踞兩宮。挾皇長子以專國命。連要諸大臣集左掖門。而折貴妃兄子養性。貴妃卽日移慈寧宮。連上疏極論貴妃所遣醫。崔文昇侍疾無狀。宜下司禮監王安窮究。宣示中外。罔俾賤臣譁汙起居。發病狀。虧損盛德。上暫輟萬幾。進皇長子及諸皇子扶牀繞膝。導迎和氣。收回封太后成命。無輕發詔令。以尊國體。疏入三日。上特命錦衣召連入。意且得罪。上對羣臣從容言病狀。而數目連指皇長子曰。科臣謂不當去朕左右。甚有理。後再召。與聞顧命。馮几注視。左右咸異之。光宗崩。選侍猶居乾清宮。羣閣教選侍閉皇長子不聽出。連首定大計。大行在乾清宮。羣臣哭臨畢。卽擁皇長子升文華殿。呼萬歲。暫御慈慶宮。須選侍移宮而復。則羣閣計格矣。諸大臣躓之。乃羣詣乾清宮。關人持挺拒。連大罵奴才。格卻之。將及宮門。內豎傳李娘娘命。追呼拉還者至。再連復手格叱退之。皇長子旣居慈慶。選侍猶居乾清。未暇移。訛言洵洵。謂欲垂簾詰責御史左光

斗疏中武氏何語。漣抗論於朝房。於掖門。於殿廷者。日以十數。叱小豎於麟趾門者一。叱閣臣從者及大閤於朝者再。選侍乃移一號殿。熹宗進居乾清。後先爭辯。謂選侍不得母天子。天子不當託宮嬪。反覆痛切。聞者口噤。移宮之日。奮髯叫呼。聲淚迸咽。選侍能於九廟前殺我則已。今日不移宮。死不出矣。聲徹御座。殿陛皆驚。上聞語。近侍曰。鬚子官何戀也。當是時。三朝大故。變起旬月。舉朝不知所爲。漣乃外戒金吾。簡緹騎。周廬徹備。內戒中官乳母。禁宮人闖入。身露坐宮門外。五日夜不交睫。頭鬢盡白。每有大議。大臣左右顧視。問楊給事云何。莫敢專決也。移宮既竣。羣閣失其所馮依。造作蜚語。聳動朝士。奸異者進。安選侍之揭以撼之。乃上移宮始末疏。優詔嘆嘉。復謂漣交關司禮王安。脅取中旨。以悲之。又發憤再疏。移病歸。忠賢用事。於是王安以釁死。明年。卽家起太常少卿。時。賀客踵至。子弟皆色喜。客退。漣呼曰。兒曹何癡。而而父進賢冠爲作牛馬耶。今沖聖子立。野有伏羌。外有強寇。內有逆豎。疆場宮府。皆而父死所憂。且不暇。何喜之有。聞者駭之。瀕行。語友陳愚等曰。楊漣此行。不知歸路。是何如也。入都。尋擢左僉都御史。進副都。見魏中賢。客氏專擅無等。遂憤激上疏。略以爲高皇帝定律令。中官止供壻除。不許於預政事。王振劉瑾。旋即誅戮。聖明在上。乃敢恣肆無忌。憚濁亂朝常。罔上行私。傾害善類。損皇上堯舜之令名。釀宗社無窮之陰禍。如東廠太監魏忠賢。本市井無賴。中年淨身。蚤入內地。初猶謬爲小忠。小信。以厚恩。旣乃敢爲大奸大惡。以亂政。祖宗以稟擬責閣臣。自忠賢專擅旨意。多出傳奉。真僞莫辨。近乃三五成羣。逼勸票擬。甚至有竟自內批者。大罪一。舊閣臣劉一燝。家臣周嘉謨。親捧御手。首定大計。忠賢急於翦己之忌。示

意孫杰論逐。不容皇上不改父之臣。大罪二。先帝賓天。進御進藥之間。普天實有隱恨。鄒元標等有言之。噉言官論去。是何仇於忠義。不容皇上有痛念弓鼎之老臣。大罪三。如王紀、鍾羽正常年功在國本。紀爲司寇。執法如山。羽正爲司空。清修如鶴。忠賢或使人呼辱於部堂。迫之去國。或與沈灌交通。陷之削籍。而柔媚善附者。則驟加蟒玉。不容盛時有正色立朝之直臣。大罪四。枚卜重事也。忠賢力阻。前推之孫慎行等。且矯旨擠出。真欲門生宰相矣。大罪五。廷推南太宰北少宰。皆矯旨點陪。顛倒有常之銓政。掉弄不測之機權。大罪六。滿朝薦等九人。抗論忠賢。傳奉降斥。大罪七。皇上南郊之日。傳聞一宮嬪德性貞靜。荷上寵注。忠賢恐其露己驕橫。託言急病。立刻掩殺。是皇上且不能保其貴幸矣。大罪八。猶曰無名封也。裕妃以有喜將媿。中外欣欣相告。忠賢以不附己。囑其私比。捏報無喜。矯詔勒令自盡。不令一見皇上之面。不思堯曾以十四月而始生耶。大罪九。猶曰妃也。中宮有慶。已經成男。乃流虹繞電之祥。忽化爲飛星墮月之慘。傳聞忠賢與客氏實有謀焉。是皇上且不能保其第一子矣。大罪十。先帝在東宮。內臣王安不無微勞。忠賢以私忿。矯殺於南海子。身首異處。肉飽犬彘。其大小內臣。無罪擅殺。不啻千百。大罪十一。窮奢極欲。今日挾獎賞。明日討祠額。毀人屋宇。建立牌坊。鏤鳳雕龍。干雲插漢。不止瑩地僭擬陵寢而已。大罪十二。今日廢中書。明日廢錦衣。如魏良弼、傅應星等。口皆乳臭。目不識丁。不知忠賢有何軍功。有何相業。喪朝廷之名器。大罪十三。因而手滑。膽粗。用立枷枷死皇親家人數命。欲扳害皇親。搖動三宮。興椒房之大獄。大罪十四。良鄉生員章士魁。以煤窰近忠賢之墳。誣以開墾。立致之死。設盜長陵一杯土。又何加焉。大

罪十五。諸生王思敬等侵占牧地果真。自有撫按學院。乃徑挈黑獄拷斃。青燐赤壁。結於泮宮。大罪十六。科臣周士樸疏糾織監。卽陞織監而踏士樸。以成中官之尊。大罪十七。北鎮撫劉僑不肯殺人媚人。持法平恕。竟令削籍。是祖宗之律可不守。而忠賢之律不可不遵。大罪十八。未也。且示移於絲綸。科臣魏大忠到任。已奉明旨。緣不依附於鴻臚報單。傳旨詰責。及科臣回話。省臺交章。又襲王言。幾成解調。玩言官於掌股。等天語於兒戲。大罪十九。東廠原以緝奸盜。自忠賢受事。快恩讐。行傾陷。傅應星等招搖引納。陳居恭等掀唇鼓舌。以至投匭打網。片語違忤。輒帖立下。造謀告密。開同文之獄。大罪二十。奸細韓宗功潛入長安打點。實往來忠賢私房之家。及事露。乃竟令避去。假彼事成。忠賢且爲胡虜首功矣。況廢帑修肅甯城池。非鄆塢計耶。大罪二十一。謀同奸相沈灌。創立內操。大盜刺客。東虜西夷之人。安知不寄名內官之家。伺隙作變。大罪二十二。進香涿州。鐵騎擁從。蟒玉追隨。警蹕傳呼。清塵墊道。歸駕驕馬。羽幢旌蓋。夾護環遮。儼然乘輿。大罪二十三。今春走馬御前。大無人臣之禮。皇上曾射殺其馬。忠賢進有傲色。退有怨言。朝夕隄防。介介不釋。亂臣賊子之心。寸櫛不足以盡其辜。大罪二十四。忠賢負此大罪。懼內庭之發。殺者殺。換者換。左右既畏而不敢言。懼外廷之發。逐者逐。錮者錮。外廷又皆觀望而不敢言。更有一種無識無骨。苟圖富貴之徒。扳附枝葉。倚託門牆。或認作居停。或投充門客。內有授而外發之外。有呼而內應之。奉聖夫人客氏復爲之彌縫其罪狀。遮護其回邪。故掖庭之內。知有忠賢。不知有皇上。以至都城之內。天下之大。皆然。每見中外有切緊之事。常用之人。必曰。要與內邊說。或人不得用。事不得行。亦必曰。內邊不肯。

是皇上爲名忠賢爲實無怪邇日涿州之役天顏咫尺稟擬者不請上裁而馳候忠賢意旨於百里之外也事勢至此羽翼將成騎虎不下太阿倒持主勢益孤不知皇上之宗社何託三宮之安危何託皇子之安危又何託萬一少有差池臣卽欲死報皇上亦何能及乞集大小文武勳戚敕法司逐款嚴訊立刻正法以快神人其客氏亦必敕令居外以全恩施如此則天意回人心悅海內不立奏太平請斬臣以謝忠賢臣死不恨忠賢匿連疏不令上覽矯詔云楊連尋端沾直本欲窮究念時方多事朝端不宜紛擾姑置不問魏廣徵晉大學士入內閣黨比亂政連復上疏謂廣徵爲忠賢羽翼疏未入傳墨敕削連籍爲民天啓四年五月下中書汪文言於獄譴以王安夙憾康妃捏造垂簾等語潛令文言授意於連等逼逐康妃及皇八公主踰垣出宮連公然以定策自居遂馳緹騎就家逮連連昇櫺就逮父老子弟哭送者數萬人壯士劍客謀奪者甚衆連悉懇求去既至下詔獄而北鎮撫司許顯純復於別案譴以連受罪臣熊廷弼銀二萬求緩刑乃酷刑拷訊連曰天下豈有貪臟楊大洪耶七月二十四日竟斃杖下暴屍六晝夜蛆蠱穿穴不可辨識僅其鬚存死之日白氣貫北斗連死三月上問左右曰何久不見都察院楊鬍子也家貧賊莫辦牧夫洒削菜傭皆以錢投縣匭代完三年而後已懷宗卽位詔錄諸死璫禍者贈太子太保兵部尙書諡忠烈官其子之易肖像祠於順天府連蘊養生風丰裁峻拔採織芥之善貶毫末之惡明白洞達推賢讓能遇事慷慨憤烈不顧利害嘗曰人果知心何難貿易首領其生平如此葬之夕鬼諠呼護其穴云先是二十四罪疏始奉旨有魏大中李應昇者皆申其說魏大中字廓園嘉善人萬曆丙辰進士授行

人歷陞吏科都給事中。大中以奸閹持權，羣邪洊熾，事關封疆宮府，無不力爭。及楊漣疏下，矯旨上自爲解。大中憤激上疏，略以爲從古君側之惡，非遂能禍人國也。有忠臣不惜其身，以告之君，而君不信，乃始至於不可救。東廠太監魏忠賢擅威福，制生死，人怒於下，天怒於上，輿情不勝切齒。願未有數其罪於皇上之前者，憲臣楊漣以稔惡顯禍，在皇上蕭牆之內，肘腋之間，故列忠賢二十四大罪以告。疏聞之日，人情踴躍，以爲禍本可拔，乃漣疏未蒙發票，而忠賢之奏先下，念其勤勞，錄其小心矣。又明日而漣疏始下，沒其忠愛，罪其沽直矣。忠賢種種之罪案，引爲親裁，而代其任咎。忠賢種種之逆迹，不能置辯，而代與分割，安排布置，倒行逆施，自疏自票，皆盡出忠賢之意，與代草者之手。而漣之疏，皇上必未經省覽也。伏乞皇上詳加省覽，將疏中所列之事，一一研究，立置重典。皇上何難割於忠賢，何難割於客氏，至謂左右屏而皇上孤立於上，夫皇上爲天地祖宗所式憑，百靈所呵護，臣民所擁戴，何藉於忠賢。若忠賢一日不戮，客氏煽處，恐左右之人皆忠賢、客氏之人，皇上真孤立於上，莫可爲仗耳。疏入，矯旨逮詔獄，幽沈慘死。懷宗卽位，贈太常寺卿，予祭葬，諡忠愍。

李應昇者，字仲達，江陰人。萬曆癸丑進士，授南康推官，擢監察御史。吏事嚴敏，風采大著，多有人所不敢言者。以背父慢君疏參魏廣微，以贖貨無厭疏參崔呈秀，及楊漣疏入不省，遂具奏。略曰：昨臣堂官楊漣疏參魏忠賢二十四大罪，此非漣一人之私言，通國之公言也。通國之人畏忠賢甚於畏皇上，故切齒不平，搖手相戒，漣獨冒死危論，感悟聖心，謂宜大奮乾剛，立加斥逐，以正厥罪。忠賢亦應束身待罪，以謝天

下忠臣義士之口。乃一疏乞憐。溫綸先下羽翼四布。謬曰孤臣。恣睢無度。謬曰忠赤。不知誰爲代草。以欺皇上者。皇上因其不辯。轉謂小心。夫忠賢非不欲辯也。千真萬真無可辯也。千罪萬罪又不勝辯也。忠賢不能自辯。而皇上反復爲之辯。則中旨真可聽其僞傳乎。閣臣真可聽其爰立乎。外廷真可聽其交通乎。老臣真可聽其驅逐乎。直臣真可聽其禁錮乎。生殺真可聽其自操乎。爵祿真可聽其掌握乎。奸細真可聽其深藏乎。兵柄真可聽其在手乎。出入真可聽其僭擬乘輿乎。臣知皇上英明天縱。此必非皇上之意也。皇上特念舊勞。不欲遽加顯斥。而忠賢但招謗議。動輒說親裁。昨聞連疏到閣。依然傳擬。而明旨諄諄。遂一一爲忠賢任過矣。臣觀從來小人之禍。其始莫不有小忠小信。以結主心。根株既深。吞噓乃肆。今皇上曲賜包荒。明示寬大。姑念其犬馬。而反以蓄豺狼。將來之害。有不可勝言者。故忠賢不去。則皇上不安。臣爲皇上計。莫如聽忠賢之引退。以全其命。而解其燭影之疑。卽爲忠賢計。亦莫若早自引決。以解中外之疑。而乞帷蓋之賜。不然。皇上日爲忠賢作江海之流。而忠賢日以其身供鳴鏑之射。縱多方箝口。百計防川。鬼神忌盈。物惡居上。九廟之靈。將必殛之。況於忠臣義士。請尙方之劍者哉。奏入。忠賢大怒。矯旨逮下詔獄。拷掠不勝死。懷宗卽位。贈太僕寺少卿。諡忠悼。又有繆昌期者。字當時。亦江陰人。萬曆癸丑進士。歷官右諭德。時喧傳以連疏實出其手。忠賢怒。因矯旨逮下詔獄。加酷刑殺之。懷宗卽位。贈正詹事。廢子國子生。諡文愍。又黃尊素者。字安白。餘姚人。萬曆丙辰進士。官監察御史。亦上疏申理。連說。忠賢怒。削籍爲民歸里。爲蘇杭織造太監李實誣劾。逮下詔獄。拷死。懷宗卽位。贈太僕寺卿。錄其子國子生。

左光斗字共之號浮邱其先左難當佐唐封王世廟食於涇後明初徙桐遂爲桐城人兄弟九人光斗居五初生岐嶷屢有火光遶屋人咸異之六歲就塾師開卷一目數十行九歲能文好購奇書喜讀節俠傳十四郡太守趙勸農有瑞麥光斗作賦上趙奇之命爲文立就稍長才名益譎家貧教育諸弟兼授徒以質筆墨每語人曰貧家無樂事惟率諸弟誦讀見其各有成就欣然忘寢食萬歷庚子舉於鄉丁未成進士鄉會皆冠其經房授中書舍人明年戊申歲大水民饑冊封益府過里乃稱貸賑三黨與邑令畫策多方拯救辛亥復大水以差還賑之如前或以官貧難辦爲言則毅然曰不記十六七年游饑乎吾父穰穰荒州母嚙指數米薄粥強進捱兒女菜色尙分甘親屬死爲具棺殮無怠容豈今叨朝廷升斗而反難之癸丑選爲監察御史俟命八年強半依膝下樂山水課諸弟力學商確古今一日言曰元祐去亂法不去亂人畢竟是錯李綱於高宗和議上疏極諫皆爭事而不知爭人蓋事之失只是一事人則貽禍無窮百年之計無如樹人況吏兵二部用人知人尤爲喫緊因於篋中取人才單一帙暗識圈點曰某賢某次其留心夾袋如此又謂吾在久靜觀宮府鈎連翹翹晝見始以小人之奧託於婦寺繼以婦寺之禍釀爲夷狄凝陰感召寢費收拾而本症從一念穢濁始吾微品本清未有女子不貞而可議四德者己未始考選命下列西臺是時神宗靜攝久邊境大擾光斗首請皇上御朝早定大計時兵部探人言許天下能募兵者卽自領至京光斗以爲召外兵入京師恐蹈漢何進故智疏力止之巡中城輯參銓胥金鼎臣等獲假印七十餘顆文卷百餘宗假官百餘名銓寶一清嗣差畿輔屯馬以勝國倚漕東南至以御酒龍衣求米

張士誠總由北人不知水利廢屯田乃疏三因十四議上請屯田另行舉勦皆報可時孝端皇后崩制禮部請敕差官訃告乃閣臣未撰敕禮部臣未請敕內徑差官齎批代敕旨光斗以爲非禮疏參改正神宗不豫東宮閣魏忠賢等矯皇太子令旨以索世廟成晚絕產首頂至私寓脇以必從光斗封還不啓曰尺地皆殿下有今日敢私授受乎閣忿而去既又疏參巨閣陳登奪民屯題蠲免十三場逋租民咸復業又念零星開墾制不能久疏請開功名之途徵漢力田科以田爲殿最使人自爲屯而國已收無窮之利其屯學博士弟子員廩餼卽取給屯糧詔曰可既又改督畿輔學政執法衡文權貴不敢干以私以道義砥剛多士疏請開武學教諸生射刻兼才錄與文並與人競超距白蓮妖起收功者半出儒生其效也涿州置水田三千畝贖貧生每鄉試給諸生卷費永爲例康妃李時爲選侍光宗憑几傳進封后光宗崩李尙居乾清宮光斗懲諸臣叩宮請皇太子出陞文華殿拜呼萬歲隨上移宮停封疏選侍怒急召光斗光斗不爲動曰天子耳目官不奉選侍召又從容與楊漣訣曰矢心無愧死自古有之時熹宗卽位擇定九月初六而選侍猶未移楊漣具疏力爭乃移一號殿閣劉遜劉朝等以盜寶逮計無從出廣略邪黨流言選侍雉經皇八妹入井以搖人心外議寢驚光斗亦不知移宮後上恩禮選侍甚渥乃具仁義兼盡疏奉旨切責時光宗年號未定或議削去否則仍以明年爲泰昌元年光斗曰先帝一月堯舜何忍言削聖作物觀宗社爲重以大行年月頒正朔安否且今日之事天啓之存泰昌非泰昌之更萬歷也議出始斷以萬歷四十八年八月爲泰昌元年是時諸閣內操成晚鄭養性輔臣沈瀛皆典重兵光斗乃上內戚典兵奸

相典兵官典兵一疏言甚危峻。上是之。先是熊廷弼初撫遼。恃才剛愎。光斗疏論之。廷弼不能平。既去遼。遼敗。廷臣交薦復起。欲處分前攻廷弼者以謝。光斗獨疏救之。廷弼愈不能平。光斗每語人於朝曰。廷弼才優而量不逮。前以之守遼則有餘。今以之恢遼則不足。其早見類此。遷大理丞。晉少卿。踰年拜左僉都御史。邪黨懷忌。乃於魏忠賢處進百官圖。某宜先驅。某宜後擊。某宜正射。某宜借攻。密爲布置。肆擠排。會楊漣疏忠賢二十四大罪。而淮揚巡按崔呈秀回道考察。都御史高攀龍疏其貪穢。下部議遣戍。於是邪黨益急。巧爲借端。而攀龍等俱去國。光斗芳草忠賢。廣徵三十二斬罪疏。將發。爲家奴福生所洩。矯旨削奪歸。疏不能進。里居嘗命小奴扮楊椒山寫本赴西市數曲。每飲撤演。事漸聞京師。忠賢乃借移宮逼遷侍。受廷弼賄。誤封疆爲罪端。先逮汪文言。下詔獄。百毒拷訊。文言甘死不誣服。乃不責文言詞。而矯旨下逮。緹騎至桐城。光斗聞命。神氣晏如。惟私語子弟曰。父母老矣。何以爲別。汝曹善解慰之。勉其子曰。修德力學。勿以爾父爲戒。而謂善不可爲。里人奔集哀號。設醮諸廟。揭竿張檄於四門。示擊緹騎。光斗曰。是抗天子命。不可懲止之。檻車出郭。里父老子弟遮馬首。哭聲動天。緹騎爲涕泗。而從者約數百人。詣闕上書。光斗嘗以利害至黃河。乃返。聞知羣心歸。愈戒嚴訪之。下獄。考訊坐贓二萬。勒限比。體無完膚。卒之夜。里中星隕。光灼灼大如斗。三日屍出。肢骸穿裂。面目如生。年五十一。是時赤族之說。一日數十驚。變產完。賊不滿千餘。株連兄弟同宗。以及三族。無一免者。囹圄填滿。流離載道。丁卯九月。懷宗卽位。誅忠賢及黨。下詔優恤。悉釋諸繫。贈太子少保副都御史。諡忠毅。廕子國子生。子祭葬祠鄉賢。建廟祀。學者稱爲浮邱。

先生又曰蒼嶼先生。

贊曰。鐵而稜稜。豸冠嶽嶽。虐焰薰天。不爲氣奪。首發大逆。星日同懸。不屈獄吏。血書載傳。左爲士宗。世賴安危。封事擊愬。千古揚輝。死骨同聲。五夜霜飛。

史官曰。世之議漣者有三。一曰以移宮貪功。一曰以交奄鉤奇。一曰以過激致禍。予不暇置辯。獨是二十四罪之疏。發之於羣言未閔之先。古云。藜藿不採。一掌堙河。漣可謂忠肝義膽矣。卒寢移鼎之謀。正參夷之罰。漣之始疏折之也。託孤寄命。若漣者足以當之矣。第移宮不必使踏跟。而氣毆聖母。威挾朕躬之聖諭。出自王安之手。熹宗罔聞。與漣之死則同。而過激之言則非矣。君子於漣取其節焉。若光斗之立朝。敷奏明試。其於禮樂兵刑諸大政。多所底績。而其諛宮闈事。與平昔章疏絕不相蒙。噫。學博氣雄。無所不可。耶。惜三十二斬之疏。存空名而受實禍。悲夫。魏大中等申明之。言烈烈有生氣。亦皆慷慨男子也。



明書卷一百十

列傳二

忠節傳十

周順昌

附五
人。萬燬、附劉廷佐。

周宗建、方震瑞傳

周順昌字景文吳縣人爲諸生時與友輩相砥礪每感人情日澆慨然有振起流俗之志多發之筆舌萬曆壬子領鄉薦癸丑成進士廷對時微雨有璫延之入室固謝卻之授福州府推官殫精法比一切請蠲略無所徇性極慈嘗曰吾爲刑官每念用刑非以飾怒六年中未嘗用重刑時稅璫高竦爲橫順昌初至不與相見璫役犯法者悉捕置之法璫所問罪贖屬郡縣遠理或加嚴刑順昌爭之力民賴以少甦已而案以民變劫撫臣質其二司或議以周司理代順昌曰此豈吾死所哉誓不往而與監司之媚璫者相左欲棄官去一郡大闕撫按固留之乃止操履清惠媒孽者終莫能難秩滿擢吏部主事銓郎一人以數吏供之窮極侈汰後以美缺償之順昌一切謝絕嘗飲湯覺味有異叩之則吏所供人參劑也出金酬之戒勿再進嚴絕饋遺都人以爲從來所希至進退人才侃侃不讓所汲引多孤特之士其人皆不知所從來歷文選員外郎署選事順昌臭味旣別不能無左右祖人遂得因而位置之因推舉大僚失要人意遂引

歸時逆璫魏忠賢已駸駸向用矣。既歸而一時相與者相繼去國。已而璫益日熾。順昌與人言義形於色。其語漸聞。天啓五年乙丑。巡撫周起元以忤璫削籍。順昌爲贈言。指斥不諱。嘉善魏大中被逮。過吳門。順昌過之。流連三日。因以女字其孫。於是御史倪文煥疏劾順昌。不應與罪人結婚。因言順昌署選時。貨賄狼籍。至漕灣。舟爲之沈。而順昌實取道中州歸。疏出。聞者咸唾罵。然順昌竟落職。而璫怒未已。丙寅三月。織監李實疏論順昌及周起元黨比。於是以緹騎馳逮。聞命之日。親知畢集。咸爲泣下。順昌意氣自若。明日。人情洶洶。蓋順昌廉。又時時爲上官言民間利病。吳人愛之。如父母。緹騎至。脅賄。衆助至千金。而脅者望益奢。民間喧傳。魏太監矯旨殺順昌。宜旨次。士民聚而與撫按抗言。緹騎叱之。衆遂大鬧。毆擊緹騎。至死。撫按諸官皆匿散。順昌立不移。請囚於獄。又三日。始以昏黑行。所過道路。無論識與不識。皆曰。清官。清官有泣下者。下詔獄。順昌對簿不屈。強坐臧三千。五日一比。會火起。王恭廠停刑。至六月。復嚴比。衆皆委頓。順昌獨瞋目罵璫極口。遂死。順昌爲人篤孝。少時嘗與友人飲醉。母夫人戒之。自是終身不飲。居恆持論平恕。而獨與璫事義憤激烈。乃以口語致禍。明年。逆璫敗。又明年。倪文煥戮死。李實以疏非其出。未減。追贈順昌太常寺卿。廕一子。諡忠介。毆擊緹騎。民顏佩章等五人坐斬。後吳人憐而葬於魏忠賢生祠之基。立碑題曰。五人之墓。奠酒漿者不絕。佩章就訊。主者問誰爲首。對曰。是日舉事者皆可爲首。何問爲。及赴市。揚揚不變色。告郡守曰。公知我等抱義死。非亂民也。郡守領之。監司張孝以下皆爲流涕。五人者。顏佩章。楊念如。周文元。馬蔗。沈揚。

萬燬字元白。南昌人。萬曆丙辰進士。授刑部主事。調工部。歷陞虞衡郎中。管寶源局。時慶陵工甚急。無所需。疏請內官監久積廢銅鼓鑄以資。而忠賢以侵內權。怒。嗣調屯田郎中。應營慶陵。至陵見百務未舉。還上疏。其略曰。人主有政權。有利權。政權一日不在人主。則竭澤而漁。飛人而食。而有毛將焉附之患。由此言之。是人主之權。臣下毫不敢睥睨。而況刑餘之人乎。太監魏忠賢性狡而貪。膽粗而大口。銜天憲。手握王爵。一切爵賞。生殺予奪之權。全不爲皇上有。而盡爲忠賢有。舉國側目。不勝太阿倒持之憂焉。率半登於忠臣之首發。與科道之交彈。臣又何敢爲撫拾附和。獨忠賢有大不忠於先帝。而敢不一妥先帝。在天之靈。大不忠於皇上。而敢不慰皇上。永思之孝。如盜利權。誤陵工。爲通天大罪。闕臣職掌者。尙未言及。臣敢爲皇上陳之。皇上之寵忠賢。以服役先帝也。忠賢既先帝之役。則當事先帝之事。既受皇上之寵。更宜心皇上之心。然皇上之心。有一刻不在先帝之陵寢乎。以陵工而用財。是皇上不以天下儉其親也。至搜財以急陵工。是又臣下體皇上罔極之苦心也。陵工原無額派。蕩目於外解。而外解無轉盼於事例。又多。臣承乏寶源局。隨蒙調屯司陵工。又臣之職也。臣在局目擊錢銅匱乏。百計購銅而不可得。咸言內官監積破廢銅器數百萬斤。但一移文。可資鼓鑄。而陵工可不勞他項。及請發而忠賢怒矣。謂內邊之利。豈可擅移於外。臣隨具奏。而忠賢益怒。奉旨不允。旨下而臣調矣。嗟嗟。以無用之物。而成皇上大孝之舉。此微臣區區一念。而不料觸忠賢之忌也。甚且詬誶及之。儻忠賢少思蚤安先帝之靈。蚤慰皇上之孝。必不專制若此。然忠賢貨賄山積。何難損此破廢。以襄鉅典。忠賢以爲不如是。不足以握天下之利權。既謏天

下之利權自全操天下之政權矣。臣詣陵相工轉至玉泉山見忠賢所營墳塋碑石崢嶸。隧道深闊。翁仲
簪朝冠而環列。羊虎接銅駝以森羅。制作規模無異陵寢。且前列祠宇。鼎建佛堂。珠網懸星。璇題炳日。丹
青照耀。金碧輝煌。歎歎久之。不覺失聲而歎曰。何物么麼。僭擬若此。所費不下鉅萬。是何來耶。至今鑿山
伐木。斤杵雷動。布金施粟。車馬如流。曾不痛念先帝之陵未完。營陵之用無措。使忠賢少有心胸。必且以
營墳之急。轉而爲先帝陵寢急。以美梵刹之費。俸而爲先帝陵寢費。伏乞皇上俯念陵工要。發廢銅以資
鼓鑄。將忠賢立真重典。以懲其盜利權。誤陵工之罪。葬其墳塋。以杜後來侈僭之端。於以謝先帝而快人
心。匪渺也。奏入。矯旨以誤陵工飾詞罪之。杖午門外一百。不死。忠賢囑校尉引錐刺心而死。燬既死。而有
劉廷佐者。字含白。萬廣人。萬歷丙辰進士。歷任監察御史。身羸弱若不勝衣。遇事敢言。以直聲聞。曾以言
事謫降。後復官。見燬以杖慘死。遂上疏言。臣惟功名富貴人之所甚欲也。死亡貶辱人之所不願也。然人
臣有甯爲此不爲彼者。豈獨其性與人殊哉。忠愛激烈。不忍君之明蔽於宵小。權移於左。而國至於亂。而
不可救。是以甯棄生存而蹈死亡。遺榮利而嗜斥削。其苦心蓋難言之矣。古哲后知其若此。每求諫如不
及。納善如轉圜。雖指及闕失。亦霽顏而受。未聞抨彈一闕宦。不能保其身。如工部郎中萬燬者也。燬效役
陵寢。循職盡言。皇上若怒燬之攻忠賢。卽立斥燬以洩其忿足矣。胡因忠賢而死燬也。皇上死燬。已爲失
刑。皇上爲忠賢而死燬。不可言也。忠賢借皇上而死燬。尤不可言也。臣親見死燬之狀。忠賢令惡校兇璫
鎖燬入朝。一路拳毆腳踢。衣裂膚碎。是未杖而已。欲死燬矣。既杖。乃引錐刺心。是已杖而又加慘死矣。皇

上亦知此光景乎。嗟。人臣有言不常。猶望聖主之能容。彼引裾折檻。季世之主能容之。留爲美談。先帝期皇上爲堯舜。而忠賢不願皇上爲何如主。使皇上有斃直臣之名。傳之夷裔。書之史冊。大爲懿德之累。此之惡蹟。又在二十四款之外。皇上豈可仍親信倚任之。而不加亟誅戮乎。伏乞皇上憐骨鯁之臣。死於忠賢之手。將忠賢立置典刑。以慰忠魂。不然。忠賢借叢憑社。恣肆益甚。則自今以後。懲爆之死。孰肯拚七尺以干不測之威。犯在旁之怒。成一瑣規。監謗之世界。使皇上孤立於上。天下事尙忍言哉。奏入。謫遣以死。懷宗卽位。贈爆光祿寺卿。贈廷佐太僕寺卿。

周宗建。字來玉。吳江人。萬曆癸丑進士。初授武康知縣。有善政。以循卓擢監察御史。入臺。疏劾客氏以保姆而威福。甚則官其夫。官其子。及甥。盜竊名器。疏入。不報。客氏睨魏忠賢而歎曰。宗建膽懸舌端耶。何法以斃。旁有聞者。拍手舞。謂其富貴乃在斯。以宗建爲奇貨。撫城事以中之。傳旨廷杖。以逮至午門。杖復免。及巡光祿。復劾貪婪。司禮太監王體乾。體乾謀之忠賢。謂此人不。去我輩耳。不得清淨矣。復傳廷杖。至午門。又傳免。忠賢敢於播弄如此。宗建欲棄官去。不許。天啓壬戌秋。京師久旱。上躬禱。獲雨。繼以雹傷稼。羣黨皆以聖德格天稱賀。宗建獨以爲災異。因疏魏忠賢目不識一丁。豈能諳大義。耳目嚶笑之際。日與相親。宮廷禮法之事。日以相託。甯不壞政事。干天怒。疏入。忠賢大怒。時上御文華殿。日講。宗建應侍班。方撤講。忠賢猖暴指詈。曉曉辯目不識丁語。狂告號奔。直達御座。願乞爲僧。上爲動容。命杖宗建一百於朝。輔臣葉向高等力救。獲免。尋忠賢益肆。而給事中郭鞏附忠賢。持內計。掎擊排擠特甚。宗建力爭。以鞏交結

近侍律常斬。大發忠賢之姦。嘗書紳曰。見邪不擊。非忠臣。畏死不言。非勇士。忠賢持章示輔臣。擬逮。誦而向高復懇救之。奪俸。乃其黨曹欽程。遂誣其按楚舊事。下詔獄。時許顯純掌北鎮撫司。卽訊。五毒備至。罵宗建曰。犬豕。此時尙能說老爺爺不識一丁否。御史王心一奮然於朝。以公義責執政。執政厲聲曰。宗建不宜言。郭鞏通內時。向高已去國。心一反復論辯。執政愈怒。心一含淚出曰。宗建死矣。忠賢使人以鐵釘釘其體。不死。復令著絳衣。以沸湯淋之。皮膚捲爛。婉轉二日而死。懷宗卽位。憫其冤。賜白金五百兩。卹其家。贈太僕卿。官其子爲部司務。

方震孺。字孩未。桐城人。萬歷癸丑進士。初授沙縣知縣。爲政清嚴。不可犯。而仁惠在民。民尸祝生祀之。秩滿。舉天下循良第一。四十四年。擢授監察御史。神宗末。朝政多爲諸要人所持。震孺力請開門戶之禁。薦起高攀龍、李邦華等。後爲名臣。或死國難。其人倫之鑑如此。光宗崩。熹宗立。逆閹魏忠賢結客氏表裏爲姦。震孺上三朝艱危疏。屢以在牀在旁爲喻。忠賢恨之。及巡視南城。忠賢甥傅應星強奪人妻。震孺執法窮治。忠賢踵門請。震孺笑曰。有執法御史。無散法御史。忠賢快快謂人曰。我與小方豈宿世冤家耶。遼陽不守。奏請添設巡撫。疏通海道。調集邊兵。更換司馬。皆中賊。及遼陽破。震孺哭請於朝曰。諸君遂棄河西耶。若以其地爲荒野危險。請自往犒師。乃言。臣本柔脆書生。當此炎天烈日之中。猶存熱血黃沙之想。臣無足濟。欲以激天下忠臣義士。使其心向東耳。是時忠賢嫉之甚。惟恐其不出。及將行。復奏以爲當此主憂臣辱之時。臣不敢愛死。惟是越二十七人而臣膺是役。後來必有以攘差中臣者。嗟夫。臣何差不可攘。

而攘此危險刀頭誓死之差乎。見其疏者，多悲其語。及至河西，敵數萬騎隔河陣。震孺集兵露處，爲虛實示不測。七月而敵無隻騎渡者。中外倚以爲安。於走卒中拔薦羅一貫，劉微可爲大將。後果皆善戰有功。守鎮武死之。其識英才如此。差旣滿，候代於前屯。敵渡河，督撫迎戰，全軍沒。大帥擁兵觀望。震孺曰：天下安危在此一著。若敵大帥去，夫豈有幸哉！卽日馳赴握手曰：將軍歸否耶？歸相保富貴，不歸請卽殺我以明心。大帥泣下攜歸，得兵數萬，火器以萬計，糧十萬，而視師者忌其功，不以聞。震孺亦不言功，而主事徐大化等逢閣意，疏震孺攘差下部議。都御史鄒元標奮筆曰：御史保全關外無過，且有社稷功，何中傷爲勦罷免之，而給事中郭興治勦元標庇御史罷歸，復勦震孺河西多賊私，遂矯旨逮忠賢苦於對簿無左證。囑緹騎曰：死御史更佳。緹騎至，焚其居，倡言夷三族，欲使自裁，而親使仗義左右之。至下詔獄，震孺在獄。會揚州知府劉鐸以扇頭詩含讖諷，忠賢怒，逮併誣其與鐸詩酒交通，擬斬西市。會皇長子生，得免。忠賢不釋然，遣邏卒伺動靜。卒心恤忠義，報惡疾旦夕且死，得延而不死者，邏卒力也。震孺賦羅刹成佛詩贈之。懷宗卽位，釋之出獄。觀者如堵，至馬不得行。省臺交薦，謂宜待以不次之擢，而執法忌其黷，或云常爲一贊。震孺笑曰：使方子而行賂，魏璫時已九列矣，遂老不仕。

贊曰：博虎而噬，未得勢也。培姦而躓，失厥志也。氣壯山河，志亦成也。誅夷肅清，勢亦行也。

史官曰：順昌清謹平恕，稱善人，惜義憤激烈，不暇反顧，以口語致禍酷烈，可痛也。觀衆毆緹騎，五人就死，可以得其梗概矣。燬以陵工諫，讀其章，忠賢罪可逭耶？宗建謂忠賢目不識丁，震孺以在牀在旁爲諄切。

熹宗不悟。奈何。震孺嘗曰。天下無一才可廢。廢之則成疹厲。名言哉。他如死於璫禍者。則有高攀龍。周起元。袁化中。顧大章。周朝瑞。吳裕中。劉鐸等。或抗顏直諫。或題詩觸忌。躬慘桁楊。命畢狴犴。悲夫。他如一時死者。或以封疆失事。或以賂賄多疵。謬附忠直。矇獲褒贈。而熹宗七年竄謫廢處之官。皆得借端。燃灰皇路。燕石美玉。薰蕕曷可同日而論哉。

范景文等死國難諸臣傳

范景文。字夢章。號質公。吳橋人。萬曆己酉。舉於鄉。癸丑。成進士。清貞端亮。內行醇備。操髮就學。便以天下爲己任。有其先仲淹風。父永年。爲南寧守。以恪修直道聞於時。景文初授東昌推官。署其門曰。不受囑。不受饋。人呼爲二不公。平刑敬獄。多所平反。卯辰間。山東大饑。條行荒政。躬親賑恤。所活以億萬計。民皆肖像尸祝。入爲吏部主事。天啓乙丑。爲文選員外郎。卽一襖被臥署中。經旬不履私寓。獎恬抑競。銓澄流品。海內翕然稱之。庚申。光宗卽位。署司事。仰副闕門。旁求舊德。枚卜起廢。無慮百人。皆先朝名宿。開礦建儲。櫻鱗觸忌。守正不阿者。人以爲光宗一月堯舜。其於用人。景文實襄成之。天啓甲子冬。起典選。不報。乙丑。起補文選郎。見逆閹魏忠賢盜柄。政府交關。入朝。首疏清仕路。養士節。以勵廉恥。杜請託。爲言。姦人耽耽側目之。時大學士魏廣徵。猶以鄉曲故。多方招致。景文竟不一投謁。比當例推。彼先授意部堂。芟除異己。如李應昇。周宗建。黃尊素等。景文侃侃與爭。執義不爲徇。兩魏矚其私人。曹欽程疏論李應昇等。而景文危甚。於大選日。嚙舌出血。噴濺几席。遇以病歸。家居閉門卻掃。同鄉知故。概行謝絕。著書立說。皆有益經

濟丙寅八月。衙門循序進卿寺。矯詔不許。時父永年官南工部營繕郎。強項不拜逆祠。亦乞假歸。懷宗卽位。省臺交薦。卽家起。太常少卿。尋以僉都御史巡撫河南。不踰月。邊鄙不守。敵薄都城。景文不待詔命。慷慨帥兵勤王。所過秋毫無犯。敵聞輒卻。保涿獲全。移鎮昌平。扈陵寢。上嘉其功。擢兵部右侍郎。護運通州。尋養病歸。起南。掌院右都御史。崇禎八年乙亥。進南兵部尚書。於留都廢弛。多所修飭。改北刑部。轉工部。極力裁節。國儲賴焉。懷宗親擢入內閣。督大學士甫四十日。寇薄城。疏請發內帑。鼓勵將士。聯絡人心。堅守待援。憂憤至廢飲食。詔對時已絕粒三日矣。飲泣入告。聲不能續。三月十九日夜。直忽傳車駕南遷。景文曰。主憂臣死。分也。予將與都城共存亡。入朝房自縊。左右解之。遂草遺奏。略以爲皇上翠華一移。衆心遂亂。力盡難施。惟有一死以報皇上。惟皇上可以爲堯舜之君。而令出唐德。宋高之舉。固自多難。殷憂運數使然。而誰爲爲之。能不痛恨於隕國之姦也哉。伏祈法湯改過。如周維新。親賢遠姦。以用人。輕徭薄賦。以撫民。憤發精神。鼓舞忠義。早圖恢復。重還故都。立成中興大業。臣雖死之日。猶生之年。又遺筆囑其子玄秀云。身爲大臣。不能殺賊雪恥。死有餘恨。然力竭盡節。生平已畢於死期。死可見太祖列宗而已。爾以遺疏追奏。見微臣一片忠赤耳。慷慨賦詩。遙拜其先人。冠帶赴井死。閣臣六人。死者惟景文焉。而景文獨先死。難諸臣所著有昭代武功錄。大臣譜。師律諸書。及詩文集行於世。

倪元璐字鴻寶。上虞人。天啓壬戌進士。選入翰林。爲庶吉士。歷官祭酒。以知兵事遷兵部右侍郎。有文名。一時制誥皆出其手。崇禎十六年。戶部尙書缺。懷宗召元璐等於平臺。言天下大務。稱旨。拜戶部尙書。時

軍興旁午一切倚辦。闖賊李自成困京城。人問元璠曰：「儻有不測，將如何？」元璠曰：「臣死君死國，何二三耶？」十七年三月十九日寅刻，聞城破，卽整冠帶望闕拜。復向南拜其先人塋及母，不別其內人。易便服至書齋，呼酒奠所供奉闕聖前，對酌三醞。復出廳正席坐，攜袖巾巾語僕輩曰：「分當如此，意已決，毋得救。」遂舉手自縊。諸僕欲解之，一老僕跪於傍哭之曰：「此吾主成名之日，囑已再三矣，請勿解。」賊至，索戶部印，見其面如生，驚拜，相戒不敢犯其室。

王家彥，字開美，莆田人。天啓壬戌進士，初授開化知縣，調蘭溪，擢刑科給事中，爲史料都給事中，多所建明。歷官兵部右侍郎，協理京營戎政，奉命守德勝門。城破，端坐城樓，賊至不動，賊衆脅之，大罵。賊段殺於城樓，仍以火焚其遺骸。

孟兆祥，字肖形，交河人。天啓壬戌進士，初以大理評事擢吏部主事，遷郎中。歷官刑部右侍郎。兆祥初以劾權閹魏忠賢削籍，直聲素著。朝野仰之。懷宗卽位，起爲太常少卿，後累陞至是職。奉命守正陽門，賊至不屈，死於門下。子章明，崇禎癸未進士，未就官，候銓京師。聞城破，曰：「吾父忠直必不辱，吾豈敢辱吾父哉。」遂自縊。闖家皆死，人皆憐之。

周鳳翔，字□軒，山陰人。崇禎戊辰進士，選入翰林。歷官左庶子。聞懷宗崩於萬歲山，北向冠帶拜，題絕命詩，有碧血九原依聖主，白頭二老哭忠魂之句。遂自縊死。二妾亦同縊。

劉理順，字淇持，杞縣人。崇禎甲戌進士第一人。歷官右諭德。聞京城破，乃題名於壁，字盈尺，有成人取義。

之詞。乃自縊。其妻妾及四僕俱死之。賊多河南人。約一二百人相率覓之。踵其門曰。劉公居鄉良善。里人咸沐其恩。此來正欲護衛以報之。何至於此。乃羅拜奠獻而去。有留守其居。仍紀其喪者。

馬世奇。字君常。無錫人。崇禎辛未進士。選入翰林。歷官右諭德。方食聞變。投箸曰。是常死。僕曰。奈太夫人何。世奇曰。不死。更辱親大矣。二妾朱。李。自縊。世奇向闕拜。復南向遙拜其母。裂帛自盡。

汪偉。字長源。江寧人。崇禎戊辰進士。初授慈谿知縣。以循卓。選入翰林。授檢討。聞變。與其妻耿呼酒對飲。畢。索筆大書於壁上云。身不可辱。義不可降。夫婦同死。節義雙芳。遂就縊。偉懸右。妻懸左。妻耿曰。雖顛沛。不可失序。乃正左右易而死。

李邦華。字懋明。吉水人。萬曆甲辰進士。初授涇縣知縣。擢監察御史。出爲山東參政。入遷光祿少卿。歷官兵部右侍郎。魏闡時。削籍。懷宗卽位。起督通州。入理戎政。遷南掌院左都轉。兵尙書。改北掌院左都御史。聞城破。走文丞相祠。慷慨哭拜。縊祠屏上。

施邦曜。字韶易。餘姚人。萬曆己未進士。自工部郎出爲福建參議。歷布政使。入爲光祿卿。再遷左副都御史。聞變。賦詩自縊。

凌義渠。字茗柯。烏程人。天啓乙丑進士。歷官行人給事中。風采凝峻。有直聲。出爲福建參政。五遷爲大理寺卿。聞變。盡焚平生所著書。服緋正笏。望闕拜。復望里拜。書四十餘字。付僕人歸報其父。有盡忠卽所以盡孝等語。寓中繩刃皆爲僕所匿。得短綆。爲繫於窗之榜。奮身而絕。隨有賊居其寓。五日始殮。猶含怒色。

申佳胤字素園永年人崇禎辛未進士初爲儀封知縣陟吏部屢進爲郎中緣事忤執政調國子學博再遷爲太僕丞時出畿輔稽馬政適賊逼都城相知遺書謂在外可暫棲僻地以免難圖進退佳胤曰君在何可逃乃單騎赴闕見事不可爲貽書里中云行己曰義順數曰命義不可背命不可違吾受國恩誓以死報時其母年八十仲子涵煜年十四爲聚賓客行冠禮明日城破左右請易服避佳胤曰吾此來何爲者苟避也僕固守之給曰吾自擇善地可避僕信之至王恭廠有巨井躍而入僕挽之袖爲斷入而水僅腰僕曰主人可登矣佳胤曰汝等歸慰老母卽出吾亦必死徒擾擾乃俯首坐而死次日昇出顏色如生兩目爛爛有光其母撫之曰兒不瞑爲我耶有子作忠臣尙何憾遂瞑長子涵光有文名

吳麟徵字聖生海鹽人天啓壬戌進士初授建昌推官擢給事中累遷吏科都給事中聞變將垣中參駁諸要事一一簡出付其僕曰賊入必縱焚史必失吾所掌不可沒也沒負君矣一語不及家事從容自縊家人星散海鹽舉人祝淵從賊羣中收其屍而斂之數日而猶如生賊皆義淵不迂之

吳甘來字和受新昌人崇禎戊辰進士初授中書歷官戶科都給事中寓與周鳳翔比鄰外城破過鳳翔寓鳳翔已盡節慨然曰大丈夫當如此矣歸寓沐浴衣冠北嚮再拜縊死

王章字芳洲武進人崇禎戊辰進士初授行人司選擢監察御史與光時亨同受命巡城並轡走城上城破賊至衆皆倉皇墜城通章攬轡神色自若賊至迫之降時亨下馬降章不爲動賊三問章三不應賊斫其膝章堅坐馬上罵不絕口遂被害

陳良謨字賓曰鄞縣人崇禎辛未進士初授大理推官舉天下廉吏第一擢監察御史聞變與妻時痛飲至醉聯古詩數十句相對而縊

許直字若魯如皋人崇禎甲戌進士初授義烏知縣擢吏部歷考功員外郎城破其役亟約投降直曰吾生可捐吾計已決時傳懷宗出齊化門南遷其友羊君輔勸曰上已南遷公輩正宜擁蹕偕行共圖恢復何必以有用之軀輕一擲也直唯唯相與結束出門一望賊衆蝟集曰當此干戈駕焉往哉忽傳懷宗崩號慟不能起君輔與諸僕掖勸曰公親老子幼奈何直瞪目曰有吾兄在是夜書家信一函遣几上作詩六絕云率士皆臣自聖明狂氛何事敢縱橫驅除安得赴桓力一斬元兇盡洗兵貫盈巨罪豈容誅屠戮腥聞駭毒痛罄竹南山書不盡任將寸磔有餘辜君國深讐慘古今么麼逆豎偏相侵微軀自恨無兵柄殺賊惟殷報主心在天靈爽念高皇開闢當年垂裕長願侍吾皇邁謁帝祈哀仍使國威揚一死酬君見血誠滿腔忠憤痛難平大讐未復身先隕漫化啼腸灑淚盈擲筆翻然亂世行老親幼子隔幽明丹心未雪生前恨青簡空留死後聲書畢命僕取麻作纆僕手戰不能成直吐出遂自作一手持練尾一手上握神明如生其友君輔斂之

成德字玄升懷柔人崇禎辛未進士初授滋陽知縣後擢兵部主事再遷爲武庫郎中賊臨城卽致書馬世奇曰主憂臣辱我等不死匡救貽禍至此惟有一死以報國耳年兄忠孝夙稟諒有同心城破緣未聞懷宗確信忍死及頓懷宗梓宮於茶菴德喪服往哭奠之盡哀賊爲感動歸伏劍刎死

周之茂字松如麻城人崇禎甲戌進士爲戶部主事再遷爲郎中辭不就逮下獄踰年宥之旋復官守銓京師賊逼城左右曰公非見任官可早逸去之茂曰君臣定誼何必見任脫不虞有從君耳城破爲賊所執使跪不屈大罵賊以梃擊脛至折不跪如故遂以梃洞胸折臂而死

金鉉字伯玉順天人天啓丁卯年十八舉鄉試第一明年登進士高等爲工部主事時以戶工錢糧多委卸參差設總督內臣主兩部錢穀立專署以太監張彝憲爲之彝憲到任兩部郎以下皆趨拜於庭如胥吏鉉不往彝憲查知厲逼入署鉉堅臥卽草疏諫不宜以中官竊利權違祖制上不省彝憲怒核兩部故庫藏重器謂鉉督造銃火門不端弗堪用奪職尋甲申起兵部主事鉉風致曠逸居近西華門嘗徘徊於西苑金鞦玉竦之間愛其風景每自攜尊酌痛飲橋上或賦詩高唱內閣觀者如堵鉉旁若無人自如也每歎曰吾死得葬此足矣聞者駭之聞變急衣冠赴萬歲山過其地號哭罵賊呼皇上者三奮身入水死王鍾彥華亭人歷官工部主事城破左右趣令投誠鍾彥笑曰豈有此理入房自縊死同邑人宋天顯爲內閣中書亦自縊死

劉文炳海州人孝純皇太后兄懷宗母舅也聞城破奉祖母時年九十妻及子繼祖孫文炳文燿會擇一大井男女子孫十六人盡投於內閉門縱火焚賜第火發自縊死

鞏永固字皇圖大興人尙光宗第八女樂安公主公主先一年薨柩在堂遣子女數人聞變悉以黃繩繫於柩縱火焚死大書世受國恩身不可辱八字自縊於庭

王長錫孝和皇后兄也。封永甯伯。聞變自盡。

張慶臻永城人。襲封惠安伯。詳孝誠太皇太后紀。闔門數十人登一大樓。縱火焚死。遺三歲兒。稍癡。乳母所藏。索不得。至今存。

張世澤英國公也。辭濂陽武侯也。郭振明博平侯也。衛時春宣城伯也。周鏡懷宗皇后從兄也。爲都督。皆聞變自盡。

朱之馮字樂三順天人。天啓乙丑進士。歷官巡撫宣府都御史。衛景瓊字帶黃韓城人。天啓壬戌進士。歷官巡撫大同都御史。馮司孔字芝闔中牟人。萬曆丙辰進士。歷官巡撫陝西都御史。蔡懋德字雲怡崑山人。萬曆己未進士。歷官巡撫山西都御史。徐標字□□濟甯人。天啓乙丑進士。歷官巡撫真保都御史。皆以兵將降賊。與城俱盡。

贊曰。天崩地坼。宗國淪亡。鼎湖痛兮。明運不滅。主辱臣死。況滅立王。諸公盡節。汗簡遺芳。忠踰白日。義概秋霜。方之古烈。文山首陽。

史官曰。逆闖憑陵。肆犯宮闕。鐘虜失守。廟社震驚。致懷宗痛大寶之遽頽。憤皇圖之實覆。含辛血裕。飲恨雉經。皇后宮妃魂消椒殿。太子諸王身繫金縢。一時在位者。雖不能策馬揮戈。奮膽尙於縣竹。力疾苦戰。死卞壺於清溪。然而仗節殉君。橫屍闕下。如范景文等。絕脰不辭。湛族無悔。非識君臣之大體。明生死之至分。何能有死無二。取義成仁。若此哉。嗚呼。若甘心賣國。反面射天。飲食楛桎之下。流水金珠之獻。覩顏

金紫誇藻美新者。可勝誅乎。至於託蔣沈之絕粒。駕樊系之忍辱。以視景文等。蓋霄壤矣。悲夫。



明書卷一百十一

列傳三

儒林傳一

史官論曰。夫儒者取其明理義。闡性道。使聖賢之傳。昭然如日星之不晦。乃稱功焉。昔司馬述六家之指。班氏申九流之略。皆彙儒於道。墨名法。此篤於時之見也。漢施孟。梁邱諸人。多沿習訓詁。不能有所發明。使微言大義。絕不復存。而公孫弘。兒寬之屬。徒以經術取卿相。彼二子者。謂儒止此耳。其事止於說經文。而效不過拾青紫。烏在其賢於稗家衆流也。自唐韓愈指辨邪正。衛道孔嚴。而後濂洛關閩。大昌於宋。相與明彌綸之奧。析義利之微。示求仁體仁之方。發理一分殊之旨。道學大明於天下。而儒始尊。而儒始真。然宋人之論儒也。嚴用心毫釐。畫疆而守。卽楊謝朱陸。一時同學。紛紛有異同之辯。伊訓曰。德無常師。主善爲師。七十子之徒。各具一體。未嘗相詰。要足以通物方。弘道用而已。若沾沾以爲得不傳之絕學。而格一世於門外。豈聖人無常克一之指歟。陳同甫譏之似矣。明興。太祖重道崇儒。徵聘四出。講論闕廷。建文篤尚文治。太宗表章聖經。而宣世兩朝。克敦至道。以故名儒輩出。嚮道甚勇。至薛瑄之守。王守仁之用。尤其憂憂者也。諸儒咸能修身理性。以宗正傳。俾聖道昭垂。燦然明備。以視漢人之專己守殘。宋儒之告密。

結壘者則有間也。烏得與六家九流同日而語耶。作儒林傳。

汪克寬傳

汪克寬字德一。又字仲裕。祁門人。世傳理學。父應新字元美。記識博洽。議論慷慨。嘗著便民二十條。力陳當世要務。克寬六歲。教之孝經語孟。隨口成誦。於理學浸悟。取四書自定句讀。晝夜誦讀。恍然知道理之要。旁極諸書。元延祐戊午。郡守聘主道一書院。往浮梁。拜見吳仲迂。以文印正。吳曰。讀書明理。蘄體諸身。文章異時可不學而能也。聞之惕然。遂篤志聖賢之學。既歸。扁其齋曰思復。銘於壁。以自勵。泰定丙寅春。謁嚴陵吳朝陽。與論所學。吳喜曰。子可謂真知作春秋心法矣。舉浙江鄉試。次年。下春官第。益刻勵爲學。棄科舉業。取春秋博考諸家。同異得失。以胡文定爲主。而研究衆說。會萃成書。曰春秋經傳附錄纂疏。易有程朱傳義音考。詩有集傳音義會通。禮有禮經補逸綱目。有凡例考異。其餘論著尤多。至於經史聖賢之言。心融神會。造詣深淵。故爲文渾融典雅。而獎掖學者。多所成就。後以經學教授宣歙間。數與鄭師山講理論學。意氣相得。四方從游甚衆。嘗語學者曰。聖賢之學。以躬行踐履。操存省察爲先。至於文章。特其餘事。篤志著述。不以一毫利祿動心。諸學者稱環谷先生。洪武二年。聘至京。修元史事畢。特旨留仕。以老疾力辭。乃命禮部設宴。賜白金采段。給驛而還。

趙汭傳

趙汭字子常。歙人。少讀朱子四書。疑難不一。師告以初學毋過意。輒不釋。夜歸。取大全集語錄等書。緝閱。

由是有悟。遂廣志聖賢之學。不事舉子業。聞九江黃楚望杜門著述。再往。乃得授六經疑義千餘條。以歸。又再往。留歲餘。得口授六十四卦義。與學春秋之要。翰林虞集授館於家。一歲。嘗爲書曰。聖賢之學大矣。學可不知其要乎。嘗聞吾之至尊。至貴。舉天下之物。不足以加之者。此心是也。吾之至親。至切。舉天下之學。不足以先之者。求放心之謂也。虞大稱之。元末。四方擾攘。起鄉兵。輔汪同保鄉里。嘗論爲國家者。不能舉天下大勢。以定攻守之宜。而所戰不求智勇之士。真可任將兵者。使臺省貴人。郡縣俗吏。共軍旅之權。賞罰不明。故是非淆亂。而治安撥亂之術。行軍克敵之方。皆廢不講。徒欲以歲月削平。安可得哉。最得其時。用兵之弊。丙申。明兵定徵。寓衢之柯山。潛心著述。不少輟。洪武初。有事屢徵辟。繼以義禮召見。辭。已再以山林遺佚徵。修元史。竣事。得請還。卒。年五十二。儒學稱爲東南鄒魯。訪每謂周易春秋二經。皆夫子手筆。聖人精神心術所存。必盡得不傳之妙。然後孔門之教。乃備。其於春秋。不舍史以論事。不離傳以求經。不純以褒貶泥聖人。以爲左柱。主史釋經。而不知筆削本旨。公穀如求筆削之旨。而不考魯史舊章。俱不能無弊。乃離經析意。分爲八類。辯而釋之。名曰春秋屬詞。以著聖人筆削之旨。作春秋集傳十五卷。以明聖人經世之志。著左氏傳補注十卷。師說三卷。以爲學者求端力用之階。其於易經。則必須明象。又曰。易象與春秋書法廢失之由。大略相同。苟通其一。則可以觸機而悟矣。作序卦圖說。及經史開端。乾坤屯三卦解。其學以積思爲本領。以自悟爲歸宿。常曰。讀書最患多疑。每展卷則羣疑起。如蠅毛。要須得程朱復作而命之。而後可釋然爾。毋謂苦思之功。若有神助。聖人復起。不易吾言。一時學者皆宗之。稱東山先生。

卽以名集。

張美和傳

張美和。初名九韶。字以行。清江人。從外祖聶先生學。不待程督。日必自課。年十三。卽能詩。合程度。聶曰。汝學駁駁來逼。吾不能教汝矣。往師前進士余復鄉於襄陽。盡得詩禮之傳。隱居教授。益攻苦。於書無所不窺。參互考訂。以窮其說。來學者甚衆。隨才造就。各有所成。元末盜起。雖顛沛中。讀書授徒如常。語學者先須讀前哲格言。以端其學術。然後能不爲邪說所惑。乃選古大儒發明經傳中語。自天地鬼神。人物性命。繼以異端。開其類凡五。各爲之條目。折衷以己意。去取詳明。剖析精當。吳草廬。孫伯尙見之。稱賞。題曰理學類編。洪武初。薦爲本縣教諭。七年。徵天下貢士入太學。銓用者多其弟子。十年。召至京。賜衣一襲。擢國子助教。氣貌嚴整。將以篤實。每教諸生。必端坐不言。有所請問。徐徐應答。不過一二語。然義理明。人深服之。十一年。遷編修。十三年四月。致仕。太祖親爲文賜之。曰。朕聞古之賢士。莫不修己行仁。爲時君之用。否則獨善其身。以終天年。或著書立言。傳之永久。雖不顯於當時。而有功於後世。以其德重而行純。學博而言信也。今老成宿儒。凋落無幾。獨爾以衰暮之年。日侍朕左右。正欲詢問古今典禮。以沃朕心。柰爾不任周旋。所以命卿歸老。卿之去矣。朕將誰從。於乎千載一遇。古今之通言。然全其始終者甚罕。今卿善始善終。不亦美乎。美和博學精擇。善於著書。故宸翰及之。嗣後應考江西者。二。考福建者。一。二十四年。典文禮部。二十七年。再典禮部。會有蜀藩之命。不果至。在蜀一年。王深敬禮之。無柰何。復召校書翰林。力勤雖

蠅頭細畫。皆出手筆。書成辭歸。賜衣被各一襲。丙子卒。年八十三。所著類編八卷外。有羣書備數十二卷。元史節要十卷。

貝瓊傳

貝瓊字廷臣。崇德人。性坦率。不事邊幅。而篤志好學。博通經史百家之言。善爲文。年四十八。始領鄉薦。張士誠累徵不就。洪武三年。被薦修元史。既成。受賞歸。六年。以儒士舉至京師。除國子助教。上嘗坐奉天殿。召諸助教。瓊及會稽趙俶。錢宰。金華鄭濬。誠諭。皆頓首受命。瓊嘗慨古樂不作。所謂成均。徒有其名。適作大韶賦見志。宋濂爲司業。建議爲常立五學。並祀舜禹湯。文爲先聖。太祖不聽。且黜辱之。然士大夫猶有黷濂者。瓊乃作釋奠解。解曰。庖羲氏闡天下之文。神農氏興天下之利。黃帝制器尙象。以通天下之變。此爲治者莫過於三皇也。乃至於孔子。不得如三皇修君師之職。於是刪詩書。正禮樂。贊周易。修春秋。以明綱常於萬世。德雖同而事則殊矣。然則或欲祀三皇於學。以孔子配之。可乎。曰。不可。按周禮。有道有德者。使教焉。死則以爲樂祖。祭於瞽宗。故文王世子篇曰。凡學。春官釋奠於其先師。秋冬亦如之。若禮有高堂。生樂有制氏。詩有毛公。書有伏生。皆先師之類也。又凡始立學者。皆奠於先聖先師。釋者曰。先聖若周公。孔子之下云。是唐虞於周所主先聖先師。固無定名。未有及於三皇也。漢魏之主。取舍各異。周孔迭爲先聖。孔顏互爲先師。若周公制禮作樂。宜享王者之祀。於是罷周公。升孔子。配以顏子。高宗永徽中。又復武德舊制。顯慶二年。以長孫無忌言。正孔子爲先聖。仍以周公配武王。歷宋迄今。釋奠孔子。定爲不易之典。

是宋所主先聖先師已有定名。未有及於三皇也。由是觀之。古之設學。原無孔子廟。惟魯有廟。然其教被於天下。非一國所得。故天下通祀之。自唐已然。虞世南。韓柳諸記可考矣。學之有廟。由孔子而建。則宜以孔子爲先聖。顏子爲先師。而三皇不預也。盛矣哉。孔子之道。中國尊之。夷狄尊之。祀以王者之禮。謂不能稱其德。是出於天下之公。而非一人之私。歷萬世不可易者。今欲崇三皇爲先聖。使居孔子之上。不足以褒其功。降孔子爲先師。使混於高堂生之列。適所以貶其德。故吾的然以爲不可也。或又曰。古者舜祀於虞庠。祀禹於夏學。祀湯於殷學。祀文王於周學。舜禹湯文得以祀於學。而不得祀三皇。何拘於貞觀之制也。曰。王天下立四代。故祀舜禹湯文。而三皇將祀之於何學歟。或曰。先生詳言之。曰。三皇孔子其道一也。崇孔子之祀。當崇三皇之祀焉。以佛氏之苦空寂滅。老氏之荒唐恠誕。無益於人與國。且崇臺廣殿。擬於王宮。法亦弗之禁。矧三皇之功及於人者如此。而領之於醫。特神農膏藥之一事。理固有未盡者。宜定其制。設官主之。以豐其祀。可也。祀之於學。則非義矣。時余爲國子助教。適聞有以邪說言於朝。破貞觀之制者。卽斥而不用。余懼其惑人也。故辯之。其持正論類如此。九年遷中都國子助教。教勸臣子弟。瓊爲人文行超越。素有名譽。雖將校武夫。皆知禮重。十一年九月致仕。明年卒於家。有清江文集二十卷。行於世。

朱廉傳

朱廉字伯清。義烏人。少刻苦厲志。淹貫經傳。悉領要義。受學文於黃潛。遂以文章知名。師道尊嚴。人皆式。

之浙東行省右丞李文忠開鎮嚴州。大加禮敬。辟長釣臺書院。洪武三年。詔修元史。聖朝日歷。徵爲纂修官。書成。授編修。八年。乘輿巡幸中都。扈行至中都。進詩十首。上覽。喜曰。佳詩。朕爲汝和有頌。召廉賜和詩。當時以爲榮。旣而授經楚府。尋陞長史。久之。病贖。致仕歸。窮經講誦。探研聖學。多所闡明。嘗取考亭語。摘其精義。名曰理學纂述。言其爲文。謹嚴精密。有文集一十七卷。

趙俶傳

趙俶。字本初。山陰人。博通經史。爲文遒健。名重當時。尤明於毛詩。洪武六年。薦至京。太祖召與講論經史。俶授據傳說。貫穿古今。每奏對。上輒稱善。除國子博士。隨扣輒應。莫不樂得經師。上一日御奉天殿。俶偕諸儒侍側。召至前諭之曰。經學必宗孔子。毋以儀秦縱橫語示諸生也。俶頓首謝。歸而告誡士子。屏去戰國策諸書勿讀。自是傳經者文日益醇。明年。詔擇諸生之聰悟能文者三十五人。命俶顯教之。且令修詞。以漢司馬遷。班固。唐韓愈。宋歐陽修。蘇軾爲法。尋於諸生中擢李擴。黃義等。入文華。武英二堂說書。多至大用。俶自專師席。旦夕誨迪不倦。士多成業。丙辰。乞歸。上御奉天門。御史臺左大夫汪廣洋。右大夫陳甯。奏博士趙俶以詩經施教。成均者四年。其弟子爲方岳重臣。及持節各部者。往往有之。是不爲無功。今年逾七十。筋力衰。精神不完。願陛下放歸山。以盡餘齡。上可其奏。加俶官翰林待制。敕給誥命。致仕。戊戌。俶詣闕謝。上召之使前。問曰。卿何郡人。對曰。會稽。上曰。向爲兵部侍郎。圭玉出知萊州者。卿之子耶。對曰。是也。上因諦視之曰。誠耄矣。歸養爲宜。俶頓首而退。當圭玉官法從時。俶作訓忠之書教之。圭玉由是服

政有名世以傲爲愛而能誨。越七日詔出庫錢二十五緡賜傲。拜謝遂行。朝貴皆賦詩贈傲。成什。學士宋濂等暨諸生千餘人送之。都門聚觀者咸羨其榮遇云。

黃鼎傳

黃鼎字伯器。一字孟鉉。先旰人。後徙吉水。世業儒。大父天衢。篤行勤學。於書靡不通究。父彥榮。直諒和厚。四子皆秀穎。鼎尤傑出。鼎天資絕人。八歲能誦五經四書。涉知大義。成童爲文章。馳聘馬班。論議閎博。不可窮。既冠。明於世務。自許賈誼。時翰林吳沈得其兄弟之文讀之。歎曰。今之軾轍也。岳穎悟超越。清修篤學。兄弟自相切磋。然必推服其兄鼎。洪武中。用薦授鎮江府知事。鎮江密邇京師。庶事叢脞。簡牒山積。既至。裁決數日而盡。素習者不能及。吏民畏服之。歲中坐註誤罷官。退處山林。取舊所爲文悉焚之。一志於性命道德之旨。自六經至於濂洛關閩之說。研精數微。涵泳淳澆。久益沛然。其從學者日衆。善開諭。獎勵誘掖。感之以誠。學者無賢愚少長。皆樂從之。隨才質高下。各有所成。凡教人以實踐爲務。必使窮其理而體驗於身。歎學者專務科舉之業。曰。士固由科舉進。然志於道者。必不以是自足。明道晦菴吾師也。篤於孝友。恬澹守約。窮達一致。爲文章。脫略凡近。根據至理。粹然大雅。所著有四書五經精義。學古齋詩文。宋史論卒年八十三。楊士奇曰。師道立則善人多。國家初興。吉之宗師碩儒。林林比立也。一二十年。物故盡矣。學者方偃偃如失所歸。伯器後出。汲汲焉以成就來學爲己任。故後之名碩多出其門。鼎才高意廣。襟度洒落。玉潔而春和。庶幾程伯子之風。

趙謙傳

趙謙字搗謙。餘姚人。博洽經史。時號考古先生。蚤歲孤貧。寄食山寺。勵志聖學。東遊鄞。台。聞金華鄭四表。學有根源。往師之。尋考亭墜緒。歸而兀坐塢山。萬書閣。博究六經百氏。因續武王諸銘。并列四勿箴於座右。嘗謂士之爲學。必先窮理。窮理必本讀書。讀書必貴識字。故曰。六書明則六經如指諸掌。遂築考古臺。肇述六書本義。以提其綱。繼成聲音文字通。以極其博。及其終也。會六經百氏於一心。而約之以造化經綸圖。又作學範。以推所得於人。天台林氏序六書本義。有曰。吾如此書。包貫古今。卓然特立。其有功於先王也。大矣。西邸顧氏謂聲音文字通。功不在孟氏闢異端下。門人合肥王惠謂造化經綸圖。張前賢未發之機。啓後學既迷之徑。四明鄭氏有曰。學者以斯爲範。當爲名世大儒。洪武十二年。上聘修正韻。年二十八。宋濂深知之。遣二子從游。自信其說。衆多嫉之。出授中都國子典簿。正韻成。多用其說。明年。與僚友論事不合。罷去。益肆力於著述。學者翕然宗之。二十二年。朝廷搜訪遺賢。吏部郎中侯庸薦奏。上曰。朕知之久矣。將老其才大用之。又具啓懿文太子。太子曰。吾識其人。宋先生每稱之。然其所著書。非靜處不能就。其以爲教官。有忌者曰。可行蠻貊。乃領教瓊山。解縉爲文送曰。教官聖人之木鐸也。吾當賀聖人於南海之濱。又增一木鐸矣。既至。作瓊臺。布學範。慨然以興起斯文爲己任。雖將門弟子。及蠻夷荷戈執戟之徒。皆知向風慕義。而遠方從游者。若莆田朱紹。三山鄭尙賓。鳳陽孫岳。臨川吳均。輩爲最著。由是南海始聞聖學。而名世之儒浸出矣。二十八年卒。年四十五。永樂初。門人柴廣敬擢進士。以聲音文字通一百卷上。

奏詔藏秘閣。先是臨終書手別璵士曰。予聞之太虛之中。不能不聚而爲人物。人物又不能不散而爲太虛。其聚其散。蓋皆理數之自然相推。不能自己。豈有所爲而爲者乎。此身在太虛中。如冰在水。而今將爲水矣。水與冰時爲之。非其自爲也。何所留。亦何足戀。聽其自然可也。方闔成。授王惠曰。觀此以明其理。寡欲以養其心。調息以養其氣。讀書以驗其誠。聖賢之域。不難到矣。易與中庸。皆聖門傳道極致之言。而謙之圖。又所以發二書秘。故臨終所得如此。謙於世利聲華。澹然無所罣礙。直義所在。目無王公。然終以此厄窮無悔。

蕭岐傳

蕭岐。字尙人。奏和人。祖方平。以書記死於文天祥崖山寨。公四歲母亡。承父靜安之訓。恭謹知讀書爲文。誓不失先業。性穎悟。成童以書經有聲。元季。退晦自守。恂恂鄉黨間。爲人所稱。比壯。博通羣經。尤長四代之書。講貫洞徹。識見廣遠。爲諸生。臥誦四書。終卷不失一字。性端重。不喜諧謔。嘗宴會。豪士有垂老者。終席。酣暢。舉杯相屬曰。吾徒身後碑銘。惟蕭生是託。拒其酒。正色曰。須好爲人。庶不闕吾筆也。一座爲之改容。世變以來。禮法廢弛。閭里宴集。諸少年往往誼譁恣肆。動至取禍。有識者多畏避。不敢赴。聞公在側。欣然相卽曰。一蕭先生足可鎮席矣。待諸少不惡。而嚴語稍不當。惟正坐不應。四方來學者。誘掖論道。懇懇不倦。或以爲太勞。曰。教人當如此矣。一言一行。足爲儀表。以故及門之士。莫不涵養造就。與人交。不屑屑責備。愈久而敬不衰。事父孝愛。遇盛宴有珍味。不舉一筋。諸生承意。輒餽於家。始食。明太祖大徵諸儒。首

舉不就。洪武十五年春，詔舉天下賢良，有司疆起之。至京，首陳十便書：一曰，審督誣告謀叛者，以便善良；二曰，禁止實封者，以便上書；三曰，免池塘之稅，以便耕種；四曰，蚤分撥秋糧，以便會計水腳；五曰，蚤行移折收，以便民間預備；六曰，雜料隨土地所宜，以便價直；七曰，雜造不必團局拘監，以便民自爲；八曰，罪坐所由，以便同寅；九曰，依律科斷，以便當罪；十曰，考數生員，以便學校書奏。復懇陳氏無寸鐵之刃，而受叛逆之名，誠可痛也。上嘉納，賜宴，明日召入授潭府左長史。以年老辭，至再四，忤旨，謫教楚雄。明日上念其忠，且年老，追還，入見，留京師，朔望一入覲，居歲餘，一夕夢神人引至別室，有古書篋，指示之，且曰：先生就此得歸家矣，覺而異之。是歲除平涼訓導，既至學舍，則皆如夢中所見，因歎曰：何莫非命也！自是安於教授，嚴條約，以身先之。學者信服，屯營守帥皆遣子從遊，善誘，率就雅飭，蓋與人爲善，本於至性。故自大江以西，經生進士多出門下，名播省憲。二十三年，校文湖廣，又三年，校福建，奉詔考定典籍，宴奉天門，趨朝，上目之曰：真老成人，可敬。賜御饌，令十日優與供給，入對屢稱旨，宿會同館，往來翰林國子，凡四閱月。學士劉三吾祭酒，胡廣論議多所推重，未幾放歸，宴餞奉天門，賜衣被，轉轍給道里費，比歸營墓，東山自誌而銘之，寫真自贊曰：吾以此見祖宗於地下，差不辱矣。時語人曰：吾已老，若等宜守法律，勿犯條例，上神聖聰明，動必加法，不汝貸也。二十九年正月，誕日，親友捧觴爲壽，笑曰：吾益衰白矣，今年又大比，其能免於行乎？三月，浙江使者果至，而岐以六月得疾，無一語家事，每攬衣起坐，曰：吾其止於是乎？言終而逝。年七十二，所著有正固集、金華藁、歸來藁、鄂渚藁，求文者填塞，常曰：吾爲文不肯諛人片言，但移置

別人使用不去有五經四書要議。又嘗取刑統八韻賦引律理爲之解。併爲一集。或問之曰。二書本不可同語。先生胡爲合而緝之。答曰。天下之道本一。而爲用則有二。曰得與失而已。出乎聖學。必入乎刑統。吾合二書。將使觀者知所擇也。陳海桑曰。先生養高龍門。三華間。清修苦節。種學積文。不求聞達。而亦未嘗不達。殆古之不顯亦式者歟。岐平生不信鬼怪事。鄉鄰有疫癘。無憚昏暮。赴救之曰。此人家稟不正之氣。故得此證。鬼安在也。學者私謚爲正固先生。子二忠。字用文。始被鹵爲居臨洮。岐自平涼還。忠適入覲。避遁道左。遂得歸。遵字用道。鄉里以孝名。

曹端傳

曹端。字正夫。河南運池人。自幼立志。以聖賢爲必可學。務在躬行實踐。而靜存居。自日潛心太極圖。通書。西銘等篇。歎曰。道在是矣。益玩索不忘。有自得處。輒親爲之注釋。以暢其旨。居家事親至孝。父雅慕佛家流。端日以聖賢之道。幾諫之。父心回向。因作夜行燭一書以進。其言曰。佛氏以空爲性。非天命之性。人受之中。老氏以虛爲道。非率性之道。人由之路。言皆粹然。合於道理。比兩親喪。哀毀五味不入口。寢苦枕塊。廬墓六年。孝思沈如也。又建祠堂一事。先建義祠一。薦外族之無後者。不用浮屠巫覡。嘗詣縣上書。請毀淫祀。年荒勸賑。全活者甚衆。屢舉同僚之喪。貧不能赴任者。贖之。客死者。斂之。永樂戊子。舉河南鄉試。己丑。一榜。授山西霍州學正。十餘年。明聖學。以訓迪諸生。然教人尤以身先爲本。士子多薰其德。而心悅服之者。壬寅。調蒲州學正。霍庠弟子上章乞留。蒲庠亦連章爭之。霍州先傳奏。遂允。宣德甲寅。卒於霍。卒之

日人爲之罷市巷哭。學者稱爲月川先生。正德中，兵尙書彭澤稱端爲本朝理學之冠，欲奏請從祀孔子，因致書河南巡撫李某曰：國家一代文明之盛，經濟之學，莫盛於誠意伯劉公、潛溪宋公。至於道傳之學，則繼自灑池月川曹先生始也。所著有四書詳說、太極圖說、通書西銘釋文、孝經述解、性理文集、儒家宗統譜、家規輯略、存疑錄、夜行燭等書。崔銑曰：月川曹端之執篤介菴李錦之清固，學皆守朱氏，識或未逮。沿襲之近也。荒陋之中，卓然自興。今士習改，民僞滋，安得斯人矯之哉！先是正統末，御史蒲州謝瑀嘗著論曰：釋氏之教，流布天下，舉世而尊信之，莫能覺其非也。能覺其非而距之，而後可與入堯舜禹湯。文武周公，孔子之道也。何者？釋氏出於自私之厭，而專尙寂滅。老子出於自私之巧，而專尙虛無。三代隆盛，未之有也。秦漢而下，始起而肆其言，人皆尊而信之，莫能覺其非也。是以愚昧者惑於誑誘，甘心迷役。高明者□於見聞，醉生夢死，嗚呼惜哉！誠能覺其非而距之，而後可入堯舜禹湯。文武周公，孔子之道也。韓子曰：不塞不流，不止不行。人其人，火其書，廬其居。明先王之道，以道之。程子曰：道之不明，異端害之也。昔之害近而易知，今之害深而難辨。朱子曰：佛老不待深辨而明，只廢三綱五常這一事，已是極大罪名了。其他更不消說。則所謂覺其非而距之者，堯舜禹湯之道，賴之而復明。周公孔子之教，賴之而復行。聖朝道學大明，真儒輩出，於是河南崑灑之間，而月川曹先生出焉。方其幼也，則以希聖希賢爲己任。其壯也，則以繼往開來爲己事。而其言曰：佛氏以空爲性，則非天命之性。人受之中，民秉之彝矣。老氏以無爲道，則非率性之道。人由之路，民用之常矣。其於聖賢精一執中之傳，果何有也。豈非所謂覺其非而距之。

者歟。

薛瑄傳

薛瑄字德溫山西河津人母齊氏將就館先一夕夢紫衣人降舍寤而誕瑄幼有異質清徹透骨五臟露如水晶七歲通論孟垂髫參議李宗問欲致見之不往因觀性理大全一書歎曰此孟孔正脈也其書不下數百萬言悉手錄之讀至忘寢食其爲學專務體驗於身心之間致知力行嘗曰聖賢千言萬語皆說入身心上事誠能因其言以反求諸身心猛省而擺脫盡私累則身心皆天理每不滿陸象山所言人讀書爲義外工夫必欲人靜坐先得此心輒歎息若如其說未有不流入禪者日玩經書以及濂洛關閩諸家粹言多所自得嘗隨父居玉田時有御史謫戍者永嘉徐懷玉高密魏希文濟南王素厚父皆命瑄往從之學三人皆待以吾友因稱之曰聖門有人矣舉永樂庚子河南鄉試第一明年辛丑登進士高第宣德丁未授御史時楊士奇在內閣求一識而不可得往監湖廣鹽場益潛心理學每方寢成思有所得卽秉燭起書尋巡按山東建言內外風憲緘默不言左都御史顧佐惡之比考滿署下下坐是不得進階瑄不爲動正統元年擢山東提學僉事以憲臣督學始此首明理學以淑士類山東士人稱爲薛夫子已而吏尙書何文淵欲薦代己稱之曰不愧往哲時王振有寵與瑄同梓里振欲效蔡京引龜山故事思拔一正人以鎮衆議一日問楊士奇曰吾鄉人誰可大用者士奇首薦之振卽召入擢爲大理寺丞比至士奇勸詣振謝曰安有受爵公朝拜恩私門邪竟不謝一日偕諸僚友遇振於塗瑄獨不加禮振滋不悅會百

戶某死。遺妾有姿色。振姪山欲娶之。妻持不可。妾因誣告其嫡妻賀氏毒殺其夫。時都察院問已誣服。及過大理寺。瑄鞫得其冤。駁還之。都御史王文怒。譴之於振。振嗾言官劾瑄。故出入人罪。論死。瑄怡然曰。辨冤獲咎。死何愧焉。獄中日。手周易誦讀不廢。至覆奏。將臨刑。門人皆奔走。先生神色自若。會王振一老僕素謹厚。不甚曉事。是日哭於廚下。振問何爲。僕曰。聞今日薛夫子將刑。故泣。振問何以知之。僕曰。鄉人也。備告其賢。振爲之動。得不死。仍繫錦衣獄。尋除曰。放歸田里。通政使李錫歎曰。眞鐵漢也。比歸。閉門不出。造詣益深。未幾。起原官。景泰辛未秋。乞致仕。戶部侍郎學士江淵言於上曰。薛瑄歷官罷而復起。終始不易其操。昨者奉命督四川。雲南糧餉。以給貴州之師。日夜勞心。竭筋力。以底有功。今年纒踰六十。耳目聰明。未嘗衰耗。臣愚以爲瑄之才。學。宜置之館閣。以資其助。不宜俯徇其情。聽之去也。遂不許歸。尋陞南京大理寺卿。時有太監金英奉使南京。諸公卿並餞於江上。瑄獨不往。英以此重其爲人。及回京。言於衆曰。南京好官。惟薛瑄耳。時南京鎮守太監興安袁誠於端午遺瑄扇。瑄辭之曰。賜扇天子事也。二人皆巨璫。亦不敢怒。瑄初被召至京。會蘇松大饑。民向富家貸。不與。遂焚其廬舍去之。蹈海以避罪。朝廷遣王文往案其事。文坐以謀叛。連及五百餘家。瑄抗疏力辨之。獲理者衆。文謂人曰。此老倔強猶昔耳。天順改元。擢禮部侍郎兼翰林院學士。入內閣。一日。上方小帽短衣。聞瑄奏事。爲更袍服。人曰。不冠不見。汲黯是也。未幾致仕。蓋是時石亨曹吉祥等恃功恣橫日甚。瑄歎曰。君子見幾而作。不俟終日。遂引疾懇歸。詔許之。居家八年。天順甲申六月十五日卒。年七十六。卒之日。先書其案云。七十六年無一事。此心惟覺性天。

通。是日正衣冠危坐而逝。有迅雷白霧之應。諡文清。呂涇野云。薛文清爲今代道學第一人。給事中張九功。侍郎姚謨。布政使許讚。吏部尙書喬宇。屢薦以爲世之真儒。明道適用。潛心理學。有功名教。宜侑食孔廟。無忝上不聽。隆慶改元。御史周弘祖又疏請入祀。而廷議竟未有成。瑄嘗謂六經四書。性之一字括盡。故其教人。一於復性反已。功夫絕似曾子。故其言曰。讀書體貼向自家心上。做工夫。方有味。不然。雖盡讀古今天下之書無益。尤從事於居敬窮理。久之有得。則見得居敬時敬以存此理。窮理時敬以察此理。雖若二事。而實則一理矣。瑄於天下事皆理會得過。故曰。事事不放過。而皆欲合理。則積久而業廣。又曰。只順理而行。都無一事之勞攘。吁。其博而約者乎。時有晦朱注爲調話。瑄曰。四書集注。皆朱子萃羣賢之旨議。而折衷以議理之權衡。至廣至大。至精至密。學者但當精思熟讀。潛心體認。而力行之。自有所得。切怪人於朱子之書之意。尙不能徧觀而盡識。或輒逞己見。妄有訾議。或勦拾成說。以行新奇。多見其不知量也。少保大學士李賢嘗曰。今日士夫中能篤於學者。僅見薛大理一人。今觀其所著讀書二錄。皆身心體驗而有得者。及其教人。拳拳以復性爲事。是以卒能身以及其人。而一時之死生利害。略不能動也。淺者或疑其言之不華。蓋指相如。揚子雲勝於曾子之一唯邪。楊廉云。本朝正統。景泰間。以理學爲倡者。河東薛敬軒。觀其讀書錄。考國初以來諸公所著述。求其粹然一出於正。未有或之先者。瑄當罷內閣歸中。途絕糧。其高風介節類如此。

胡居仁字淑心。江西餘干人。幼穎異。端慤孩提時。言動卽不苟。比學於家塾。師殊目。年十七八。習舉子業。已而聞吳興弼。往從之。因有所悟。遂退而藏修於讀書窮理。深慨記誦詞章之非。而謂聖學之成。始成終在一敬。因以敬扁其齋。動靜語默。出入起居。常以敬作。故其自銘詩云。謹獨功深切。防微意最玄。爭交真在此。要不愧皇天。其主敬如此。學先於主忠信。而要於求放心。終日竟夕。孳孳不倦。由是存諸心而理諸身。明其體而達其用。故自言曰。惟己所從不差。然後可以及人。又曰。第一怕見得不真。第二怕工夫間斷。嘗著進學箴以自勵云。誠敬既立。本心自存。力行既久。全體皆仁。舉而措之。家齊國治。聖賢能事。此其畢矣。因歎學者好高入於禪。聘詞失於矜。不務操存省察爲何事。安能造道德之域。時陳憲章負大名。一時英流皆北面之。居仁深詆其學爲禪。嘗曰。儒者養得一箇道理。釋老只養得一箇精神。儒者養得一身之正氣。釋老養得一身之私氣。又曰。釋氏見道。只如漢武帝見李夫人。非真見也。又曰。禪家在空虛中見出一箇假物事。以爲識心見性。以爲不生不滅。其實未嘗識心。未嘗見性也。蓋居仁於斯理。一反求諸身心。以得之。嘗曰。惟王道能使萬物各得其所。又曰。一日克己復禮。天下歸仁。此王道之本。已而築室山中。曰禮吾曰南谷四方及門者。日與講貫。因著居業錄。蓋理有契於中。而無可告語。事有感於外。而無可施行者。皆筆之。而名以是名。取易修辭立其誠。所以居業之意。專以辨禪爲急。其言曰。與儒道相似。莫如禪學。後之學者。做存心工夫。不得其真。多流於禪。又曰。學一差。便入異教。其誤認聖賢之意甚多。又曰。釋氏是認精魂爲性。專一守此。以爲超脫輪迴。緣他當初只是去習靜坐。屏思慮久了。精神光彩。其中了無一物。

遂以爲真空言道理。只是這箇極妙玄。天地萬物。都是這箇做出來。得此則天地萬物雖壞。這物事不幻。身雖亡。此不亡。所以其妄愈甚。楊廉云。本朝正統景泰間。以理學爲倡者。河東薛敬軒有讀書錄。近年乃得敬齋居業錄。其言精確簡當。讀書錄之外。所見惟此耳。廉聞敬齋嚴毅清苦。力行可畏。其議論實由涵養體驗中來。非考索探討致。然張吉云。先生老於林泉。無以考其本末兼備之明驗。然於斯理體認親切。一反諸身心以得之。吾邑自曹無妄先生以後。僅見斯人而已。今讀居業一錄。其間經傳旨趣。學問工夫。政教基本性命淵微。皆悉焉。而於異端佛老。尤詳闢之。使末世不陷溺人心。變亂士習。先生教之澤不淺。居仁嘗示人曰。程朱發明道理。如此明白。開示爲學工夫。如此真切。今人又做差了。道之興喪。不係於天乎。羅整菴云。敬齋大類尹和靖。皆是一敬做成。又云。胡敬齋力攻禪學。但於禪學本末。似乎未嘗深究。動於想像二字。斷之。安能得其心服耶。蓋吾儒之有得者。固是實見。禪學之所得者。亦是實見。但所見者不同。是非得失。遂於此乎判爾。彼之所見。乃虛靈知覺之妙。亦自分明脫灑。未可以想像疑之。然其一見之餘。萬事皆畢。卷舒作用。無不自由。是以猖狂妄行。而終不可與入堯舜之道。愚所謂有見於心。無見於性。常爲不易之論。竊觀似之亂真。非精於禪者。誰敢辭而闢之。然而排似是之學於狂波之時。實自居仁始。

陳真晟傳

陳真晟。字德晦。又字剩夫。漳州鎮海衛人。氣清爽。性穎特古樸。年十七八。卽然不襲俗味。遂厭末作。蓋心而棄之。惡異端害道。拒之。致儒業。先是從進士唐泰業舉子。被薦就試。見有司遇士不以禮。督察嚴瑣。遂

歸蓋自是不復應舉。隱居力學。務踐履之實。初讀中庸。做存省工夫。未有得。繼續大學。始知爲學次第。覺有下手處。因讀大學。或問。知敬乃大學基本。及求其所以爲敬。見程子以主一釋敬。以無適釋主人。始於敬字見得親切。因推尋此心之動靜。而務主於一。靜而主於一。則靜有所養。而客念不復作。動而主於一。則動有所恃。而外誘不能奪。遂從敬字做工夫。而尤於慎獨用力最猛。常語人曰。大學誠意爲鐵門關。難過。主一二字。乃其玉鑰匙也。蓋意有善惡。而一以守之。則所謂惡者退聽矣。又曰。人於此學。若真知之。則行在其中矣。自號布衣。學者稱布衣先生。天順二年。循伊川故事。詣闕上程朱正學纂要。其書首探程氏學制。次探朱子論說補正學工夫。次作心學二圖。其一爲天地聖人之圖。大書一心字。以上一點規而大之中。虛曰太極。太極左曰靜。右曰動。推極於六十四卦。其一爲君子法天之圖。亦大書一心字。其上一點規而大之。視前差小。中虛曰敬。敬左曰靜。右曰動。以黑白象陰陽動靜。而分爲乾坤坎離。總爲之說曰。右圖二。一著天心動靜之本然。是性之原也。一著君子法天之當然。是性之復也。聖人亦天性之自然者也。君子豈可以不學乎。然復性之說。經傳詳矣。而未有如此後一圖義之要而盡者也。惟君子知之。又能主敬以體之。以盡其法天之功效也。而有序焉。蓋始則主敬。使一動一靜互爲其根。卽致知誠意之事。是始學之要也。固不外此圈。終則敬立而動靜相根。明通公溥。卽知至誠意之事。是爲聖功之成也。亦不外於此圈。而自始至終。則皆不離乎敬焉。如是則天下之功。至於前一大圈。同一渾然。粲然而無間矣。一敬之功用如是。豈不大哉。三代學校所以教者。惟此而已。此非記誦詞章之所能與也。自伏羲畫卦示精之後。

堯以是傳之舜。舜以是傳之禹。禹以是傳之湯。湯以是傳之文。武。周公。孔子。孔子傳之顏。曾。思。孟。及孟氏沒而遂失其傳者此也。寥寥千載。至周程張朱氏出。此學大明。及朱氏沒而復晦者。只因宋元學校。雖皆用程朱之書。而取士。又仍隋唐科舉。是以士視此心學爲無用。故多不求。又失其真傳焉。今幸聖明崇重聖學。學校採程朱之議而用之。則心學之傳。可以繼朱氏矣。夫象理甚明。不煩解剝者。但能體此學下之功。循循訓至。於以得其上達之妙。太極全體。則此圖在我。雖四書五經。無復遺理。蓋祇是吾所得於天之本心。而聖賢相傳者也。次乃嚴明師補正學。輔皇儲。隆教本。數事。以終上文圖說之意。書未奏。先疏乞召見。而陳其說。不報。及書奏。下禮部詳看。時侍郎鄒幹掌部事。不知其說云何。竟寢歸家。因讀提學憲臣頒行教條。有主敬窮理。修己治人。崇正學。迪正道。就尙孝弟忠信禮義等語。歎曰。此學校正教也。然學校雖崇正教。而科舉不定。正考雖有。正教不行也。因採勅諭中要語。參以程氏學制。呂氏鄉約。朱子貢舉私議。作正教正考會通。定考德爲六等。考文爲三等。各有案例而據而行。告諸當道。終不能行。又寢。已而聞吳與弼名。欲往質之。乃貨其家之直。得五金。攜其從子一人。以行。戒之曰。我死。卽瘞於道旁。題曰。閩南布衣陳某墓。足矣。入南昌。見張元禎。止之宿。因叩其學。大加稱許。曰。某敢僭謂斯道自朱程以來。惟先生得其真。吳許二子亦未是。如與弼者。不可見。亦不必見也。真晨聞之。若然。遂歸。尋卒。年六十有四。後十年。提學僉事周孟中。知府彭桓立石。題曰。大明闕下兩上書請補正學。泉南布衣陳先生墓。提學副使姚謨表章先哲。始舉入漳州鄉賢祠。布衣平日不喜文字。有雜藁若干卷。邑人林祺爲之編次。名存藁云。周瑛謂布

衣學有所得。行之皆無所遇。四顧徬徨。不能自釋。及見張元禎之許。乃歸。尋卒。陳獻章云。閩中陳剝夫者。不幸去年秋間死矣。其人雖未而嘗粗聞其學術。專一教人靜。此尋向上人也。可惜可惜。此學寥寥。世間無人整頓得起。士習日見頹靡。殊可憂也。康齋與布衣並起。一時薦之者不及布衣。人共惜之。



著者清傅維麟編纂

Author

書碼 626.01
Call No. 7567

書名 明書 一百七十一卷：八
Title

登錄號碼 007888
Accession No.

月日 Date	借閱者 Borrower's Name	月日 Date	借閱者 Borrower's Name
6/10	吳子白		
11/15	曹壽長		

國立中央圖書館

書碼 626.01
7567 登錄號碼 007888

國家圖書館



000007888

